

Нуридин ИСМОИЛОВ

Ю 32058
29,

**МИЛЛИАРДЕРГА
ҚҰЙИЛГАН ТУЗОҚ**

Нуриддин исмоилов

МИЛЛИАРДЕРГА ҚҮЙИЛГАН ТУЗОҚ

Саргузашт-детектив роман

Тошкент
«Янги аср авлоди»
2006 МАЖБУРИИ
НУСХА

84(54) 6-445 Бадийи авазы
Саргузашт - детектив
роман

Нуридин ИСМОИЛОВ. Миллиардерга қүйилған тузоқ: —Т.: «Янги аср авлоди», 2006. —192 б.

32058
10 291

ББК 67.404

ISBN 5-633-00261-X

16

Alisher Navoiy

nomidagi

Ozbekiston M

© Нуридин ИСМОИЛОВ.

«Миллиардерга қүйилған тузоқ».

© «Янги аср авлоди», 2006.

ҚАЛАМ ВА ҚАЛБ ҲАМНАФАСЛИГИ

Муҳтарам китобхон! Сиз танишиб улгурган “Бургут тоғда улғаяди” ва эътиборингизга ҳавола этилаётган “Миллиардерга қўйилган тузоқ” китоблари мазмун-мундарижка нуқтаи назаридан бир-бира-га яқин, ҳамоҳанг мавзулар бўлгани учун ҳам саргузашт-детектив жанрдаги асарлар сифатида эътиборга моликдир.

Адаб Нуриддин Исмоиловнинг бу янги саргузашт-детектив романидаги воқеа-ҳодисалар, қаҳрамонлар ва уларнинг тақдирни адабиёт муҳлисларини қизиқтиради, қайси замон ва маконда бўлаётганидан қатъи назар, умуммуштарак юялар, тушунчалар билан эзгулик ва ёвузлик ўртасидаги курашнинг моҳиятини очиб беради, ёш замондошларимизнинг маънавий дунёсини бойитишга, уларнинг ҳаётда ўз ўринларини топишларига хизмат қилади. Яхиси, романни ўқинг, унга ўзингиз баҳо беринг. Ёзуви учун ўз ўқувчисининг назари, баҳоси ҳар нарсадан ҳам қиммат турса керак.

Нормурод НАРЗУЛЛАЕВ,
Ўзбекистон Халқ шоири

Рустам машинаға мингандан кейин ортидан Анжела қараб қолди. Сүнг эри томонға ўғирилиб:

— Жуда хүшбичим, ҳатто чиройли йигит экан. Ҳайронман, шу пайтгача нега үйланмаган? Қизиқ томони, миллиардер. Наҳотки, шундай бой одамни аёллар ўз ҳолига қўйган бўлишса? — деди.

— Сенгаям ёқиб қолдими? — мийифида кулиб сўради Семён хотинидан.

— Дарров бемаъни хаёлларга борасан-да, жоним, — дея аразлаган бўлди Анжела.

— Мен бошқа хаёлдаман. Ўзинг менинг гапимни бошқа томонға бурдинг. Юр, уйга кирайлик, гаплашадиган гаплар чиқиб қолди.

Улар учта тансоқчи ҳамроҳлигида ортларига қайтишди. Семён дарвозадан ичкарига киргандаридан кейин ҳовлисини гир айлантириб экилган майсага қараб роҳатланди. Кўзи қувнади. Кейин қулочини кенг ёзиб:

— Оҳ, нақадар гўзал бу олам, бир қара, — дея қўшиқ айтди. Анжела тўхтаб ортига бурилди. Эрининг мамнунлигини кўриб, жилмайди.

— Сенга нима бўлди? — деб сўради шўх овозда.

— Омад ўз оёғи билан ҳузуримга келганига ўзимни қўярга жой тополмаяпман. Мен, — дея Семён кўрсаткич бармоғини тепага қилди, — шаҳардаги энг бой кишилардан биттасиман. Мана шу ҳовлини сотсан, камида икки миллион долларга кетади. Қара, мен бу уйни қандай гўзал қилиб қурганман! Йўлагимиздаги манави тошлардан тортиб, уйнинг шиферигача чет элдан келтирилган. Фонтанни бир маротаба менинг кўзим билан кўрсанг-чи, етти хилда тов-

ланади-я! Энди мен Россиядаги энг бадавлат одамга айланаман. Күрасан, хотин!

Семён сал нарироқда ўзига ҳамон табассум билан боқиб турган Анжеланинг ёнига югуриб борди ва хотинини қучоқлаб олди-да:

— Ҳамма бойликларимни тарозининг битта палласига, сени иккинчи палласига қўйсам, барибир сен босиб кетасан. Ҳеч кимда сендайин гўзал, латофатли хотин йў-ў-қ! — дея бақирганча кўтарди-да, чирпирак қилиб айлантира бошлади.

— Ҳой, жиннивой! — дея эрига қичқирди Анжела қиқирилаганча. — Йиқитиб юборасан!

— Йўқ, мен сени ҳеч қачон йиқитмайман! Сен менинг гавҳаримсан! — дея бақирди Семён.

У икки-уч дақиқа хотинини худди шундай айлантириб турди ва шундан кейин ерга қўиди.

— Сашка! — дея бақирди Семён, — пиво олиб кел, шу ерда, манави майса устида, хотиним иккаламиз думалашиб пивохўрлик қиласми.

Хизматкорлардан бири юрганча пиво кўтариб келди. Хорижда ишлаб чиқарилган ниҳоятда тиниқ пиво шишиасини Семён қўлига олиб разм солиб қарди. Сўнг мийифида кулди-да, бир кўтаришда ичидаги суюқликни сипқориб юборди.

— Семён, — дея эрининг бўйнидан қучоқлади Анжела, — сенга нима бўляяпти?

— Ҳеч нарса, — деди Анжеланинг юзидан ўпиди кўйган Семён, — хурсандлигимдан бир яйрагим келди-да.

— Юр, уйга кирамиз.

Уй ёнига борганларида эшикнинг ўзи автоматик тарзда очилли. Эр-хотин бир-бирини қучиб ичкарига киришди ҳамда юмшоқ итальян мебелига ўтиришди.

— Биласанми? — дея гап бошлади Семён жилдий тортиб, — миямга антиқа фикр келди.

— Қанақа фикр экан? — дея эрига термилди Анжела.

— Рустамни шунчаки қўлдан чиқариб юборишимиз инсофдан эмас, йўлини қилиб олиб қолишимииз керак. Аниқроғи, унинг пулларини. Йўқ жойдан миллиардер бўп қолсам, нимаси ёмон экан? Қанчадан бери шунинг орзусидаман-ку. Иккита заводим, бешта рестораним бўлгани билан шунча пулни йиғолмаяпман-ку.

— Қандай қилиб унинг пулига эга чиқмоқчисан?

— Бунинг йўли жудаям осон. Биронта дугонангни ёки яқин қариндошингни топасан. У уйланади. Маълум муддат улар бирга яшашади. Ундан кейин ўзўзидан Рустам ҳамма билан умрбод хайрлашиб, нариги дунёга равона бўлади. Карабсанки...

— Унинг қариндош-уруғи-чи, улар шунча бойликни икки қўллаб бериб, оғизларини очиб қолаверишадими? — деди Анжела.

— Нью-Йоркда унинг уйига киргандим. На отонаси бор, на-да қариндош-уруғи, ўшандаёқ бу фикр миямга келганди. Шунинг учун ҳам уни Москвага келишга унгадим. Ресторан, тунги бар қуриш баҳонасида, албатта.

— Ўйинг чаккимас, лекин битта хом жойи бор.

— Қанақасига?

— Дугонам ёки қариндошимга осмондан шунча мол-давлат тушиб қолса, уларни қандай қилиб сенга беради? Улар ошқовоқ бўлсаям, битта каллани кўтариб юришибди.

— Ҳа-а, — деди бошини қашиб Семён, — бу ёғини ўйламаган эканман. Унда менинг синглимга уйлантирсак-чи?

— Фақат қора танли йигитлар билан кўнгил хушлашни ёқтирадиган Маргаритами? Кўй, ундан бегона минг марта афзал.

Ҳафсаласи пир бўлган Семённинг бироз асаби бузилди. Бироқ буни хотинига билдирамаслик мақсадида улкан телевизорни ёқди. Зангори экранда бирбирини обдон ялаб-юлқаб, севги “рақс”и билан машғул бўлаётган ёшгина қиз билан йигит тасвири

кўринди. Семён илгарилари бунақа фильмларни жонжон деб кўрарди. Эрталабгача томоша қилиб чиқкан пайтлари бўлган. Аммо ҳозир кўзи телевизорда бўлгани билан хаёли бошқа томонда эди. Анжела бўлса, фильмга берилиб кетди. Бутун диққатини кино тортиб олганидан эри билан бўлган суҳбат ёдидан ҳам кўтарилаётганди. Баъзан кинодаги йигитнинг қилиқларига ютиниб кўярди. Зеро, эри анчадан бери бундай ишларни у билан бирга қилмаган, Анжеланинг эса соғинчи бўғзига келганди.

— Бор-йўғи битта йўли бор экан, — деб қолди бир маҳал Семён телевизордан кўзини узмаган ҳолда.

— Ниманинг? — деди Анжела ҳеч нарсага тушунмай. Айни дамда эрига норози нигоҳ ташлаб кўйди.

— Рустамни қўлга олишнинг... Унга сен турмушга чиқасан!

— Ним-ма? Кимга мен турмушга чиқаман? — дея кўзининг ола-куласи чиқиб эрига қаради Анжела.

— Эшифтмадингми? Рустамга эрга тегасан!

— Ўйлаб гапирайapsанми? Мен сенинг хотинингман-ку, қандай қилиб бошқа бировга турмушга чиқаман? Иккаламизнинг муҳаббатимиз-чи? — деди Анжела энди кўzlари косасидан чиққудек бўлиб. Аслида, эрининг бу таклифи унга ёқиб тушган эди. Шу боис, бир лаҳза унинг кўз ўнгидан Рустамнинг чиройли табассуми, майин сўзлашлари, сочининг силлиқ тараалгани ўтди.

— Ниҳоятда қисқа вақтга, жа узоқ бўлса, олти ой унга хотинлик қиласан. Бу билан бир жойинг камайиб қолмайди. Менга пул керак, Анжела, жуда-акўп пул!

— Хўп, сен айтганча мен кўндим ҳам дейлик. У рози бўлмаса-чи? — деди Анжела эрига ёвқараш қилиб.

— Сенинг ҳусну латофатинг олдида у жонини беришгаям тайёр бўлади. Сен томондан озгина истак бўлса тамом.

Анжела эрига жавоб қилмади. У ҳозир Рустам

ҳақида ўйлаётган эди. Хотининг жим бўлиб қолгани Семёnnинг жаҳдини чиқарди. Зарда билан телевизорни ўчирди. Эрини беш қўлидай яхши биладиган Анжела бирдан сергак тортди.

— Хўш, нима дейсан? — деди Семён хотинига ўткир нигоҳини тикиб.

— Ўйлаб олишим учун вақт берарсан? Ҳар қалай. мен ҳам одамман, бирорта иш қилишимдан, айниқса, бирорга турмушга чиқишдан аввал ўйлаб кўришим керак-ку. Бирорнинг никоҳида бўлиб туриб, қандай қилиб яна бошқасига эрга тегаман? — деди Анжела ўзини хафа бўлган кўрсатиб.

— Гапингда жон бор. Лекин ўйлашга фурсат йўқ. Сенга бунақангги таклифни айтишим менга осон бўлди, деб ўйлайсанми? Хуллас, бугун кечга мен Рустамни биронта ресторанга овқатланишга таклиф қиласман. Шунда сен билан муросамиз келишмаётгандигини, яқин кунларда ажрашишимиз эҳтимоли борлигини айтаман. Табиийки, у бизни яраштириб қўйиниша ҳаракат қиласди. Ва сен билан гаплашмоқчи бўлади. Худди шу пайт сен отишгни қамчилайсан. Келиндикими? — деб Семён хотинига савол назари билан қаради.

Анжела “хўп” дегандек бошини қимирлатди ва ўрнидан туриб маҳзун қиёфада бир-бир қадам босиб, иккинчи қаватга кўтарилиди ҳамда ётоқхонага кирди. У ўзини хўрланган ҳис қilmadi. Балки, тошойна олдига бориб, чиройини томоша қилди. Сўнг хурсандлигидан чуқур нафас олди.

* * *

Рустам Семёnnинг уйидан чиққанидан кейин аввалдан буюртма бериб қўйилган меҳмонхонага келди. У хафа эди. Шу боис ўзига еб қўйгудек бўлиб тикилган меҳмонхона ходималарининг ўзгача тавозе билан берган саломларига эътибор ҳам қilmadi. Бoshqa пайт бўлганда, албатта, илтифот кўрсатган, қизларга уларнинг гўзаллиги ҳақиша айтган бўларли.

Ўзига ажратилган хонага чиққанидан сўнг ечин-

масдан ҳам каравотга чўзилди. Уни ҳамон Анжела-шинг: “Исмингиз осиёликларни кига ўхшаркан, асли қаерликсиз? Миллатингиз нима?” — деб берган саволлари қийнарди. Ахир унинг ўзи ҳам шу пайтгача ота-онаси кимлигини, ким унга бунақа исм қўйганини, қлерда туғилғанлигини билмайди. Ҳаёлида бори — ҳамма ёги чакалакзор билан ўралган ўтлоқ. Қоратоб болаларнинг мол боқиши. Ўзининг ҳам шу болакайларга қўшилиб тўртта қўйининг орқасидан югуриб юргани... Кейин қаерданdir иккита кишининг пайдо бўлгани ва унга конфет беришгани. Тамом, туғилган жойи ҳақида бошқа нарса эслай олмайди. Кейинги воқеалар унинг худди тушида кечгандай эди. Рустамга конфет берган одамлар уни сайд қилдирариз, деб алдаб, машинага миндиришиб, узоқларга олиб кетиб қолиши. Сўнг ўша одамлар билан бирга самолётда учди. Рустам қўрқди. Қўзини чирт юмиб олди. Самолёт қаергадир қўнди. Рустам ҳалиги одамлар ҳамроҳлигига баланд-баланд иморатлар орасидан машинада ўтди. Кейин худди ўшандай иморатларнинг бири ёнида машинадан тушиши. Уни биринчи қаватнинг пастига етаклашди (ўша пайтда у ертўла нима эканлигини билмасди. Қишлоқнинг тўрт ёшли боласи қаёқдан ҳам билсин). Ҳалиги иккита одам Рустамнинг устидан қамаб, ўзлари қаёққалир чиқиб кетиши. Шу бўйи Рустам кечгача ўтириди. Қорни очди. Йиғлади. Аммо ҳеч ким эшикни очмади. Бир пайт у нур тушиб турган туйнукни кўриб қолди. Бориб қараса, туйнук хийла каттагина экан. Етти-саккиз ёшли болалар сифмайди-ю, бироқ Рустам бемалол сифаркан. У шу туйнук орқали ташқарига чиқиб кетли. Аввал қаёқка боришни билмай туриб қолди. Сўнг очлик хуруж қила-вергач, боши оққан томонга кетаверди. Талай муддат юрди. Қўчада у ёқдан-бу ёққа шошиб кетаётган одамлар унга мутлақо эътибор беришмасди. Охири у чидамади. Қандайдир иморатнинг ёнига ўтириди-да, йиғлай бошлади. Бироздан кейин унинг тепасига

қари бир чол келди. Алланималар деди. Аммо Рустам ҳеч вақо тушунмади. Баттар йигига зўр берди. Шундан сўнг ҳалиги чол унинг қулидан етаклади ва уйига олиб борди. Аввал чўмилтириди, кейин овқат берди. Рустамнинг нафси қонгач, яна ўзининг тилида бир нималар деди. Ҳеч вақони тушунмаётган Рустам бўлса унга нуқул: “Уйимга кетаман. Мени уйимга олиб боринг”, — дерди. Чол ҳам унинг нима деяётганини англамасди.

Шу куни Рустам унинг уйидаги қолди. Эртасига чол Рустамни нонушта қилдирди-да, ўзи қаёққадир кетди. Шу бўйи пешиндан кейин келди. Ўзи овқат қилди, уйларни тозалади. Рустам чолнинг у ёғидан ўтиб-бу ёғидан ўтиб, унга ёрдам берган бўлди. Чол муштадеккина боланинг ҳаракатини кўриб қулиб қўяр эди.

Орадан ой, йил ўтди. Рустам ўзининг тилини унута бориб, чол гаплашадиган туркчани ўрганиб олди. Кейин маълум бўлишича, чолнинг исми Олқар экан. Ёши етмишдан ошиб кетган, хотиниям, бола-чақасиям йўқ. Сўққабош экан. “Ёлғизлик мени роса қийнаган эди, яхшиям баҳтимга сени топиб олдим. Бўлмаса кўп қийналган бўлардим”, — дерди чол гоҳида унинг бошини силаб. Улар Туркияда узоқ яшамадилар, чол уйини сотди. Кейин Америкага кўчиб кетишиди. Орадан тўрт йил ўтиб, чол қазо қилди. Шундан сўнг Рустам ёлғиз ўзи қолиб кетди. Ижарага олган уйлари Нью-Йоркнинг камбағаллар яшайдиган туманида эди. Бу уй ҳам чол ўлганидан кейин эгалари томонидан тортиб олинди. Рустам энди бутунлай бошпанасиз қолганди. Бу пайтла Рустам Френк исмли қора танли бола билан дўстлашганди. У ҳам камбағал оиласининг фарзанди эди. Гарчи камбағал бўлишса-да, оила бошлиқлари Рустамнинг кўкрагидан итаришмади, уйларига қабул қилишиди. Ўзларининг ўғилларига нима беришса, қип-қизил етим болакайга ҳам шуни беришиди. Кучлари етгунча ҳисоб-китобдан дарс беришиди, зоро мактабда ўқитиш учун уларда пул йўқ эди.

Албатта, бу яхшиликларнинг бари етим бола фарзандларининг ўртоғи бўлгани учунгина қилинмади. Эҳтимол, кўзлари порлаб турадиган бу болакайни ёқтириб қолганликлари ҳам бунга сабаб бўлгандир. Айни пайтда улар Рустамда ўзлари учун ажабтовур туйилган қизиқ феъл-автор, кўникуларни ҳам кўришди. Чунончи, Рустам эрталаб уйғонганидан кейин Френкка ўхшаб ётган жойида бирон нима тановул қилас, аввал албатта юзини ювар ва ана шундан кейингина салом берарди. Тамадди пайтида эса болакай фақат катталардан кейин таомга қўл узатар эди. Бирорта айб иш қилиб қўйганида эса, Френкнинг отасининг кўзларига тик қаролмас, бошини эгиб турарди. Ҳолбуки, Френк ундан фарқли ўлароқ, бунақа пайтлари отасига ўзининг ҳақлигини исботлашга уринар, шу йўл билан жазосиз қолишига ҳаракат қиласарди. Ҳамма нарсага қизиқувчан оила бошлиғи Рустамнинг феъл-авторидаги бунақангичишиларни унинг гўдакликдан шунақа тарбия олганлигига йўйди.

Аввал Рустам бу уйда фарзанд қатори яшаб юришдан ийманмас эди. Бироқ йиллар ўтгани сайин шундоғам кунини базёр ўтказадиган оилага қўшимча юк бўлгиси келмаганидан бу оилани тарқ этди. Кўп узоқ кетмади. Бойваччалар туманига борди. Ёш бўлишига қарамай, пулдорларнинг нимаики иши бўлса, барини бажарди. Ҳаттоқи ҳожатхоналарини тозалашдан ор қиласади. Олган чойчақаларини авайлаб-асради. Имкон қадар камхарж бўлишга уринди. Оқибатда беш юз долларга яқин сармоя тўплади. Бу пайтда ёши ўн бешга яқинлашиб қолганди. Шундан кейин у ишига бироз ўзгартириш кирилди. Бой оиласлар билан гаплашиб, уларнинг кундалик озиқ-овқатларини ўзининг цулига олиб келиб берадиган бўлди. Маҳсулотни қўлига олгандан кейингина уй эгалари у билан ҳисоб-китоб қилишарди. Бунлай усул Рустамнинг сармоясини кундан-кунга ошириб борарли. Ва кўча-кўйда яшаб юришни бас қилиб,

ижарага уй олди. Кунлар ўтиши билан топаётган пуллари унга камлик қилаётгандай түйилиб қолди. Шунда у кичкинагина газета дўкончасини очди. Ва газета сотишни йўлга қўиди. Ҳам хонадонларга мол ташибга, ҳам газета сотишга бироз қийналиб қолгани учун қора танли дўстини олиб келиб дўкончасига ўтқазиб қўиди. Шундан кейин омад эшиги унга ланг очилди. Реклама билан шуғулланди. Камбағаллар тумани билан бойларникининг ўртасидаги бензин қувиш шахобчасини сотиб олди. Кейинги ишлари хамирдан қил суғургандай осон бўлиб кетаверди. Орадан саккиз йил ўтганидан кейин у биринчи миллионга эга бўлди. Шундан сўнг дўконларининг сонини янада кўпайтирди. Турли-туман компанияларнинг акцияларини сотиб олди ҳамда бир кунлик даромадини юз мингга етказди. Кунларнинг бирида “синиб куни битган” компанияни сув текинга қўлга киритди. Бу унинг ҳақиқий бой бўлиб кетишига катта туртки бўлди. Ва у миллиардерга айланди...

Рустам ҳар гал ўтмишини хотирлаганда кўпроқ пулни “қоплаб” топган онлари эмас, балки ёшлигидаги сарсон-саргардон, оч-наҳор юрганлари ёдига тушади. Ичидан зил кетади.

Шундай ўйлар гирдобидаги Рустам кўп ўтмай ухлаб қолди. Тушига оппоқ рўмол ўраган, пешонаси тиришган аёл кирди. У нуқул жилмайиб турарди. Тушидаёқ: “Ким экан бу аёл?” — деб кўп ўйлади. Бироқ барибир кимлигини билолмади. Илгари ҳам бир неча бор тушида бу аёлни кўрган эди. Аммо ҳар гал аёл бир оғиз ҳам сўз айтмас, жилмайишдан нарига ўтмасди.

Тинимсиз жиринглаётган телефон уни уйғотиб юборди. Рустам уйқусираган қўйи гўшакни кўтарди.

— Ухлаб қолдингми, нима бало? — деган овоз келди гўшакдан. Бу Семён эди.

— Ҳа, бироз ухлабман, чарчаганман, шекилли, — дея жавоб қилиди Рустам.

— Сен билан оқшом бирга овқатланиш ниятим

борлигини айтиб қўймоқчи эдим. Кечкурунга ҳеч нарсани мўлжаллаганинг йўқми? Ҳар қалай, рус аёллари анчайин мафтункор бўлишади. Ажабмаски, меҳмонхонада биронтасини кўз остига олиб қўйган бўлсанг, — деди кулиб Семён.

— Нималар деяпсан? Самолётда ўлардай чарчаганга ўхшайман.

— “Горка” ресторанида кутаман. Умуман... Тўғриси, сен билан гаплашиб ўтиргим келди. Ҳасратлашиб...

Рустамнинг ташқарига чиққиси йўқ эди. Шовқиндан безор бўлганди. Қолаверса, эртага бир талай ишлари бор эди. Шундай бўлса-да, Нью-Йоркда ортирган дўстини хафа қилгиси келмади. Ва унга: “Бораман”, дея ваъда бериб юборди.

Бироз вақт ўтгандан кейин яна телефон “шовқинсурон” кўтариб қолди. Рустам эринибгина гўшакни қулогига тутди.

— Безовта қилмадимми? — деган аёл кишининг овози келди гўшакдан. Рустамнинг юзига табассум югорди:

— Сиздай соҳибжамол маликанинг истаган пайтда безовта қилишга ҳаққи бор, — деди у. — Ҳозиргина Семён қўнғироқ қилган эди. У ҳақиқатан ҳам безовта қилганди.

— Ҳа-а, дарров дардини достон қилгиси келиб қолибди-да, — деди Анжела киноя билан.

— Тинчликми, нима бўлди? — дея сўради Рустам ҳайрон бўлиб.

— Унинг сиз билан дўстлигидан хабарим йўқ-куя, лекин мен у билан яқин кунларда ажрашсам керак.

— Боягина апоқ-чапоқ эдинглар-ку, дарров ораларингдан ола мушук ўтиб қолдими? — деди шунчаки оиласвий жанжал бўлса керак, деб ўйлаган Рустам.

— Сизга шундай кўринган бўлса керак, аслида... Майли, қўйинг бу гапларни. Меҳмонхонага яхши жойлашиб олдингизми?

— Раҳмат.

— Шуни сиздан сўрамоқчи эдим, холос. Кейинроқ гаплашармиз, — деда Анжела гўшакни қўйди.

Рустам эса гўшак қўлида, ўйланиб қолди. Кўз ўнгидан Семён билан Анжеланинг бир-бирига қараб жилмайиб бокишлари ўтди. “Йўқ, — деди ўзига-ўзи у, — бу ерда бошқа сир борга ўхшайди. Бирданига бунаقا бўлиши мумкин эмас. Қолаверса, Анжеланинг бирдан, ҳали яхшилаб танишиб олмасимиздан бурун бундай дейиши сал ғалатироқ туйилаяпти”.

* * *

— Анжелка, — деди хотинини қучиб Семён, — сен, аслида, актриса бўлишинг керак эди. Бопладинг. Энди бу ёғини ҳам қотириб ташлайсан.

Анжела эрига норози қиёфада қаради.

— Ўзимнинг суюкли эрим тўғрисида ҳар хил бўлмагур гапларни айтиш менга осон деб ўйлайсанми?

— Бу гапларни қўй, сен иш тўғрисида ўйла, — деди Семён Анжеланинг кўнглини кўтарган киши бўлиб.

“Майли, ҳозирча шунаقا деб тур. Сени биламан, агар керак бўлиб қолса, мендан ҳам воз кечиб юборишинг мумкин. Рустамни қўлга олганимдан кейин ўзим биламан нима қилишни”, — деда хаёлидан ўтказди Анжела ва бир-бир қалам ташлаб ташқарига чиқди.

Семённинг ёшлиги жуда аянчли ўтган эди. Отаси — пиёниста, онаси эса кўча аёли. Семён Рустамдан фарқли ўлароқ, кўча болаларига қўшилиб кетди. Майда безорилик билан шуғулланди. Бунинг оқибатида бир неча марта қисқа-қисқа муддатларга қамалиб чиқди. Қамоқда олган “тарбия”си унинг ҳақиқий каллакесар, ўғри бўлиб етишишига мактаб вазифасини ўтаб берди. У уйига ҳар доим ярим кеча кириб келарди. Унгача эса биронта бузғунчиликка қўл урган, қайсиdir шўринг қурғурнинг бурнини қонатган бўларди. Вақт ўтган сайн у аста-секин атрофига ўзига ўхшаган болаларни тўплай бошлади ва кўп

ўтмай яхшигина жиной гурух тузиб олди. Энди у майда-чуйда ўғирлик, йўлтўсарликни бас қилиб, дўконлардаги сотувчиларга зуғум қилишга ўтди. Кўп ўтмай, унинг номи катта-катта тўдабошиларнинг қулоқларига ҳам етиб борди.

— Ҳов, жиприқи. — деди унинг ёнига бир куни юзида тиртиғи бор, найнов, йигирма беш ёшлардаги барзанги келиб, — шаҳар учга бўлинган, бизга тўртинчи емхўрнинг кераги йўқ. Сенга бир кун муҳлат, итваччаларингни йиғиштириб, бу ердан Қорангни ў chir!

Бу амрга Семён бўйсунмади. Тиртиқнинг кўзига бақрайиб турди-да, “миқ” этмай-нетмай унинг Қорнига пичноқ тиқиб олди.

— Мен! — деди у пичноқни ирғитиб юбориб, кўлини қоқар экан, қаддини ғоз тутиб, — истаган жойимда нафас оламан!

Унинг қилған ишидан, гапидан куч олган атрофидаги “ўлаксахўр”лари мурдага ташланишиб, уни бўлакларга бўлишди-да, ахлатта ташлаб келишди. Семён бу ишдан кейин нималар содир бўлишини олдиндан биларди. Шунинг учун ҳам атайлабдан шунақа қилди. У тўдалардан бирининг “белини синдириб”, унинг ўрнига ўзи ўтиришни мўлжал қилганди. Зоро, у тўплаган куч-қудрат бошқаларнидан кам эмасди. Доим кимдантир пусиб, қимтениб юриш унинг жонига теккан, бошқаларнинг у билан ҳисоблашиш вақти етганди.

Кутилганидек, ўша куннинг ўзидаёқ Семённинг йигитлари хабар топиб келишди: Филайнинг “Бомба” номи билан жиноят оламида машҳур хўжайини эртага чошгоҳда унинг шохини қайириб қўймоқчи эмиш. Семён хабарни эшитгандан кейин ёйилиб кулади. “Кўрамиз, — дея хаёлидан ўтказди у, — ким кимнинг шохини қайирар экан?”

Семён эртани кутиб ўтирмади. Ўша куннинг ўзидаёқ ҳаракатга тушди. Аввал йигитларини разведкага жўнатди. Улар зумда “Бомба”нинг қаердалигини

аниқлаб келишди. Шундан сўнг у ҳеч иккиланиб ўтирмай йигитларини тўплади-да, ўша ёқса жўнали. Рақиби бунаقا бўлишини кутмаган экан. Тўсатдан тапир-тупур отишма бошланиб қолганидан довдирраб қолди. Ўзига келгунча эса Семённинг қўлига тушиб улгурди. “Бомба” деганлари Семён кутганидан ҳам анча иродали чиқиб қолди. У голибга бошини эгмади. Фўдайиб Семённи онасидан олиб сўклиди. Унинг бундай қўполлиги ўзининг бошига етди. Семён бундай қилмоқчи эмасди. Агар у Семённи “авторитет” сифатида тан олганида қўйиб юбормоқчи эди.

Шу воқеадан кейин шаҳарнинг қолган иккита хўжайини у билан сулҳ тузишли. Бу пайтта келиб мамлакатда парокандалик бошланган эди. Тезда янги янги гурухлар, бойваччалар бўй чўзиб қолаётганди. Уларнинг ҳаммаси билан тортишишга янги “авторитет”нинг кучи етмасди. Шу боис ўзини тадбиркорликка урди. Бироқ у кутилмаганда қаттиқ касалланиб қолди. Олти ойга яқин тўшакдан қимирламай ётишга тўғри келди. Бу вақт ичидаги унинг кўпгина йигитлари бошқа гурухларга ўтиб кетди. Атрофида ўзига ишончли олтитагина одами қолди, холос. У согайиб чиққач, аввалги обрўсини тикламоқчи бўлиб кўп уринди. Бироқ фишт қолипдан кўчган экан. Шундай бўлса-да, аввалги шаҳардаги иккита заводга эга чиқишига мұяссар бўлди. Ресторанлар қурди. Кейин Анжелага уйланди.

Семён Нью-Йоркга борганида иттифоқо Рустамга дуч келиб қолди. Гаплари бир жойдан чиққач, ҳамкорликда ишлашни таклиф қилди. Оғиз кўпиртириб Москвада айни бизнес қилиш вақти келганлигини тушунтируди. Узоқ мулоҳазалардан сўнг Рустам рози бўлди. Зеро, ўзи ҳам “қулоч”ини кенгроқ ёзиш вақти келганлигини ўйлаб юрар эди.

* * *

Айтилган вақтдан ярим соат аввал Семён ресторанга етиб келди. Икки шиша пиво ичди. “Қилаёт-

ган ишм анчайин хатарли, — деда ўйлади у. — Мен бирваракайига ҳам хотинимдан, ҳам Рустамдан айрилиб, икки құлимни бурнимга тиқиб қолишим ҳеч гап эмас... Агар Рустам Анжелага уйланса, иккилан-масдан уни гүмдөн қиласан. Кейин Анжелани құлимда ўйнатаман. Албатта, менга бирордан қолган “матох”нинг кераги йўқ. Мақсадимга етганимдан сўнг ундан ҳам воз кечиб қўя қоламан. Ҳали мактабни ҳам тутатмаганига уйланиб, мазза қилиб яшайман”. Семён ширин энтикиб қўйди. Худди шу пайт йигитлари Рустам келганлигидан хабар бериши. У эринибгина ўрнидан турди-да, меҳмонга пешвоз чиқиш учун ресторон эшиги томонга юрди.

— О-о-о, — деди Семён Рустамни кўргач қучогини очиб, — кўришмаганимизга ярим кун ҳам бўлмади-ю, менга йиллар ўтиб кетгандай бўлди.

— Ҳақиқий дўстлар ҳар дақиқада бир-бирини соғиниб қолишиади, — деди Рустам ҳам кулиб ва ўзидан бирмунча пакана Семённи эгилиб қучогига олди.

Улар дастурхон атрофига ўтирганларидан кейин:

— Нега тансоқчиларинг билан келдинг? Улар Россияда дам олишади. Бундан бу ёғига меникилар сенга хизмат кўрсатишади, дегандим-ку, — деди дўстидан ўзини бироз ранжиган кўрсатиб Семён.

— Ўрганиб қолганман буларга, — деди Рустам. Сўнг Семённинг қулоги томонга бироз эгилиб пицирлади: — Булар менга худди хотиндай бўлиб қолган.

Шу ондаёқ иккаласи ҳам қаҳ-қаҳ отиб кулиб юбориши. Кейин Семён қадаҳларга тўлдириб ароқ қўйди.

— Биласанми, мен бу қадаҳни ишимизнинг омади чопиши учун ичмоқчиман, — леди.

— Албатта, — деда Рустам ҳам қадаҳни қўлига олиб Семённики билан уриштиргандан сўнг худди дўсти каби бир кўтаришда сипқармоқчи бўлди. Аммо удалай олмади. Афти бужмайиб кетган Рустам қадаҳдан бор-йўғи бир қултумгина ичолди, холос.

— Русларнинг ароғи ана шундай ўткир бўлади. Ҳечқиси йўқ, ҳали ўрганиб кетасан, — деди Семён Рустамнинг аҳволини кўриб.

Шундан кейин улар иш тўғрисида бироз гаплашиб туришган бўлишди. Кўпроқ Семён гапирди. Рустам унинг гапларини маъқуллаб, бош қимирлатиб турди, маъқул келмаганларига эса ортиқ қулоқ солмади ҳам. Кейин гап мавзуси оила томонга бурилди-ю, Семён бирдан хотинидан нолий кетди.

— Ишонасанми? Анжела учун ҳамма нарсани муҳайё қилиб қўйганман. Ўзига бир эмас, иккита “Мерс” олиб берганман. Шуям кам! Қачон қарасанг, минғирлагани-минғирлаган. Мен аёлларни яхши кўрармишман. Ўзинг ўйла, қайси эркак аёл зотини ёмон кўради? Ҳаммаям ҳар-ҳар замонда шўхлик қилгиси келади-да, шунга энди дунёни бузиб favfo кўтариш керакми? Хуллас, у билан ажрашмоқчиман. Бошқа йўли йўқ ундан қутулишнинг, — деди Семён афсусланиб бошини чайқар экан.

— Яхши-ку, — деди унга эътиroz билдириб Рустам, — аёл бўлганидан кейин эрини қизғанади-да, эrim бойвачча деб тўғри келганга сени бериб кетаверсинми? Агар Анжела эркакларни хуш кўрганида, ўзинг нима қилган бўлардинг? Чидаб туролармидинг?

— Рустам, дўстим, биз эркаклармиз. қўлимиз узун. Ана, арабларнинг тўрттагача хотини бор. Бизда бор-йўғи биттагина. Шунга битта-яримта “дугона” ортирасак осмон узилиб тушибдими? — деди Семён ўзининг гапини маъқуллаб.

— Мен барibir сенинг гапингта қўшилмайман. Хотининг фариштадай аёл. Агар унинг жавобини берсанг, унга ўхшаганини бошқа тополмайсан.

— Гапингга қўшиламан. Лекин... Хуллас, чарчадим. Топганим, балки, Анжела бўлолмас, аммо аниқ биламанки, миямни бунчалик эговламайди.

— Хотининг билан мен гаплашиб қўришимга рухсат берасанми? — деди Рустам суҳбатдошининг кўзига

қараб туриб. Унинг бу гапи Семённинг айни кўнглидаги эди. Ахир бекорга шунча гапни Рустамга айтмали-ку. Шундай бўлса-да, у сир бой бермасликка ҳаракат қилиб:

— Гаплашсанг-гаплашмасанг мен қатъий қарорга келиб қўйдим. Қароримни ўзгартириш ниятим йўқ, — деди.

— Сен қароринг ҳақида гапирма. Дунёда нималар ўзгариб кетмаяпти дейсан. Сенинг қароринг уларнинг олдида икки пул. Эртагаёқ Анжела билан гаплашаман.

— Майли, ўзинг биласан. Ке, қўй, шу гапларни, мен ўзимни жуда нокулай сезаяпман. Ҳудди аёллардай фийбат қилаётганга ўхшаб қолдим. Қани, яна битта-битта отайлик.

Рустамнинг бироз кайфи ошганлиги сабабли кейинги ичилган ароқнинг ўткирлиги сезилмади. Улар яна лича ўтирганларидан кейин ўринларидан туришди. Семён қанча ҳаракат қилмасин, Рустам унинг одамларини қўшимча тансоқчиликка олмади.

У дўсти билан хайрлашганидан кейин кўл телефоны жиринглаб қолди. Рустам: “Семён биронта гапни эсидан чиқариб қўйган, щекилли”, деган ўйда телефонини ёқиб қулоғига тутди.

— Рустамчик, — деган овоз келди ундан.

— Ким бу? — деди Рустам ўзига кўнғироқ қилган қизнинг дарровдан кимлигини билолмай. Ҳўжайнинг бундай савол ёберганини эшиштан тансоқчилар безовталаниб Рустамга қарашибди. Рустам уларга “Ҳаммаси жойида”, дегандек қўлинни кўтариб қўйди.

— Наҳотки мени дарров эсингиздан чиқариб қўйган бўлсангиз? — деди овоз эгаси.

— О-о, Анжела, — деди Рустам юзига табассум ютуриб, — яқинда давлатингиз менинидан ҳам ўтиб кетар экан. Танимабман, ўлай агар.

— Сиз эркаклар доим шунақасиз. Дарров эсингиздан чиқариб қўясиз, — дея эркаланган овоз келди гўшакдан.

— Бир қошиқ қонимдан кечинг. Мен албатта, айбимни ювишга ҳаракат қиласан. Айтинг, қилган айбимни нима билан ювсам бўлади?

— Мен билан кўришасиз!

— Унда мен тайёрман. Қачон ёнингизга қушдай учиб борай?

— Ҳозироқ, — дея ўзх кулди Анжела.

— Ҳозир, — дея довдираб қолди Рустам.

— Қўрқиб кетдингизми?

— Йўқ, Семён билан кўришганимизга атиги...

— Агар унинг номини яна бир марта тилга олсангиз, мен сиз билан гаплашмай қўяман, — дея бирдан Рустамнинг гапини бўлди Анжела.

— Майли, мен розиман. Ҳозироқ бораверайми?

— Ҳазиллашдим. Яхиси, эртага кўришайлик. Бамайлихотир ўтирамиз. Нима дедингиз?

— Жуда соз. Мен ўзим сиз билан эртага кўришишни мўлжаллаб тургандим. Эртага пешинда мен сиз айтган ерга бораман.

— Яхши, унда ўзим сизга қўнгироқ қиласан, — деб Анжела гўшакни қўйди.

“Ўзи нималар бўлаяпти? — дея ўйлади Рустам. — Анжела менинг телефон рақамимни қаердан олибди? Яна қўнгироқ қилган вақтини қаранг. Эри билан хайрлашиб улгурмасимдан... Нега энди олдинроқ қўнгироқ қилмади? Бу ерда бир сир борга ўхшайди”.

Рустам туни билан ухлаёлмай чиқди. Энди уйқуга кетиши билан тушига қандайдир маҳлуқлар кириб, унга ҳужум қиласар, Рустам чап бериб қочмоқча тушса, яна олдидан чиқиб қолаверарди. Охири бўлмади. Ўрнидан турди-да, чироқни ёқди. Бориб юзини ювиге келди-да, каравотга ўтирган кўйи хаёл сурди. “Тушим нимадан далолат бераяпти? Илгари ҳечам бунақа туш кўрмасдим... Балки, Семён билан Анжеланинг ажрашишида хийла сир яширинганилар?” Бироз ўтиб Рустам бу ўйларидан бутунлай воз кечди. Чунки москвалик дўстларининг оилавий келишмов-

чилигига ўзининг даҳлдорлигини кўрмади. Сўнг бироз чарчаш, кўзини толиқтириш мақсадида телевизорни ёқди. Ҳаммаси рус тилидаги кўрсатув, кинолар. У ҳеч вақо тушунмади. Шундай бўлса-да, экранга бақрайиб ўтираверди. Мақсади бирон нима англаш эмас, шунчаки кўзини чарчатиш эди. Ниҳоят, тонгта яқин мақсадига эришли. Қотиб ухлаб қолди. Ва шу аснода кўрган тушини буткул унуди.

Рустам эрталаб Семён билан учрашди. Ошнаси уни эски кинотеатр биносига олиб борди. Рустам бу иморатни синчиклаб кузатар экан, икки юз минг доллар эвазига қойилмақом қилиб таъмирдан чиқаришни чамалади. Албатта, Америкала бундай бинони “одам” қилиш учун камида бир миллион кетади. Россияда эса арzon ишчи кучи эвазига бинойидек иншоот тикласа бўлади.

У бажарилажак барча ишларни Семён билан келишиб олганидан сўнг яна меҳмонхонага келди. Бу сафар Семён тихирлик қилиб уни олиб қолишга уринмади. Рустамга ҳам Семёндан таклиф тушмагани маъқул келган бўлса-да, кўнглининг бир бурчагида ғашлик пайло қилди.

Тушдан кейин Рустамга Анжела қўнғироқ қилди ва ажабланарли томони, у ҳам “Горка” ресторанида учрашишса маъқулроқ бўлишини айтди. Рустам кўнди, унга бу томошанинг нима билан якунланиши қизиқроқ эди.

Рустам ресторанга борганида ёнига бир неча хизматчи қизлар нима ейишини сўраб келишса-да, буртма бермади. Анжела етиб келишини кутди. Жувон келишилган муллатдан нақ ярим соатта кеч қолиб келди.

— Мени юз бора кечирасиз, — деди у ресторан ичидаги кўриниш бериши билан. — Ишларим шу дарражада кўпки, санаб ўтишнинг ўзига нақ бир кун вақт кетади.

Рустам уни ўрнидан туриб тавозе билан кутиб олар-

кан, қўлидан упиб қўиди. Ва жувоннинг кечикишидан асло хафа бўлмаганлигини айтди.

— О-о, Рустамчик, қани эди, ҳамма сиз каби олижаноб эркак бўлса, — деди Анжела Рустамни мақтаб, — сизнинг хислатларингиз адоксиз.

Таомномадан ҳар иккаласи ҳам ўзларига ёққанини танлаб бўлишгандан сўнг:

— Рус ароғининг энг зўридан икки шиша олиб келинг, — деди Анжела хизматчи аёлга алоҳида таъкидлаб.

Буни эшитган Рустамнинг капалаги учиб кетди:

— Рус ароғининг “шира”си ниҳоятда ўткирлигидан хабардор бўлдим. Агар ундан икковлашиб икки шиша ичалиган бўлсан, мени бу ердан кўтариб олиб кетасиз, — деди у.

— Хавотир олманг, — деди Анжела Рустамга эҳтиросли табассум ҳадя этиб, — бизда қонун шундай, стол устига, албатта, бир жуфт ароқ қўйилади.

Рустам бирдан Семён билан бирга ўтирганини эслади. Унда бир шиша ароқ қўйилган эди. Ҳеч қанақангি удум ёдга олинмаганди. Таажжубланган Рустам жувон нокулай аҳволга тушиб қолмаслиги учун жилмайиб қўя қолди.

— Биринчи қадаҳни, — деди Анжела стол усти турли нозу неъматлар ва егуликлар билан тўлгач, қадаҳларни тўлдирав экан, — танишганимиз учун ичамиз. Бизнинг уйимизга борганингизда ёзилиб ўтиrolмадик. Мана бугун очилиб чақчақлашамиз.

Рустам аввал аёлнинг қадаҳ бўшатишини кутди. Ароқни ичаётганида Анжеланинг бирор туки ўзгармади. Рустам ҳам худди жувондай қилиб ичмоқчи бўлди. Лекин улдасидан чиқолмади. Кўзидан ёш чиқиб кетишига оз қолди. Қадаҳни стол устига қўйиши билан ортидан салқин ичимлик ҳўплади.

— Биласизми? — деди Анжела орадан бирор бешидақиқа ўтганидан кейин сухбатлари озгина қизишгач, — мен сизнинг дўстингиздан хафаман. Албатта, юмшоқ қилиб айтганимда. Ваҳоланки... Яххиси, ай-

тмаганим маъқул. Хуллас, Семён билан ажрашаман!

— Нега? — деди Рустам ўзини гўлликка солиб.

— Балки Семён билан бирга худди шу жойда ўтирганларингизда мен ҳақимда у гапирган ва менинг устимдан мағзава афдарган чиқар... Умуман, унинг гаплари мен учун сариқ чақага қиммат.

— Анжела, — деди Рустам унга табассум билан боқиб, — у сиз ҳақингизда жуда кам гапирди. Худди сиз каби “Ажрашмасам бўлмайди”, деди, холос.

— Рустамчик, эркаклар фийбатга нўноқ бўлишади, дейишади. Буларнинг бари — сафсата. Айнан эркаклар фийбатда аёлларни ортда қолдириб кетишаётпти. Албатта, бу гаплар сизга тааллуқли эмас. Сизнинг олижаноблигингиз шундоққина кўзингиздан кўриниб турибди. Семён бўлса... Унинг дунёси мутлақо бошқа. У бир марта оғир касалликка чалиниб қолган эди. Кўпчилик уни ўлса керак, деб ўйлаганди, бироқ ҳали куни бор экан, яшаб кетди. Тузалгач, атрофида ҳеч ким қолмаганини кўриб, таҳликага тушиб қолди. Ўшанда биринчи марта мен ёрдамга келганман унга. Кўрнамак, билмали шу хизматларимни, муккасидан хотинбозликка урди ўзини. Кошки, қўлидан бирон нима келса. Мен унинг хотини бўла туриб, унинг бу борада қай даражада эканлигини биламан-ку. Ялаб-юлқашдан нарига ўтмайди. Ахир менинг ҳам она бўлгим, фарзанд кўргим келади, — шундай дея Анжела кулиб юборди, сўнг ўзини кулгидан базур тўхтатиб: — қандай қилиб хотинбозликни эплайди, ҳайронман!.. — деб қўшимча қилди.

— Унда нега рашк қиляпсиз? — дея сўради ҳайрон бўлиб Рустам.

— Мени қадримни ерга ургани учун... Тўхтанг, шу ерда бу мавзуга нуқта қўйиб, яна битта-битта отайлик, — деди Анжела Рустамга қараб жилмаяркан.

Рустам бу сафар ароқни қадаҳларга Анжела қуишига йўл қўймади. Идишларни ўзи тўлатди. Навбатдаги қадаҳдан сўнг Анжеланинг кўзи сузилиб қолди. Шундай бўлса-да, у сўзидан адашмаётган эди.

— Рустамчик, сизга қанақа аёллар күпроқ ёқади?
— дея сўради у.

Рустам турли давраларда бўлган, қаерда нима деб гапириш ҳадисини олганди.

— Албатта, сизга ўхшайдигани. Яъни, кўзи мовий, сочи тим қора, оппоқ юзли, тор шим ва кўйлак киядигани, — дея жавоб қилди у.

— Комплiment учун ташаккур, — деб Анжела ўрнидан турди-да, столни айланиб ўтиб, ҳеч тортиниб ўтирмасдан Рустамнинг лабидан ўпди, — сиз айнан мени таърифладингиз.

Бу пайтда унинг эри — Семён уларни қўшни залда кузатиб ўтиради. У хотининг қилигини кўриб фижинди. Ва асабийлашганидан олдиаги вискини бир кўтаришда ичиб юбориб, оғзини енги билан артди. Сўнг ароқ шишасига термилиб қолди. Пешонаси тиришиб, шишадаги ёрлиқни ўқиб ўзини овтмоқчи бўлди. Ўқиди-ю, бироқ миясига ҳеч нима кирмали. Шундан сўнг у алам билан шишани стол устига тўқ этказиб уриб ўрнидан турди-да, иккинчи эшик орқали ташқарига чиқиб кетди.

Рустам ўпишиш шунчаки бўлмаганини, унга озги на эҳтирос ҳам аралашганини сезган ва бу аёлга нисбатан ўзида ҳам қизиқиш пайдо бўлганди. Бироқ сир бой бермали. Қандай ўтирган бўлеа, шу ҳолича ўтираверди.

— Зерикдим, — деди Анжела, — ҳамма нарсадан бездим. Узоқларга кетгим келаяпти. Кўзимни юммоқчиман, воз кечмоқчиман баридан.

— Баъзida одам шундай қилгиси келиб қолади. Менимча, бу ўткинчи ҳою ҳавас, агар хоҳлаган нарсасини ўша пайтнинг ўзидаёқ бажармаса, кейин бу нарса ўз-ўзидан қолиб кетади.

— Йўқ, мен қолиб кетишини истамайман. Узоқ Африка бўлсаям майли, Семёндан нарироқ юрсам бўлгани, — деди кўзига ёш олган Анжела.

Рустам атрофига алланглади. Бегона кўзлар уларни кузатмаётганига амин бўлгач, секин ўрнидан турди-

да, Анжеланинг ёнига бориб унинг қўлидан ушлаб ўрнидан турғазди.

— Биз бу ерга қайғуларни эсга олиш учун келганимиз йўқ, — деди унга жилмайиб қараб. — Кетдик, яхшиси бирорта боқقا бориб сайр қиласиз.

Таклиф Анжелага маъқул тушганидан, индамай Рустамга эргашди.

Ташқарига чиққанларидан кейин эллик метрлар чамаси нарида спортчиларга ўхшаб кийиниб олган бир йигит уларни кузатиб тургани Рустамнинг зътиборини тортди. Бироқ парво қилмади. Ўйладики: “Семён менинг тансоқчиларимга ишонмай, қўшимча одам йўллаган”, деб. Рустам ўтирган машина йўлга тушганидан кейин ҳалиги йигитнинг ҳам машинаси томон шошиб қолиши унинг гумонини яна бир марта тасдиқлади. Машина катта тезликда Пушкин боғи томонга елиб кетди. Анжела Рустамнинг қўлини қучоқлаб олган, ҳар замон кўзига эҳтиросли қарашиб қилиб қўяр эди.

Улар талай муддат боғни айланишди. Рустам жувонга Америка ҳақида гапириб берди. Аммо қизлар ҳақида бирон оғиз ҳам сўз айтмади. Анжелани эса Рустамнинг айнан қизлар билан муносабати кўпроқ қизиқтираарди.

— Шу ёшгача биронта аёл билан ҳам юрмаганмисиз? — дея сўради охири унинг ўзи чидолмасдан гап мавзусини шу томонга буриб.

— Афсуски, бу масалада мен жудаям ноформан. Ишларим шунчалик қўпки, қизлар билан юриш у ёқда турсин, ҳатто бу ҳақда ўйлашгаям фурсатим етмаган. Мана, биринчи бор айланиб юрибман. Шундаям азбаройи ўртоғимнинг хотини бўлганингиз учун...

— Рустам, мени хафа бўлмасин десангиз, кимнинг хотини эканлигимни эслатманг, илтимос, — деди Анжела Рустамнинг қўлини кўйиб юбориб.

— Мен сизнинг дилингизни оғритиб қўймоқчи эмасдим. Қаерда туғилганим, кимнинг фарзанди

эканлигимни билмасам-да, ўзимни мусулмон ҳисоблайман. Мусулмонларда оила жуда муқаддас ҳисобланади. Шунинг учун сизнинг оилангизни ўзимга яқин олиб, унинг бузилмаслигига ҳаракат қилаётган эдим. Семён ҳам, сиз ҳам бирга яшамасликка қарор қилган экансизлар, қўлимдан ҳеч нарса келмайди. Менинг эса иккаловингиз билан ҳам дўстлигим абадий бўлади, — деди Рустам Анжелага жиддий қараб.

— Раҳмат, Рустамчик, мен сиздан айнан шуни кутган эдим. Яна бир марта такрорлайман, сиз ҳақиқий олижаноб эркаксиз, тўғрироғи, йигитсиз. Эркак бўлишингизга, аҳвол шу тариқа кетаверса, кўп борга ўхшайди.

Анжеланинг сўнгти гапидан кейин ҳар иккиси ҳам қаҳ-қаҳ отиб қулиб юборди.

— Қарангки, сўзни ҳам шунчалик усталик билан айтасизки, осонлик билан ўзингизга тегишли бўлган гапдан чиқиб кетасиз, — деди Анжела қулгидан тўхтагандан кейин.

— Нимани назарда тутаяпсиз? — деди Рустам.

— Аёллар билан боғлиқ гап-да, чала қолдириб бошқа томонга ўтиб кетдингиз-ку.

— Мен аввал ўзимнинг қайси миллатга тааллуқли эканлигимни аниқлайман, шундан кейин ўша миллат вакиласига уйланаман.

— Мабодо миллатингиз лўли бўлиб чиқса-чи? — дея сўради Анжела. Бу гап кутилмагандан унинг оғзидан чиқиб кетди. Гапириб бўлгандан кейин шундай савол бергани учун ўзини-ўзи ичида койиди.

— Шундай бўлган тақдирдаям, — деди Рустам бироз сўлиш олиб. Ва Анжелага қўлини узатди. Хайрлашиб учун узатилган қўл ҳавода бироз муаллақ қолди. Анжела Рустамдан буни кутмаган эди. Шу боиски довдиради. Кейин ноилож қўлини Рустамнинг кафтига қўйди. Рустам жентельменларга хос ҳаракат билан унинг қўлини ўпди-да:

— Мени маъзур тутасиз, зарур ишларим бор эди, ҳали сиз билан кўп кўришамиз, гаплашамиз. — деб

тез-тез қадамлар ташлаб жувондан узоклашди. Анжела унинг орқасидан қараб қоларкан: “Бир куни, албатта, мен билан битим тузасан, бойвачча”, — дея хаёлидан ўтказди.

Рустам машинага ўтиргач, ҳайдовчига одамлар кўпроқ жойга олиб боришини айтди. Ҳайдовчи бироз ўйланиб тургач:

— Хўжайн, мен Москвани яхши билмайман, балки биронта одамдан сўрармиз, — деди ойна орқали орқа ўринлиқда ўтирган Рустамга.

— Унда ҳайдайвер, ўзим қаерда тўхташ кераклигини айтаман, — деди Рустам.

Қоп-қора, сўнғи русумдаги “Мерседес” жойидан енгилгина қўзғалди-да, дарров тезлашди. Рустам машина деразасидан кўчани томоша қилиб борар экан, битта жойдан катта-кагта сумка кўтариб чиқаётган одамларни кўриб қолди ва ҳайдовчига шу ерда тўхташни буюрди.

Машинадан тушиб, ўша одамлар чиқиб келаётган жойга кирли. Рустам бу ер бозор эканлигини дарров англади. Ва расталар оралиғидан аста-секин юра бошлиди. Сотувчилар ўзларининг молларини рус тилида мақташарди. Уларнинг гапини тушунмаган Рустам жилмайиб қўярди. У раста охирига етай деганда, бирдан гул бозори бошланиб қолди. Гуллар Рустамнинг жону дили эди, шу боисдан ҳам уйининг атрофига дунёнинг турли бурчакларидан келтирилган гуллардан эккан, алоҳида коллекция қилган эди. Қизиқиши уни гулларни синчиклаб кузатишга мажбур этди. У сариқ-қизил аралаш очилган лолани қўлига олиб меҳр билан кузатаётганда унинг қулогига қорачадан келган икки сотувчининг ўзаро гаплашаётгандари чалинди. Уларнинг гаплари Рустамга ниҳоятда таниш эди. У гулни унутиб, сотувчиларга термилиб қолди.

— Сизлар русмисизлар? — деб сўради Рустам инглизчалаб. Йигитлар инглиз тилини билишмас экан. Рустамнинг гапига тушунмасдан русчалаб бир нар-

салар дейиши. Энди уларнинг гапини Рустам тушунмали. Ва атрофига аланглади. Мақсади, биронта инглиз тилидан бохабар одамни топиш эди. Хўжайиннинг безовталаниб қолганини кўрган икки тансоқчи югуриб келди. Рустам уларга инглизчани биладиган одам топиб келишларини буюрди. Тансоқчилардан бири тезда ортига бурилиб юриб кетди. Иккинчиси эса Рустамнинг ёнида қолди.

Сотувчилар жуда башанг кийинган чет элликнинг қилиғидан ажабланиб, унга ҳайрон бўлиб қараб туришарди.

— Очил, — деди сотучилардан бири шеригига, — менимча, бу жа катта бойваччага ўхшайди. Кўп гул оладиган чўти бор-ов.

— Менимча, бунинг Москвада қариндош-париндоши ўлган. Шунга чамбарак ясатиш нияти бўлса керак, — деди шериги Рустамдан кўзини узмай.

— Гулларнинг нархини беш-олти баравар кўп айтамиз, шу баҳонада кеча анави “оимча”ларга кетган харажат чиқиб кетади, — деди ластлаб гап бошлагани.

— Шунақаларнинг тез-тез қариндош-уруги ўлиб турса бизга яхши бўларди, — деди Очил исмли йигит.

Рустам дилига яқиндай гапларни эшитаётганидан хурсанд бўлар, гулларни кўриш баҳонасида қулоғини динг қилиб, сотувчиларнинг сўзларини кўпроқ эшлишга ошиқарди.

— Рус тилини билмаганиям яхши бўлди, бозорнинг нархини билмайди. Баҳонада бизлар “соқقا” қилиб қоламиз, — деди сотувчиларнинг новчароги.

Бу пайтда тансоқчи бир одамни етаклаб келиб қолди.

Рустам у одам билан қўл бериб сўрашди-да, озгина ёрдами керак бўлиб қолганлигини айтди. Тансоқчи билан бирга келган кўзойнакли одам:

— Жоним билан ёрдам бераман, — деди.

— Унда сиздан илтимос, манави, — деди Рустам

қўли билан сотувчиларни кўрсатиб, — манави йигитларнинг қайси миллатдан эканлигини сўраб беринг.

Кўзойнакли одам Очил билан унинг шеригидан қаердан келишганлигини сўради. Очил жавоб бергандан кейин ҳамроҳига хавотир билан қараб:

— Иш чатоқقا ўхшайдими, дейман. Чет эллик нега бизнинг қаердан келганимиз билан қизиқиб қолди? — деди.

— Билмайман, — дея елкасини қисди новчароқ йигит.

— Демак, миллатларинг ўзбек, шундайми? — дея сўради Рустам. Унинг гапини таржимон рус тилига ўгириб йигитларга айтди.

Иккала сотувчи ҳам бараварига бошини қимирашиб, тасдиқ ишорасини қилди.

— Менинг исмим Рустам. Бу исм сизларга ҳеч нарсани англатмайдими? — дея сўради Рустам.

— Оддий исм, бизнинг юртда бунақа исмли одамлар тиқилиб ётиби, — деди Очил.

Бу гапни эшигтан Рустамни ҳаяжон босди. Кўзида ёш пайдо бўлди.

— Демак, Рустам деган исм сизларда кўп? — деди у қулоқларига ишонмай.

— Сиз гул олмайсизми? — дея сўради Рустамдан новча йигит.— Бизга сизнинг исмингиздан кўра, кўпроқ гулларни сотиш муҳимроқ.

У гапириб бўлгандан кейин Рустам кўзойнакли йигитга қаради. Таржимоннинг қиёфасида сотувчилардан хафа бўлганлик аломатлари пайдо бўлган эди.

— Бу йигитларнинг ҳозир вақти жуда зик экан. Эртароқ молларини сотиб, юртларига кетиши зарурмиш, — дея Рустамга йигитларнинг гапини бошқача таржима қилди таржимон. Кейин эса:

— Мехмонга ҳам шунақа гап айтадими? — деди йигитларга ўзининг ранжиганини ошкор қилиб.

— Бу ҳозир қандай келган бўлса, шундай яна изига қайтиб кетади. Биз бўлсак, орқасидан термилиб

Қолаверамиз. Гап сотгандан кўра беш-олтита гул сотиб олса, шуниси бизга яхши. Бу шаҳарга у меҳмон бўлса, бизам меҳмонмиз. Хўш, шунга нима қипти?
— деди Очил кўзойнакли йигитга ола қараб.

Рустам уларнинг сўзларига тушунмай бир унисига, бир бунисига қараб турарди. Таржимон хижолатдан чиқиш учун Рустамга қаради-да:

— Булар жуда узоқда яшашар экан. Шуни менга айтди, — деди.

— Гуллар... гулларни мен сотиб оламан, мана пули,
— деб Рустам тансоқчи кўтариб турган чарм сумканинг ичидан бир даста юзталик доллар чиқариб Очилнинг қўлига тутқазди. Очилнинг ҳайратдан кўзи олайиб кетди. У бунақа бўлади деб умуман ўйламаган эди.

— Сизлар мен билан ресторанда тамадди Қилинглар, илтимос. Кетишга шошилманглар, сизлардан сўрайдиган гапларим бор, — деди Рустам йигитларнинг юзларида хурсандчилик пайдо бўлганини кўргач.

— Бу баччағар, — деди новча ўзбекчалаб Очилга,
— бизни чув тушириб кетса нима қиласми?

— Бозор ташқарисидаги йўлнинг нариги бетидаги ресторанга борамиз. У ернинг ошпазлари ўзимиздан, — деди харидорнинг таклифини рад этса, у айниб қолиб, пулинин қайтариб олишидан кўрқкан Очил.

* * *

Анжела кайфияти тушган ҳолда уйига қайтиб келди. Уни ноқулай аҳволга туширган эрини бир яниб олмоқчи эди. Бахтга қарши, у ҳам йўқ экан. У ўзининг хонасига чиқди-да, кийимларини аёвсиз ечиб-отиб, юмшоққина каравотга ўзини ташлади. Бироз кўзини юмиб ётди. Асаблари тинчланмади. Қайтанга, хәёлига хўрлангани келавериб, баттар жигибийрони чиқди. Сўнг ўрнидан турди-да, шкафдан конъяк олиб, уни қадаҳга тўлдириб қуиди-ю, бир кўтаришда ичиб юборди. У ичган “Наполеон” конъяги бирданига таъсир қила қолмади. Ичи бир қуиди,

холос. У қадаҳни яна бир маротаба тұлдириди. Ҳартугул, буниси унинг бошини дарров айлантириди. Тағин каравотга چүзилди ва чуқур нафас олиб: “Оҳ, Рустам, Рустам, — дея ўзига-ўзи гапирди, — сен фақат бой эмассан. Мафтункорсан ҳам. Сен учун одам ҳамма нарсадан воз кечиши мүмкін... Лекін сен мени ерга урдинг, бунинг учун мен сени кечирмаслигим мүмкін. Оҳ, камситилиш қаичалик оғир ботади одамга!”

У секин оппоқ, силлиқ баданини силади. Қанчалық ёмон күриб кетган бүлмасин, ёнида Рустам пайдо бўлиб қолишини истади. Сўнг унинг муҳаббатга бўлган хоҳиши ўрнидан турғазиб юборди. Анжела баланд бўйли тош ойна рўпарасига келди. Ва ўзининг қадди-қоматини томоша қилди. Ўзига-ўзи ошиқ бўлганидан, секин ойнага яқин бориб аксини ўпди. “Мана шу қадди-қоматимни бир марта кўрган Семён дарров ўзиники қилиб олган эди. Унгача бўлгандари Эса менга Эгалик қилишга кучлари етмаганди”, дея хаёлидан ўтказди у. Ва бирдан хаёлига шаҳарнинг қоқ марказидаги ҳеч ким, ҳатто Семён ҳам билмайдиган уйи эсига тушиб қолди. Ҳамда юзи ёришиб, тошойнадаги ўз аксининг бурнига астагина уриб қўйди-да: “Бизда имкониятлар жудаям кўп”, дея пицирлади. Унинг руҳи бироз тетиклангач, қайтадан каравотига چўзилди-да, кўзини юмди. Бироз ўтгандан кейин ухлаб қолди.

Орадан икки соат ўтгач, эшик тақиллади. Масть уйқудаги Анжела эшитмади. Эшикнинг икки-уч марта чертилишига ичкаридан жавоб бўлавермагач, у қия очилди. Остонада пайдо бўлган хизматчи йигит уй маликасининг қип-яланғоч ухлаб ётганини кўрди-ю, жойида сеҳрлангандай қотиб қолди. Болища сочилиб ётган қоп-қора соchlар, оппоқ бадан уни ўз жодусига тортган эди. У бундай манзарани қандайдир картинада кўрганди. Рассом аёлнинг ухлаб ётганилигини шунчалик усталик билан чизгандики, уни кўрган одам жойидан анча вақт қимирлолмай қолар-

ди. Ҳозирги ҳолат эса қоғозга чизилмаган. Уни күрган әркак қандай қилиб чидаб турсин?

— Каёққа йўқолиб кетдинг, Вася?! — деган овоз пастдан эшитилди-ю, йигит худди уйқудан уйғонгандай чўчиб тушди ҳамда тескари ўгирилиб:

— Ҳоним, — деди юмшоқ овозда.

Анжела истар-истамай кўзини очди ва қандай ҳолатда ётганидан бехабар:

— Нима дейсан? — деди.

— Пастда сизни эрингиз кутаётганди, — деди йигит довдираған кўйи.

— Ҳозир бораман, — деб Анжела энди ўрнидан турмоқчи бўлиб бошини кўтарди-ю, ўзининг қандай аҳволда ётганини сезиб қолиб, хизматкорнинг беруҳсат кирганига жаҳли чиқиб кетди-да: — Нега кирдинг бу ерга?! — деб бақирди.

— Маликам, мен кирмоқчи эмасдим. Эшикни кўп тақиљлатдим, уйғонмадингиз, эрингиз эса асабийлашаётганди.

— Йўқол! — дея бақирди Анжела.

Хизматкор юрганча хонадан чиқиб кетди. Анжела эринчоқлик билан кўзини ишқалади-да, ўрнидан туриб халатини кийиб, эшик томонга юрди.

Диванда бир нуқтага тикилиб сигарета чекиб ўтирган Семён хотинининг ёнига келганини сезмай қолди. Анжела эрининг юзидан ўпид қўяркан:

— Салом, жоним, — деди.

Семён унга қараб ясама жилмайиш қилди.

— Ишларинг зўр бўп кетганга ўхшайди, — деб у Анжеланинг белидан кучди.

Анжела ҳам унинг ёнига ўтирди. Ва эрининг қўлидаги сигаретани олиб, ўзи уч марта тортди-да, кейин кулдонга қўйиб:

— Мен жуда қийналиб кетдим, — деб эрининг елкасига қўлинни қўйди. — Иш ҳам ўйлаганимиздай эмас. Рустам кўпроқ иккаламизни яраштириб қўйиш тўғрисида қайғураяпти.

— Жоним, — деди Семён хотинининг юзидан ўпид

қўйиб, — ҳеч бир иш бирданига ҳал бўлиб қолмайди. Шунинг учун ҳечам қайфурма. Энг асосийси, сен биринчи қадамни қўйдинг, энди ортга қайтиш йўқ. Бошқа ҳамма ишларни йигиштириб қўйиб, фақат Рустам билан шуғулланишимиз керак.

— Тушунаман, — деди Анжела бошини қимирлатиб, — сенга осонмаслигини ҳам биламан. Шунинг учун ҳам сен учун ҳар қандай қурбонликка тайёрман.

Жувоннинг бундай гапидан сўнг Семён уни маҳкам қучоқлаб, лабидан бўса олди ва:

— Ўзимнинг меҳрибоним, — деда эркалади-да, хизматкорни чақириб, шампан виноси олиб келишни буюрди.

* * *

Рустам стол устини тўлдириб ташлади. Тўрт хил овқат, газак, салқин ичимликлар-у конъяк-ароқлар иккита савдогарни шошириб қўйди. Илло, ресторанда овқатланиш чўнтақ “иситма”сини ошириб боришини билган ҳамюртлар доим ижарага олинган уйда овқатланишарди. Бунинг устига, тансоқчилар ичимликларни уларнинг қадаҳларига қўйиб беришлиари ҳар икковининг ҳайратини баттар оширди. Улар хизматнинг бунақа турини киноларда кўп кўришган эди, бироқ айнан ўзларига шундай илтифот кўрсатишларини ҳечам кутишмаганди.

Рустам гапни нимадан бошлашни билмас, ўзининг ҳам рўпарасида ўтирган икки йигитга миллатдош эканлигини қандай айтиш чорасини тополмасди. Нима десин? Тўгридан-тўғри: “Мен ҳам ўзбекман. Мен ҳам Ўзбекистон деган диёрда туғилганман”, десинми? Ишончсизроқ чиқиб қолмайдими? Манави йигитлар қандай қабул қиласди? “Бизнинг миллатда Америкага бориб санқиб юрадиганлар йўқ”, демайдими? Бу саволлар унинг бошида гужфон ўйнар, икки-уч марта сўзлашга уринган тилини боғлаб қўйганди. У рўпарадагиларига одатий жилмайиб қўяр, назарида, бу жилмайиши ҳар доимгидай самимий

чиқмаётганга ўхшар эди. Бундан у баттар нокулай ахволга тушарди.

Савдогар йигитлар стол устидаги түкин-сочинликдан ҳайратта тушишса-да, таомга ўзлари аввал қўл узатишдан тийилиб туришди. Орага бироз сукунат чўмганида:

— Қишлоққа борганимда роса мақтана диган бўлдим-да, — деди Очил шеригига секингина.

Уларнинг шивирлашларидан тансоқчилар безовтавланишиб, таржимонга қарашди.

— Йигитлар, сизлардан битта илтимос, бунақа жойларда бошқалар тушунмайдиган тилда гаплашманглар, — деди таржимон Очил билан унинг шеригига.

Рустам таржимондан нима гаплигини сўраган эди, у йигитларни овқатга ундағанлигини айтди. Миллиардер таржимонга кулиб, унга:

— Илтимос, менинг гапларимни тез-тез уларга таржима қилиб туринг, уларнинг оғзидан чиққанини эса менга, — деди.

Таржимон “хўп” дегандек бошини қимирлатди. Шундан сўнг Рустам:

— Мен ҳам ўзбекка ўхшайманми? — дея сўради Очилдан.

— Ўзбекка! — деди Очил ҳайратини яшиrolмай Рустамга тикилиб қолди.

— Ҳа, ўзбекка? Менинг исмим сизларнинг миллатингизда кўп экан. Сизларнинг она тилларинг менга жуда таниш туйилаяпти, шунга сўрайпман, — деди Рустам.

— Бунақа исм тожиклардаям бор. Қирғизларда, қозоқларда, ҳатто татарлардаям тикилиб ётибди, — деди Очилнинг ёнида ўтирган ҳамроҳи.

Таржимондан бу гапларни эшитган Рустамнинг капалаги учди. “Наҳотки, булар менинг миллатдошим бўлмаса?” — деган хавотирга тушди.

— Мен, — деб у таржимонга қаради, — ёшлигимда йўқолиб қолганман. Кейин Америкага бориб...

— Эй-й, — деди Очилнинг ёнида ўтирган йигит ҳаяжонланиб, — Рустам... Тоғамнинг биз қатори ўғли бор эди, исми Рустам. Мол боққани акаларига қушилиб чиққанда, иккита одам машинасига ўтқазиб ўғирлаб кетган. Уни олиб кетишаётганини иккита бола кўриб қолган. Кейин тоғамлар ўғлини роса қидиришди, лекин ҳеч қаердан топишолмади. Ўғирланларни милиса ушлабди, аммо бола йўғимиш.

Рустам чидолмай ўрнидан сакраб туриб кетди-да, йигитни қучоқлаб олди ва баралла йиғлаб юборди. Ўтирганларнинг ҳаммаси таажжубда, Рустамнинг қучоғидаги йигит эса ноқулай аҳволда эди.

— Отингиз нима, биродар? — деди ниҳоят бироз ўзига келган Рустам йигитни қучоғидан бўшатиб кўз ёшини артаркан.

— Фозил, — деди йигитнинг кўнгли ҳам алланечук бўлиб.

— Фозил, мен ўша боламан, мени айнан мол боқиб юрганимда ўғирлаб кетишган. Тушундингизми, ўғирлаб кетишган... Менинг ота-онам ҳозир тирикми?! — шундай дея Рустам юрагини ушлади.

Тансоқчилар Рустамнинг икки ёнидан маҳкам тутишди-да, жойига ўтиришга кўмаклашиши. Улардан биттаси ички чўнтагини кавлаб, валидол олдида, хўжайинига берди. Дори таъсиридан бироз ўзига келган Рустам яна ҳамюрларига табассум билан боқиб, олдидаги шампан виносини олди:

— Олйнглар, — деди у ҳаяжони ҳамон тарқамаганидан қалтираб, — бугунги кун учун ичамиз!

Ҳамма унга қўшилди. Қадаҳлардаги вино тугагандан кейин Рустам тансоқчилар хизматидан воз кешиб, уларга эшик ёнида кутиб туришларини айттида, стол устидаги ароқни очиб, ўзи ҳаммага қуйиб чиқди.

— Бугун, — деди у қувончдан кўзи порлаб, — мен ҳаммага хизмат қиласман. Бугунги кун ҳамма кунлардан устун, ҳатто ҳар қандай байрамдан ҳам!

Икки йигит ўзларига миллатдош, ҳатто қариндош

чиқиб қолган америкалик бойнинг гапларини эши-тишгач, бироз нокулай аҳволга тушиши. Аммо яхшигина чойчақа олиш умидида Рустамнинг киприк қоққанига ҳам эътибор қилиб турган кўзойнакли таржимон қарсак чалиб: “Браво! Браво!” — дея бақириб юборди. Рустам елиб-югуриб юрган хизматчи қизлардан бирини ёнига чақириб, унга ресторон эгасини чақириб келишни илтимос қилди. Киз тезда бошлиқни етаклаб келди.

Бошлиқнинг кўзи безовта боқар, “Биронта хизматчим айб иш қилиб қўйдими?” — дея ўйларди. У стол ёнига келгач, Рустам унинг белидан қучди-да:

— Дўстим, бугун сизнинг ресторонингизда ҳамма текин овқатлансан, менинг ҳисобимдан, — дея хитоб қилди.

Буни эшитган ресторон эгасининг юзида табассум пайдо бўлди. У дарров ёнида жилмайиб турган хизматчи қизга ресторанга кираверишга “Бугун ресторонимизда барча овқатлару ичимликлар текин” деган ёрлиқ осиб қўйишни буюорди ва Рустам қуйиб берган қалаҳни бир кўтаришида ичиб, газагига енгини ҳидлади ҳамда яна биттадан ичишни таклиф қилди. Иккинчи қадаҳ ҳам бўшагандан кейин Рустам ресторон эгасига юз минг долларга чек ёзиб берди.

Ташқарига илинган ёрлиқни тезда кўпчилик илғаган шекилли, тезда юз эллик кишига мўлжалланган жой хўрандалар билан тўлди. Ҳамма хурсанд, ҳамманинг юзида табассум. Ўшандай байрамона қайфиятда ресторанга иккита алкаш кириб келди. Келибоқ хизматкор қизлардан бирини ёнларига чақиришиб, тезда ўzlари учун жой топиб беришини буюришиди.

— Жой йўқ, — деди уларга қўрс муомала қилган хизматкор қиз.

— Шунча одамга жой топилганда бизга йўқми? — деди алкашлардан бири аламзадаланиб.

— Бу ер сизлар кирадиган жой эмас, тезда туёқларингни шиқиллатиб қолмасаларинг, мен қоровул-

ларни чақираман, — деди уларга тижиниб қараб турған қиз.

— Үнда биз ҳов анави жойга ўтирамиз, — деди алкашларнинг новчароги ва кийими шеригиникига нисбатан пича тозароги ҳамда улфатини айнан Рустам ўтирган жойга етаклади.

— У ёқقا мумкинмас сизларга! — деб официантка қанча айтмасин, улар қулоқ ҳам солишмади. Тўғри Рустамнинг ёнига бориб айнан унга:

— Текинакан деб ўтираверасанларми? Қани, ўрниларингдан бир туриб юборинглар-чи, — деди.

Рустам ажабланиб таржимонга қаради. Таржимон унга нима дейишини билмай турганида, Очил:

— Йўқол, бу ердан, икковингам! — дея дўқ урди алкашларга.

— Ўзларинг майшат қилиб ўтирибсанлар, текин деб. Нега бизга хўжайнлик қиласанлар? Ундан кўра жойни бўшагиб қўйларинг! — дея қичқирди яна ўша новча пиёниста. — Қаёқдандир бу ерга келиб хўжайнлик қиласан!

Рустам шундай кунни увол қилгиси келмагани учун тансоқчиларни чақиришга мажбур бўлди. Улар тезда иккала алкашнинг суробини тўғрилашиб, ташқарига чиқариб ташлаши.

Орага тушган нокулайлик учун Рустам ҳамюртларидан узр сўраб, базмни давом этказишини айтди.

Шу куни у ҳалдан зиёд — беш қадаҳ ароқ ичди. У одатда кўпи билан бир қадаҳ ароққа қаноат қилар эди. Очил ва унинг шериги Фозил эса тинимсиз ичиб туришганларидан маст бўлиб қолишли. Бироқ кўзойнакли таржимон бир-икки қадаҳдан кейин ичишни бас қилиб қўйганди. Унинг хаёлида Рустамдан униши керак бўлган пул гужон бўлиб айланиши тўхтатмасди. Ва у базм ниҳоялангандан кейин мақсадига етди. Рустамнинг имоси билан тансоқчилардан бири ён чўнтагидан иккита юз купюралик доллар чиқариб берди.

Рустам ҳамюртларини машинага ўтқазиб ётогига

олиб бориб қўйгач, меҳмонхонага қайтиб келди. Унинг кайфияти шу қадар чоғ эдики, меҳмонхонада қолдирилган кийимлари титилганига эътибор ҳам бермади. Келасола костюмини ечиб шкаф ичига илиб қўйди-да, ўзини диванга ташлади. “Эртагаёқ Ўзбекистонга учаман. Ота-онамни топаман. Қанчалик соғиниб кетганман мен уларни. Акаларим бор эди, биттагина синглимни ҳам эслайман. Уларнинг бари улғайиб кетишган бўлишса керак... Ажабмаски, оила ҳам қуришган бўлишса?.. Мени қандай қабул қилишаркин?” — деган хаёлларга берилган маҳал телефон асабий “сайраб” қолди. “Шундай пайтда ҳам одамни безовта қилишади-я”, дея хаёлидан ўтказган Рустам гўшакни кўтарди.

— Алё, Рустамчик, — деган Анжеланинг овози келди гўшакдан.

— Анжела, кутмаган эдим, — деди Рустамнинг бирдан юзи ёришиб.

— Ана шунаقا, мен кутилмаган пайтла безовта қиласман. Рустамчик, мен ҳозир бошқа жойда — ўзимнинг квартирамдаман, — деди Анжела.

— Ўзингизнинг квартирангиз ҳам борми? — деди Рустам ҳайрон бўлиб. — Мен ҳамма нарса Семён икковларингизники бўлса керак, деб ўйлагандим.

— Йўқ, менинг қизлик давримдан қолган уйим бор. Уни Семённинг кошонасига ҳеч қачон алмашмайман. Ҳозир ёлғиз ўзим ўтирибман. Илтимос, келинг, сизга айтадиган бир дунё гапларим бор, — деди Анжела ўксик овозда.

— Менда ҳам сизга айтадиган хушхабарлар пайдо бўлди. Сизни қандай толсам экан, деган хаёлда эдим. Лекин сизнинг овозингиз гўшакдан бошқачароқ чиқди. Тинчликми ўзи?

— Умуман олганда, тинчлик. Бир-иккита гаплар бор, уларни келганингиздан кейин гаплашамиз.

— Яхши, манзилни айтинг, — дея Рустам қалам-қоғоз олли-да, Анжела айтган манзилни ёзиб олди.

Кейин қайтатдан костюмини шкафдан олди. Бироқ бу сафар ҳам бошқа кийимларига эътибор бермади.

Анжела Семёнга айтмасдан ўзининг квартирасига кетганди. Аммо хотинида пайдо бўлган ўзгаришни англаған эр тансоқчиларига Анжеладан кўз узмасликларини буюорди. Улар хўжайнинг хотини кирган уй ҳақида Семёнга маълумот беришган, энди бу уйга яна ким киришини кутишаётган эди.

Анжела ўзининг квартирасига Рустам ҳали ресторандалигига ёқ келган ва унинг қўл телефонига қўнғироқ қилганди. Аммо телефон ўчирилганлиги боис Рустамнинг меҳмонхонага келишини кутишга мажбур бўлди. Телефондаги қисқа муддатли суҳбат жувонни руҳлантириб юборди ва у гўшакни қўйганидан кейин севган қўшигини хиргойи қилиб тош ойна қархисига борди-да, ўзига обдон оро бера бошлади. Чиройли қилиб бўяниб олгач, соchlарини орқасига ёйиб ташлади. Сўнгра кийим танлашга ўтди. Иккита қўйлакни кийиб кўрди, бўлмади. Кўкраги унчалик очиқ эмас экан. У бўлиқ кўкракнинг момиқина қирғоги кўриниб туриши эркакларнинг жонини сууриб олишини яхши биларди. Семён ҳам айнан Анжела шунаقا кўйлак кийганида унга ошику бекарор бўлганди.

Ўзининг кўринишидан кўнгли тўлиқ хотиржам топгач, юмшоқ диванга ўтирганча сигарета тутатди. Анжела асли кашанда эмас, фақат мана шундай ҳаяжонли дақиқаларда кўзи сигарета қидириб қоларди. Чамаси, орадан ярим соатга яқин вақт ўтгани эшик қўнғироги чалинди. Анжела хурсанд бўлганидан ўрнидан сапчиб туриб эшик томонга югурди. Рустамни кўриши билан эса бўйнидан қучиб, эркак лабининг бир четидан ўпди. Ундан тараған хушбўй атир ҳидидан маст бўлаёзган Рустам саросималаниб қолди.

— Киринг, — деди унинг қўлидан ушлаб ичкарига тортган Анжела.

Ўзининг ҳолатини жувонга билдирилмаслик мақсадида Рустам яна табассумга зўр берди. Илгари ҳам тўрт-беш марта бундай аҳволга тушганди у. Айниқса, унинг машҳур актриса билан тунни бирга ўтказгани ҳеч қачон ёдидан чиқмайди. Голливуд юлдузи худди Анжела каби қўнғироқ қилиб: “Тезда етиб келмасанг, аҳволим чатоқ”, деб алдаганди. Борса, мутлақо бошқача манзара. Меҳмонхонада чиройли қилиб стол безатилган. Нимқизил чироқ ёқиб қўйилган. Хонадаги буюмлар, деворга осилган турли расмлар — ҳаммаси эҳтирос учун мўлжалланган. Ўшанда Рустам актрисанинг кўнглидаги ишни қилиб берган эди. Шундан кейин эса унлан қутулиш учун нақ бир йил ва бир ярим миллион доллар совурди.

Рустам машинада келаётib бу ҳақида ўйлаганди ҳамда Анжела кўрсатиши мумкин бўлган ҳамма кирдикорларга ўзича тайёргарлик кўрганди. “Эҳтимол, у мени маслаҳат учун чақиргандир. Ахир унинг эри билан яқинлигимиз бор. Бу иккаламиз орамизда соодир бўлиши мумкин бўлган ишқий “можаролар”га тўсиқ бўлиб турали”, — деган ўй ҳам ўтганди унинг хаёлидан. Аммо Анжеланинг Рустам билан учрашувга алоҳида тайёргарлик кўргани уни янада сергаклантириди.

— Мана шу каталакдек ўй менинг ҳақиқий бошпанам ҳисобланади. Қалай, ёқдими? — дея сўради Анжела улар стол атрофига ўтирганларидан кейин оёғини сонигача очиб қўйгач.

— Умуман олганда, ёмон эмас, лекин сиздай аёл учун бироз торлик қиласди. Сиз қасрларга муносиб хонимсиз, — деди Рустам.

— Таърифингиз учун катта раҳмат. Рустам, биласизми, сиз билан худди бегоналардай сизлашиб гаплашиш менга ноқулайлик туғдираяпти. Келинг, яхшиси, сенлашамиз, — деди Анжела ноз билан гапириб.

— Жуда соз. — деди Рустам унинг гапини маъқуллаб.

— Раҳмат, — дея Анжела ўрнидан турди-да, Рустамнинг ёнига келиб, унинг лабидан секингина эҳтиросли қилиб ўпиб қўйди.

— Бу қилиқ бизни янадаям яқинлаштириб қўйди,
— деди унга Рустам, — ҳар тугул менга анча ўнгайсиз.

— Сени бошқача ўпиш умуман мумкин эмас. Бу ерда сен билан мен ўтирибмиз. Бошқа ҳеч ким йўқ. Бўлмайди ҳам. Шундай экан, кўнгилга бемалол эрк беришимиз мумкин. Албатта, бунинг учун бошқа ҳамма нарсани унтишимиз шарт.

— Мен сенга бошқа нарсани айтмоқчи эдим, — деди Рустам гапни бошқа томонга буришга уриниб.

— Қанақа гап экан? — деб Анжела яна жойидан қўзғалди-да, Рустамнинг тиззасига ўтириб олди. Ва узун бармоқлари билан унинг сочини силай бошлиди.

— Эсингдами, хиёбонда сен менга: “Балки сенинг авлодинг лўлидир”, дегандинг. Афсуски, ундан бўлиб чиқмади. Менинг ҳам ўзимни мақтаса арзийдиган миллатим бор экан, — деди Рустам бироз Анжелани ўз хоҳишига қўйиб.

— Рустамчик, мен сенга унақа демоқчи эмасдим. Оғизмдан чиқиб кетди. Илтимос, шу қўпод гапим учун мени кечир.

— Мен сендан хафа эмасман. Қайтанга шу гапинг яқинларимни топишинга ёрдам берди.

— Ростданми?! — деб Анжела боягидан сағал узоқроқ Рустамнинг лабига лабини босиб турди. — Энди айт, қанақа қариндошларингни топдинг?

Гарчи Анжела кулиб турган бўлса-да, Рустамнинг гапидан кейин ичидан бир нарса чирт этиб узилгандай бўлди. Чунки у Семённинг ишини битириш баҳонасида Рустамга тегиб олмоқчи, кейин у билан Америкага кетмоқчи эди.

— Бозорда гул сотадиган икки ўзбек йигити билан танишдим. Улар айнан менинг хотирамда сақланиб қолган тилда гаплашишар экан. Тўғри, мен бу

тилни мутлақо эсимдан чиқарып юборғанман. Аммо тилнинг оҳанги ёдимда. Улардан биттаси ҳатто менга қариндош чиқиб қолди. Эртагаёқ мен улар билан бирга Ўзбекистонга кетаман. Тезроқ яқинларимни кўрсам дейман, — деди Рустам Анжела ўта назокат билан юзидан ўпаётганига эътибор ҳам қилмай.

* * *

Рустамнинг Анжеланикига кирганлигини эшигтан Семён мамнун жилмайди-да, анча йилдан бери қадрдони бўлган Тарасга қўнфироқ қилди. У Москва остонасида турарди. Икки гектар ер олиб шу ерда чорвачилик қилар, топилаётган тўрт-беш тангага қаноат қилиб яшарди. Унинг биттагина ёмон одати бор — ичишга суяги йўқ эди. Айнан ўша одати сабаб хотини кетиб қолганди. Семён у билан касалхонада бир палатада ётган, ўша кезлари танишиб, кўп гаплари бир жойдан чиққанлиги боис дўстлашганди. Мана, орадан олти йилдан мўлроқ вақт ўтиблики, Семён уникига камида икки ойда бир боради. Фақат шу ердагина у ўзини эркин ҳис қиласди. Чарчоғи ёзилади.

— Қаёқларга йўқолиб кетдинг?! — деди Тарас Семёnnинг овозини эшигтганидан.

— Сўрама, ишларим бошимдан ошиб кетди. Эртага сенинг ёнингга бормоқчи эдим. Бир мазза қилайлик.

— Биласан-ку, сенинг келишингни интизорлик билан кутаман, — деди Тарас дўстининг келишини эшигтгандан кейин хурсанд бўлиб.

— Бу сафар бошқача бўлади. Хотининг кетиб қолганига анча бўлди. Ҳар-ҳар замон эркаклигинги эслаб турсанг, ёмон бўлмасди, — деди Семён яйраб кулиб.

— Сенинг бу ерга олиб келадиган одатинг йўқ эди-ку, ёки Анжела бирон жойга кетиб, зерикиб қолдингми?

— Умуман, шундай, қолган гапларни кейин гаплашамиз, — деб Семён гўшакни хайрлашмасданоқ

қўйди. Чунки Анжеланинг номини эшитиб асаби ўйнади. “Хозир у Рустамнинг қўйнида эҳтиросдан овози бўғилаяпти... Қонуний иш қилиш бунчалик ҳам оғир-а... Анжела ҳаром бўлди. У билан бир тўшакда ётиш керакмас, ишим битаверсин-чи, у ёғини ўзим биламан”, деб хаёлидан ўтказди-да, ўрнидан туриб ташқарига йўналди. Очик осмонга қаради. Юлдузлар хира кўринарди. Юраги сиқилди. Уйга қайтиб кирди, яна бўлмади. Шаҳарнинг ўртасида содир бўлаётган воқеалар хаёлига келаверди. Охири чидамади. Югурдаклардан бирини чақириб, доим ўзи силаб-сийпашадиган Наташани олиб келишларини бујорди-да, ётоги томонга кетди. Икки қадаҳ конъяк ичган эди, кўнглидаги губор бироз ёзилгандай бўлди. Хаёлига қўлга киритиши мумкин бўлган пуллар келди. Сиқилган юраги энди ҳаприқиб кетди. Ўзича дунёнинг бешта энг гўзал масканида қаср қуришни, ҳар қасрга биттадан қиз қўйиб обдон роҳатланишни ўйлади. Ва кутилаётган лаззатли онларни орзу қилишга шу даражада берилиб кетдики. Наташа кириб келганини ҳам сезмай қолди.

— Кўзи очик ҳолда ухлаётган одамни биринчи марта қуришим, — деди Наташа эшик ёнида туриб.

— О-о, менинг жаннатим, кел бу ёқقا! — деб Семён ўрнидан турди...

* * *

Эрталаб соат саккизларга яқин Анжела келганида ҳали Семён ухлаётганди. У эрига ижирганиб қарапкан Рустамни эслади. Унинг ҳаракатлари Анжеланинг жонини суғуриб олишига озгина қолганди. Аммо Семён билан Анжела шунча йилдан бери бирга яшаган бўлса-да, ҳеч қачон бунақа лаззат ололмаган эди. У Семённинг ёнгинасига келди ва ўзи ётадиган болишда уч дона сариқ сочни кўриб қолди-да: “Бу ҳеч қачон зерикиб қолмайди”, — деб хаёлидан ўтказди. Сўнг эрини секин туртди. Семён кўзини очган эди:

— Мен келдим, — деди жилмайиб.

— Яхши, — деди Семён кўзини уқалаб, — анча бўлдими?

— Ҳозиргина, тур, сенга айтадиган муҳим гапим бор, — деди Анжела.

Семён дарров сергакланиб ўрнидан турди-да:

— Нима гап? — дея сўради.

— Рустам кеча миллатдошларини топибди.

— Ним-ма?! — деб бақириб юборди Семён. — Қанақа миллатдошлари?

— Кечада билан хиёбонга борганимизда, балки миллатинг лўлидир, деганимдан хафа бўлиб кетиб қолганди. Тўғри бозорга борибди. У ерда иккита ўзбек йигити билан танишибди. Уларнинг гаплашиш оҳанги Рустамга таниш туйилибди...

— Тўхта, у ерда ўзбек йигитлари нима иш қилишаркан? — деди Семён хотинига еб қўйгудек қараб. Анжела доим эрининг мана шу қарашидан кўрқади. Ўзича Семённинг ҳамма қудрати кўзида, деб ўйлайди. Ҳозир ҳам вужудига енгилгина титроқ кирди.

— Гулфурушлар экан.

— Ислами нима экан? — дея сўради тобора тутоқиб кетаётган Семён.

— Билмайман, айтмади, — деди эридаги ўзгариши кўрган Анжела баттар қўрқиб.

— Ўзи аёл зотига ҳеч нарсани ишониб бўлмайди! — деб бақириб юборган Семён каравотидан сакраб тушиб эшик томонга энди қадам ташлаганида, Анжела уни тўхтатиб қолди.

— Ҳамма ишни расво қилиб, яна нима демоқчисан? — дея бўкирди Семён хотинига.

— Ҳеч курса калта иштонингни кийиб олгин, — деди Анжела юзини четга буриб.

“Тутаб” турган Семён аҳволига бир қаради-ю, иржайди. “Паришонхотирликнинг бундан баттари бўлмайди”, дея ўйлаб кеча кечаси улоқтирган калта иштонини қидира бошлади. “Барака топтур” тезда топила қолмади. Бундан Семён баттар тутоқиб кетди.

— Қидиришсанг амалингдан тушиб қоласанми? — деб бақирди хотинига.

— Балки малла соч эсдаликка олиб кетгандир, — деди Анжела қовоғини согланча ўрнидан тураркан.

— Қанақа малла соч? — деб ўқрайди Семён.

— Сен билан биргә ётган малласоч-да!

— Қаёқдан олдинг бунақа гапни?

— Ана, менинг ёстиғим устида ётибли.

— Мен сенинг Рустам билан ётганингни юзингга солаётганим йўқ-ку.

— Мен бу ишни хоҳламагандим. Ўзинг мажбурладинг.

— Бўпти, — дея қўлинин силтади Семён, — иштонимни топишиб юбор.

Зинадан учгудай бўлиб пастга тушган Семён хизматкор қизга тезда одамларини айтиб келишни бўюрди. Ўзи эса уйнинг у бошидан-бу бошига асабий тарзда бориб кела бошлади. У бунақа бўлишини умуман кутмаган эди. Рустамни осонлик билан қўлга туширмоқчи эди. Бироқ ўзи тушиб қолди. Анжела сидан айрилди. Ахир у хотинини яхши қўради. Аммо манфаат йўлида уни курбон қилса-ю, натижа мутлақо тескари бўлиб чиқса, бундан баттар кўргулик ҳам бўлиши мумкинми?

— Бунча имиллайсизлар?! — бақирди эшикдан кириб келган бешта барзангидай йигитга. — Чақирганимга қанча вақт бўлди?!

Шефнинг кайфияти эрталабдан бузук эканлигини кўрган йигитлар бир-бирларига қарашиди.

— Ҳозир бозорга борасанлар-да, гул сотаётган иккита ўзбек болани олиб келасанлар. Кўл теккизманлар. Улар менга жуда керак.

* * *

Гарчи ҳориган, уйқуга тўймаган эса-да, Рустамнинг кайфияти аъло эди. Шу боиски, меҳмонхонага келгач, қайтадан тўшакка ётмади. Вақтни ўтказиш учун қофозларини бирма-бир титкилашга тушиб кет-

ди. Шу пайт унга Нью-Йоркдан қўнгироқ бўлиб қолди.

— Сизга халақит берганим учун узр, — деди иш бошқарувчisi, — лекин қўнгироқ қилмасдан чираб тура олмадим. Куни кеча икки ой мобайннида туриб қолган молларнинг ҳаммасини сотдик. Ўн миллион доллар ҳисобимизга тушди.

— Зўр бўпти-ку, — деди қувонганидан Рустам. Бироқ шунча пул келиб тушгани ҳам туғилган юртига боришдек қувончдан устун эмасди, — мен боришим билан сизга мукофот пули бераман.

У гушакни қўйганидан кейин кафтларини бирбирига ишқалаб қоғозларига термилди. Бошига ҳеч нарса кирмади. Соатига қаради. Соат миллари саккиздан ўн беш дақиқа ўтаётганлигини кўрсатиб турар эди. “Вақт бўлиб қолибди”, — дея хаёлидан ўтказиб қоғозларни йиғиштириди-да, тансоқчиларидан бирини чақирди. Ва унга аэропортга қўнгироқ қилиб Ўзбекистонга учта чипта буюртма беришини айтиб, ўзи шкафни очди. Очди-ю, кийимларига тикилиб қолди. У эндигона костюм-шимиу кўйлаклари титкиланганлигини кўриб турарди. Тезда шкафнинг тепалаги кўзини очиб чамалонини олиб кўрди. Унинг ҳам очилиб-ёпишгани шундоққина кўриниб турарди. “Ким қилиши мумкин? — дея ўйлади у. — Ўзимдан бўлак бу хонага ҳеч ким кирмаса? Фаррош хотин ҳам фақатгина ўзимнинг борлигимда келади. Мени бу ерда танийдиганлар Семён билан Анжела. Уларнинг кўлидан бунақангি пасткашлик келмаса керак... Тўхта, тўхта! Нега энди улар шу пайтгача иноқ яшаб келиб мен келишим билан ажрашиб тадоригига тушиб қолишли? Анжела эрига хиёнат қилди. Унга қўшилиб мен ҳам қадрдонлашиб қолган одамнинг юзига оёқ босдим... Лекин мен буни истамагандим-ку, Анжеланинг ўзи ёпишган бўлса... Бизнинг бундай иш қилишимизни Семён билмаган... Билган бўлса-чи? Билганидан кейин бу ерга йигитларини жўнатиб, текшириш ўтказганимикин? Бўлди, Моск-

вала ҳеч қандай иш қилмайман. Нью-Йоркдаги ишларим ҳам етиб ортади. Кетишім керак. Агар юртимга бориб қариндошларимни топсам, ўша ёқда бирон нима қилишим мүмкін". Рустам ўзидан-үзи хафа бўлган қўйи хонасидан ташқарига чиқди ва йигитларидан чиптани сўради. Ҳаммаси жойида эканлигини билгач, унинг хонасидаги буюмларни машинага ортишларини буюриб, ўзи секин-аста пастки қаватга қараб кета бошлади.

Уларнинг орқасидан иккита тимқора "Мерседес" тушди. Буни аввал машина бошқариб бораётган тансоқчи сезиб қолди. Ва бу ҳақда Рустамга айтди. Рустам орқасига ўгирилиб қаради-да, кейин ҳайдовчига тезликни оширишни буюрди. Машина тезлашгани билан орқадагиларни ортда қолдириб кета олмади. Светофорлардан бирида тўхтаганларida эса орқадаги "Мерседес"нинг биттаси ёнларига келиб тўхтади. Ва дераза ойнаси автоматик тарзда очилиб, кўзойнакли йигит бошини чиқарди-да, Рустамнинг тансоқчисига: "Машинани бизнинг орқамиздан ҳайда, хўжайнингни шефимиз кутиб ўтирибди", — деди. Ҳайдовчи орқасига ўгирилиб, хўжайнинга "нима қиласай?" маъносида қаради.

— Унинг айтганини қил, — деди Рустам.

Яшил чироқ ёниши билан машиналар ҳаракатта келди. Боши қотиб қолган Рустам нима қилишини билмай орқа ўриндиқقا суюниб кўзини юмди. У ҳамма нарсани тақдирнинг измига кўйганди. Орадан беш дақиқа ўтар-ўтмас қарама-қарши томондан келайётган оппоқ "Волға" тиккасига Рустам ўтирган машинага келиб урилди...

* * *

Очил Фозилга нисбатан бироз олдинроқ уйқудан уйғонди. Унинг боши жуда қаттиқ оғрирди. Бундай ҳолга аввал ҳам у кўп бора тушганлиги учун ўрнидан туриб музлатгични очди. Қора кунга деб асраб кўйган ароқ шишиласининг тубида бир пиёла қолганини кўриб афти тундлашди. "Ҳарна, йўқдан кўра", дея хаёли-

дан ўтказиб уни қултиллатганча пиёлага қыйди. Ва бир кутаришда сипқорли. Шундан кейин бош оғриғи пича камайиб, ювениш хонасига кетди. У ҳали ювениб улгурмасидан орқасидан Фозил келди. У афтини тириштириб Очилга қараб турди-да:

— Кеча, тозза учеб қолмиз-ку, — деди.

Очил оғзидан тиш чүткасини олмай “хим”, деб жавоб қилди.

— Бошим ёрилай деяпти, бўл тез, бошимни юваман, — деди Фозил Очилнинг эринмасдан тишини юваётганидан ичи қизиб.

— Кечаги бойвачча ким экан ўзи? — деди Очил оғзини чайиб бўлганидан кейин.

— Мен қаёқдан билай? Гулларни ҳаммасини сошиб олди. Ҳақини берди.

— Пул қаерда? — деб сўради Очил сочиқни қулига олиб.

— Билмайман, кеча ўзинг чўнталингга солгандингку, — деди унга бақрайиб қараган Фозил.

— Эсимда йўқ, — деб Очил шеригини четлаб ўтдида, ётоқхона томонга югурди.

Унинг ортидан Фозил ҳам гизиллаб етиб борди. Чўнтаgidан бир ласта долларни чиқарган Очил ўшшайди-да:

— Капалагим учеб кетай деди-я, — деди.

Фозил ювенишга чиқиб кетди. Очил эса ошхонага ўтиб чой дамлади, дастурхон ёзди. Музлатгич бўшаб қолганини кўрганидан кейин: “Ҳамма вақт мен нарса ташийман. Бу баччагар тужа қилишдан бошқага ярамайди”, — деб шеригини яниди.

— Кеча сен, анави бойваччага тоғамнинг исми Рустам эди, ёшлигида ўғирлаб кетишган дедингми? — деб сўради Очил оғзига бир бурда нон солиб, — ҳақиқатданам шундайми? Мен ҳеч эшитмаган эканман.

— Бе, қаёқда? Бойвачча шунча муруват кўрсатганига бир кўнглини кўтариб қўяй дедим-да. Лекин ҳақиқатданам ёшлигимда биздан тўрт-беш қишлоқ

нарида бола ўғирланғанлигини әшитувдим, — деди Фозил оғзидаги луқмасини эрінчоқлик билан чайнаб.

— Тоғамнинг ўғлини мол боқиб юрганида ўғирлашган, дединг-ку.

— Шундай деб әшитувдим. Эшитганимни айтдимда.

— Юр, ўша ёқа олиб бор мени, деб келиб қолса, нима қиласыз? — деди бир зум чайналишдан тұхтаган Очил.

— Москва катта шаҳар бўлса, бизни қаерданам топарди у, — деди бамайлихотир Фозил.

— Жинни, кеча унинг машинасида келдик-ку, — деди жаҳли чиққан Очил.

— Келиб қолса янаем яхши, — деди пинагини ҳам бузмаган Фозил, — Тошкентгача билет текин бўлади.

— Қойил-э сенга, илгариям хўжайнини боллаб туширгандинг. Буниси унданам ўтиб тушди.

— Энди, ҳамма сенга ўхшаганмас. Агар мен бўлмаганимда қотган нонингният топиб еёлмасдинг. Лўлининг эшагини сугору пулини ол, дейишган. Бундай бойлар ҳамма вақт ҳам дуч келавермайди. Вақтида фойдаланиб қолмасанг, бурнингга икки қўлингни тиқиб қолаверасан, ошна, — деди Фозил гуурланиб.

— Карагин-да ишқилиб, асал деб заҳар ютиб қўймагин, — деди ўзининг камситилганидан хафа бўлган Очил.

— Чойингни ич, кейин мен сенга зўр гап айтаман, — деди Фозил.

Аммо у зўр гапини айтишга улгурмади. Эшик асабий тақиллаб қолди. Ҳамхоналар бир-бирига тикилишди.

— Ким бўлиши мумкин? — деди Фозил кўркув аралаш.

— Ким бўларди! Бор, эшикни оч, энди ҳаммасига жавоб берасан, — деди Очил.

— Эшик темирдан-ку, глазокдан секин қарайман, агар ўша бойвачча бўлса, уйда ҳеч ким йўқдай жим ўтираверамиз, — деди пичирлаб Фозил ва аста ўрнидан туриб оёқ учida юриб борди-да, эшикнинг “кўзи”дан мўралади. Эшик ортида ёшгина қиз билан бола турарди. Уларни кўргач бироз ўзига келган Фозил шарақ-шуруқ қилиб эшикнинг зулфинини туширди. Бироқ эшикни очишга улгурмади. Нариги томондагиларнинг ўzlари очиб қўя қолиши. Фозил не кўз билан кўрсинки, қиз билан бола йўқолиб, уларнинг ўрнида барзангидай учта йигит турарди. Фозилнинг юраги шув этиб кетди.

— Сизларга ким керак?! — дея сўради у базўр тили айланиб.

— Албатта, сен билан шеригинг-да, — деди улардан бири иржайиб.

— Не... Не-га? — деди довдираб қолган Фозил.

— Негалигини кейин биласан, — деб ҳалиги барзанги Фозилни итариб уйга кирди. Ва уйнинг шувови кўчган, лампочкаси қорайиб кетганлигини кўриб: — Намунча исқирт яшайсанлар? — деди ўдайлаб.

Бу пайтда Очил ҳам ошхонада бу ёқса бостириб келган барзангиларни кўриб анграйиб қолганди.

— Сизларга уч дақиқа вақт. Тез кийиниб, биз билан кетишга шайланинглар, — деди яна ўша барзangi. Фақат унинг гапираётганлигини кўрган Фозил уни учаласининг каттаси деб ўйлади.

— Қаёқса борамиз? — деди у йигламоқдан бери бўлиб.

— Эзмалик қилма! Борганда кўрасан ҳаммасини. Ҳозир бўлса, сенинг вақтинг кетаяпти.

Очил билан Фозил апил-тапил кийинишга тушиб кетишди. Худди ўша дақиқада Очилнинг калласи ишлаб қолди. У ошхонадан нарсаларини олиш баҳонасида, чўнтағидаги пулларни яшириб қўйди.

Улар қора “Жигули”га чиқиши.

— Агар менга бирон нарса бўлса, сен жавоб бераб-

сан, — деди Очил ўзбекчалаб Фозилнинг сонидан чимдиг қўяркан.

— Хавотир олма, ҳаммаси кўнгилдагидай бўлади, менимча, бизни Рустамнинг олдига олиб боришади. У ер...

— Ўчир овозингни! — деди олдинги ўриндиқда ўтирган йигит. — Яна мен тушунмайдиган тилда гаплашсаларинг, икковингнинг ҳам каллангни оламан!

Бу гапни эшитганларидан кейин иккита савдогарнинг ҳам нафаси ичига тушиб кетди. “Рустамнинг одамлари русча гапиришмасди. Булар бошқага тегишлига ўхшайди”, — дея хаёлидан ўтказди Очил.

Ярим соатнинг ичида улар Семённинг уйига етиб келишиди. Бу пайтда Семён уйининг олдидаги майсазорда голъф ўйнаётган экан. У дарвозадан кириб келган иккала бегона йигитни кўриб илжайди.

— Азиз меҳмонларни ҳам шундай олиб келадими?
— деди у йигитларига киноя билан, — буларни кафтимизда кўтариб келсаккина, хурматини жойига кўйган бўламиз, азизларим.

Икки йигит Семённинг ёнига борганларидан кейин бошларини эгганча тўхтади.

— Исминг нима? — дея сўради Семён аввал Очилдан.

Очил айтиши билан Семён рус тилидаги изоҳини сўрали. Йигит лаби гезаридан пичирлагудай бўлиб: “Откройся”, деди.

Бу сўзни эшитиб Семён хандон отиб кулиб юборди. Унинг кулгиси уй ичида сигарета чекиб ўтирган Анжеланинг ҳам қулогига эшитилди ва у ўрнидан туриб ташқарига чиқди. Эри уни кўргач:

— Хоним, зўр томошага гувоҳ бўлай десангиз, бу ёққа келинг, — деди.

Анжела унинг ёнига бориб йигитларга бирма-бир қараб чиқди-да:

— Сенда гапим бор, — деб эрининг қўлидан ушлаб четга сурлади.

Хотинининг қилиғидан Семённинг жаҳли чиққан бўлса-да, тишини тишига босди. Аламини ичига ютди. У бунақа пайтларда ишига бироннинг аралашини ёмон кўтарди.

— Кечак Рустам танишган йигитлар шуларми? — деди Анжела паст овозда.

Семён ортига ўгирилиб Очил билан Фозилга бир қараб кўйди-да, бошини қимирлатиб таслик ишорасини қилди.

— Ҳозир сен буларнинг устидан кулмасдан, иззатикром кўрсатишинг керак. Шунда Рустам ўзининг юртдошларига қилган ҳурматингни эшлиб хурсанд бўлади. Ва сенга ишончи янаем ортади, — деди Анжела паст овозда.

— Лекин сенга уйланмайди, тўғрими?

— Бу ёғини менга қўйиб бер. Ҳамма иш кўнглингдагидай бўлади, — дея Анжела эрининг кўзига тикилди. Иккала маккор нигоҳ тўқнашди.

Рустам ёнига ағанаб кетди. Тансоқчилар эса сакраб машинадан тушишли. Шу пайт “Волга”дагилар уларга ўқ уза бошлади. Битта тансоқчи пешонасига теккан ўқдан қулади. Иккинчиси эса машина орқасига ўтиб яширинди. Машина авариясидан ҳеч жойи лат емаган бўлса-да, Рустам карахт аҳволда эди. У нима воқеалар содир бўлаётганлигини идрок этолмасди. “Волга”дан тушган иккита йигит Рустам ўтирган машинагача етиб келишолмади. Уларни “Мерседес”дагилар отиб ташлашди. Бироқ шу ондаёқ қаердандир пайдо бўлган микроавтобусдан ўндан зиёд юзига ниқоб тутганлар бирин-кетин сакраб тушлида, кўз очиб юмғунча иккала “Мерседес”ни кунпаякун қилиб ташлашли ҳамда Рустамни машина ичидан суғуриб олиб, келган томонларига қуюндай учишди. Шундан сўнггина машина ортига яшириниб олган тансоқчи — Эдуард секин бошини кўтариб, микроавтобус кетган томонга қараб мийифида қулиб

Күйди ва ёнидан құл телефонини чиқариб, шошил-масдан рақам терди-да:

— Алло, Павел, ҳаммаси окэй, — деди инглизча талаффузда.

— Хабарим бор. Эртароқ келишган жойимизга етиб кел, — деди гүшакнинг нариги томонидан Эдуард қўнғироқ қилган одам.

Бу гап Эдуардни баттар шодлантириб юборди ва у телефонини қайта жойига солиб, юргурганча йўл четтига ўтди. Ҳудди ўша маҳал тепасидаги чироғини айлантириб ёқсанча милиция машинаси етиб келди. “Бу ёғини энди ўзларинг тозалаб оласанлар”, дея хаёлидан ўтказди Эдуард милиционерларга бир қараб қўйиб. Кейин югурмаса-да, илдам қадамлар ташлаб, кўп қонларга гувоҳ бўлган жойдан узоқлашди.

* * *

Семён Анжела билан гаплашиб бўлганидан кейин бозордаги йигитларга меҳри ийиб, мийифида қулиб бораётганида ёнидаги телефони асабий жиринглади. У телефон рақамига назар солди-да. қулогига тутиб:

— Нима гап? — деди.
— Шеф, — деди қўнғироқ қилган одам, — аҳволимиз чатоқ. Бизга хужум қилиши. Рустамни олиб қочишиди.

— Ким?! — дея бирдан бақириб юборди Семён.
— Тинчликми?! — дея сўради Анжела ՚эрининг безовталаниб қолганини кўриб.
— Машиналар рақамини ёзиб қолдим. Лекин бизга таниш бўлганларда бунақангি рақамлар йўқ! — деган овоз келди гўшакдан.

— Смирновга қўнғироқ қил! Аниқла кимлигини! Тез бўл! — дея бақирган Семённинг бўйин томирлари бўртиб кетди. Кейин телефонини ўчириди-да, асабий тарзда атрофига бироз аланглаб туриб, қўлидаги телефонини савдогарлар томонга улоқтирганча:

— Онангни ... — дея сўкинди.

— Семён, — деди эрига ачиниб қараб турган Анжела, — ўзингни бос! Нима гап экан, менга тушунтириброк гапир!

— Пиво! — дея бўкириб юборди Семён, — менга пиво келтиринглар!

Хизматкорлар югуриб қолиши. Шундан кейин Семён хотинига ўқрайиб қараб:

— Сен билан мени чув тушириши. Оғзимиздаги луқмани ўғирлаши. — деди.

— Тушунтириб гапирсанг-чи, нима бало бўлибди?! — дея қичқирди Анжела.

— Нима бўларди?! Рустамни ўғирлаб кетишибди!

Анжеланинг ранги оқариб кетди. У эридан батттар саросимага тушиб қолди. Барча қилган орзу-ниятлари бирпасда саробга айланиб кетгандай эди унинг назарида.

— Кимнинг ҳадди сифибди? — деди у пичирлаб.

— Билмайман, билмайман! — дея бақирган Семён “асир”лари ёнига югуриб бориб Очилнинг юзига мушт тушириди. — Сенлар айбдорсанлар, сенлар! — деб томоқ йиртган кўйи Фозилнинг қорнига тепди. Зарба унчалик ҳам кучли эмасди. Бироқ бунаقا одам урганда йиқилиш кераклигини яхши билган икки савдогар йигит ўзларини ерга ташлаши. Семён уларни бир-икки марта тепганидан кейин, олиб келинган пивони ютоқиб симириди-да, шишасини улоқтириб юборди.

Ичи ўт бўлиб ёнаётган Анжела эрининг ҳаракатларига эътибор ҳам бермас, ўриндиқда сочини фижимлаганча ўтиради.

Семён унинг ҳолатини кўриб аччиқ жилмайди. Агар қандайdir ўйнаш учун Анжеланинг бунчалик куйинишини у бир ҳафта бурун кўрганида борми, хотинининг терисини шилиб, ичига сомон тиққан бўларди. Бироқ ҳозир у бундай қилолмайди. Кўнглида Рустамни яна қайта қўлга киритиш ишончи бутунлай йўқ бўлмаган.

Семён қалтираб, довдираб турган хизматкорнинг

Қўлидан иккинчи шиша пивони олди-да, Анжела-нинг нариги томонидаги ўриндиқقا ўтириди ва Рустамга яна кимнинг назари тушганлиги ҳақида ўйлай бошлади: “Эскилардан ҳеч ким бу ишни қилмайди. Биринчидан, улардан биронтасининг миллиардер менинг чангалимда эканлигидан хабари йўқ. Иккинчидан, уларнинг ҳеч бири менинг “ов”имга аралашмайди. Ким бўлди экан, бунақа ўзбилармонлик қилган?” Семён чўнтакларини пайпаслаб телефонини қидирди, кейин отиб юборгани эсига тушди-да, хизматкорларига бақириб телефон олиб келишларини буюрди. У аввал Вадимга қўнғироқ қилди. У шаҳарнинг марказий қисмини идора қиларди. Биринчилардан бўлиб Семёнга тан берган, ҳамтовоқлик битимини тузган шу эди. Вадим Семёnnинг гапларини дикқат билан тинглаганидан сўнг:

— Ҳозиргина бу ҳақда эшийтдим. Машиналар нотаниш, улар шаҳарнинг жануб томонига кетган. Мениям асабим ўйнаб турибди. Бесўроқ менинг ҳудудимда ким бунақа зўравонлик қилганлигига ақлим етмаяпти, — деди.

— Сендан илтимос, Вадим, бошқалардан ҳам бир сўраб кўр. Ўзим суриштирсам ҳам бўларди-ю, ўлжа меникилиги одамни ноқулай аҳволга солиб қўяди. Яна ҳар хил хаёлларга бориб юришмасин. Лекин нима бўлган тақдирдаям мен уларни топаман. Калласини биттама-битта узаман, — деди Семён асабини жиловлолмай.

Шундан сўнг Вадим ҳаракат қилишини айтиб гўшакни қўйди.

* * *

Эдуард шаҳар чеккасидаги вайронага айланган тўрт қаватли бинонинг ҳовлисига етиб келгач, ҳеч ким йўқлигини кўриб ҳайрон бўлди. “Шу ерда кутишлари керак эли-ку, наҳотки улар мени алдашган бўлса?”

— дея ўйлади у. Эдуард бу иш билан шуғулланганига олти йилдан ошган эди. У Америкада биронта бойваччага тансоқчи бўлар, кейин уни Россияга ке-

лишга кўндирап, бу ерда эса эскидан таниш бўлган Павелнинг қўлига топшириб, ўзининг ҳақини ундиргандан кейин яна қанот қоқиб Америкага — янги овга учар эди. Бу сафарги ови бошқаларидан анча бошқача, чунки Рустам саноқли миллиардерлардан биттаси эди. Шу боисдан Эдуард Павелга ўзига тегишли улушнинг чўгини баландроқ қилиб айтганди.

Орадан ярим соат ўтганидан кейин Эдуард асабийлаша бошлади. Ҳаттоки алам қилганидан ерда ётган икки-учта фишт парчаларини тепди.

— Қизишка, — деган овоз келди ўша пайт бино ичидан.

Эдуард ялт этиб овоз келган томонга қаради. Бинонинг деразаси йўқ жойидан ҳар доим унинг улшини олиб келадиган Александр тиржайиб қараб тураг эди.

— Оғайни, бу сафар кечикиб қолдингми, дейман?
— сўради Эдуард.

— Сендан аввалроқ келгандим. Бир асабингни си nab кўрмоқчи бўлдим, — деди Александр ҳолатини ўзгартирмай.

— Олиб келдингми?

— Бўлмасам-чи! Биз ҳеч қачон, ҳеч кимга хиёнат қилмаймиз, — деб Александр ташқарига чиқиш учун эшик томон юрди. Йўл-йўлакай, шимининг орқасига қистирилган тўплончасини ўқлади. Буни Эдуард эшитиб қолди ва ўзи ҳам тайёргарлик кўриб кўйди.

— Бу сенинг улушинг, оғайни, — деб қўлйдаги қопни Эдуарднинг ёнига етмасдан улоқтирган Александр тўплончасини энди олаётган маҳал икки қоши ўртасига теккан темир парчасидан орқасига қулади. Қопни олган Эдуард бирдан бино ичига қараб юргурди. У Александрни ёлғиз эмас деб ўйлаганди. Бу ўйи тўғри чиқди. Бузилган бинонинг қайсиидир бурчагидан отилган ўқ унинг қўлини яралаб ўтди.

“Ярамаслар, ҳайвондан тарқаганлар!” — дея пи чирлаци у ярасини иккинчи қўли билан чангллаб. Сўнг бироз нафасини ростлаб, қулогини динг қил-

ди. Бинонинг қаеридандир қадам товушлари эши-тилди. У орқасини деворга тираб овоз келган томонга тўппончасини ўқталиб турди. Рақиб: “Эдуардни яхшигина ярадор қилдим. Ҳозир бораман-у, ас-фаласофилинга жўнатаман-да, ҳамма пулни олиб, жуфтакни ростлайман, Александрнинг ўлганиям кўнглимдаги иш бўлди. Энди миллион бузилмасдан менга қолади”, деган ўйда эҳтиёткорликни бироз йўқотиб, Эдуардга яқинлашарди. Эдуард овоз жуда-ям яқинлашиб қолганлигини сезгандан кейин қўли-нинг оғриғига ҳам, оқаётган қонга ҳам эътибор бер-май тўппончани икки қўллаб ушлаганча душманинг қораси кўринишини кутиб турди.

Шу пайт келаётган кимса юришдан тўхтади. Вақт жуда секинлик билан ўтар, ҳар битта тиқ этган то-вуш ваҳимали эшитиларди. “Нимани кутаяпсан, ит? — дея ичида сўкинарди Эдуард. — Яна озгина юр. Бор-йўғи бир қадамгина”. Аммо унинг кўнглидан кечган гаплар бўлмади. Душмани тош бўлиб қотган-дай жойидан жилмас эди. Бу эса уни баттар жиги-бийрон қилар, бақириб юборишдан ўзини базўр тий-иб турарди. Аксига олиб, қон оқиши кучайиб, боши айланана бошлади. Шу ҳолат чўзилса, хушидан кетиб қолиши ҳеч гап эмасди.

Эҳтиёткорликни йўқотган рақиб Эдуардга яқин қолганида бино ёрифидан инглизнинг аҳволига бир қараб қўймоқчи бўлди ҳамда яраланган “шер”нинг ҳали бардамлигини кўргач, бироз кутишга қарор қилди. Кутганидек, Эдуарднинг боши эгилиб-эгилиб кетавергач, у “ин”идан чиқди. Шу ондаёқ бирдан ик-кала туппонча ҳам ишга тушди. Эдуард юрагидан теккан ўқдан ўтирган жойида боши ёнига қийшайиб қолди. Рақиб эса елкасини ушлаганча инграр, нажот истаб атрофига қаарди. У бироз ётгач, оғриғи су-сайгандек бўлди ва аста-секин эмаклаб Эдуардга яқинлашди. Аммо қопни маҳкам чангллаганча қотиб қолган инглизнинг чангали тезда очилавермади. Ра-

қиб сўкинди. Жонсиз қўлни леворга урди. Шундан кейингина мақсадига етди.

У шайтонлар макон қилган жойдан чиққанида тобора тинкаси қуриб бораётганидан оёғида базур турарди. Қоп ушлаган қули эса қалтираб кетаётган эди. Рақиб яна тўрт қадамни базур босди. Машинасига етиб олиш учун ҳали йигирма-ўттиз одим ташлаш керак. Неча-неча чақирим йўлларни югуриб босадиган йигит бор-йўғи шунчагина масофага мадори етмай қолди. У бешинчи қадамни босмоқ учун оёғини кўтарди-ю, ағанади.

Унинг ағанаганини сал наридаги ахлатхонани титиб юрган пиёниста хотин қўриб қолди-ю, йиқилган йигит ўрнидан турмасдан бурун унинг чўнтағидаги пулларни тинчтиш мақсадида чопиб келди. У рақибнинг қонга беланиб ётганлигини кўргач, тирикми ёки ўликлигини билиш учун туртиб кўрди. Йигит оғир нафас олаётганлигини билгач, унинг чўнтағига қўлини тиқди. Бироқ ҳеч нима илинмади. Пиёниста аёлга бирдан алам қилиб, эркаклардан ўтқазиб сўкинди ва рақибнинг қўлидаги қопни истар-истамай тортиб олди-да, ичини очиб кўриши билан кўзи қинидан чиқиб кетаёзди.

— Ё, раббим! — деди у очиқ кафтларини осмонга чўзиб, — берган неъматинг учун минг қатла шукр!

* * *

Павел эндинга қирқقا кирганди. Миллати жуҳуд бўлган бу одам ўта эҳтиёткор. Ҳар биттә қадам босишидан аввал атрофга қайта-қайта разм соларди. Унга жиной тўда тузиш режасини Швейцария хусусий банкларидан бирининг эгаси бўлмиш амакиси берганди. “Жайдари Россияда, — деганди у, — маданий йўл билан бойлик орттиришдан кўра куч билан катта маблағга эга бўлиш осонроқ. Ҳар хил мағиозлар тутган йўл ўта аҳмоқона. Тўдани шундай бошқариш керакки, сенинг борлигингни энг яқин одаминг ҳам билмасин”. Павел амакисининг гапига қаттиқ амал қилди. У биронта дўконни ўмаришга

тушмади. Биронта одамга зўравонлик ўтказмади. Ризқини четдан — бой мамлакатлардан қидирди ҳамда Эдуардга ўхшаган беш-олти одамни топди. Улар “мижоз”ни Россияга олиб келишар ҳамда Павелнинг қўлига топширишарди. Павел эса қулга тушган “оҳу”га шундай зуфум ўтказардики, у қандай қилиб компьютер орқали Швейцарияга — Павелнинг ҳисоб рақамига ярим бойлигини ўтказиб берганини билмай қоларди. Амакиси у ёқда келиб тушган пулни покпокиза қилиб жиянига расмийлаштириб қўйишни яхши биларди. Албатта, ўзини эсдан чиқармаган ҳолда. Ҳамма ишлар хамирдан қил суғургандай битгач, Павел бойваччани қўйиб юборар эди. Аммо “мижоз” “кутилмаганда” баҳтсиз ҳодисага учрар ва оламдан ўтарди. Шу билан қозон ёпилар эди.

Павел ҳеч қачон Эдуардни хафа қилмаган, ҳар доим олиб келган “мол”ига қараб унинг ҳақини берган. Шу сафар ҳам у берган ваъдасининг устидан чиқди. Аммо “қоп”нинг бир миллионлигини эшитган Александрнинг феъли айниди. Оқибатда эса...

* * *

— Мен сизни қаттиқ ҳурмат қилганимдан каллакесар қўлидан озод қилдим, — деди Дмитрий исмли йигит Рустамга иржайиб қараб, Павел ўргатган гапларини айтар экан. — Семён Россияда, айниқса, Москвада ўзининг безорилиги билан ном қозонган. Сиздай олижаноб одам қандай қилиб унинг қармогига илиниб қолганига ҳайронман.

— Сиз кимсиз? — дея сўради Рустам асабийлашганидан ёнидан сигарета олиб лабига қистирар экан.

— Мен сиздай одамларга ёрдам берадиган ташкилотнинг раҳбариман. Менинг вазифам мамлакатга келган сармоядор кишиларни сог-саломат ватанига етиб олишига қўмаклашиш, — деди ўта мулойимлик билан Дмитрий.

— Яхши ташкилот экан, — деди ҳамон қўли қалтираётган Рустам. — Эвазига қанча тўлайман?

— Вой, сизни қаранг-а, дарров хизмат ҳақида гап-

лашасиз, аввал яхшилаб тамадди қилиб олайлик, у ёини гаплашиш қочмайди. Вақтимиз бемалол, ҳеч қаерга шошаётган жойимиз йўқ. Қани, юринг мен билан, — дея Дмитрий ўрнидан турди.

Рустам истар-истамай унга эргашди. Улар бошқа хонага ўтишди. Дарҳақиқат, узун стол турли-туман ноз-неъматлар-у егулик, ичкиликлар билан тӯла эди.

Дмитрий Рустамни тўрга ўтқазиб, ўзи пойгакдан жой олди.

— Жаноб Рустамбек, — деди Дмитрий француз конъягининг оғзини очар экан, — футболга қизиқасизми?

— Жиним сўймайди, — дея жавоб қилди Рустам қисқагина.

— Бекор қиласиз. Футбол, бу — фалсафа. Ундан жуда кўп нарсаларни ўрганса бўлади. Мана, мен футбол бошланди дегунча, ҳар қандай ишимни йифишираман. Агар хотиним сўйкалаётган бўлса, унинг хоҳиш-истагини футболга алмасиб қўяқоламан. Кейин шунчалик жон-дилим билан футболни томоша қиламанки, натижала бир дунё маъно топаман. Менга ким ютишининг қизиги йўқ. Асосийси, йигирма иккита одам у ёқдан-бу ёққа югуриб юрса бас.

Улар бир қадаҳдан конъяк ичишганларидан кейин Рустам бироз ўзига келди. Ва ўйинни чўзиб ўтираслиқ учун:

— Қанча берайин? — дея сўради.

— Ҳимматингизга яраша, — деди Дмитрий қадаҳни айлантириб ўйнаркан.

— Аниқроқ айтинг, — деди Рустам тоқати-тоқ бўлиб.

— Майли, агар сиз суммани шунчалик тез билишни истасангиз, айтганим бўлсин. Биз ҳар доим эллик фоизга ишлаймиз. Чунки меҳмонларни қаттиқ ҳурмат қиласиз.

— Ниманинг эллик фоизига? — деди ҳайрон бўлган Рустам.

— Семён олиши керак бўлган сумманинг эллик фоизи.

— У мендан бир тийин ҳам олмоқчи эмасди. У мени бирга ишлашга таклиф қилган, холос.

— Ёш бола эмаслигингизни ўзингиз яхши биласиз, жаноб. Лекин бироннинг ичидаги нарсани билишдан оғир нарса ҳам йўқ дунёда. Балки ҳақиқатан ҳам сиз Семённинг бутун бойликларингизни ўзиники қилиб олмоқчи бўлганидан хабарингиз йўқдир?

— Нималар деяпсиз? — деди ҳайратланган Рустам.

— Бутун сармоянгиз қанчалигидан яхши хабаримиз бор. Шунинг эллик фоизини, биз сизга ҳисоб рақами берамиз, ўшангә ўтказасиз.

Бу гапни эшитиб Рустам тошдек қотиб қолди.

* * *

Анжела бошида қаттиқ оғриқ пайдо бўлганидан кейин ўрнидан туриб, уй томонга кета бошлади. Семён унинг орқасидан қараб турганида телефон жиринглаб қолди. Гўшакни кўтарган эди, ундан Вадимнинг овози келди.

— Семён, мен сени хурсанд қиломайман. Одамларнинг хабар беришича, микроавтобус ва "Волга"-даги рақамлар сохта экан. Уларнинг номерлари аввал битта "Запорожец" ва "Москвич"га берилган. Ўша машиналарнинг эгалари бундан икки кун муқаддам рақамлари ўғирлаб кетилганини айтишиди, — деди Валим.

— Ахир улар сув эмаски, ерга сингиб кетса, қаергадир киргандир?! Кимнингдир хабари бордир?! — деди хуноби ошиб Семён.

— "Волга"дагилардан бири тирик қолган, ҳозир касалхонада ўладиган бўлиб ётибди. Агар ўша ўзига келса, биронта маълумот олиш мумкин.

— Қайси касалхонада? — дея шошиб сўради Семён.

— Марказийда, менинг одамларим у ерда навбатчилик қилаяпти.

— Яхши, ҳозир мен у ерга етиб бораман, — деди

Семён ва гүшакни қўйиб тансоқчиларни чақирдида, уларга машинага ўтиришларини буюрди.

Эрининг қаёққадир кетаётганилигини кўрган Анжела уйидан югуриб чиқди. Семён унга ўқрайиб қарди. Аммо хотини бунга эътибор ҳам бермади.

— Янгилик борми? — дея сўради.

— Арзимас. Лекин унга сенинг боришинг шарт эмас, мен ўзим ҳал қилиб келаман.

Анжела бирдан бўшашиб қолди. Унинг хаёлидан “Ишқилиб, тирик бўлсин-да”, деган ўй кечди.

— Манавиларни, — деди Семён жирканганча иккита савдогарни кўрсатиб, — подвалга қамаб қўйинглар, керак бўлиб қолади.

Учта машина бирин-кетин уйдан катта тезликда чиқиб кетди. Эрига нисбатан умуман ҳурмати қолмаган Анжела шу топда унга омад тилади.

Семён касалхонадаги боши дока билан боғланган, ҳануз ҳушига келмай ётган йигитга қараб турди-да:

— Буни ўзига келтиришнинг иложи борми? — дея сўради шифокордан.

— Афсуски, — деди бошини чайқаб шифокор, — балки умуман ҳушига келмаслиги ҳам мумкин. Жароҳати оғир.

Шунда Семён бирдан шифокорнинг ёқасидан олди-да:

— Менга у тириклайн керак. Агар ўлса, сен ҳам ўласан! — деди ўшқириб.

Кўзларидан ўт чақнаб турган Семённинг важоҳатини кўриб врач қалтираб кетди ва бошини қимирлатиб “хўп”, деган ишорани қилди. Семён унинг ёқасини қўйиб юбориб хонадан чиқди ҳамда ҳушсиз ётган йигитни аравачада олиб келаётган иккита оқ халатли йигитга урилиб кетай деди.

— Эшакка ўхшаган! Ўласанми кўзингга қарасанг?! — дея ўшқириди у оқ халатли дўхтирларга ва йўлак бўйлаб кетаётиб бир нарса эсига тушиб қолган одамдай жойида таққа тўхтади-да, ортига ўгирилди. Беморни олиб кетаётган шифокорлар Семён чиққан

хонанинг ёнидаги палатага кириб кетишиди. Бироз ўйланиб турган Семён дарров уларнинг ортидан борди.

Эшик ёнида яна бояги оқ халатлига урилиб кетишига сал қолди. Аммо бу сафар унинг жаҳли чиқмади.

— Нима қипти бунга? — дея сўради шифокордан.

Шифокор ортига бир қараб олди-да:

— Елкасидан ўқ теккан, — деди.

— Тирикми? — дея сўради Семён кўзлари каттакатта бўлиб.

— Ҳозирча тирик. Кўп қон йўқотиб ҳушидан кетган, — деди шифокор.

— Қанақа қон керак? Ҳозироқ топиб бераман, — деди Семён бирдан ҳовлиқиб.

Бундай муруватли одамнинг бу ерда қандай пайдо бўлиб қолганлигига ҳайрон бўлган дўхтир Семёnnинг орқасида ранги гезариб турган шифокорни кўрсатиб:

— Бу киши аниқлаб айтади, — деди.

Семён боягина ўзи ёқасидан олган одамга ўқрай-иб қаради.

— Ҳозироқ қон группасини аниқлаймиз, — дея шошганча шифокор палатага кирди.

Орадан беш дақиқа ҳам ўтмасдан ярадор қонининг гуруҳи маълум бўлди. Бу ҳақда шифокор Семёnnга айтиши билан у тўртта йигитни унга рўпара қилди.

— Буларники тўғри келмаса, бошқа яна истаганча одам топиб келаман, — деди Семён йўлакдаги ўриндиқقا ўтириб.

Ярадорга қон қуйилгандан кейин ярим соатлар чамаси вақт ўтиб у кўзини очди. Шифокор бу ҳақда дарҳол Семёngа хабар берди. Ўрнидан сапчиб турган Семён шошилганча палатага кирди. Ярадор йигит шифтга тикилганча ётар эди.

— Исминг нима? — дея сўради елкасига оппок халат ташлаб олган Семён мулоимлик билан.

Ярадор нигоҳини шифтдан олиб Семёnga қаратди.
Ва бироз жилмайиб:

- Мени бекорга бу ерга олиб келишибди, — деди.
- Асосийси, жонинг омон қолибди. Шунисига шукр қил. Испингни айтмадинг?
- Боря, — деди йигит бироз афти бужмайиб.
- Боря, ким сени бу аҳволга солди? — дея сўради Семён энди меҳрибон товушда.
- Сиз прокурор эмасмисиз? — дея суҳбатдоши нинг саволига савол билан жавоб қайтарди йигит.
- Мен сенга яқин одамман. Прокурор энди кела-ди, — деди Семён тутақиб кетаётган бўлса-да, ўзи-ни босиб.
- Ҳеч ким, ўзим йиқилдим, — деди йигит қўрслик билан.
- Ҳов, итдан тарқаган! — деди бирдан жон-пони чиқиб кетган Семён. — Мен сендан сўраяпман, ким сени бундай аҳволга солди? Бўл, тез айт. Йўқса, ҳозир қайтиб келган жойингга қараб жўнайсан. Фа-қат бу сафар қайтиб келмайдиган бўлиб.
- Сизни мен танимасам... — деди қўрқиб кетган Боря.
- Яхшилаб эсингдан чиқмайдиган қилиб танитиб қўяман, агар менинг саволларимга жавоб бермасанг, — деди Семён ғазабдан афти бужмайиб.
- Инглиз йигит, оти Эдуард. Қандайдир милли-ардер билан Америкадан келган экан. Унинг доля-сини олиб боргандик. Келишолмадик. Отишмада менинг шеригим билан инглиз ўлди. Мен, яраландим, — дея тез-тез жавоб бера бошлади Боря.
- Миллиардер қаерда? — дея сўради Семён Борянинг тезда тилга кирганидан хурсанд бўлиб.
- Уни Дима асир олган. Ленинградский қўчаси-ning охиридаги уйнинг подвалида қурилган тунги клубда ҳозир, — деди Боря ҳансираф.
- Бу гапинг бошқача бўлди, — деди унинг елка-сига қоққан Семён. — Энди худо хоҳласа, кўп яшай-сан.

Йўлакка чиққан Семён йигитларига Боряни ҳозироқ бу ердан олиб кетишларини буюриб, ўзи ташқарига кетаётганда уни шифокор тўхтатиб қолди.

— Нима гапинг бор? — дея сўради Семён афтини бужмайтириб.

— Ярадорнинг бу ерга олиб келингандиги ҳақида ички ишларга хабар берилган. Ҳали-замон келиб қолишади. Шунинг учун ярадор шу ерда қолгани маъқул, — деди у қўрқа-писа.

— Ўлгинг келаяптими? — дея сўради бамайлихотир Семён.

— ...

— Унда уларга ўзинг гап топиб берасан! — деб Семён тез-тез юрганча касалхонадан чиқиб кетди.

У машинага ўтириши билан қўл телефонни жиринглади.

— Алло, — деди телефонни қулогига олиб борган Семён.

— Ишлар қалай, биродар? — деган овоз келди телефондан.

— Вадим, ҳаммасини аниқладим. Фақат мен бир нарсага ҳайронман. Дима деган “тип”ни танийсанми?

— Дима... Дима, ҳа, сал эсладим. Бир сафар йигитларим Дима исмли чурвақа пайдо бўлганини айтганди. Ўша машинага ҳужум қилибдими? — деди Вадим.

— Шунақага ўхшайди, ҳозир борайлик-чи, кейин кўрамиз, — деди Семён мамнун қиёфада.

Ертўлага қамалганларидан кейин Очил йиғлаб юборди-да:

— Ҳаммасига сен айбдорсан! — дея қичқирди Фозилга, — сенинг лақмалигинг касофатига бу ерда ўтирибмиз.

— Нима қилибман лақмалик қилиб?! — дея бақириб юборди Фозил ҳам, — мен бошлаб келдимми ўша бойваччани?

— Сен тоғамнинг ўғли йўқолиб қолганди демаганингда, шу кунлар йўғиди бошимизда, — деди Очил бетон жойга ўтиаркан.

— Гап менинг шунаقا деб гапирганимдамас. Сен билан мен тушунмайдиган ўйинга тасодифан қўшилиб қолдик. Бор-йўқ айбимиз шу, ошна. Боя анавилярнинг телефонда гаплашганларини эшитмадингми?

Очил бошини эгди. Хотини, учта боласини эслади. Хотини Очил йўлга чиқаётганида: “Дадаси, кўнглим жуда ғаш. Сал кейинроқ боринг”, деган эди. Очил унинг гапига қулоқ солмади. “Ҳозир сезон, агар сезондан кечга қолсак, ҳамма қилған ишларимиз чиппакка чиқади”, деди. Шу бўйи хотини жимиб қолди. Ортиқча сўз айтмади. Аммо Очил дарвозадан чиқар пайти ортига ўгирилиб қараганида, хотини йиғлаб турарди. Унга қўшилиб учта боласи ҳам кўз ёши тўкишарди. Очилнинг кўнгли ўша пайт алланечук бўлиб кетди. Болаларининг ёнига югуриб боргиси, уларни бағрига босгиси келди. Аммо ўзини босди. Уларнинг йиғлаб қолишини одатий ҳол деб тушунди. Энди бўлса ўшандада хотинининг дилини оғритгани учун ичидан эзилиб ўтирибди.

Орадан бир соатлар чамаси вақт ўтиб ертўланинг эшиги очилди. Иккала савдогар йигит ҳам бирдан ўринларидан туришди. Тақ-туқ этказиб зиналардан паства Анжела тушиб келди.

— Яхши ўтирибсизларми? — дея сўради у йигитлардан.

Очил билан Фозил бошини эгди.

— Ҳафа бўлмайсизлар, шунақанги ҳолатлар ҳам бўлиб туради, қоринларингам роса очқагандир? Ҳозир мен сизларни овқатлантираман, орқамдаи юринглар, — дея йигитларнинг кўнглини қўтарган Анжела ортига бурилди-да, яна зинадан тепага қараб чиқа бошлади.

“Ҳақиқат бор экан-ку, мана, бизниям одам қаторига қўшишди”, дея ўйлади Фозил. Очилнинг хаёли

эса бошқача эди. “Нега энди дабдурустдан бу ойим-ча бизга муруват кўрсатиб қолди? Бунинг тагида бошқа гап йўқмикан? Эри бунга “Ўзинг буларнинг адабини бер”, деб айтган бўлса-чи? Ҳозир бу му-лойим супурги овқатимизга заҳар солиб берса нима қиласиз? Бекордан-бекорга ўлиб кетаверамизми?” — деган хаёлга борганди у.

Эрига ёрдам бериш учун ҳамма одамлар унинг ёнига кетганидан Анжела усталик билан фойдаланиб қолмоқчи эди. “Рустам булар билан гаплашган. Шундан кейин унинг феъли айниб қолди. Булар унга нималарницир айтиб беришган. Мен Рустамни ўзбек эмаслигига ишонтиришим керак. Шунда у тўлалигича меники бўлади”, — деган ўй унинг миясига ўрнашиб қолганди.

— Йигитлар, — деди Анжела егуликлар билан тўлдирилган столнинг бир чеккасидаги стулга ўтириб, — менинг сизларга раҳмим келиб кетди. Эримнинг аҳволини кўрдинглар. Бўридай одам. Ҳеч нарсадан қайтмайди у. Боя сизларни ураётганида базур тўхтатиб қолдим. Энди эса, сизларнинг менга ёрдамларинг керак бўлиб қолди. Ўйлайманки, бизнинг фикримиз бир жойдан чиқади.

Фозил Анжела гапиргунча дастурхонга қўлини узатган эди, Анжела ўтиришлари билан овқатга ҳам таклиф қиласдан бирдан гапириб юборганидан кейин секин қўлини тортди. Очил унга ўқрайиб қараб қўйди-да: “Қани, бизни нима деб лақиллатишни ўйлаб қўйибсан? Бир эшитайлик-чи”, — деб хаёлидан ўтказди.

— Сизлар bemalol олаверинглар, тортинманглар. Менинг одатим шунаقا, овқатдан олдин кўп гапираман, — деди уларнинг жим турганларига ажабланган Анжела.

Йигитлар дастурхондаги турфа ноз-неъматлардан чўқина бошлашди. Уларнинг бундай овқатланишини кўрган Анжела йигитларни хижолатга қўймаслик учун ташқарига чиқиб кетди. Шундан кейингина

бехад очиққан иккала савдогар ҳам ҳақиқий эркак-часига овқатланишга тушиб кетиши. Турли таомларнинг ҳиди томоғини қитиқлаб, Очил хаёлида боя пайдо бўлган ўйни эсидан чиқариб юборганди. Шу боисдан ҳам кавшашда шеригидан ортда қолмасди.

Ташқаридаги Анжела бекорга юрмади. У йигитларни қандай қилиб бутунлай ўзига оғдириб олиш, кейин уларнинг хизматидан усталик билан фойдаланиш режасини тузди.

Анжела ошхонага кириб келганида Фозил билан Очил тўйган қўзидаи бўлиб ўтиришарди. Даструрхон ҳам анча очилиб қолган эди. Буни кўрган Анжеланинг лабида табассум пайдо бўлди. Жувон аввал сал энгашиб, кейин стулга секин ўтириди. Унинг шундоқ ҳам кўриниб турган оппоқ бўлиқ сийналари баттар ўзини қўз-қўз қилди. Буни кўрган Фозил ўрнидан туриб кетаёзди. Очил эса ютиниб қўйди. Анжела йигитларда пайдо бўлган ўзгаришни сезди ва оёқ томонига ноз билан қараб кўйлагини бироз тортиб, оппоқ сонини бўлдиригача очиб қўйди. Очилнинг қўзи гарчи кейинги жодуга тушмаган эса-да, Фозилнинг юраги қинидан чиқиб кетаёзди.

— Ҳали мен сизларга айтгандим, — дея гап бошлиди қадаҳга шошмасдан шампан виносини ўзгача бир назокат, эҳтирос ила қуяётган Анжела, — менга ёрдамларинг керак.

— Қанақа ёрдам бўлса тайёрмиз, — деб юборганини Фозил ҳатто ўзи ҳам сезмай қолди.

— Оҳ, сиз эркаклар, — деди жувон қадаҳдаги шампан виносидан бир қултум ютаркан. — Ҳар доим мард ва шошқалоқсизлар.

Рағбат Фозилга хуш ёқди. У лаб-лунжини умуман иғиширолмай қолди. Агар ҳозир имкон бўлса Анжелага қалишиб ўтириб олган бўларди. Очил эса бироз сергакланди. Жодуланиб қолмаслиги учун бoshини эгди.

— Сизларга айтмоқчи бўлган хизматим унчалик

ҳам оғир эмас. Истасанглар ҳамма ишни шу ернинг ўзида битириб қўйиш мумкин.

— Йўғ-э, — деди Фозилнинг кўзи ёниб, — бўлмаса тезроқ бошлайлик вақтни чўзмай, балки ундан кейин бошқа иш ҳам чиқиб қолар.

Анжела савдогар йигитнинг шамасини бирдан тушунди. Ва секин этагини тортиб иккинчи жодуни беркитиб қўйди-да:

— Гап бундай, йигитлар, — деди бирдан жиддий қиёфага кириб, — Рустам билан қандай таниш чиқиб қолдинглар? Мени шу нарса қизиқтирияпти.

Фозил билан Очил бу гапдан кейин бирдан бирбирига қаради. Ва маъноли кўз уришириб қўйишди.

— Танишлигимиз, — дея гап бошлади зумда бояги шайтон хаёллари пучга чиққанини сезганидан ҳафсаласи пир бўлиб Фозил, — танишлигимиз, умуман, бизнинг у билан танишлик жойимиз йўқ...

— Ҳа, — шундай дея бирдан Фозилнинг гапини бўлди Очил, шериги ўйламай яна биронта гапни лақи́ллаб қўйишидан чўчиб, — биз у билан гул бозорида тасодифан танишиб қолдик. Гулимизни сотиб олди-да, кўнглида бизга бир яқинлик сезди, сўнг ресторонга таклиф қилди. Еб-ичиб, маст бўп қолибмиз. Бўлган гап шу.

— Яхши, — деди Анжела жилмайиб.

— Унда қайси бирларинг унга қариндош чиқиб қолдиларинг?

Фозил Анжеланинг сўроғидан дув этиб қизариб кетди:

— Битта қариндошимиз ёшлигига йўқолиб қолган экан. Шуни айтувдим, у ўша менман, деб қолди. Бўлмаса уни умримда биринчи кўриб туришим. Менга умуман ўхшамайдиям, — деди у тутилиб-тутилиб.

— Шу, холосми? — деди Анжела таажжубга тушиб.

Биронта гап кам бўлмадими деган ўйда Фозил Очилга қаради.

— Бори шу, — деди Очил.

— Айнан мен куттан нарса, энди буларнинг барини Рустам келганидан кейин унинг ўзига айтиб берасизлар, келишдикми? — деда Анжела ўрнидан турди. — Энди сизларни кузатиб қўяман, — деди.

Яна қамалиб қолғанларидан кейин бурчакка ўтирганча икки тиззаси орасига бошини тиқиб олган Фозил секин борди-да:

— Ошна, лекин зўр нарсайкан-а? — деди.

Асабий равишда бошини кўтарган Очил овсар шеригига еб қўйгудек тикилди-да:

— Зўрлигини пишириб ейсанми? Эртага Рустамга шунаقا сени алдагандик десак, бизни ўлдиртириб юбормайдими, эшшакмия!

— Ваҳима қилаверма, балки қўйиб юборишар. Ҳар қалай, биз уларнинг киссасига ўғирликка тушмадикку! — деди ранги ўчиб кетганилигини билдирамаслик учун бошқа ёққа қараган Фозил.

Анжела савдогар йигитлардан ўзи кутган жавобни олган эди. Энди у Рустамни қўйиб юбормаслик учун ҳамма чорани қўллашга тайёр, фақат бунинг учун эри уни олиб келиши шарт эди. “Семён осонлик билан Рустамни қўйиб юбормайди. Бунинг учун мен ҳйла ишлатиш им керак. Агар бунда эрим қаттиқ жабрланиб қолсаям ҳеч нарса қилмайди. Шунга лойиқ у. Аммо ўша ҳйилани қандай амалга ошириш лозим?” деда ўйлаган Анжела ўзининг саволига ўзи жавоб излаб тополмай хуноби ошди.

Худди шу пайт унинг қўл телефони жиринглаб қолди. У телефондаги рақамга қараб ҳайрон бўлди. Унда мутлақо номаълум рақамлар ёзилган эди. Жувон телефон тугмачасини босиб қулогига олиб борди-да:

— Алё, — деди

— Анжелка, — деган овоз келди ундан, — дугона-жон!

— Маргарита! — деб юборди бирдан Анжела ҳам.

— Сени базўр топдим, Анжелка, одам шунақаям

бұладими, бир йилдан ошиб кетди-я күришмагани-
мизга. Ҳеч қурса бир маротаба құнғироқ ҳам қилиб
күймайсан.

— Тұхта, тұхта, — деди бирдан кулиб юборган
Анжела, — индамасам ҳозир пулемёт бўлиб кетасан.
Аввал саломлашиб олайлик-чи!..

— Саломдан олдин ҳамма гапларимни айтиб ол-
масам, сени ҳозир эринг чақириб қолади, худди ав-
валтиларидаи. Кейин гапларим ичимда қолиб кета-
ди.

— Эрим ҳозир уйда йўқ, — деди Анжела ва бояги
саволига жавоб топилғандай бўлди-ю, юзига табас-
сум югурди. — Рита, бугун сен билан кўришишнинг
иложи борми?

— Бўлмасам-чи? — деган овоз келди гўшакдан. —
Сенга худди шунинг учун қўнғироқ қилаётган эдим.
“Белые ночи”га келгин, шу ерда кўришамиз.

Анжела шошилганча гўшакни жойига қўйди-да,
кийиниш учун хонасига югурди.

У ресторанга етиб келгунча орадан бир соатга яқин
вақт ўтди. Маргарита аллақачон келиб ултурган, ду-
гонаси кўринавермагач, битта шампан виносини эр-
мак қилиб ўтирас эди.

Улар ўпишиб кўришдилар, Маргарита дугонасига
бошдан оёқ қарап экан:

— Анжелка, намунча очилиб кетдинг? Ёшариса-
нам. Ҳозироқ менга бунинг сир-асрорини айтасан,
йўқса бу ердан сени кўйиб юбормайман, — деди.

— Тсс! — дея кўрсаткич бармоғини лабига босди
Анжела. — Эркаклар шу гапларингни эшлишишса,
мени сендан тортиб олишади.

Икки дугонага ҳам гап нашъя қилиб хандон отиб
кулиб юбориши. Сўнг улар столга бир-бирига қара-
ма-қарши ўрнашиб, озгина у ёқ-бу ёқдан гаплашиб
ўтиришли. Маргарита эрмак қилган шампанни туга-
тишиб, бошқа олиб келтириши. Кейин Анжела бу
ерга келгунича миясида пишитган гапларни дугона-
сига бирма-бир айта бошлади.

— Шоҳона яшаяпман. Кўнглим тусагани — мұхайё, — деди у ҳазинлик билан. — Лекин ҳақиқий баҳтни яқиндагина учратдим.

— Йўғ-э, — деди унга тикилиб қолган Маргарита, гапир-чи, қанақа баҳт экан?

— Бир одам.

— Эрингми?

Анжела дутонаси берган саволдан пиқ этиб кулиб юборди.

— Қизиқсан-а, Маргарита, ёшлигингда қандай бўлсанг, бир грамм ўзгармагансан. Бунинг учун менга эмас, сенга ҳавас қилиш керак. Агар ўша баҳт эрим бўлганида сенга айтиб ҳам ўтирумасдим. Умуман бошқа одам, тушунаяпсанми, Рита? Бошқа!

— Хўш, кейин-чи?

— Нима кейин?

— У одам қанақа, қандай қилиб танишиб қолдинг? Ҳаммасини бирма бир гапиравер, биласан-ку, бунақа гаплар менинг жону дилим.

— У билан танишиш-у, учрашувларни ҳаммасини эрим ташкил қилиб берди.

— На-ҳот-ки?! — деди Маргарита ўрнидан туриб кетди. — Нималар деяпсан, қандай қилиб эринг?..

— Рита, дугонажон, ўтиранг-чи, — деди Анжела паст овозда, дутонасининг ҳовлиқиб кетганидан ясама ранжиб. Ва қадаҳидаги шампан виносини охиригача ичди. Кейин бироз ўйланиб тургач, Рустам ҳақида батафсил гапириб берди.

— Қойил, — деди Маргарита Анжела ҳикоясини тамомлагач, — бутун бошли романтика... Энди нима қилмоқчисан?

— Бу ёғига сенинг ёрдаминг керак. Эримни қўлга туширишда кўмаклашмасанг бўлмайди. У мени бекордан-бекорга Рустамга тортиқ қилгани йўқ. Эртага мақсадига етади-ю, кейин мендан воз кечиб қўя қолади. Ундан кейин аҳволимга маймунлар йиглайди. Хуллас, менинг режам бунақа. Сен чиройда мендан ўтсанг ўтасан-у, лекин ортда қолмайсан. Демак,

эримни бемалол ўзингта боғлаб олишинг мумкин. Мен учун, ёшлидан бирга катта бўлган дугонанг учун у билан бирга бўласан. Мен эса ўша хонага камера ўрнатиб қуяман. Бўлди, шу билан ишинг битади. Эвазига қуруқ қўймайман.

Маргарита ўйланиб қолди. Анжеланинг қўйнига кириб чиқиш унинг учун хамирдан қил сурғандай осон иш. Шу кунгача не-не эрларнинг “танобини тортмади”. Уни ҳозир бошқа масала қизиқтиради. Яъни, эвазига бериладиган хизмат ҳақи...

— Хўш, қанча бермоқчисан, дугонажон? — дея кулиб қаради у Анжелага.

— Битта лимон етадими? — деди Анжела дугонасининг кўзига тик қараб.

— Битта лимон миллионлар олдида нима деган гап? Сал оширанг, яхши бўлармиди? — деди мийигида кулиб Маргарита.

— Бир ярим етадими?

— Чидаса бўлади.

— Яхши, — дея Анжела хизматчи аёлни чақириб, унга конъяк келтиришни буюрди.

* * *

Семённинг одамлари Дима ўтирган уйнинг атрофини ўраб олишди ва бу ҳақда хўжайнинг хабар бериши. Шундан сўнг Семён бор-йўги битта соқисини олиб машинада ўша уйнинг ёнига бордида, ертўлага тушмоқчи бўлганида унинг йўлини иккита барзанги тўсди.

— Қаёқقا? — деди улардан бири оғзидағи сақичини чайнаб.

Семён бир муддат уларга қараб турди-да:

— Хўжайнларингнинг ёнига, — деди.

— Кимсан? — деди ҳалиги барзанги оғзини чапиллатишида давом этиб.

— Хўжайнингга бориб айт. Семён бор-йўги битта йигити билан келибди, де.

Таниш ном эштилиши билан барзанги бесаран-

жом бўлиб қолди ҳамда ёнидаги телефонни олиб дарров Димага қўнгироқ қилди.

Дима Семёnnинг бу ерга келишини хаёлига ҳам келтирмаганди. Чунки унинг ўзи Рустамни “тинчи-тишда” иштирок этган ва ҳеч ким бу ишнинг “ҳиди”-ни олмаганлигига ишончи комил эди. “Балки, — дея йилади у, — бошқа иш билан келгандир. Бирдан ваҳимага тушиб қолиш мендай одамга ярашмайди. Агар мен Рустамни бирёқли қилганимда ҳам битта одами билан нима қила оларди. Бирпасда ўзини ҳам тинчтиб қўяқоламан”.

Ичкаридан “киритавер”, деган буйруқни эшигтан барзанги дарҳол Семёнга йўл бўшатди. Семён ертўлага кираётиб қўлидаги сигаретани оёқ остига ташлади. Бу “ишни бошланглар”, деган буйруқ эди.

Дима “авторитет”ни қучоқ очиб кутиб олди ҳамда ўзининг мана шундай кўримсиз жойдан идора очганлиги учун узр сўради.

— Сичқонлар шунаقا жойда яшайди, — деди Семён қулиб. — Сенинг бунаقا жойдан ин қилганингнинг ҳеч ажабланарли жойи йўқ.

Бу гапдан Дима гезариб кетди. Бошини у ёқдан-бу ёққа боксчилардай чайқаб:

— Одамни тузлашнинг жа ҳадисини олгансиз-да, ўртоқ қария, — деди ва сал нарида турган йигитига қараб лабини тишлиди. Бу унга “тайёр тур”, деган ишора эди. Тансоқчи йигит қўйнига қўлини тиқдида, тўлпончасини маҳкам ушлади.

— Мен сени тузлаш учун келганим йўқ. Бунга вақт бор. Менга Рустамни бер, мен кетаман!

— Ким сизга қанақангидир Рустамни менда деб айтди? — деди Дима ўзини ҳайрон бўлғандай тутиб.

— Ўзингни гўлликка солма, — деди Семён ўқрай-иб.

— Туҳмат қандай жазоланишини ўзингиз мендан яхшироқ биласиз, деган умиддаман, — деди мийигида кулимсираган Дима.

— Ёлғон эса ундан ҳам баттарроқ! Сен йирикроқ

одам бұлғанингда мен аллақачон таниған бўлардим.
Ўзинг майда экансан, лекин гапни майда қилма!

— Ҳақоратлар сони ортиб бормаяптими, муҳтарам Семён ака? — деди Дима киноя билан.

— Айтганимни қилмассанг, бундан баттариям бўла-ди, — дея Семён ёнига қўлини тиқди. Шу заҳоти унга тансоқчи тўппончасини ўқталди.

— Бу ер менинг жойим, шундай экан, бу ернинг қонуни ҳам меники, ортиқча ҳаракат қилмасдан ўзингизни қўлга олиб ўтиринг, — деди Дима қовоги оси-либ.

— Сен майдагина бола экансан, десам қўён билан ошнолигинг ҳам бор экан-ку, — дея Семён ёнидан папирос қутисини чиқариб ундан битта дона олди-да, лабига қистириб энди тутатганида эшик томонда шовқин-сурон бўлиб қолди. Бироздан кейин Семённинг кетма-кет бешта йигити кириб келди. Улар қўлларидаги тўппончаларини Дима билан тансоқчи-нинг пешонасига тирашди.

— Айтдим-ку, ука, ҳали биз билан гаплашишга майдалик қиласан деб. Ёлғончилигинг учун жазони эса, агар айбингнц ювмассанг, албатта, ҳозирнинг ўзи-даёқ оласан, — дея Семён ўрнидан турди ва папи-росни чуқур тортди. — Рустам қаерда?

Гарчи пешонасига ўқталган тўппончадан Диманинг баданидан совуқ тер чиқиб кетган эса-да, у вазият-дан силлиқ чиқиб кетиш учун Семённи яна бир марта алдаб кўрмоқчи бўлди.

— У бу ерда эмас, қўшни кварталдаги ўттиз бе-шинчи уйнинг йигирма олтинчи квартирасида.

— Шунаقا дегин, — деди Семён мийигида кулиб ва ёнидаги йигитга: — Болалардан иккитасини олиб кўриб келинглар, — деб буюрди.

Дима: «Мениям қўшиб жўнатади. Йўлда амал-та-қал қилиб қочиб қоламан», дея ўйлаган эди. Аммо ўйлагани рўёбга чиқмади. У чуқур тин олди.

— Йигитларингиз келгунча ўтиришга рухсат бе-

парсиз, — деди Дима Семёнга имкон қадар илжайиб қарашга ҳаракат қилиб.

— Э, узр, — деди Семён қулинни икки ёнга ёзиб, — сенинг мезбон эканлигинг эсимдан чиқиб қолибди.

У Дима билан унинг одамига тўппонча ўқталиб турғанларга бир имо қилган эди, улар хавфдан вақтинча озод бўлишиди. Дима айланма столга бориб ўтириди ва стол тагидаги кичкина тугмачани босди.

Павел амакиси билан гаплашар экан, кўзи ёниб-ӯчаётган қизил чироқقا тушди. Бу Димага ҳужум бўлганлик белгиси эди. У амакисига кейинроқ қўнфироқ қилишини айтиб, гўшакни жойига қўйди-да, “Қўриқчилар!” дея бақирди.

Павел ўтирган хонага бирин-кетин иккита барзаниги юргурганча кириб келди.

— Димага ҳужум бўлган, тезда ҳаммани йиғиб унинг ёнига боринглар! — деди асабийлашган Павел.

Оралан беш дақиқа ҳам ўтмасдан Павелнинг ҳовлисидан кетма-кет тўртга машина қушдайин учиб чиқиб кетди.

Дима: “Ишқилиб, Павел уйида бўлсин, тезроқ йигитларни жўнатсан”, дея ўйлади. Аммо худди ўша пайт Семённинг орқа томонидан йўтал товуши эшитилиб қолди. Семён ўрнидан турди-да, нақшинкор деворга яхшилаб разм солди. Ва унда эшик борлигини сезиб қолди.

— Ўҳ, — деди у ортига бурилиб Димага қарар экан, — хазинанг бу ёқдага ўхшайди-а! Оч, бир кўрайлик-чи, нималарни яшириб қўйибсан? Йигитлар қайтиб келишгунча зерикмасдан “музей”ингни томоша қилиб турамиз.

Диманинг ичи шиф этиб кетди. Нима қиларини билмай довдираб қолди.

— Оч! — дея бақириб юборли Семён Диманинг қизариб-бўзариб кетганини кўргач.

Дима бирдан стол тортмасини тортиб, яширган тўппончасини олмоқчи бўлди. Лекин улгурмади.

Унинг ёнгинасида турган Семённинг одами биқирига тепиб юборди. Семён пинҳона хонада ким яши-ринганини тусмоллаб билди. Ва ғазабдан қалтираб, Диманинг ёқасидан ушлади-да, ўрнидан тургазиб:

— Мараз, агар ҳозироқ эшикни очмасанг, итнинг кунини бошингга соламан! — дея бўкирди.

Димадан садо чиқмади. У ичиди Павел эртароқ етиб келсин, дея дуо қилиб турарди.

— Тарзан! — дея бақирди Семён. — Эшикни буз!

Кораҷадан келган, кўзининг тубигача жун босган барзанги йигит деворнинг ёнига келди-да, синчиклаб қараб эшикнинг қаердалигини аниқлашга киришиб кетди. У тезда айтилган буйруқни бажаравермагач, Семён Диманинг жағига бир мушт туширдида:

— Нега бунча чўздинг, кўзинг кўрми? — дея ўзи бориб эшикни кўрсатди.

Барзанги бир-икки марта тепди, аммо эшик очилмади. Шунда у қўлидаги тўппончадан эшикнинг қулфига уч-тўрт марта ўқ узди, сўнг бир тепган эди, эшик шарақлаб очилиб кетди. Семён нариги хонага ўтди-ю, ҳангуманг бўлиб қолди. Рустам столга оёқ-қўлидан боғланганча ўтиради.

— Дўстим, сени не куйларга солиб қўйиши! — дея бақирганча у Рустамни қучоқлаб олди, сўнг унинг қулларини тезлик билан еча бошлади. — Айтгандим-ку сенга қўриқчи берай деб, қулоқ солмадинг!

Семён Рустамни озод қилиб бўлгач, аввалги хонага югуриб ўгди-да, мунгайиб ўтирган Диманинг пешонасидан отиб ташлади.

— Итдан тарқаган ҳаромилар! — дея сўкинди у.

— Улар ҳали менга зиён етказишмаганди, — деди Рустам Семённинг ишидан норози бўлиб.

— Улгуришмаган, — деди Семён ва Рустамни белидан қучиб ташқарига бошлади.

Ертўладан биринчи бўлиб кўтарилган тансоқчи кўкрагидан ўқ сб орқасига қулади. У Рустамнинг устига йиқилишига оз қолди.

— Ким улар? — деда бирдан бақирди Семён рацияни қулига олиб.

— Тўртта қоп-қора машинада ниқоб кийганлар келишди. Мен сизга хабар беришга улгурмасимдан чиқиб қолдиларинг, — деди рўпарадаги уйнинг томидаги йигит Семёнга ахборот бериб.

— Вадимга хабар бер, кейин ўзинг уларни нишонга ол. Балки ўзимиз ҳам чиқиб кетармиз, — деда Семён ортига бурилиб, йигитларига қаради. — Вадик томдан ўқ узишни бошлиши билан битта-битта чиқиб подъездга яширинасанлар.

Павелнинг йигитлари ҳам анойилардан эмасдилар, томдан отилган ўқдан иккитаси ағанаганидан кейин машиналарнинг орқасига яширинишди-да, ертўладан чиқмоқчи бўлганларни ўқ ёмғири остида қолдиришди. Яхшиям кўп ўтмасдан Вадимнинг йигитлари ёрдамга етиб келди, акс ҳолда Семён ҳам шу ернинг ўзида жон таслим қилиши ҳеч гап эмасди.

Қисқа муддатли отишмадан кейин Семён Павелнинг учта йигитини асирга олди. Қолганлари эса қонига беланди. Асиirlарни йигитларининг ихтиёрига бергач, Вадимга қўнғироқ қилиб раҳмат айтишни унуммаган Семён хурсанд бўлиб Рустамни машинага миндирганча уйига олиб кетди.

Ҳовлига кириб келган “Мерседес”дан Рустамнинг тушаётганини кўрган Анжела югуриб келиб унинг бўйнига осилди.

— Хайрият, — деди у пичирлаб, — тирик экансан!

— Рустамнинг озод бўлиши биз учун байрам! — деда хитоб қилди хотини уялмасдан Рустамнинг лабига лаб босганилигини кўрган Семён: “Исталган эркакни ром қилиб олишингни билмаган эканман”, деда хаёлидан ўтказиб. — Тезда дастурхон тузалсин, базм уюштирамиз.

Рустам жувоннинг қилиғидан ноқулай аҳволга тушди. Қизарди. Ва Анжелани мулојимлик билан ўзи-

дан итарди. Аёл буни сезди ва Рустамга нозли норози қарашиб:

— Қаёққа борсанг ҳам сени топиб оламан, — деди паст овозда.

Дарров дастурхон турли ноз-неъматлару егулик-ичиликлар билан тўлди. Дастурхон атрофига Маргарита ҳам ўтири.

— Бу хоним, — дея гап боштади Анжела дугонаси уни бир туртиб қўйгач, — менинг ёшликтан бирга ўсган якка-ю ягона дугонам бўлади.

— Наҳотки, — деди Семён кўзи чақнаб, — мен сенинг эринг бўла туриб яқин дугонанг ким эканлигини билмасам. Рухсат этинг, хоним.

Маргарита Семёнга юзини тутиш билан бирга ўзи ҳам уни ўпиди олди. Ўпиш маҳали эҳтиросли қилиб “Имм!” дейишни ҳам унумади. Бу сас Семённинг кулоғини қитиқлаб ўтди.

Базм ниҳоятда қизиб борар, Рустамдан бошқа ҳамма кайфни тароқ қилишда ўзаро мусобақа ўйнашаётгандай ароқ қадаҳларга қўйилган заҳоти бир кўтаришда ичиб юборар эди.

Семённинг буйруғига биноан мусиқа қўйилди. Базм давомида ўзига ноз-ишва қилиб турган Маргаритани Семён рақсга таклиф қилиди. Таклифни жон-жон деб қабул қилган Маргарита Семённи бўйнидан қучоқлар экан, дугонасига:

— Эрингни чарчатиб қўйсам хафа бўлмассан! — деди илжайиб.

Бу гапдан кейин бирдан кулги кўтарили. Ҳатто дастурхон атрофида қўл қовуштириб хизматга тайёр бўлиб турган тансоқчилар ҳам илжайиши. Фақат Рустам соғ рус тилида айтилган гапга тушунмаганилиги боис ҳаммага бир-бир қараб қўйиш билан чекланди. Гарчи кайфи тароқ эса-да, Анжела ўзи ёқтириб қолган одамга нисбатан дикқатини бир дақиқа бўлсин сусайтирганли. Шу боисдан Рустамнинг ҳайрон бўлганлигини дарров илғаб, дугонасининг га-

пини таржима қилиб берди. Шундан кейин Рустамнинг ҳам лабида табассум учқунлари пайдо бўлди.

— Мени рақсга таклиф қилмайсанми? — деди сўради Анжела Рустамнинг чиройи очилганини кўргач.

— Бажонидил, — деди Рустам ва ўрнидан турди.

Анжела дугонасидан ўтказиб Рустамни қучди. Унинг лаби эркакнинг томогида ўрмалар, бундан Рустам баттар хижолатга тушар эди.

Гарчи яхшигина кайф бўлиб қолган эса-да, хотининг қилаётган ишлари Семённинг назаридан четда қолмасди. У азбаройи тансоқчилар олдида нокулай аҳволда қолмаслик учун, мусиқани тўхтатишлирини буюриб, ҳаммадан қадаҳ кўтаришларини сўради. Сўнг тансоқчилар ташқарида қолишиб, икки жуфтлик уйга кирди. Энди у ерда ҳеч кимдан тортинасдан базмни давом этказиш мумкин эди. Шундомам бўлди...

Семён хотинига парво ҳам қилмасдан Маргарита-ни ётоғига олиб кириб кетди.

— Сизлар ҳақиқатан ҳам бутунлай ажрашмоқчимисизлар? — деди Семённинг орқасидан қараб қолган Рустам.

— Бунга ўзинг ҳам гувоҳ бўлиб турибсан. Энди ишончинг комил бўлгандир. У билан менинг ишим йўқ. У ҳам менга парво қилмайди, — деди Анжела Рустамдан бўса олиш учун унинг бўйнига осиларкан.

— Мен ўзимни нокулай ҳис қиласяпман, — деди Рустам Анжеланинг лабларидан лабини базур айириб. — Мен туфайли ораларинг бузилиб кетаётганга ўхшайди, назаримда.

— Ҳечам унақа деб ўйлама, мен сенга айтгандимку, сен келмасингдан бурун муносабатларимиз соvuқлашиб кетганди, сенинг келишинг менинг кўнглимдаги муҳаббат оловининг қайта алана олишига хизмат қилди, холос. Мен ҳозир туну кун сен тўғрингда ўйлайпман, — деди Анжела Рустамнинг елкасига бошини қўйиб.

Рустам бошини орқага ташлаб қўзини юмди. Икки савдогарнинг гапларини эслади ва энтишиб кетиб ўрнидан турди.

— Нима гап? — деди эркакнинг бунақа ҳаракатини кўрган Анжела.

— Анжела, сен ниҳоятда мафгункор аёлсан, лекин менинг ҳозир муҳаббат ҳақида ўйлашга вақтим йўқ. Кутқариб қолгани учун Семёндан миннатдорман. Мени қўлга олишганларида пул ҳақида мутлақо ўйлаганим йўқ. Юртимга боролмасликдан, ота-онамни кўролмаслигимдан кўпроқ кўрқсан эдим, — деди Рустам бошини кўтариб Анжелага қарапкан.

Анжела қадаҳига ароқ тўлатиб бир кўтаришда ичиб юборди-да:

— Ёлгон, — деди чуқур нафас олиб.

— Нима ёлғон? — деди Рустам ҳайрон бўлиб.

— Ўша сенга юртдошмиз деб айтган одамлар сенга ёлғон гапирган. Улар сенга ҳеч қанақанги қариндош эмас.

Анжелага термилиб қолган Рустамнинг қўзидан ёш чиқиб кетаёзди. “Наҳотки ёлғон гапиришган бўлса, қаерга келиб қолдим, ҳар қадамда алдов, фирибгарлик! Булар мендан нима кутишаяпти ўзи? Кимга ишонай, кимдан ёрдам сўрай? Йўқ, бўлиши мумкин эмас, ахир ўша йигитларнинг гаплари менга танишку. Мен қанча давлатларни кезиб, ўзимга бунчалик таниш бўлган сўзлашувни учратмаган эдим. Қариндош бўлмаслиги мумкин. Лекин менинг ўша юрт вакили эканлигимга гумоним йўқ... Балки бу кўзларини сузиб турган аёл ҳам ўзининг манфаатини ўйлаб менга шундай деяётгандир?” — дея ўйлади у.

— Ишонмаяпсанми? — деди Анжела ўрнидан туришга ҳаракат қилиб. — Юр, кўрсатаман ўша болаларни.

Анжела билан Рустамга тансоқчилардан бири ҳамроҳлик қилаётганди, аёл уни жеркиб берди.

— Йўқол! Сенга пишириб қўйгани йўқ!

Ертўлага тушганларидан кейин Рустам ҳайратдан

қотиб қолди. Айни чоғда Фозил билан Очил ҳам ҳайратларини яширолмасди. Улар Рустамни айни шу ерда учратамиз, деб мутлақо ўйлашмаган эди.

— Қани, йигитлар, — деди Анжела кўзи юмилиб кетгудек бўлиб, — Рустамчикка бояги гапларни айтиб беринглар-чи.

Йигитларнинг иккаласи ҳам шолғомдайин қизариб кетишиди. Уларнинг бошлари бараварига эгилди, тиллари калимага келмай қолди.

— Мени алдагандиларингми? — дея сўради Анжела.

— Йўқ, — деди Очил бошини қимирлатиб, — Рустамнинг миллатдошимиз эканлиги балки ростдир, бунга бир нарса деёлмаймиз, лекин Фозил билмай «Қариндошиман», деб кўйибди. Кайф устида.

Анжела дарров Очилининг гапларини Рустамга таржима қилиб берди.

— У қариндошман деб айтганида, ҳали ичмаган эди, — деди Рустам, — маст бўлганида ишонмасдим.

Анжеланинг оғзидан Рустамнинг гапларини эшитган Очил баттар мулзам бўлди.

— Шу ёғигаям раҳмат, йигитлар. Мен сизларга қариндош бўлмаган тақдиримда ҳам сизлардан хафа эмасман. Ҳар тугул ватанимни топдим-ку, — дея Рустам ортига бурилди-да, зиналардан тез тепага кўтарилиб кетди.

Анжела билан миллиардер ташқарида талай муддат айланиб юришиди.

Анжела Рустамни қўлтиқлаб олган, бир-бир қадам босганча хаёлга чўмиб борарди. Унинг назарида, ҳамма нарса якун топгандай ва айни пайтда ҳаёти энди бошланаётгандек эди. Семённинг бошлаган ишидан кўнгли хира тортган бўлса, Рустамни учратганидан боши осмонда.

— Нега анави йигитларни бу ерга қамаб қўйиб-сизлар? — дея сўраб қолди бир маҳал Рустам.

— Уларми? — дея Анжела бироз ўйланиб қолди.

— Сени ўғирлаб кетишганларидан кейин биз кимлар билан гаплашганлигингни аниқлаштиридик. Гаплашганларинг орасида шу икки йигит ҳам бор эди, бу ҳақда сен менга айттандинг. Ҳар эҳтимолга қарши олиб келдик.

— Уларга зуфум қилдингларми? — дея сўради Рустам тўхтаб, Анжелага қаарarkan.

— Йўқ. — деди жувон кўзини олиб қочиб.

— Сен мени яхши кўриб қолганингни айттандинг. Одатда, яхши кўрган одамига ҳечам ёлғон гапирилмайди, ўйлайманки, менга айтаётган гапларингнинг ҳаммаси рост.

Рустам айни мўлжалга урганди. Анжела бу гапдан кейин бутунлай довдираб қолди. Ҳаяжонланганидан ҳатто вужудига енгил титроқ кирди. “Алладим, гапларимга ишонма, икки ўзбек йигити итдай қилиб калтакланди”, деб айтишга оғиз ҳам жуфтлади. Бироқ бундай қылса, бутун режалари чиппакка чиқшини ўйлаб, тилини тишлади. Сўнг бошини қимирлатиб:

— Ишонишинг керак, — деди.

— Яхши, — деди Рустам қиёфаси янаем жиддийлашиб, — ўзи нималар содир бўлаяпти? Мендан нима истайсизлар?

— Бошқалар нима исташини билмайман-у, лекин менга фақат сенинг муҳаббатинг керак. Сенинг севгингни уйготолсан бўлди, бор-йўғи шу керак менга, — деди Анжела энди Рустамнинг кўзига тик қараб.

Рустам ўзига керакли бўлган жавобни ололмагач, майса устига чордона қуриб ўтириб олди. Унинг кайфияти бутунлай тушиб кетган, ҳамма нарсадан совиб улгурганди. Ҳеч кимга ишонмасди. Ҳатто манави ўзини Рустам учун исталган нарсага тайёр кўрсатаётган жувонгаям. Бу ерда юришига биттагина сабаб бор эди. У ҳам бўлса, юртига бориш. Тупроғини кўриш. Иложини қилиб, яқин қариндошларини топиш.

- Қачон қўйиб юборасизлар анави йигитларни?
- дея сўради Рустам бошини қўйи ётганча.
- Билмадим, — деди Анжела, — менга боғлиқ эмас. Буларнинг ҳаммасини Семён ҳал қиласди.

Рустам жувоннинг гапидан кейин бирдан ўрнидан туриб кетди ва тез-тез қадам ташлаб уйга кета бошлади. Унинг мақсадини тахминан билган Анжела орқасидан қараб қолиш билан чекланди. Ҳозир у уйга киролмасди. Чунки эрининг дугонасининг қучоғидан чиқиб келишини кўришни истамас эди.

Уйга кирган Рустам хизматкорлардан Семённи чақириб беришларини сўради. Аммо улар бу илтимосни бажаролмасликларини айтишди. Шундан кейин у бутунлай асабийлашиб кетди ва ўзи Семён ётган хонага кўтарила бошлади. Бироқ зинадан икки погона ҳам кўтарилемасдан тансоқчилардан бири унинг қўлидан ушлаб қолди.

— Ҳозир шефни безовта қилиш мумкинмас, — деди у имкон қадар юмшоқ гапиришга уриниб.

— Менинг эса ҳаққим бор уни безовта қилишга, — деди Рустам қўлини тортиб олиб, — менга қилган одобсизлигинг учун эса жазоланасан.

Тансоқчи Рустамга қараб турди-да:

— Нима бўлгандаям мен буйруқдан четга чиқолмайман, — деди жилмайиб.

— Шунақами? — деб Рустам ҳафсаласи пир бўлганча ортига қайтди. У ҳеч қачон, ҳатто ёшлигида ёлғиз қолиб кетганда ҳам бунчалик ночор аҳволга тушмаганди. Боши ғовлаб кетган, биронта режани тузуккуруқ охиригача етказолмасди.

Рустамнинг ортига қайтиб кетаётганлигини кўрган тансоқчи ҳам жойига кета бошлади. Худди ўша пайт Рустам орқасига қаради ва тансоқчи зинани бўшатиб қўйганлигини кўрди-ю, ўгирилиб икки зинани битта қилганча тепага югурди. Тансоқчи унинг ортидан отилди-ю, аммо етиб ололмади.

Фарқ терга ботиб шифтга қараб ётган Семён эшик-

нинг туйқусдан очилишидан чўчиб тушди-да, бирдан ўрнидан туриб чойшаб билан белини ёпди.

— Тинчликми? — деди Рустамнинг авзойи бузуқлигини кўриб.

— Сенда гапим бор, тез пастга туш, — деб Рустам ортига бурилди.

Ороми бузилганидан қаттиқ ранжиган Семён битта-битта қадам ташлаб пастга тушиб келди.

— Семён, — деди диванда ўтирган Рустам уни кўриши билан ўрнидан туриб, — сенинг ёрдаминг сув билан ҳаводек зарур менга.

— Биласан-ку, сен учун ҳамма нарсага тайёрман. Ҳозир дамингни олиб, эрталаб айтганингда ҳам тезда бажариб ташлаган бўлардим. Ёки шунчалик зарурми? — деди ялтироқ ҳалати чўнгагидан сигарета олиб лабига қистирган Семён.

— Аnavи икки ўзбек йигитини қўйиб юборсанг. Кейин менга Ўзбекистонга учишим учун самолётга чилта керак, — деди Рустам шошиб.

— Бор-йўғи шуми? — деди Семён ва Рустамнинг ёнига келиб диванга ўтириди ҳамда мароқ билан сигарета тутунини ичига ютди. — Йигитларнинг энди менга умуман кераги йўқ, ҳозироқ уларни қўйиб юборман. Лекин сенинг масалангда озгина муаммо бор.

— Қанақа муаммо? — деди Рустам ҳайрон бўлиб.

Семён унинг гапига бирданига жавоб бермай, аввал хизматкорларига пиво олиб келишларини буюрди.

— Муаммо шуки, — деди келтирилган пиводан озгина ичган Семён, — сен билан Анжеланинг орасида қандайдир иттифоқ пайдо бўлибди. Мен, очиги, бундай бўлишини кутмаган эдим. Тўғри, сенга ҳамма дардимни айтгандим. Анжела билан ҳақиқатан ҳам ажрашмоқчиман. Ажрашишимга сенинг алоқанг йўқ. Лекин ҳали ҳамма ишни битирмасимдан бурун у билан дон олишганинг мени жудаям ёмон аҳволга солиб қўйди.

Рустам бу гапни эшитиб нима деярини билмай қолди. Юзи қизариб, оловдек ёна бошлади.

— Мен айбормасман, — деди ўзини оқламоқчи бўлиб.

— Биламан, унинг ўзи сени ҳоли-жонингга қўймаган. Лекин нима бўлган тақдирдаям сен эркак кишисан. Истамасанг, ҳеч нарса рўй бермаган бўларди, — деб Семён пиводан яна бир марта хўплади.

— Хўп, — деди бошига оғриқ кирган Рустам, — мен айбдор эканман, бу ёғи нима бўлади энди?

— Дўстга хиёнат, билмадим, бунинг учун нима қилиш керак? Кел, яххиси, шу ҳақда эртага гаплашайлик. Унгача мен ўйлаб кўраман, — дея Семён ўрнидан туриб яна ётоғига қараб кетди.

Рустам бутунлай боши берк кўчага кириб қолган эди. У ўзини Семённинг ёнида айбдордек ҳис қиласар, ўзидан-ўзи хафа бўларди. Бир маҳал унинг елкасига нозиккина кўл тегди. Рустам қарамасдан ҳам билди унинг кимлигини.

— Нега бунчалик хомушсан? — деди Анжела унинг орқа томонидан қучоқлаб. Рустамнинг гаши келди. Уни силтаб ташламоқчи бўлди. Лекин бу ўринсиз эканлигини сезиб, индамай тураверди.

— Мен сени шунчалик хафа қилиб қўяман, деб ўйламагандим.

— Сендан хафа эмасман, ҳаммасига ўзим айборман, — деб Рустам ўрнидан турди. Ва хизматкордан ўзи қаерда ётишини аниқлаб олгач, биринчи қаватдаги энг чекка хонага кетди.

Бир соатлар чамаси уйқуси келмай шифтга қараб ётди. Тушиб қолган оғир вазиятдан чиқиб кетиш йўлларини қидирди. У шунчалик ўйга берилиб кетган эдики, хонага Анжела кириб келганини ҳам сезмай қолди. Фақат чироқ ўчгандан кейингина у бoshини кўтариб эшик томонга қаради.

— Сен бошқа хонада ухлашинг керак шекилли, — деди Рустам тунги кўйлагини ечаётган Анжелага.

— Сен билан бирга бўлишимни истамайсанми? —
деди Анжела қошларини чимириб.

— Ёлғиз қолмоқчиман.

— Мен эса сени ҳечам ёлғизлатиб қўймайман, —
деб Анжела Рустам ётган каравот ёнига келди-да,
бармоқларининг учи билан эркакнинг кўкрагини сий-
палай бошлади. Бундан Рустамнинг ғаши келди. Жу-
воннинг қўлини силтаб ташлади. Ҳар қандай вази-
ятда ҳам Рустамдан бундай қўполликни кутмаган
Анжела аввал ҳайратланди. Сўнг Семён иккисининг
ўртасида жиддий гап ўтганлигини тусмол қилиб, эр-
какнинг кўнглини кўтариш мақсадида жилмайди. Ру-
стам тескари ўгирилиб олгач, секин унинг ёнига
чўзилди ва елкасидан ўпди.

— Бу ҳаракатларнинг ҳаммаси ортиқча. Яхшиси,
чиқиб кет, — деди Рустам, — йўқса, шарманда бўла-
миз. Бир марта шармандалик бўйнимга илингани
ҳам етар.

— Семён нима деди?

— У ҳаммасидан хабардор.

— Тушунарли, мен сени ёлғизлатиб қўймайман,
дедимми, тамом, нима юз берган тақдирда ҳам бир-
га бўламиз...

...Семён ётогига киргач, Маргарита билан ҳам иши
бўлмай, шифтга қараб анча вақт ётди. “Вақт келди,
энди унумли фойдаланиш керак, — дея ўйлади у, —
ўзиям битта ўқ билан иккита қўённи урдим. Энди
Рустамга қушилиб Анжела ҳам ғинг деёлмайди. Де-
ганд-чи? Мендай одам унинг суробини тўғрилаб
қўёлмайманми?”

— Жоним, — деди худди ўша пайт Маргарита
унинг кўкрагини силаб, — нега бунча хомуш бўлиб
қолдинг?

— Қайтанга хурсандман, — деди Семён иржайиб,
— ишларим бунчалик тез битиб кетади, деб ўйлама-
гандим.

— Қанақа ишлар?

— Бунисига сенинг ишинг бўлмасин. Бир сўрадинг, қайтиб бунаقا гапни оғзингга олма.

— Менинг виждоним қийналаяпти. Анжела энг яқин дугонам...

— Нима қипти? Мен у билан орани очиқ қилганимга анча бўлди. Бундан бу ёғига ўзинг кўнглимни хушлаб юраверасан. Ундан кейин, Анжела икковимизнинг орамизда негадир ҳеч нарса ўхшамайди. Мана, масалан, сен билан ҳамма нарса бўлди-ку. Сениям кўнглинг тўлди, меникиям.

— Ёқдими? — дея сўради Маргарита.

— Бўлмасам-чи, — дея Семён унинг лабидан ўпиб қўйди. Сўнг яна шифтга қараб хаёл сурганча ётаверди. Агар Вадим қўнгироқ қилиб қолмаганида, балки, шу ҳолича ухлаб ҳам қоларди.

— Сенга зўр янгилик бор, — деди Вадим, — айтсан ишонмайсан.

— Қанақа экан ўша мен ишонмайдиган янгилик?

— деди Семён кўзини уқалаб.

— Бугун тинчтилган Дима аслида ҳеч ким эмас экан. Буни мен йигитларинг олиб келиб берган учта асирдан билиб олдим. Асли уларни Павел деган одам бошқааркаркан. Уни Швейцарияда қандайдир ҳомийси қўллаб туаркан. Хуллас, ўша Павел “мижоз”ингни тинчтилган. Биласанми, қандай қилиб? Рустаминг билан бирга Америкадан келган тансоқчилардан бири илгаридан Павел билан алоқа боғлаб келган. У Америкадан кўзга кўринган бойваччаларни Москвага олиб келиб Павелнинг ихтиёрига топширади. У ёғи эса маълум, — деди Вадим.

— Шунақа дегин, — деди Семён ҳайрати ошиб, — ярим йил аввал бир америкалик бизнесмен бу ёққа келиб, кейин изсиз йўқолганди. Буларнинг ҳаммаси шу маразнинг иши экан-да. Унинг “ини” қаерда экан?

— Ҳеч ким билмайди. Қўлга тушганлар унинг номини эшлишишган-у, аммо ўзини кўришмаган. Ҳамма ишни у Диманинг қўли билан қилган.

— Эсиз, — деди Семён сочини қули билан тараб,
— бекор уни тинчиттан эканман-да.

— Ҳа, менам шундан афсусдаман. Лекин қаерда
бўлмасин, мен уни топаман.

— Топсанг, сендан илтимос, менга хабар бер. Бир
гаплашиб кўрай-чи, қанақа экан ўша кўринмас одам?
— деди Семён.

Шундан кейин Вадим хайрлашиб гўшакни кўйди.

— Уфф... — деганча Семён ўрнидан турди ва шкаф-
нинг ёнига борди-да, бироз ўйланиб қолгач, бир
шиша пиво олиб оғзини очди-ю. худди чўлу биё-
бонда қолиб кетган одамдай ютоқиб-ютоқиб ичди.
Ва Маргаритага қаради. Вадим билан гаплашаётга-
нида унинг борлиги эсидан чиққанди. Шунча гал-
ларни Маргаританинг билиши эса мумкинмас эди.
Шу боис у жувонга қараб турган пайтининг ўзидаёқ
унинг тақдири қандай якун топишини белгилаб
кўйди.

Семён каравотга ўтиргач, Рустам билан Анжела-
нинг ишини ортиқча чўзгиси келмади. Шу боис,
халатини елкасига ташлаб хонадан чиқди ва тансоқ-
чидан Анжелани сўради.

— У Рустамнинг ёнига кетди, — деди тансоқчи
кўзини ерга тикиб.

— Зўр бўпти-ю, — деди бирдан тиржайган Семён,
— сен йигитлардан бири билан анави икки ўзбек
болани шаҳарнинг ташқарисига олиб бор-да, тинчи-
тиб кел. Айтиб кўяйин, аввалги сафаргидек ўлиги
тапқарида қолиб кетмасин. Кўмиб ташланглар, —
дэя буйруқ берди у.

Кейин ўзи ташқарига чиқди-да, ҳовлида стол ус-
тига нарда қўйганча ўйнаб ўтирган иккита “одам”и-
ни чақирди. Улар юргурганча етиб келишгач:

— Видеокамера олиб келинглар, — деди Семён...

...Анжела Рустамни ўзига қаратолмаганидан, унинг
сочини силаш билангина кифояланиб қолган эди.
Рустам эса гоҳ-гоҳида чукур нафас олиб қўяр, энди

бу ёғи қайси томонга қараб кетишини билолмай ҳалак эди.

Чироқ бирдан ёнганидан иккиси ҳам сапчиб ўринларидан туришли.

— Ўҳ-хў, — деди Семён қўлларини бир-бирига ишқалаб, — жа, вақтида келибмиз-ку, а? Қани, ўрниларингдан бир туринглар-чи, яхшилаб кинога олиб қўяйлик.

— Нима қилиқ бу, Семён?! — деди Анжела йигла-моқдан бери бўлиб.

— Эротик фильм ишляяпмиз. Бош қаҳрамонлар бор. Вазият ниҳоятда романтик. Шундай имкониятни қўлдан бой бериб бўларканми? Қани, устинглардаги ёпинчиқни бир олиб ташланглар-чи, — деб Семён Анжела бўйнигача ёпиниб турган кўрпани тортиб олди. Жувон қип-яланғоч бўлса-да, Рустамнинг калта иштони бор эди. Буни куриб Семён афтини бужмайтириди.

— Оббо, — деди у иккала қўлини ҳам юқорига кўтариб, — бунақаси қизиқ бўлмайди. Рустам, ўзинг онадан туғилгандай бўласанми ёки ёрдамлашиб юборишисинми?

— Эсингни йиф, шунча устимдан кулганинг етар. Кимга кераги бор бунақа майнавозчиликларнинг?

— Менга, қадрли дўстим, менга! Мен кино ишлаб бизнес қиласман, газетага иккалангнинг ҳам расмалингни чиқариб, “Америкалик миллиардер Россияда” деб сарлавҳа қўяман! Зўр-а!.. Нима, сен мени аҳмоқ, осонгина оғзидағи ошини олдириб қўяди, деганмидинг? Чучварани хом санабсан! Мен бунақанги хиёнатни кечирадиганлар хилидан эмасман, уқдингми?! — деб бақирди Семён. — Қани, ечин!

Анжела йиглаб юбориб, юзини кафти билан бекитди.

— Семён, керакмас, илтимос! — деди у йиглаб.

— Энди тушундим, — деди Рустам Семённинг ўқрайган кўзига тикилиб, — сен буларнинг барини ўюштиргансан. Ҳатто мени олиб қочишлариниям

ўзинг ташкил қилгансан. Ҳаммасини очиқ-оидин айтсанг бўларди-ку! Шартмиди шунча одамнинг қонини тўкиб!

— Мен ҳеч нима ташкил қилганим йўқ! Мен сен абраҳни бир ўлимдан сақлаб қолдим. Эвазига эса, мана менга совға! — деда Семён Анжелани қўрсатди.
— Энди менинг айтганимни бажар!

* * *

— Чиқинглар бу ёққа! — деб тансоқчи бақирганидан кейин Фозил билан Очил ўринларидан сакраб туришди.

— Ҳали тонг отмади, шекилли, — деди Фозил Очилга қараб, — шу пайтдан нега уйғотишид?

— Яна сўроққа бўлса керак, — деди Очил ўзича тусмол қилиб.

Сўнг иккаласи ҳам олдинма-кейин зина томонга юра бошлишди.

Ташқарига чиқишганларидан кейин уларни машинага ўтиришга буюрди иккала шерикни уйқусидан уйғоттан тансоқчи.

— Қаерга борамиз? — деда сўради ундан Очил.

— Онангникига, — деди тансоқчи ва ўзининг шеригига қараб кулиб қўйди. — Сизларни қўйиб юборамиз, энди керакларинг йўқ.

— Хайрият-э! — деди чуқур нафас олган Фозил ва энди яшаш манзилини айтмоқчи бўлганида, Очил енгидан тортиб қўйди. Шу билан унинг гапи бўғзида қолиб кетди.

Машина чароғон кўчалардан елдек кетиб борар экан, Очил ўзларини қўйиб юборишларига ишонмай қолди. “Кўйиб юборишса, уйидан чиқариб орқамизга бир-бир тепарди, жа бўлмаса, бир-икки кўча берироққа олиб келиб ташларди. Лекин бунчалик узоққа оборишмасди. Бу ерда бир гап борга ўхшайди. Агар иложини топиб қуён бўлиб қолмасак, ким билади, бизларни нима кутиб турибди”, — деда ўйлади у. Ва секин Фозилни туртди.

— Нима дейсан? — деди Фозил ўзбекчалаб.

- Бизларни күйиб юбораёттганга ўхшамайди булар, — деди Очил пичирлаб.
- Менам шундай деб ўйлаяпман.
- Нима қиласыз?
- Битта учирив олайлик, деб сүраб, кейин жуфтакни ростлаб қоламизми? — деди Фозил.
- Булар бизнинг айтганимизни барибир қилишмайди, яхшиси, сакраб тушиб қоламиз-да, кейин қочамиз, — деди Очил овозига ваҳимали тус берип.
- Шундай тезликда сакрасанг, ўлиб кетишинг аниқ. Ундан кўра, мен ҳайдаб кетаётганининг қўлини буриб юбораман. Бирон нимага урилади, кейин қочамиз. — деди Фозил.
- Нима деб валдираяпсанлар?! — деди ҳайдовчинг ёнида ўтирган барзанги орқасига бир қараб олиб. — Биз тушунмайдиган тилда гаплашмаларинг.
- Хўп, — деди Очил ва Фозилни бир туртиб кўйди. Бу “бошла”, деган ишора эди.

Шу ондаёқ Фозил ҳайдовчига ташланди ва унинг бўйнидан бўғди. Очил эса унинг шеригига ҳужум қилди. Бирпасда машина йўлдан чиқиб кетиб, кутилганидек, йўл ёқасидаги баҳайбат дарахтга урилди. Машина ичидагилар силтаниб, олд ўриндиқдаги икки барзанги бараварига пешонаси билан олдинги ойнага урилди. Ва хушидан кетди. Очил ҳам озроқ муддат нима бўлаётганини англолмай қолди. Фозилни эса жин ҳам урмаган эди. У пачофи чиққан машинадан бир амаллаб тушиб олди-да, Очилнинг ҳам чиқишига ёрдам берди. Очил ташқарига чиқиб бироз гангиги турган палла йўл чеккасидан тош олган Фозил иккита барзангининг бошига бир мартадан уриб чиқди-да:

- Кетдик энди, — деди ва шеригининг бошидан оқаётган қонни кўриб қолди.

Улар квартирасига етиб келгунларича орадан икки соат ўтиб кетли. Юрак ҳовучлаб квартира эшигини очишли. Ҳар тугул, улар чиқиб кетишганидан кейин бу ерга ҳеч ким, ҳатто уй эгаси ҳам келмабди. Бу-

юмлар кетаётганларида қандай сочилиб қолган бўлса, худди шу аҳволда турарди. Очил югуриб бориб пулнинг бор-йўқлигини текширди. Бахти бор экан, қандай яширган бўлса, худди шу ҳолатда турар эди. У пулни чўнтағига солиб ортига қайтгач, Фозилга тезда бу ердан кетишларини айтди.

— Озгина дам-пам олайлик, — деди унинг гапидан норози бўлган Фозил.

— Дамни энди уйингга боргандা оласан. Хотинингнинг қучогида, — деб уни силтаб ташлади Очил.

Уларнинг нарсаларни йигишириб олишларига ўн дақиқадан сал ортиқроқ вақт кетди.

— Қаерга борамиз? — деди Фозил кўчага чиққанларидан кейин.

— Оляникига, — дея унга бепарво жавоб қайтарди Очил.

— Фақат ўзингникуга бошлайсан-а! — деди Фозил норози бўлиб.

— Сенинг аҳмоқлигинг орқасидан ўлиб кетиши мизга сал қолди... Оля сенинг анави алкашбашара Наташангга қараганда тузукроқ, унга ишонса бўлади. Ҳали у жой берадими-йўқми, худо билали.

Фозил индамади. Олянинг уйи йигирма чақиримлар чамаси келарди. У билан Очил гул бозорида танишганди. Оля гул олиш учун шошилиб келганди-ю, аммо қайси гулни танлолмай гаранг бўлиб қолганди. Шунда Очил ёрдам бериб юборганди: туғилган кунга бунақа гўл олиб борса бўлади, тўйга бунақаси яхшироқ қабилида. Йигитнинг нозик дидли эканлигидан қиз унга табассум ҳадя этганча:

— Бир ҳафтадан кейин битта туғилган кун бор, унгаям ўзингиз гул танлаб берасиз, — деган эди.

Бир ҳафта ўтиб қиз ҳақиқатан ҳам келди. Бу сафар вақти бемалолроқ экан, шекилли, Очил билан бирга анча вақт гул танлашди. Баҳонада иккаласи танишиб ҳам олишди. Оля Очилнинг қочиримли гапларига муносиб жавоб бергач, йигит унинг уй манзилини, телефон рақамини олиб қолди.

Орадан икки қун ўтиб Очил унга қўнғироқ қилди.

— Агар гул олиб келсангиз, сизни меҳмон қилардим, — деди Оля унга кулиб жавоб берар экан.

Очил унинг айтганини қилиб борди. Қиз ёлғиз ўзи икки хонали уйда яшар экан. Ҳамма ёқ саранжом-саришталигидан Очил билдики, Оля кўча қизларидан эмас.

Улар анча вақт гаплашиб ўтиришди. Очил унинг оиласи ҳақила сўради. Шунда Оля кўзига ёш олди.

— Сен (Оля уни бирдан сенлашга ўтганди) ҳеч нарсани билмаганинг учун айтаман. Лекин қайтиб бу ҳақда мендан сўрама, — деганди у, — ўзим ростовликман, бу ерга кўчиб келганимга ўн йилдан ошиб қолди. Ўшанда мен энлигина йигирмага кирган, соддагина қиз эдим. Шаҳарни яхши билмасдим. Шунга қарамасдан ишга жойлашдим. Атирупа фирмасига. Шу ерда Паша исмли йигит билан танишиб, сўнг севишиб қолдим. Ниҳоятда покиза, ишбилармон йигит эди. У билан турмуш қурдик. Бир куни уни ўлдириб кетишиди. Нега, қайси айби учун ўлдириши? Ҳанузгача билмайман. Шундан кейин онам менга: «Яна Ростовга қайтиб кел», деди. Лекин мен бормадим. Шу менинг қисқача тарихим.

Ўшанда Очил уни нима деб юпатишни билмай гарансиб қолганди. Ҳар тугул қиз бир қадаҳ шампан виносидан ичди-ю, дарров ўзига келди. Кейин ўрнидан туриб шўх мусиқа қўйди, Очилни рақсга таклиф қилди. Ярим тун бўлганида эса улар битта хонада тунашли.

— Очил, — деди сумкасининг қайиши қийиб кетганидан гоҳ у қўлига, гоҳ бунисига олиб келаётган Фозил, — киритмаса қаерга борамиз?

— Наташангникига! Унинг эшиги эркак зотига ҳамиша очиқ-ку! — деди Очилнинг негадир асаби ўйнаб.

— Бўмайди, у билан уришиб қолганман. Охирги марта уйига борсам, одам бор экан. Бўлмаса, олдиндан қўнғироқ қилувдим. Келавер, деганди. Шунча

овораи сарсон бўлиб борсам, эртага кел дейди, — деди Фозил тўхтаб пешонасида пайдо бўлган терни артаркан.

— Боягина фақат сеникига борарканмиз-да, дегандинг-ку, — деди Очил киноя билан.

— Айтдим-кўйдим-да... Лекин, тўғриси, шу ерда юравериш жонимга тегиб кетди. Амаллаб кетиб олсам, қайтиб қорамни кўрсатмайман.

— Яна келсанг, каллангни узиб олишади-да.

— Очил, — деди Фозил яна юришдан тўхтаб, — лўқиллаб кетаверамизми? Такси-пакси тўхтатайлик, қўлимнинг дабдаласи чиқиб кетди.

Пиёда юравериш Очилнинг ҳам жонига теккан эди. Фозилнинг оғзидан шу гап чиқиши билан йўлакчадан катта йўл томонга бурилди.

— Намунча? — деди Оля Очилни кўриб. — Вақт алламаҳалданам ўтиб кетди-ку! Пешонангни нега боғлаб олдинг? Тинчликми ўзи?

— Уйга кираверайлик, кейин гапириб бераман, — деди унга жавобан Очил.

Очилнинг бошига боғланган матони ечиб олган Олянинг кўзи қинидан чиқиб кетаёзди.

— Ким билан уришдинглар? — деди у хавотир аралаш.

— Кейин... кейин ҳаммасини гапириб бераман, — деди Очил, — аввал яхшилаб ювиниб олай.

— Эркакларга ҳечам тушунмайман, доим һиманидир бўлишолмай юришали, — деди Оля ва Очил билан бирга юваниш хонасига кетди.

Уларнинг ортидан қараб турган Фозил шеригининг шундай меҳрибон жувон топиб олганига ҳаваси келди. “Падарингга лаънат, менга доим қаёқдагилар учрайди. Бу бўлса, мана шундай ёшгина, чиройлигина, яна меҳрибонгинасини топиб олади”.

Оля “йигит”ининг чўмилишига ёрдам бериб, кейин унинг бошини бинт билан яхшилаб боғлагач, дарров дастурхон тузашга тушиб кетди. Бу пайтда

Фозилга чарчоқ ўз кучини кўрсатган, унинг кўзлари юмилиб кетаётган эди.

— Бор, — деди уни туртиб, покланиб қушдай сенгил тортган Очил, — сенам чўмилиб чиқ.

Фозил ҳам тезда апил-тапил ювинди-ю, ошхонага кирди. Столнинг устида турган ҳали очилмаган ароқни кўриб кўзи қувнади. Очил билан Оля эса бирбирига мусичалардек суйкалишиб ўтиришарди.

— Энди сизларга ҳалақит бермасдан иложим йўқ. Биринчидан, итдай очман. Иккинчидан, асабларнинг томи кетган. Озгина қизишмасам бўлмайди, — деди у.

— Сизнинг чиқишингизни интизорлик билан кутаётгандик, — деди Оля бироз жилмайиб, — ўтргингиз нима бўлганини ҳечам айтмаяпти.

“Сенга нима? — дея хаёлидан ўтказди Фозил, — беш-бегона одам бўлса. Эртага кетади. Қоласан яна битта ўзинг. Худди эрингдай меҳрибонлик қиласан”.

— Бунга балоям ургани йўқ. Довдирлигидан йиқилиб тушди, — деди Фозил жилмайиб.

— Айнан пешонаси билан-а? — деди киноя билан Оля.

— Индамасанг, бу кўзи биланам йиқиловради, — деди гапни ҳазилга бурган Фозил.

— Ана, кўрдингми? — деди Очил Оляга. — Шуна-канги қадрдон дўстим борки, душман бунинг олдида ип эшолмайди.

Бу гапдан кейин улар сенгил кулиб олишли.

Ароқ зумда тамом бўлди. Оля яна битта олиб келиб стол устига қўйди-да:

— Шуни ичасизлар, бўлди. Мендан бошқа сўрамайсизлар, — деди.

— Меҳмонлигимизнинг қадри шунчаликми? — деди унга Очил.

— Маст бўлиб қолишларингни истамайман, — деб Оля гапни қисқа қилди.

Улар деярли тонг отғунча ўтиришли. Ниҳоят иккала йигитнинг ҳам кўзи уйқуга кетиб қолавергач,

Фозилга қаерда ётишини күрсатган Оля Очилнинг қўлидан етаклаб ўзининг хонасига олиб кириб кетди.

* * *

— Нималар деяпсан, Семён? Мақсадингни очиқ айт! — деди Рустам асабийлашиб.

— Мен сенга нима дедим? Ечин дедимми?! — деди Семён ўзининг машхур ўқрайиши билан.

— Ҳеч қачон мени бунга кўндиrolмайсан. Мен ўзимни шарманда қиласиган одамлар тоифасидан эмасман!

— Шунақами ҳали, қани бошланглар, — дея Семён йигитларига буйруқ берди.

— Фақат менинг ўлимимдан кейин мақсадингга етасан, абраҳ! — деди Рустам титраб.

— Бас қил! — дея бақириб юборди Анжела.

Тўртта йигит аста-секин Рустамга яқинлаша бошлиашди. Уларнинг башаралари бир-бириникидан хунуклашган, ҳаммаси иржайишарди. Анжела шу ҳолида бирдан Рустамни тўсди. Йигитлар шу заҳоти жойларида тўхташди. Зотан, яланғоч аёлнинг ёнига боришига журъатлари етмай қолганди уларнинг. Вазият анча қалтис эди.

Бу томошани кўрган Семён бирдан хохолаб кулиб юборди.

— Нақадар драматик ҳолат! Агар менга бирор бу ҳақда гапириб берганида ишонмаган бўлардим. Миллиардерни қип-яланғоч аёл ҳимоя қилди. Кино, тайёр кино бу. Қўлимдан режиссёрлик иши келишини билмаган эканман. Нимага қараб турибсанлар?! — дея бақирди Семён бирдан юзи тундлашиб.

Йигитлар энди аста-секин эмас, балки шиддат ила аёл ва эркакнинг устига ўзларини отишмоқчи бўлишганида:

— Тўхта! — дея ўкирди Семён. — Етади, энди йўқол ҳамманг бу ердан!

Ҳанг-манг бўлиб қолган тансоқчилар бирин-ке-

тин чиқиб кетиши. Видеокамера күтартган йигит ҳам уларнинг орқасидан хонани тарқ этди.

— Ҳазиллашдим, — деди бирдан мулойимлашган Семён, — шунчаки қалтис ҳазил қилгим келди.

Бу гапдан кейин Анжела каравот устига ўтириб қолди-да, ўкириб йиғлашга тушди. Рустам эса асабийлашган кўйи кийимларини кия бошлади. Уларнинг ҳолатини кўрган Семён тутоқиб кетди.

— Ҳазиллашдим дедим-ку сенларга, нега тушунмайсанлар?! Одам бўлиб мениям ҳазиллашишим мумкин эмасми?

— Шунақа ҳазил қиласанми?! — деди унга ўқрайиб қараган Рустам.

— Ҳа, энди ҳазил ҳам ҳар хил бўлади-да: бири унақа — бири бунақа. Шунга ота гўри қозихонами? Ундан кўра, юринглар, менинг оригинал ҳазилимни ювамиз.

— Менимча, анча кеч бўлиб қолди, — дея эътиroz билдири ҳамон ўзига келолмаган Рустам.

— Унда ҳамма уйқуга! — дея хитоб қилган Семён ортига бурилиб хонадан чиқди.

Елкасига халатини илиб олган Анжела Рустамнинг ёнига келиб унинг юзидан ўпиб қўймоқчи бўлганида, эркак бирдан ўзини тортди. Аёл бошини эгиб, хонани тарқ этишга мажбур бўлди. Уни уй айвонида сигарета тутатганча Семён кутиб турар эди. Анжела аччиқ қилиб, у билан гаплашмасдан ўтиб кетмоқчи бўлганида, Семён қўлидан ушлаб қолди.

— Шарманда қилиб қўйиб, яна нима демоқчисан? — деди қовогини солиб Анжела.

— Нимаси шармандалик экан? — деди иржайганча Семён.

— Анави югурдакларингнинг олдида сариқ чақалик ҳам обрўйим қолмади-ку.

— Эй-й, шуларам одамми? Керак бўлса, ҳозир оёғингни ялашади. Шуни истайсанми?

— Керакмас.

— Бўпти, буларни кўйиб турайлик. Ишлар қалай кетаяпти?

— Устимдан куляйсанми? — деди унга ўқрайиб қараган Анжела. — Ҳаммаёқ расво бўлди-ку. Бунга ким сабабчи эканлигини ўзинг жуда яхши биласан.

— Бўлди, дедим-ку! — деда бақириб юборди Семён.

— Бу масалага бошқа қайтмаймиз.

— Менга бақирма, мен ҳамма айтганларингни бажардим. Мендан тағин нима истайсан ўзи?

— Хўш, яна бошидан бошлаймизми?

— Рустамга имконият бериш керак. Яъни, Ўзбекистонга бориб келсин. Барибир у ердан ҳеч кими ни тополмайди. Орадан қанча йиллар ўтиб кетган, — деди Анжела ўйланган киши бўлиб.

Шу пайт Семённинг қўй телефони жиринглаб қолди. У норози бўлиб телефонида ёзилган бегона рақамларга қаради. “Ким бўлди экан?” — деда хаёлидан ўтказиб, истар-истамас телефон тугмасини босди-да, қулогига тутиб:

— Алло, — деди.

— Шаҳар ДАН бошқармасидан қўнғироқ қиласяпмиз. Сизга тегишли бўлган машина аварияга учраган. Икки киши ўлган, — деди бегона овоз эгаси.

— Ким экан ўлганлар? Сиз менинг телефон рақамини қаердан олдингиз? — деди ҳайрати ошган Семён.

— Ўлганларнинг ён дафтарчасида сизнинг телефон рақамингиз ёзилган экан. Сизни яхши билганимиз учун қўнғироқ қилдик.

— Авария қаерда бўлган? — деда сўради Семён дикқати ошиб.

— Петроград шоссесида, — аниқлик киритди телефон қилган одам.

Семён ҳайрон бўлиб қараб турган Анжелага ҳеч қандай изоҳ бермасдан, икки йигитини олиб, шошилинч йўлга тушди.

Воқеа содир бўлган жойга боргачгина, икки ўлган йигит ҳам ўзига тегишли эканлигини кўрди.

— Бошқа ҳеч ким йўқмикин? — деда сўради ДАН ходимларининг биридан.

— Ҳеч ким, — деда жавоб қилди у.

Қаёқдаги овсар йигитларнинг бунаقا иш қилиб кетганига Семённинг ишонгиси келмасди. “Бу ерда бир гап бўлганга ўхшайди. Уларнинг осонгина қулдан чиқиб кетиши мумкин эмас, кимдир ёрдам берган. Лекин ким? Жонимга тегиб кетди. Ҳар хил қаланги-қасангиларнинг оёғим тагидан чиқавериши. Ҳаммасини қираман. Биттаям қолдирмайман”, — деда хаёлидан ўтказиб, машинага минди у ва йигитларига икки савдо гарни топишни буюрди.

Ҳаддан зиёд чарчаган Семён уйига келди-ю, тўшакка ўзини ташлаб, қотиб ухлаб қолди. Тушга яқин уйғонганида эса, уни бир дунё муаммолар кутиб турар эди.

Савдо гар йигитлар ҳеч қаердан топилмаган. Анжела билан Рустам Ўзбекистонга учиб кетишган. Семён бу хабарларни эшлитиб, бошини чанглаб қолди.

* * *

Семён уйдан чиқиб кетгач, Анжела яна Рустамнинг ёнига кирди.

Энди гина кўзи уйқуга кетган Рустам ёнига жувоннинг қайтиб келганидан тутоқиб кетди.

— Тинчлик борми-йўқми? — деди у ўрнидан туриб ўтиаркан.

— Бу сафар сени кўп безовта қилмайман. Олдинга кирмасам бўлмасди, тўғриси. Эртага эрталаб сен билан Ўзбекистонга учиб кетамиз. Ҳозиргина Семённинг яна битта муаммоси чиқиб қолди. У шу масала бўйича кетди. Энди қачон келишини худо билади. Ҳозир ҳеч кимга кетаётганимизни айтмаймиз. Аэропортда танишим бор. Боришимиз билан чипта тўғрилаб беради. Илтимос, ўжарлик қилма, — деди шоша-пиша Анжела.

Рустам бироз ўйланиб, жувоннинг гапида жон борлигига амин бўлгач, рози бўлди.

Улар чиқиб кетаётганида Семённинг келганига эндиғина икки соат бўлганди. Анжела билан Рустамнинг кетишига югурдаклар монелик қилишолмади. Айни пайтда бу ҳақда Семёнга хабар беришнинг ҳам иложи йўқ эди. Чунки, агар уйи ёниб кетаётган бўлсаям, Семён бундай пайтда ўзини уйғотган одамни кечирмас эди.

Тўрт соат учган самолёт Ўзбекистон пойтахтига етиб қелаётганилигини борт кузатувчиси — қип-қизил хонатлас кўйлак кийган, юзи оппоқ, соchlари қопқора қиз майин овозда инглиз, рус ва ўзбек тилларида эълон қилганида Рустамнинг кўзида ёш пайдо бўлди. Қувониб кетганидан, ўрнидан туриб қизни қучоқлаб олишига, юзидан ўпишига бир баҳя қолди.

— Ура! — дея бақирди у.

Унинг овозидан самолётга чиққанидан бери ухлаб қелаётган Анжела уйғониб кетиб, атрофга олазарак боққанча:

— Тинчликми? — дея сўради.

Салондаги бошқа йўловчилар эса кўринишидан туппа-тузук одамга ҳайратланиб қарашди. “Эй худо, ишқилиб, самолёт эсон-омон қўнсин-да”, — дея хаёлидан ўтказди Рустам ҳамда Анжелага:

— Ўзбекистонга келдик, эшитаяпсанми? Ўзбекистонга! — деди кўз ёшини яширмай.

Анжеланинг унга юраги ачишиб кетди. Рустамни қучоқлаб, “Табриклайман”, — деди пичирлаб. Самолёт ерга кўнди. Ҳаммадан олдин худди бирор қуваётгандай шошиб-пишиб самолёт салонидан чиққан Рустам ерга тушмаёқ қуличини кенг очиб чукур нафас олди ва: “Ассалом, Ўзбекистон!” — дея қичқириди. Инглиз тилини билмайдиганлар: “Бу боядан бери нега довдираяпти?” — дея ўйлашди. Биладиганлар эса мийигида кулишди. Рустам пастга югуриб тушди-да, ерга ётиб, уни узоқ ўпиб турди. Асфальтнинг иссиқ тафти унинг лабини куйдириш арафасида Анжела келиб, Рустамнинг қўлтиғидан олдида:

— Тур, жиннивой, — деди.

Улар таксида меҳмонхона томон кетишаркан, хорижлик ўзбек атрофдан кўз узмас, зўр иштиёқ билан кузатар эди.

— Ҳозироқ йўлга тушамиз, — деди Рустам улар меҳмонхонага жойлашиб олганларидан кейин.

— Нималар деяпсан? — деб кулди Анжела. — Ўзбекистон деганлари биттагина мана шу шаҳардан иборат эмас. Қарийб ярим Америкага яқин територияси. Қолаверса, қаёққа борамиз? Кимдан сўраймиз? Шуларнинг ўзиям катта муаммо. Бундан ташқари, иккаламиз ҳам итдай чарчаганмиз. Бугунча дам олайлик, эртага йўлга тушамиз.

Рустам Анжеланинг айтганига ноилож кўнди. Аммо юмшоқ диванда шифтга қараб қанча ётмасин, барibir уйқуси келавермади. Ички бир ҳаяжон уни ташқарига чорлайверарди. У секин бошини кўтариб, Анжела ётган диванга қаради. Жувоннинг кўzlари юмуқ, бир текисда нафас олаётганлигини кўргач, шиппагини кийди-да, шкафнинг ёнига бориб кийина бошлади.

— Қаёққа? — дея сўраб қолди шу пайт кўзини очган Анжела.

Худди ўғирлик қилаётган одамдай Рустам чўчиб тушди ва орқасига ўгирилиб:

— Шундай, ташқарига чиқиб келмоқчидим, — деди.

— Ҳеч қаерни билмайсан-ку, адашиб кетасан, — деди норози бўлиб Анжела.

— Юр унда сен ҳам, бирга айланамиз.

— Ташқарининг иссиқлигини кўрмайсанми? Озгина салқин тушсин, кейин чиқармиз.

— Сабрим чидамаяпти, Анжела. Шунча ухлашга ҳаракат қилсам ҳам кўзимга уйқу келмади. Бироз айланайлик, кейин келиб дам оламиз.

Рустамнинг қайсаrlигини қайтаролмаслигига амин бўлган Анжела унинг айтганига кўнишдан бошқа илож тополмади.

Шаҳар Рустамга ёқиб тушди. У ҳамма нарсага зўр эътибор билан қарап, ўзига таниш бўлган бирон нима қидиради. Қоп-қора соchlарини орқасига ёйиб ташлаб олган, ўзлари европача кийинган қизлар унинг кўзини қамаштиради. “Бунча чиройли бўлмаса бу ернинг қизлари?! Юзларининг тиниқлиги-чи?” — деб ўйлаб, ҳар битта қизни кўзи билан кузатиб қўярди у.

— Мен сенинг бу қилифингдан рашк қила бошладим, — деди ёнида кетаётган Анжела туртиб қўйиб.

— Тан бермай иложинг йўқ, — деди Рустам очикча иқор бўлиб, — қизларнинг чиройлилигини қара. Ҳаво қанчалик иссиқ бўлмасин, ҳаммаси оппоқ. Бу ердаги каби қизларни на Европада ва на Америкала учратасан.

— Ҳа, — дея тан олди Анжела ҳам, — ҳақиқатан ҳам чиройли экан.

Улар бир соатга яқин айланганларидан сўнг ошхоналардан бирига киришди. Рустамнинг кўзи паловга тушди-ю, ҳаяжонланиб кетди.

— Мен, — деди у энтикиб, — бу овқатни ёшлигимда еғанман. Ҳалиям эсимда. Ишонмасанг, мазасини ҳам айтиб беришим мумкин.

— Ишондим, ишондим, — деди Анжела кулиб, — ёшлигингни эслашинг учун айнан шу таомдан еймиз.

Биринчи луқмани оғзига олганидан сўнг Рустам узоқ вақт кўзини юмиб турди.

— Нима бало қиласапсан? — деди ҳайрон бўлган Анжела.

— Мазасини кўраяпман.

— Жиннивой, — дея кулиб қўйди Анжела.

Меҳмонхонага қайтиб келганларида иккаласи ҳам ҳолдан тойган эди. Шу боис, ювиниб олишди-да, сўнг пинакка кетишиди. Рустам тушида онасини кўрди. Унинг бошида оппоқ рўмол. Кўзлари кулиб турибди. Лекин сочининг оппоқлиги, пешонасидаги сон-саноқсиз ажинлар унинг кўнглини хира қилди.

— Ойи, нега бунчалик сочингиз оқариб кеттган? — деде сүради у.

— Отанг икковимиз сени роса соғиндик. Тезроқ келақол, — деди она унинг саволига жавоб бермасдан.

Рустам энди унинг ёнига югуриб бормоқчи эди, бирдан гуп этиб йиқилиб тушди. У кўзини очганида ерда ётар эди. Ҳеч нарсани англолмай карахт аҳволда бироз атрофга қараб турди-да, сўнг яна диванига чиқиб ётди. Тезда ухлаб қолган эса-да, ўша totли тушни бошқа кўрмади.

Кечки саккизларда улар уйгонишиб, тамадди қилишди-да, меҳмонхона атрофидаги бир соатлар чамаси сайр қилишди. Кейин яна хоналарига қайтиб келишди. Рустам телевизорни ёқди. Ўзбек тилидаги кўрсатувга умуман тушунмаётган эса-да, тикилиб тураверди. Унинг орқасидан Анжела келиб қучоқлади. Ундан ўша улар бирга бўлган ilk кечадаги хушбўй атири ҳиди келар эди.

— Сен мени бутунлай унутиб қўйлинг, — деди у ноз билан ва эркакнинг томоғидан ўпди.

— Унуганим йўқ, — деди Рустам унга бир қараб қўйиб, — кун бўйи биргамиз-ку, ҳатто кечасиям.

— Менга камлик қиласяпти...

— Сен истаётган нарса менинг умуман хаёлимга келганий йўқ.

— Ўзим эслатиб қўяман.

* * *

Очил билан Фозилга юрга қайтиш осон кечмади. Аввалига уч кун улар Олянинг уйида биқиниб ётишиди. Кейин Киевга поездда кетишли. Ундан Сочига боришиди ва у ердан самолётга чипта олиб, Тошкентта учиб келишди.

— Энди, — деди Очил таксида “Отчопар”га кетаётганларида, — сен билан бирон жойга борсам кучук бўлай.

— Бўлмаса, ўзингга бирорта итнинг номини қўявер, — деди Фозил кулиб.

— Мана кўрасан. Бирортаям жойга бормайман.
— Сен мени ёмон қилиб, ўзинг оппоқ бўлиб қолмоқчимисан? Ҳе ўргилдим сендан. Мен нима гуноҳ қилдим? Неча кундан бери фақат мени айблайсан. Ўтирсам ўпоқ, турсам сўпоқ. Ўзинг жа сўфимисан? — деди бирдан жаҳли чиқиб кетган Фозил. — Ҳали қишлоққа бориб ҳаммага нима бўлганлигини бирмабир айтиб саситарсан ҳам.

— Ҳаммани ўзингдай деб ўйлама. Сенинг оғзингдан чиқмаса. Москвадаги гаплар Москвада қолади, — деди Очил унга қирғий қараш қилиб.

— Жўра, — деди дарров паст тушган Фозил, — нима бўлсак иккаламиз бўлдик. Буни қишлоққа бориб гуллаганимиз билан икковимиздан бошқа ҳеч ким шарманла бўлмайди. Шу ерда келишиб олайлик, бирорвга бошимиздан ўтганларни гапирмаймиз. Гапирган — учта ҳарф, келишдиқми?

Улар қўл ташлашиб, қасам ичиши. Аммо бу қасамнинг умри қишлоққа боргунларига қадар етди, холос.

Борган куниёқ, Фозил қариндош-уругига, ёру биродарларига “ҳақ” берди. Кечга бориб кайфи ошиб қолган “сайёҳ” Рустамбой ҳақида тўлиб-тошиб, қушиб-чатиб гапириб берди ва табиийки, миллиардер ва унинг гумашталаринингчув тушиб қолишида ўзи қаҳрамонлик вазифасини ўтаганлигини оғзи кўпирив ҳикоя қилди.

Очилнинг ҳам уйида деярли шунга ўхшаш тафсилотлар бўлди. Шу боисдан ҳам ҳар икки “қадрдон” ўртоқ “учта ҳарф”га айланмади.

Албатта, қишлоқда айтилган гапларнинг учқур қаноти бўлади. Очил билан Фозил эртасига ҳали бош оғриғидан кутулолмай қатиқ ичаётганларида кўшни қишлоқдагилар, ундан наридагилар уларнинг саргузаштларидан хабар топиб улгуришганди. Орадан икки кун ўтганидан кейин эса бутун туманда бу воқеанинг янада қўшиб-чатилган тафсилотлари кезиб юрар эди.

Ҳозир Америкада яшайдиган Рустам қачонлардир шу ерда туғилгани, кейин унинг ўғирлаб кетилиши ҳақидаги хабар Рустамнинг ҳақиқий ота-онасининг қулогига ҳам етиб келди. (Фозил ресторанды Рустамнинг қулогига “лағмон” илаётганида, ўзи билмаган ҳолда ҳақиқатни ҳам гапириб қўйганди. Яъни, у ёшлик кезларида йўқолиб қолган бола ҳақида эшитганди. Тўғрироғи, Рустамнинг йўқолиб қолиши район, областда ваҳимали тус олган, ота-оналар болаларини кўчага чиқармай қўйганди). Етмишдан ошиб қолган Бўрибой ота бунақа гапларни аввал ҳам эшитганди. Лекин уларнинг ҳеч бири тўғри бўлиб чиқманлиги учун бу хабарга ҳам қўл силтади. “Бўлса бордир, — дея ўйлади у оппоқ соқолини силаб, — лекин мен қидириб борсам, бошқа Рустам бўлиб чиқади. Ҳатто миллатиям ўзбек бўлмайди. Бундан ўн беш йил аввал ҳам шунақа бир хабар тарқалганди. Ўлай деб қидириб излаб топсан, татар чиқиб келди. Бунинг устига, отиям Рустам эмас. Рамил экан. Буям шунга ўхшаш гап-да”. Гарчи хаёлидан шунақа ўйлар ўтган эса-да, барибир кўнглининг бир чеккасида умид учқунлари пайдо бўлди. Бу шунчалик майда эдики, киприк соясини ҳам ёритолмас эди.

Бозордан шунақа миш-мишларни эшитиб келган Бўрибой ота узум сўриси тагидаги чорпояда неварасини ўйнатиб ўтирган кампирининг ёнига келиб ўтириди. Сўнг кампирига чой дамлаб келишни буюрди. Бўрибой отанинг иккита келини бор эди. Бири Рустамнинг акасининг, иккинчиси эса укасининг хотини. Уларнинг ҳар иккиси ҳам чол-кампир билан бирга яшарди. Чунки Бўрибой ота қўли калталик қилганидан, ҳеч бирига ўй-жой қуриб беролмаган, шу боис бор-йўғи тўрт хонали уйининг учта хонаси ни иккаласига бўлиб берганди. Ҳали келинлар ёш, болалари кам пайти жой масаласида қийналишмади. Аммо болалар катта бўлган ва кўпайган сайин уйининг торлиги билиниб қолди. Бунинг устига, бо-

лаларнинг тез-тез уришиб қолиши, унга катталарнинг ҳам аралashiши икки овсинни юз кўрмас даражага олиб келган эди. Бўрибой ота уларга қараб туриб, ичида эзилар, ҳеч қурса, болаларини тузукроқ ўқишларда ўқитиб, топармон-тутармон қиломаганидан афсус чекарди.

Эҳтимолки, шу боисдан ҳам ота келинлари: “Фақат нима иши бўлса, менга айтади, овсиним тараллабедод қилиб юради”, қабилидаги ўйга боришмасин деган хаёлда уларга иш буюрмас, нимаики дарди бўлса, кампирига айтар, келинларга қандай буйруқ беришни эса, кампирининг ўзи эплаб ташларди.

— Кампир, — деди Бўрибой ота суюққина чойни хўплагач, афти буришиб, пиёласидаги чойга хунук назар билан қарап экан, — пенсияни беришмадими?

— Қишлоқнинг нариги томонига почтачи келиб тарқатиб кетибди. Эшагинг ҳаром ўлгур, ҳар доим шундай қиласди. Навбат бизга келганда пули тамом бўп қолади... Эртага келармиш, — деди кампир қўлидаги набирасини кўрпачанинг устига ўтқазиб кўяркан.

Бу аёл ёшлигига қишлоқнинг энг олд қизи эди. Ҳамма унга ошиқу беқарор бўлганди. Лекин Бўрибой ота барининг бармофини тишлатиб қўйди. Ойсифат билан озгина салом-алиги фойда бериб, бир куни кечқурун олиб қочиб кетди ҳамда ҳамма ишни бажариб ташлади. Ўзига тўқ бўлган Ойсифатнинг ота-онаси шундан кейингина қизларини унга беришга мажбур бўлишди. Ойсифат Рустам йўқолиб қолгунча ҳам илгаригидай гўзал эди, уни кўрганларнинг, албатта, бир маротаба суқи тушарди. Аммо Рустам йўқолди-ю, у бирдан ўзини олдириб қўйди. Юзига ажин тушди, сочи қировдай оқариб кетди. Унинг чиройидан асар ҳам қолмаганди.

— Ҳмм, — деди Бўрибой ота ўйланиб, — бугун гўшт олиб келмоқчийдим. Пул сафана етмади.

Унга кампир ёвқарашиб қилиб қўйди.

— Кейин, — деди Бўрибой ота, айтсамми айтма-

самми, деган хаёлла, — шу битта гап эшитиб қолдим...

— Нима гапакан? — дея сўради кампир чолидан кўзини узмай.

— Эсингдами, ўн беш йил бўлдими-ўн олти йилми... йўқолиб қолган бир татар болани излаб борувдим...

— Унга нима қипти? — дея бирдан чолининг гапини бўлди кампир.

— Ҳеч бало қилмаган, — деди чол кампири гапини бўлганидан жаҳли чиқиб, — яна битта шундай гап тарқабди. Америкадан бир бола Масковда шу районлик иккита савдогар боламидан учрашиб қопти. Шу бола: “Мени бир пайтлар ўғирлаб кетишган, ҳозир Америкада яшайман. Бойлигимнинг учи-куйруғи йўқ. Отим Рустам”, дебди.

— Ни-ма?! — деб юборди бирдан ҳаяжонланиб кетган кампир. — Оти Рустамакан? Кўралмай ўлиб кетаманма, деб қўрқувдим болам бечорани!

— Шу пайтдан кўз ёш тўковурасанма?! — дея уришган бўлди кампирини Бўрибоя ота, аслида ўзининг ҳам кўнгли бўшаб кетганди.

— Отаси, — деди кампир кўзидағи ёшини рўмомлига артиб, — қаердайкан шу болалар, уйини сўраб-суриштирдингизма?

— Бозорда эшитдим бу гапни, кимдан сўрайман? Илгариям бундайча миш-мишлар ёлғон чиқувди. Шунинг учун...

— Ҳечам шу болангизни ўйламанг, йўқолгандаям уч-тўрт кунгина излагансиз, мен уни кўчадан етаклаб келганим йўқ-ку! — дея яна чолининг гапини бўлган кампир дийдиёсини бошлаб юборди.

— Дарров бигиллашга тушасан! Суриштирувдим, милисаям изловди. Тополмовдик-да, энағарди боласи! — деб Бўрибоя чол пиёласидаги совиб қолган чойни ичди-да, ўрнидан туриш ҳаракатига тушди.

— Қақа борасиз энди? — деди кампири жиғибийрони чиқиб.

— Улингнинг биронтасини олиб, топаман шу болаларни, — деди Бўрибой ота кўзидаги ёшини яшириб.

Чол билан унинг катта ўғли Равшан қуёш уфқа ёнбошлайдиган маҳал, амал-тақал қилиб Очилнинг уйини топиб келишди. Очил бунаقا ошна-оғайниси йўқлигидан, уларни хушламайгина кутиб олди.

Бўрибой ота ичида гапни узоқ сақлаб туролмади. Озгина у ёқ-бу ёқдан гаплашиб турғаниларидан кейин бирдан мақсадга кўчиб кўя қолди.

— Тўғриси, шунаقا гаплар ҳам бўлувди, — дея чайналди Очил. — Лекин биз унчалик ҳам эътибор қилмаганмиз. Асосан савдо билан шуғулланганмиз...

Даврада Очилнинг ҳам отаси ўтирган эди. У ўғлининг бунаقا чайналишига чидолмади. Илгаридан ҳам унинг отаси дангал гаплиги билан қишлоқда танилганди. Нимаики, хоҳ яхши-хоҳ ёмон бўлсин, шартта истаган одамига айтиб кетаверарди. Бунинг устига, ичида сир сақлаб туролмасди. Уғилларини ҳам шунаقا қилиб улғайтирмоқчи эди. Аммо уддасидан чиқолмади. Ташқи кўриниши отасига ўхшаган фарзандларнинг бошқа ҳамма фазилатлари онасига, унинг уруғ-аймоғига тортиб кетди.

— Эзмаланмай нима бўган бўлса, ҳаммасини гапир-да, баччағарди боласи, булар шунча йўлдан оврайи сарсон бўлиб келишган. Сен эзмаланиб мияни қотирасан! — боласини койиди дангалчи ота.

Очил отасига норози қиёфада бир қараб қўйдида, гапни энди узоқдан бошламоқчи бўлганида, падар уни яна силтаб ташлади. Шундан кейингина Очил қисман Рустам ҳақида гапириб берди.

— Болам, — деди кўзидан ёш чиқиб кетган Бўрибой ота, — мени шу ёқларга обор, бориш-келишини тулайман.

Бу гапдан Очилнинг ранги оқарди.

— Мен боролмайман, у томонларнинг милисаси жуда ёмон бўп кетган. Ҳозир борган одамни ушлаб

* Бўла (шевала) — холавачча

олиб қамаб қўйяпти, — дея ёлғон гапирди у. — Лекин унинг ўзи бу ёқса келмоқчиди. Ажабмас, бир-икки кунда келиб қолса...

* * *

Семённинг боши қотиб қолди. У нима қилиш, қандай йўл тутишни билмасди. Рустам пайдо бўлгунча кўпинча Анжела билан маслаҳат қиласади. Энди у йўқ. Семён илк маротаба ўзини ёлғиз ҳис этди. Яхшилаб ўйлаб қараса, атрофида биронта ҳам садоқатли одами йўқ экан. Ҳамма ундан қўрққанидан, пулнинг кўплигидан атрофига тўпланар, хизматини қиларкан. “Йўқ, — деди у бирдан ўзига-ўзи, — бунақаси кетмайди! Нега довдираяпман? Бунақаси менга ярашмайди. Мен ҳеч қачон ёлғиз қолмайман. Мен доим олдинга юраман. Ҳамиша шунаقا бўлиб келган, бундан кейин ҳам шундай бўлиб қолади. Ўзими ни йўқотдимми, демак, мен ўлимга маҳкум одамман. Мен ёлғиз эмасман. Мен суянадиган Мен борман! Ҳа... ҳа, мен фақатгина Ўзимга суянаман. Вошқалар менинг олдимда ҳеч киммас!” У телефонни олди-да, Вадимнинг рақамини терди.

— Оғайнини, — деди у салом-аликдан кейин, — бир келиб меникида меҳмон бўлиб кет. Гаплашадиган гаплар бор.

Одатдагидек, Вадим йўқ демади. “Албатта бораман, — деди у, — чақчаклашиб ўтирамиз”. Кўнгли бироз кўтарилган Семён ўрнидан турди-да, тансоқчиларидан бирини чақириб, тезда Маргаритани уйғотиб келишларини буюрди. Ўзи эса голъф таёқчаларини олиш учун уйнинг орқа томонига ўтди.

— Рита, — деди Семён узун оёқларини намойиш этиб келаётган жувонга, — сенинг туришингни сабрсизлик билан кутаётган эдим. Манави гўрсўхталарнинг, — шундай деб ёнидаги йигитларни кўрсатди, — биронтаси ҳам голъф ўйинини билмайди. Биттагина сендан умидим, шунинг учун ҳам уйғотишга мажбур бўлдим.

Ноз билан унинг юзидан ўпиб қўйган Маргарита

йигитларга бирма-бир назар ташларкан, ҳар бирига алоҳида жилмайиб:

— Мениям түрсүхта десанг бўларкан, — деди.

— Оббо, — деди коптокни уриш учун эгилиб турган Семён қаддини тиклаб, — бир ўзим ўйнасан, умуман қизиқ бўлмайди-да. Ундан кўра ўйнамаганим бўлсин. Яхшиси, юр, пивохўрлик қиласиз.

Маргарита унинг бу таклифига қаршилик қилмади. Шундоққина кўм-кўк майса устига ўтириб олиб, оёқларини икки томонга ёйди. Семён ҳам унинг ёнига шунаقا қилиб ўтиреди.

— Мен ҳам шундай ўтиришни яхши кўраман, айниқса, сендай жоннинг офати ёнимда бўлса, — деди у кулиб.

— Анжелани кўрганингда-чи? — деди Маргарита бир кўзини қисиб.

— У ҳамма ваqt ҳам менинг кўнглимдагини топлмайди. Сен бўлсанг, бир қарашимнинг ўзидаёқ нима демоқчилигимни билиб оласан, — деди Семён ва Маргаританинг кўзига тикилди.

Аммо Маргарита унинг бунаقا ўқрайиб қарашидан мақсади нима эканлигини билолмади. Билганда ҳам қўлидан ҳеч нарса келмасди.

— Паша, — деди Семён ёнидаги йигитта, — хонимни яхшилаб чўмилтииринглар. Хоним гольф ўйнашдан кўра чўмилишни яхши кўраркан.

Йигитлари Семённи Анжела билан Маргаританинг ҳийласидан хабардор қилишган эди. Аммо бу томоша нима учун кераклигини билмасди. Шундоғам Маргарита билан унинг ишқий саргузаштларини ҳамма билди-ку, Семён буни ҳеч кимдан яширмади-ку. Нима кераги бор экан уни кино қилишнинг?

Семён икки жувоннинг маҳфий ишидан хабардор бўлган лаҳзадаёқ Маргаритага ҳукм зълон қилиб қўйган эди. Яъни, у сувга бўқтирилади.

— Ҳозиргина чўмилиб чиқдим, — деди мафтункор жилмайган Маргарита ҳеч нимага тушунмай.

— Чўмилгансиз-у, лекин сузмагансиз-да, хоним,
— деди Семён машхур ўқрайишини унга тағин “ҳада”
этиб.

* * *

Очилининг гапидан кўнгли тўлмаган Бўрибой чол
уйига бошини эгиб қайтди. Чорпояда чолининг ке-
лишига илҳақ кўз тикиб ўтирган кампирини кўрга-
нида эса баттар эзилди. “Шу бечорага ҳам жавр
бўлиб кетди, — дея ўйлади у, — менга текканидан
бери рўшнолик кўрмайди. Ўзи шу боласини бошқа-
ча яхши кўрарди”.

Кампир чоли келиб ўтирганидан кейин талай муд-
дат юрак ютиб бир нарса сўрай олмади. Чол ҳам
келинини дамлаб келган суюққина чойдан икки-уч пиё-
ла ичмагунча ёрилмади. Охири кампирнинг тоқати
тоқ бўлиб:

— Нима бўлди? — дея сўради.

Чол жавоб ўрнига қўлини силтаб қўйди.

— Гапиринг, бошқайканма, улар учратган бола
Рустамасаканма? — деди кампир лаблари титраб.

— У ёғини худо билади, — чол хўрсинди. — Бач-
чағарди боласининг айтишига қараганда, ҳақиқатан
Рустам деган одам билан Москвауда билла бўғана-
кан, билла ўтиришиб чой ҳам ичибди. У мени ёшли-
гимда Ўзбекистондан ўғирлаб кетишган, деб айтиб-
ди.

— Кейин-чи, кейин нима бўпти? — деди кампир
сабри чидамай.

— Нима бўларди, Рустам ўзи ётайдиган жойга ке-
тибди. Булар ўзларининг қўноғига.

— Бораман, келаман, деган гаплардан айтмаппа?

— Айтипти, келаман, депти.

— Қачон келаркан?

— Бунисини уям билмасмиш.

— Юр, бирга бориб келайлик, демадингизма?

— Айтдим, — деди чол кампирни эзмалик қиласавер-
ганидан жаҳли чиқиб, — йўл пулингди тўлайман,

бориб келайлик, дедим. Кўнмади-да баччағардинг боласи.

— Яхшилаб айтмагансиз-да. Бўмаса кўнайди, — деб кампир кўзига ёш олди. — Бутун бошли болангиз йўқ бўлиб кетсаям сизди парвойингизга кемайди. Эртага ўзим бориб келаман шу одамди олдига.

— Бор. Ҳозироқ бор. Ҳе...

— Кўйингизлар, — дея бирдан гапга аралашди Равшан, — бирдан эковингизам тутаб кетасизлар.

— Биронта болант ҳаяллаб қолсин-чи, нима аҳволга тушаркансан?! — деди кампир тўнғичига заҳрини сочиб. — Боланг — бола, лекин жигаринг, битта қориндан талашиб тушганинг — бегона. Жонинг ачимайди.

— Эна, нималар дейверасиз ўзингизча? — деди Равшан асабийлашиб. — Ҳали мен бирон нарса дедимма? Бирдан одамни уришишга тушасиз.

— Бўмаса сенгина ер ютгур, шу боладан Рустамди қаердалигини билиб олмайсанма, эртага укангди олиб йўлга тушмайсанма? — деди кампир шанғиллаб.

— Москва деганларига умримда бормаган бўлсам, уни қаердан излайман? — дея ўзини оқлаган бўлди Равшан.

— Одамлар дунёнинг у бурчагига бориб келишапти. Силар бўлсаларинг, тухум босиб ётоворинглар уйда, хўпми! — деди кампир алам билан.

— Бу борса-ю, у бу ёққа қараб чиқса, — гапга аралашди Бўрибой чол, — кейин сарсон бўп қайтиб келади. Ундан кўра озгина кутайлик, ажабмас, ўз оёғи билан кириб келиб қолса.

Чол анча ҳовуридан тушиб қолганди, шу боисдан бу гапни босиқлик билан айтди. Кампир оқ докадан бўлган рўмолига кўзидаги ёшини артди. Ўғил эса бошини эгиг ўйланиб турди-да:

— Ота, милисага хабар берсак-чи. Давлат балки бирон чорасини топар, — деди.

— Бу гапингдаям жон бор. Балки милисага айтармиз. Икки-уч кун қараб турайлик-чи, хабар бўлавер-

маса, кейин айтамиз. Ўзимизам унгача биронта чорасини топиб құярмиз, — деди чол ва “Е бисмилло”, дея ўрнидан туриб уй томонга кета бошлади.

* * *

Рустамнинг қўкрагига бош қўйиб ётган Анжела айқаш-уйқаш бўлиб кетган ҳаёти ҳақида ўйлар эди. Бундан бир ой аввал унинг муаммоси кўйлакларнинг қайсинаси модага кирган-у, тирноқни қанақа қилиб ўстирган маъқул деган масалалар билан банд эди. Энди эса булар ҳақида ўйлашга хаёлида жой ҳам йўқ. Бир томондан Семённинг ўйинлари, иккинчи томондан Рустамнинг ташвишлари уни сиқиб қўйганди. Агар эртага Рустамнинг қариндош-уруги топилиб қолса, бой улар билан овора бўлиб қолади. Эҳтимолки, Анжелани буткул унутиши, кераксиз латтадай улоқтириб ташлаши ҳеч гап эмас. Семёндан ҳам умидини узса бўлаверади. Гарчи у: “Ҳамма иш якунига етгандан кейин яна аввалгидек яшайверамиз”, деган эса-да, сўзида турмаслиги кундай аён эди.

— Рустамчик, — деди Анжела бошини кўтариб, — сен мени севасанми?

— Нега бунақа деб сўраяпсан? — дея Рустам кўзини очиб Анжелага қаради.

— Билгим келаяпти.

— Ёқасан, — дея ноаниқ жавоб қилди Рустам. Анжелани бу жавоб қониқтирмади.

— Биламан ёқтиришингни, менга севишинг ёки севмаслигинг тўғрисида айт.

— Бу ҳақда ҳали ўйлаб кўрганим йўқ, — деди Рустам, — шунинг учун ҳозир бир нарса деёлмайман.

Анжела хўрсинди-да, яна бошини Рустамнинг қўкрагига қўйди.

— Одам севган одамини ҳеч қачон ташлаб кетмайди. Лекин севмаса... Ўйлаб қарасам, мени юрагидан севадиган одамни ҳали учратмабман. Ошиқларим кўп бўлган, лекин ҳаммасининг чиройимга ҳава-

си келган, холос, — деди у. Кўзидан икки томчи ёши оқиб, Рустамнинг кўкрагига тушди. Буни сезган Рустам унинг бошини эҳтиёткорлик билан кўтардида:

— Сенга нима бўлаяпти? — дея сўради.

— Кўявер. — деди Анжела йиғлоқи овозда, — бир бўшашиб олайин.

Рустамнинг унга ичи ачиб кетди. Жувоннинг хушбўй ҳид таралиб турган сочини силади, сўнг оҳис-тагина ўпди.

— Хафа бўлма, — деди жувоннинг кўнглини кўта-риш учун, — ҳали ҳаммаси жойига тушиб кетади. Вақт кўп нарсаларга қодир. Муҳаббатнинг пайдо бўлиши, ўлиши ҳам вақтга bogлиq.

— Бундан чиқдики, сенга умид қилсан бўлади, — деди Анжела яна бошини кўтариб.

— Билмадим, Анжела, билмадим. Ҳозир мен сен-га бирон нима деб жавоб қилишга ожизман. Ҳаёлим қариндошларимни топиш билан банд. Бошқа ҳар қандай ишлар ундан кейинги ўринда туради. Яхши-си, ухлайлик. Эртага ухлашга вақт бўладими-йўқми, худо билади, — деди Рустам ва кўзини юмди. Анже-ла ҳам бошини эркакнинг кўкрагидан олиб ёстиққа кўйди.

Соат ўндан ошгандан кейин улар уйғонишли. Ювениб бўлишгач, нонушта қилиш учун меҳмонхона ресторанига тушишли.

— Менга бу ер ёқди, — деди Рустам жилмайиб Анжелага қарап экан, — фақат ҳавоси бироз иссиқ экан.

— Ҳечқиси йўқ, кўнишиб кетасан. Шу ерда туғил-гансан-ку, кўнишинг осон кечади. Менга осон бўлмаса керак. Ишқилиб, димиқиб қолмасам гўрга эди, — деди у ва пиёладаги чойдан ҳўплади.

— Ишни нимадан бошлаймиз? — дея сўради Рустам ундан.

— Ҳайронман, — деди Анжела елкасини қисиб.

— Балки элчихонага борармиз. Тушунтирамиз, ёрдам беришар.

— Унда шов-шув бўлиб кетади. Яхшиси, милицияга борамиз. Ўзбекларни меҳмондўст халқ деб эшитгандим. Ажабмаски, кўмаклашишса.

Рустам бироз ўйланиб турди-да, унинг фикрини маъқуллади.

Улар нонуштадан кейин хоналарига чиқиб кийимларини алмаштириши-да, сўнг меҳмонхона директорининг ҳузурига киришди. Директор уларни очиқ юз билан кутиб олди. Меҳмонхона ёқсан-ёқмаганлигини сўради.

— Ҳаммаси жойида, — деди Анжела Рустамга бир қараб қўйиб.

— Ҳеч қанақанги муаммо йўқми? — деди директор гўзал аёлга ҳирс билан қааркан.

— Меҳмонхона масаласида ҳеч қандай муаммога дуч келмадик, — деди Анжела табассум билан.

“ЗАГСинг бўлмасаям одамгарчилик қилиб иккавингни энг қиммат жиҳозлар билан безатилган хонага жойлаштириб қўйган бўлсак. Мазза қилиб юмшоққина италян ётогида бир-бирингнинг қучоғингда ётган бўлсанг, қанақа муаммо бўлсин?! Биз сенинг юрtingга борайлик-чи, шунақа қилиб беришармикин?” — дея хаёлидан ўтказди директор ва:

— Унда шаҳарни айланинглар, маза қилинглар, сўнг бизнинг юрт тўғрисидаги таассуротларингни ватнларингга борганларингда бошқаларга гапириб берасизлар, — деди кибр билан.

— Кеча шахрингизни айландик. Таасуротлар бир дунё. Биз сизнинг ёнингизга бошқа масала юзасидан келгандик, — деди Анжела.

— Қанақа масала экан?

— Бизга милиция бўлими керак эди.

— Тинчликми? — дея сўради директор бирдан кўзи олайиб.

— Тинчлик, ўзимизнинг ишимиз бор эди. Шуни хал қилиб олишимиз керак.

— Қанақа масала бўлса, мен шу ерда эканман, ўзим ҳал қиласман. Бунга милицияни аралаштиришнинг ҳечам ҳожати йўқ, — деди директор. “...пуруш ходимларга ҳечам ақл кирмади-да. Неча марта айтганман, чет элликлар билан эҳтиёт бўлиб муомала қилинглар, ҳар битта гапларингни ўйлаб гапиринглар, деб. Барibir айтганимдай бўлмайди. Менинча, биронтаси хизмати учун қўшимча чойчақа сўраган бўлса керак. Ёки қўпол муомала қилдимикин? Нима бўлсаям буларнинг кўнглини олиб, шу ернинг ўзида ҳамма ишни тинчтишим керак. Йўқса, ортиқча бошоғриқ қўпаяди”, — дея ўйларди у.

— Йўқ, сизни асло ташвишга қўйиш ниятимиз йўқ. Милиция қаердалигини билсак, ўзимиз бориб ҳамма ишимизни ҳал қилиб келардик, — деди Анжела бироз жиддий тортиб.

“Буларни яхши биламан, — дея ўйлади директор, — ҳаммаси мулойим хунук бўлади, олдингда иржайиб, тиржайиб туради-да, арзимаган камчиликни у ёққа олиб бориб, отнинг калласидай қилиб кўрсатади. Йўқ, мен осонликча жон берадиган одамлардан масман. Бўлмаса шундай меҳмонхонага директор бўлармидим. Барibir ичингдаги гапларни сугуриб оламан”.

— Нималар деяпсиз, хоним? — деди директор имкон борича юмшоқ гапиришга ҳаракат қилиб. — Сизларни мутлақо уринтирмаймиз. Бу бизнинг вазифамиз. Айниқса, чет элликларга ҳурмат бизда бошқача.

— Раҳмат, — деди Анжела табассум билан, — лекин бизнинг масаламиз сизга умуман тегишли эмас. Шунинг учун ўзимиз ҳал қиласми.

— Нима гап? — деди шу пайтгача бўлаётган гапларга умуман тушунмай гаранг бўлиб турган Рустам инглиз тилида.

— Мен ўзим сизларга ёрдам бераман, деяпти. Балки бунга айтармиз. Шу ерда туриб ҳал қилиб берса, бизга ҳам осон кечармиди?

— Шунақа имконияти бормикин? — деди сўради Рустам.

— Билмадим... — деди жувон.

Энди уларнинг ўзаро гапларига директор тушунмади. Шу боисдан унинг ҳадиги икки баробар ошди.

— Жанобни нима безовта қилаётган экан? — деди у Анжелага қараб.

— Директорнинг бизга ёрдам беришга имконияти бормикин, деб сўраяпти, — деди Анжела Рустамнинг гапини русчага таржима қилиб.

— Бўлмасам-чи, — деди директор кўзи қувончдан порлаб кетиб.

— Бизнинг бу ерга келишимиздан мақсад: бир бола ёшлигига йўқодиб қолган. Бунга ўттиз йилдан кўп вақт ўтган. Ҳозир ўша бола топилди. Энди у ота-онасини излаб юрибди. Милицияга айтсак, балки ёрдам беришар.

— Шунақами? — деди директор енгил тин олиб.

— Унда мен сизларга таржимон бераман. Ўзи мелисаҳонага олиб боради. Сизларнинг гапларингизни уларга тушунтиради. Ажабмаски, муаммонгиз ҳал бўлиб қолса.

Директор столи устига ўрнатилган тугмачани босган эди, эшик унсиз очилиб, остонада бежиримгина, соchlари қоп-қора котиба юзида табассум билан пайдо бўлди. Меҳмонхона хўжайини унга таржимонни айтиб келишни буюрди. Бироздан кейин ёши йигирма беш ёшлар атрофидаги, қоп-қора костюмшими кийган, сочи силлиқ тараған йигит кириб келди. Директор унга кўрсатма берар экан, мабодо меҳмонлар ортиқча гап қилиб қўйишса, милиция ходимларига силлиққина қилиб, меҳмонхона мижозларининг ҳамма нарсадан кўнгли тўқлигини тушунтириш зарурлигини айтишни унутмади.

* * *

Семённинг гапидан ёмон бир нарсанинг ҳидини сезган Маргарита бассейн томонга кетаётганида, “Қо-

чиб кетмасам бўлмайдиганга ўхшайди”, дея ўйлади.
Ва қуриқчи йигитга кўкраги билан бироз суйкалиб:

— Ҳожат чиқариб олмасам, ҳозир тамом бўламан,
— деди ноз билан.

— Бемалол, — деди тансоқчи йигит ва уй томонга
йўлни бурди.

Улар ҳожатхона ёнига борганларидан кейин Маргарита эшикни очди-да, ортига ўгирилиб, тансоқчи-
га жилмайди ва бирдан унинг ёқасидан ғижимлаб
ушлаб, лабига лабини босди. Тансоқчи буни кутма-
ган эди, шу боисдан ҳам аввал довдираф қолди. Кей-
ин ўзининг ҳам авжи келиб кетди ва Маргарита
билан бирга ҳожатхонага кирди. Эшик қулфланди.
Ишқий ҳангома тезда бошланиб кетди. Пешонаси-
дан тер оқиб кетган тансоқчи ҳамма нарсани уну-
тиб, қиласётган ишига бутун борлиги билан берил-
ган маҳал, “ғирч” этиб пичоқнинг ўткир тифи унинг
қорнига санчилди. Кутимаган оғриқдан инграб
юборган тансоқчи ўтириб қолди. Маргарита вақтни
бой бермаслик учун тезда унинг томогига ҳам тиф
ботирди. Кўзи олайиб кетган тансоқчи бир зумда
тинчиди.

— Узр, — дея тансоқчининг пичоини устига таш-
лаган Маргарита унинг тўппончасини олди, — шу-
нақа бўлиб қолди. Бошқа пайт бўлганида сени бош-
қача эркалаган бўлардим.

У ҳожатхонадан чиқиб, уй ичини яхшилаб кузатиб,
ҳеч ким йўқлигига амин бўлгач, яширин йўл
орқали ташқарига жуфтакни ростлади. Махфий йўлни
унга бу ерга келган куни ҳар эҳтимолига қарши деб
Анжела кўрсатган эди.

Кўнгли сал хотиржам тортган Семён чўзилиб ос-
монга қараб ётганча хаёл суриб, икки шиша пивони
бўшатганидан кейин керишиб олди-да, ўрнидан турди
ва йигитларига стол безатиб қўйишларини тайин-
лаб, уй томон юрди. Уйга киргач, бирдан хотиржам-
лиги йўқолиб, безовталаниб қолди. Аввал атрофга
аланглади. У кўнгли нега безовталигини ўзи ҳам ту-

шунмасди. Бунинг сабаби эса ноаён. Шу пайт унинг хаёлига тансоқчи Маргаританинг тақдири нима бўлганлиги түгрисида хабар бермаганлиги келиб қолди ва тез-тез қадам босиб ташқарига чиқаётганида полнинг устидаги бир томчигина қонга кўзи тушиб қолиб, шартта тұхтади.

— Аня! — деб бақирди кўзи олайиб кетган Семён.

Ошхона томондан фаррош хотин юргилаб келди.

— Нима бу? — Семён полдаги қонни кўрсатиб ўшқирди унга.

— Ҳозиргина йўғиди, — деди кўркувдан қалтирашга тушган фаррош аёл.

— Йўғиди? — Семён чўккалаб полга ўтириди-да, қонга диққат билан тикилди ва унинг янги эканлинини билгач, ўрнидан туриб, чуқур нафас олди ва фаррошга тезда тансоқчиларни айтиб келишини буюрди. Бирпасда айтилган йигитлар йифилди, уларнинг орасида Маргаритани “тинчтиш” учун кетганий йўқ эди.

— Валера қани? — дея сўради Семён йигитларидан.

Тансоқчилар бир-бирига қаради.

— Боя анави аёлни бу ёққа етаклаб келаётган эди, — деди улардан бири.

— Ним-ма?! — дея бақириб юборди Семён. — Мен унга қанақа буйруқ берган эдим? Топларинг тезда!

Тансоқчилар бирдан ҳар томонга тарқалишиди. Бири ҳожатхона эшигини очди-ю, кўрқиб кетганидан бақириб юборишига озгина қолди. Валера шифтга барайганча ўлиб ётарди.

— Шеф! — деган овоз янграши билан Семён ҳожатхонага юргурди ва у ердаги манзарани кўрганида бўкириб юборди.

Семён ёнидаги тансоқчиларни тепкилади. “Итдан тарқаганлар! Ҳаромилар! Текинхўрлар!” — дея сўкди.

Вадим келгунча Семён ўзини босолмади. Қанчада

дан-қанча чиннилар чил-чил бўлди, дераза ойнала-рининг соғи қолмади ҳисоб, бир-иккита жиҳоз ас-фаласофилинга жўнади.

— Нима бўлаяпти? — деди уйга кириб келган Вадим ҳайрон бўлиб.

— Ўзимам билмайман! — дея дўсти билан саломлашмасдан ҳам бошини ушлаганча диванга ўтириди Семён.

— Тушунтириброқ гапирсанг-чи! — деди унинг ёнига келган Вадим.

— Менимча, — деди ёнидан сигарета олиб лабига қистирган уй эгаси, — ҳамма нарсанинг расвоси чи-қиб кетди. Иккита қаердаги итваччанинг “ишини битириш” учун одамларимни жўнатдим. Биласанми, нима бўпти, менинг одамларимни ҳалиги гўдаклар мажақлаб кетишибди. Сени чақирганимдан кейин битта манжалақини сувда “чўмилтиргин” деб барзангидай бир йигитимга буюрсам... Итнинг боласи ана, ҳожатхонада қонига беланиб ётибди...

Вадим Семённинг ер чизиб ўтирган одамларига ўқрайиб қаради. Сўнг:

— Буюр, — деди дўстининг ёнига ўтириб, — буларни ўзим яхшилаб тарбиялаб қўяйин.

— Вера! — дея бўкирди Семён Вадимнинг гапига зътибор қилмай. — Ароқ опке!

Ошхонада хўжайниннинг гапини эшитмай қолиб, ажали тўрт кун олдин келиб қўйишидан кўрқанча қулогини динг қилиб турган ошпаз аёл патниснинг устига музлаткичнинг ичидаги ароқлардан бирини олиб қўйди-да, Семённинг ёнига югурди. Ошхонадан шошилиб чиқаётганида эшик рахига урилиб кетиб, йиқилиб тушишига сал қолди. Яхшики, буни Семён кўрмали. Йўқса, яхшигина “маош” эгаси бўлар эди.

Икки дўст бир қадаҳдан бўшатишгач, Семён пича бўшашди ва Вадимни ташқарига таклиф қилди.

Улар тўкин дастурхон тайёр бўлгунча яна бир қадаҳдан ароқ ичишиди. Суҳбат тезда қовушиб кета-

вермади. Семён Вадимнинг ёнида анчагина обрўсизланиб қолган эди. Буни Вадим ҳам сезиб турарди. Гарчи:

— Шунгаям хафа бўлиб ўтирибсанми? Ўтиб кетади тезда, эркаксан-у, қанчасидан эсон-омон ўтиб кетгансан, — дея Семённинг кўнглини кўтармоқчи бўлган эса-да, хаёлида “Бунинг куни битибди. Тезроқ отга қамчи босиб, ҳамма нарсага эга чиқиш керак”, деган ўй бор эди.

Семён асабий кўл силтали. Сўнг хўрсишиб қўидида, ароқдан қулқуллатиб қадаҳларга қўйди.

— Ичамиз, порлоқ келажак учун ичамиз, — деди у зўрма-зўраки илжайиб.

Семён тез маст бўлиб қолди. У одатда унча-мунчага маст бўлмасди. Ҳамма вақт шишадошидан кейин кайфи ошарди. Бундан икки йил аввал худди мана шу Вадим билан ким кўп ичарига ўйнаганди. Ўшанда Семённинг бир ўзи нақд уч ярим шишани бўшатган. Вадим эса учинчисини тутатиш арафасида кулаганди. Энди эса Вадим ҳеч нарса бўлмагандай ўтирибди-ю, Семён алжираб қолди. Бир ҳисобдан, бу алжираши ўзига фойда келтирди. У Анжела билан Рустамни бир ёқлик қилиш режасини айтмади улфатига.

Семён ухлаб қолгач, йигитлари уни ётогига олиб бориб ётқизиб қўйишиди. Вадим эса ширин ўйлар гирдобида уйига кетди.

У уйига етиб борганидан кейин одамларига Эдуард исмли маслаҳатчисини топиб келишларини буюрди. Бу яхудий йигит Вадим билан ёшлигидан бирга ўстганди. У нимаики жиддий иш қилса, аввал, албатта, ундан маслаҳат сўпар ва шунга қараб режа тузарди. Мана, шунча вақтдан бери Эдуарднинг берган маслаҳатлари уни уялтириб қўйгани йўқ.

— Йўқламай қўйганингга ўзингга бошқа яхудий топиб олгансанми, деб ўйлаб юрувдим, — деди Эдуард қучогини очиб.

— Сендан ўтадиган жуҳуд ҳали түгилмаган бўлса керак, — деди Вадим ҳам қулочини ёйиб.

— Ҳаммаси зўр уларнинг. Лекин улар барибир жуҳудлик қилиб кетишади-да, — деди Эдуард Вадимнинг юзидан ўпаркан.

— Сени шунаقا холислигинг учун яхши кураман.

Улар талай муддат латифа айтишиб, кулишиб ўтиришди. Кейин Вадим хаёлидаги гапни айтди.

— Бу масала сен ўйлагандан бироз жиддийроқ, — деди Эдуард бир нуқтага тикилиб. — Семён кўп нарсани кўрган тулкилардан. Осонлик билан уни бир чеккага чиқариб ташлашнинг ўзи бўлмайди. Ҳозирги унинг парокандалиги алдамчи ҳолат. Бироз кутиш керак. Агар ҳақиқатан ҳам четда кўринмас кучлари бўлмаса, ундан кейингина ҳаракатга тушиш керак. Лекин бу шунчалик сир тутилиши керакки, бошқа “авторитетлар” хитланиб қолмасин.

— Бунинг учун нима қилиш лозим, деб ўйлайсан?

— Демоқчиманки, одамларингсиз бир ўзинг улдашинг керак. Йўқса, сиринг барибир очилади.

— Тушунарли, — деди Вадим ва ўрнидан туриб у ёқдан-бу ёққа юрди. У вақти еттан бўлса тезда ҳаракатингни қилиб қол, деган гапни кутганди. Бироқ ундаи бўлиб чиқмади. Шу боисдан Эдуарднинг гапларини тарозига солиб кўрди. Қандайига ўйламасин, маслаҳатчисининг гаплари босиб кетаверди. Аммо бу унга маъқул келмасди. Унинг ҳозироқ бориб Семён масаласини бир ёқли қилгиси келарди. Аммо маслаҳатчисининг гапи... У гарчи Эдуарднинг маслаҳатларини жон қулоғи билан эшитса-да, доим унинг гапларига амал қилишдан олдин ўзининг мијасида обдон “қоришириб” кўрарди. Шундан кейингина ишга киришарди. Одати шунаقا эди.

— Сенга катта раҳмат, — дея суҳбати якун бўлганигини билдириди Валим.

Вадимни беш кўлидай яхши биладиган Эдуард гапи ёқмаганлигини дарров сезди ва ўрнидан туроётуб:

— Албатта, менинг гапларим нисбий. Балки

ҳақиқатан ҳам вазият пишиб етилгандир. Унинг ҳолатини яхшилаб чамалаб кўрай, ундан кейин сенга ўзим қўнғироқ қиласман, — деди.

Бироқ унинг қўнғироги ўша куни бўлмади. Вадим у ҳақда унтиб қўйганди ҳатто. Чунки уй жиҳозлари ишлаб чиқарадиган корхонасини прокуратура ходимлари “босгаилиги” ҳақидаги хабар келиб қолди. Бу корхонада номига маҳсулот ишлаб чиқариларди. Шундаям тўқсон фоизи яроқсиз эди. Бироқ ўша “брак” маҳсулотлар бир кун ҳам омборда сақланиб қолмасди. Тезда сотилиб кетарди. Яна чет элга. Чет элнинг ҳам Италия, Греция, Чехия каби Европа мамлакатларига. Албатта, бекордан-бекорга шунаقا яроқсиз маҳсулотни хорижликлар сотиб олмасди. Бунинг сири бор эди. Бу сир шунчалик жўн эдикি, оддийлиги сабаб ҳеч кимнинг назарига тушмаганди. Ҳатто ўша қийшиқ-қинғир шкафлар-у ошхона мебелларини ясадиган пиёниста усталар ҳам шунаقا яроқсиз маҳсулотларга тайёр бўлмасидан бурун буюртма бераётган хорижлик мижозларнинг устларидан кулишарди. Аммо улар ҳаддан зиёд кўп ишлатадиган елимларнинг таркибида нималар борлигини етти ухлаб тушларида ҳам кўрмасди.

Қизиқ томони, одамдан баттар наркоманга айлануб қолган божхоначиларнинг итлари ҳам қуриб қотиб қолган елимда ўзларининг “нон”и борлигини билмасди.

Прокуратура ходимлари Вадимни яхши танишарди. Унинг хорижга марихуана экспорт қилишидан ҳам хабардор эдилар. Лекин айнан қандай қилиб бунинг удласидан чиқаётганига ҳали-ҳануз жавоб тошишолмаган эди.

— Хўш, хизмат, — деди Вадим ўзининг ҳар-ҳар замонда бир келиши учун шоҳона қилиб безатилган хонасида прокуратура ходимларини қабул қиласар экан, — биздан нима хизмат?

— Ўтган кварталда, — деди новча, озғин, мўйлов-

ли киши, — бошқа кварталдагига нисбатан икки баробар солиқ кам ўтказилган.

— Бунинг билан аввал солиқ ходимлари шугулла-нишар эди, шекилли. Бирданига сизлар келибсиз-лар, бу ерда бир гап борга ўхшайди, — деди кулиб Вадим.

— Қаерла шунақа деб ёзиб қўйилган экан? — деди ҳалиги киши қовоғини уйиб.

— Ҳазиллашдим. Ҳазилни зилга буриб юборманг-да. Ҳозир бухгалтерни чақириб айтаман. Жаримаси билан қўшиб ўтказиб беради, келишдикми? Энди сизларни қаттиқ ҳурмат қилганимиз боис, қолганла-рини ўзимиз ҳозирнинг ўзида амаллаб қўяқоламиз.

Бу гап иккала прокуратура ходимиға ҳам мойдай ёқиб тушган эди. Лекин нимага энди Вадимдек одам дарров жон бериб қўя қолаётгани уларни таажжубга solaётган эди.

— Биз сиз ишлаб чиқарадиган маҳсулотлар сифа-тини ҳам бир кўрмоқчи эдик. Ҳар қалай, чет элга “Россияда ишлаб чиқарилган” деган маълумот билан кетади, — деди бироз жиддийлиги ортга чекин-ган новча одам.

— Ҳозир ярим тайёр маҳсулотларгина бор, бундан сифатни аниқлаш, менимча, бироз оғирроқ.

— Шундай бўлса-да, бир кўрайлик.

Ноилож қолган Вадим меҳмонларни устахонага ўзи бошлаб борди. Вадим билан кўришаётган маҳалда-гина бир оғиз сўз айтган, шеригига нисбатан анча ёш куриналиган текширувчи ҳали қотмаган елимга тикилиб қолди. Буни кўрган Вадимнинг кўзи ўйнаб кетди. Ба йигитларига имо қилди. Уста кийимида-ги, иккита барзангидай йигит текширувчиғининг ёнига келди.

— Бирорта ёрдам керакмасми? — дея сўрали улар-дан бири.

— Фалати ҳиди бор экан, — деди текширувчи, — менинг бобом дурадгор ўтган. Ишхонасиға кўп бор-

ганман. Елимларни бир-биридан яхши ажратаман. Лекин бунаقا ҳидлисими ҳечам күрмаган эдим.

— Бу Мексикадан келтирилади. Сизнинг отангиз совет даврида дурадгорлик қилган бўлса керак. У пайтлари фақат ўзимизнинг елимлар ишлатилар эди, — деди Вадим унинг ёнига бориб.

— Бўлиши мумкин-у, барибир ғалати экан.

— Сиз елимнинг сифатини билмоқчимисиз ёки бизнинг маҳсулотларнинг? — деди Вадим аччиқланаб.

— Начора, — дея гапга аралашди новча прокуратура ходими, — тайёр маҳсулот йўқ экан. Тайёр бўлганида келиб қўяқоламиз.

— Ўзларинг биласизлар, — дея Вадим уларга қўл силтаб устахонадан чиқиб кетди.

У хонасига борди-да, дарров ёнига учта йигитни чақириб, “Булар бир нарсанинг исини олганга ўхшайди. Киллер ёлланглар. Эртага пешингача иккovi ҳам “тинчтилсин”. Лекин бугун тирик юриши шарт”, деган буйруқ берди. Дарҳақиқат, ёш терговчининг миясига “Елимнинг таркиби текшириб кўрилса, бирон нарса чиқиб қолар”. деган ўй келтан эди. Аслида, уларнинг мақсади солиқлар эмасди. Мебеллар сифати ҳам уларни қизиқтиրмасди. Прокуратура ходимларини Семённинг наркотик моддаларни қандай қилиб четга чиқараётганлиги қизиқтираади. Шунга яраша ўзларига тегиши мумкин бўлган улуш миқдорини ошириб олишмоқчи эдилар. Чунки буларга ҳеч ким “Бориб фалончининг наркотик модда сотаётганини аниқлаб келинглар”, деб айтмаганди. Улар Вадимни наркотика экспортига алоқаси бор, деб гумон қилишарди, холос. Лекин юқорида айтганимиздек, қандай усулда экспорт амалга оширилишидан бехабар эдилар.

Текширувчилар кетгач тезда елимлар бошқа жойга олиб кетилиши, ярим тайёр маҳсулотлар эса ёқиб юборилиши тўғрисида Вадим буйруқ берди.

Бу ишларнинг ҳаммасини бажариб бўлганидан кей-

ингина у Семённи “ўйин”дан чиқарип ташлаш ревасини туза бошлади. Икки соат мобайнида тинимсиз чекди, у ёқдан-бу ёққа бориб келди. Шунчалик хаёлга берилиб кетгандики, ҳатто калта юбка кийган, оёқлари узун, баданини кўз-кўзлаш учун юпқа, тор кийим кийиб олган ўн саккиз ёшли, малласоч, сулув “дугона”си Татьяна кириб келганини ҳам сезмай қолди.

— Менинг жоним нимадан бунчалик безовта бўлиб қолди? — дея Татьяна Вадимнинг ёнига бориб, елкасига осилди. Шундагина Вадимнинг хаёли жойига келди. Ва қувониб кетди.

— Жуда вақтида келдинг-да, — деди у қиздан бўса олар экан, — диққатим шунчалик ошиб кетган эдики, кўнгилга яқин биронта одамни кўмсаб тургандим.

— Мени эса хаёлингга ҳам келтирмагансан. Агар ёнингга ўзим қидириб келмаганимда, эсламасдинг ҳам. Тўғрими, жоним?

— Сиқилардим. Менга нима етишмаётгандигини ўйлардим. Кейин сени эслардим ва тезда ёнимга чақирган бўлардим. Ахир ҳозир менга сен етишмаётгандигингни сезиб турибман.

— Балки хотининг етишмаётгандир, — деди жилмайиб Татьяна ва иккала қўлини Вадимнинг бўйнидан ўтказиб қучоқлади. — Оҳ, менинг қадрдон севгилим!

Улар талай муддат шундай тўрганларидан кейин Татьяна секин сирғалиб чиқди-да:

— Дала ҳовлингга таклиф қилмаганингга ҳам анча вақт бўлиб кетди, одамни зериктириб қўйдинг, — деди ноз билан.

— Ишим қанчалик кўплигини билсанг эди, бу савонни бермасдинг. Мен сенга ажойиб сюрприз тайёрламоқчиман, — деди Вадим ва ўзини диванга ташлаб, қўлини икки ёнга ёзди.

— Қанақа сюрприз экан? — дея юргилаб унинг қучоғига кирди Татьяна.

— Айтмайман. Айтсам, қизиги қолмайди. Ҳозир сен менга муаммоларни унущимга ёрдам бер. Ундан кейин бир-иккита ишларимни битираман, — деди Вадим қизнинг сочидан силаб.

— Ҳар доим шунаقا, — деде тескари ўгирилиб олди Татьяна, — ишингни битирасан-у, кейин мен керак бўлмай қоламан.

— Эркакларнинг ишига аёлларни аралаштиришни ёқтирмаслигимни яхши биласан-ку. Ўзингга тегишишини олгин-да, жим бўл. Йўқса, умрингда кўрмаган сюрприздан ҳам куруқ қоласан.

Вадимнинг мутлақо жилдий гапираётганлигини сезган Татьяна яна ўгирилиб, эркакни қучди.

— Дарров мендан хафа бўлдингми? Энди ҳечам ишингга аралашмаганим бўлсин.

Икки соатлик дам олишдан сўнг чўмилиб чиққан Вадимнинг хаёлига гаройиб ўй келиб қолди. Ва кафталарини бир-бирига уриб ишқалади. “Ана энди ҳамма ишлар жойида бўлади”, — деде ўзига-ўзи гапирди у.

* * *

Маргарита қочиб кетганидан кейин Семён на уйга сиди, на ҳовлига. Тинимсиз пиво ичди, сигарета чекди. Бўралатиб сўқинди. Лекин кимни сўкаётганлигини ўзи ҳам билмасди. Кейин уйига кирди-да, диванга чўзилганча ухлаб қолди. Орадан икки соат ўтгандан кейин уйғонди. Бироқ калласини кўтармасдан ўйланиб ётди. “Вадимнинг олдида анча обрўйим тушиб қолди. Ўзиям устимдан роса кулган бўлса керак. Балки бошқа нарсалар ҳам хаёлига келгандир. Майли, нима деб ўйласа ўйласин, ҳали ҳеч нарса йўқотилгани йўқ. Иккита бола билан битта макиён чангалимдан омон чиқиб кетди, холос. Барибир ҳеч қайсиси узоқча кетолмайди. Қўлимга тушади. Ана ундан кейин ҳисоб-китоб мутлақо бошқача бўлади”, деде хаёлидан ўтказди у ва чирои очи-либ ўрнидан турди.

Хўжайнинг кайфияти яхшилигини кўрган тан-

соқчилару қолган барча хизматкорлар енгил нафас олиши.

Семён муздай сувда яхшилаб ювиниб олганидан кейин аввал ёнига барча тансоқчиларни йигди. Ҳаммасига бирма-бир бошлан-оёқ кулиб қараб чиқди, елкаларига қоқди. Сүнг ўша машхур ўқрайиши юзида акс этди-ю, тансоқчиларнинг оёқларига титроқ кирди.

— Мен сизларнинг ҳаммаларингга ишонганим боис атрофимга йиққанман. Қорниларингни тўйгазаяпман. Кийинтираяпман. Олдимга келганингда, кўпчилигингнинг уйинг ҳам йўқ эди. Ҳозир бор. Бўлгандаям, шоҳона. Лекин эшакнинг ортиқча семириб кетиши эгасига малоллик олиб келаркан. Ана, учтанг бунга мисол. Менинг буйруғим бажарилмай қолганилиги ўз йўлига, ит, ҳеч қурса ўзинг тирик қол. Одам шунчалигам латта бўладими?.. Хуллас, сизларга айтмоқчи бўлганим, кимда-ким менинг буйруғимни бажаришга “дух”и етмаса, марҳамат, ҳозирдан қорасини кўрсатмасин менга. Агар шу ерда қолишни ният қиласидан бўлсанглар, ҳар битта бажарилмаган буйруқ учун нафақат ўзларингнинг жонларинг билан, балки, бутун уруғ-аймоғингнинг жони билан ҳам жавоб берасанлар. Уқдиларингми?! — деди Семён сўзи ниҳоялаб.

Бу гаплардан кейин кўпчиликнинг кўнглида кетиш истаги пайдо бўлди. Аммо бу истакни амалга оширишнинг мутлақо имкони йўқлигини ҳаммаси биларди. Шу боиски, барчаси бошларини эганича: “Тушундик”, дея жавоб қайтариши.

Шундан кейин Семён бошқа уй хизматчиларини йигиб, уларга ҳам ўзининг “игна”сини суқиб олди.

Барчанинг бирдек тобелигини ўз кўзи билан кўрганидан кейин Семён: “Сал енгил тортсам керак”, деб ўйлаган эди. Йўқ, барибир кўнгли жойига тушавермади. Нимадандир безовталаиарди у. Лекин ўша безовта қилаётган нарса нима эканлигини излаб топмасди. Бироз ўтганидан кейин эса топди. Бу Ан-

желанинг ёнида йўқлиги эди. У қайси буюмга қарамасин, ҳаммаси Анжелани эслатаверди. Шунда Семён “Аччиқни аччиқ кесар” мақолига амал қилиб, йигитларидан бирига ёшгина, ниҳоятда гўзал қиз топиб келишни буюрди ҳамда диванга ўтириди-ю, кўзини юмди.

Бир соатга яқин вақт ўтганидан кейин буйруқни бажаришга кетган йигит ниҳоятда соҳибжамол бир қизни етаклаб келди. Уни кўриб Семённинг юзида табассум пайдо бўлди.

— Юр, — деди бирдан қизнинг қўлидан ушлаб, ётоғи томон етаклар экан.

— Қаёқقا? — деди жилмайиб турган сариқ сочли гўзал.

— Сенга бир нарса кўрсатаман.

Қиз индамайгина унинг орқасидан эргашди. Улар ётоққа киришганларидан кейин Семён қизга обдон тикилди. Худди маймунни томоша қилаётган одамдай ҳали у ёғидан ўтиб қаради, ҳали бу ёғидан.

— Исминг нима? — дея сўрали ниҳоят томоша жонига текканидан кейин.

— Оля, — жавоб қилди қиз Семённинг қилиғидан бироз қизариб.

— Яхши. Неча ёшласан?

— Ўн еттида.

— Бунисиям яхши. Ҳамма томонлама мос келасан. Қани, Оля, бир ечиниб юбор-чи!

Қиз Семённинг саволларидан буткул довдираб қолганди. Қалтираганча аввал юбкасини, сўнг кофтасини ечди. Кейин рўпарасидаги эркакка қараб тураверди. Эркак эса яна бояги аҳволда уни томоша қилиб чиқди. Сўнгра стол тортмасидан пичоқ олдида, қизга яқинлашиб келди. Оля унинг қўлидаги пичоқни кўриб адойи тамом бўлди. Кўзидан ёш оқа бошлади. Семён эса ҳеч бир шошилмасдан унинг устида қолган “латта-путталар”нинг ипларини астасекинлик билан кесиб ташлади.

— Энди ёт! — деди Семён паст, аммо таҳдидли

овозда. Буткул жони ҳалқумига келган қыз құрқаписа орқасига тисарилиб, икки кишилилек Каравотта ўтири.

— Ақлли қыз экансан, — деди әрқак пичоқни ўқталған күйи Оляга яқынлашиб.

— Керакмас! — деди қыз күзидан ёши дув-дув оқиб.

— Керак! — деди Семён вишиллаб ва зарб билан пичоқни осмонга күттарған эди:

— А-а-а! — дея бақириб юборған қыз бир думалаб түшакнинг нариги бошига ўтиб кетди.

Семён бирдан қаҳ-қаҳ отиб кулиб юборди.

— Зүр бўлди! — деди у пичоқни орқасига отиб юбориб, — менга сенинг қилиқларинг ёқди. Агар қочмаганингда, сени чавақлаб ташлаган бўлардим. Энди кийимларингни кий-да, менинг ёнимга ўтири. Мен сен билан узоқ суҳбатлашмоқчиман.

Кыз тезда унинг айтганини бажарди. Семён қизнинг сочини силаганча анча вақт ўтири. Сўнг:

— Эркаклар билан юрганмисан? — дея сўради Олядан.

Кыз бошини қимиirlатиб “Ха” ишорасини қилди.

— Кўпи биланми?

— Йўқ, иккитаси билан. Бири мен тўққизинчидаги ўқиётганимда алдаб қўйган. Иккинчисини эса ёқтириб қолгандим, — деди қыз мунгли овозда.

— Ҳозир у қаерда?

— Билмайман. Бирданига йўқолиб қолди.

— Индамай қолавердингми?

— Нимаям қилардим? Катта шаҳарнинг қайси бурчагидан излайман уни?

— Менам йўқотиб қўйдим. Осонгина. Яна ўз қўлим билан, — деди энди Семён сўлиш олиб, — ўзимнинг аглаҳлигим сабаб бўлди ҳаммасига. Ҳаётда шунакаси ҳам бўлиб тураркан. Оля, сен унинг ўрнини босоласанми?

— Билмадим, — деди қыз ерга қараб.

- Менга турмушга чиқсанг, биласанми, қандай яшайсан? Билмайсан.
- Орзуларим нима бўлади?
- Қанақа орзу? — деди кулиб Семён. — Орзуга бало борми? Ўзи нимани орзу қилгандинг?
- Актриса бўлишни. Ундан кейин модельер бўлардим.
- Агар мен бир марта куф-суф қилсам, бир ҳафтага қолмасдан Россия сени танийдиган бўлади.
- Ростданми?! — деди қувончи ичига сифмай Оля.
- Лекин мен куф-суф қилмайман-да. Мен сенда-қаларга умуман ишонмайман-да. Мен Анжелага ишонардим. У қўчада тўғри келган одам “юр”, деса кетавермасди. Албатта, авваллари. Ҳозир бўлса уям кетади. Сен бўлсанг, ҳали йигирмага ҳам кирмасдан эркакларнинг олдига тушиб олиб югуряпсан. Айт, шу инсофданми? Инсофдан эмас. Сен югурмаслигинг керак эди. Сен мен юборган одамнинг юзига тупуришинг керак эди. Ўшанда мен сенга ишонган бўлардим. Севиб эркалардим. Афсус, энди ундей қилолмайман. Ҳаққим йўқ. Кўрдингми, дарров қанча гуноҳларга ботиб қолдинг! — деди Семён. У гапирган сайин асабийлашаётган, гаплари кескинлашаётган эди.
- Худди об-ҳавога ўхшаб бирдан бир юз саксон дарражага ўзгариб кетаётган эркакнинг муддаоси нима эканлигига Оля тушунмаётганди. Кўрқув уни яна ўз исканжасига олди.
- Энди кет, — деди Семён, — сен мен ўйлаган қизлардан эмас экансан.
- Оля ўрнидан сакраб турди-да, шошилганча эшик томонга йўналди. У чиқиб кетгач, Семён чўзилиб ётди-да, Анжелани, уни илк бор учраттанини хаёл сурди. Шу пайтгача у: “Биронта одамни ҳам севмайман”, дея ўйлар эди. Ҳозир эса ҳақиқатан ҳам Анжеласиз яшолмаслигига амин бўлди.
- У орадан икки соат ўтиб пастга тушди. Тўртта йигитини чақириб, уларга зудлик билан Ўзбекис-

тонга учишларини ва Рустам билан Анжелани топишларини, ўша ёқнинг ўзидаёқ Анжелани ерга кўмишларини, Рустамни эса оёгини ерга теккизмасдан олиб келишларини буюрди.

* * *

Бўрибой чол уйга кирганидан кейин юраги чим этди. У бирдан қўлини кўкраги устига қўйди. “Шу пайтгача, — дея хаёлидан ўтказди у, — чилаб келдинг. Энди ўйинингни бошлалингми? Яна озгина шошмай тур. Мен боламни бир кўрай, кейин ишламай қолсанг ҳам майлига”. Унинг боши ҳам айлангандай бўлди. Шу боис, секин кўрпачага ўтириди. Ва ҳар эҳтимолга қарши, калимасини қайтарди.

Кампир чоли уйга кириб кетганидан кейин унинг орқасидан қараб қолган эди. Шу боис, у чолининг кўкрагини ушлаганча ўтираётганини дераза ойнаси орқали кўрди.

— Равшан! — дея бирдан бақирди ўзининг уйи томон кетаёттан ўғлига, — чоп, отангнинг орқасидан бор. Бир нима бўп қолганга ўхшайди!

Равшан жойида тўхтаб, бироз гарантсиб турди-да, кейин отаси кирган уйга югурди. У уйга кириб борганида, Бўрибой чол кўкрагини ушлаганча шифтга қараб ётарди.

— Ота, сизга нима бўлди? — деди Равшан шошиб.

— Озгина, — деди Бўрибой чол, унинг овози ниҳоятда нимжон чиқди, — тобим қочганга ўхшайди. Дўхтир-лўхтир чақирмасанг бўлмайдиганга ўхшайди. Укангни кўрсам армоним йўқ эди.

Равшанинг юраги орқасига тортиб кетди. У бирдан отасининг ёнига чўккаласб ўтириди.

— Ота, — деди қўрқа-писа, — ундан деманг. Сиз кўп яшайсиз ҳали. Невараларингизнинг тўйини кўрасиз.

— Равшан болам, кўзим етмай қолди. Сен бориб Маъруф дўхтириди айтиб кел, тезроқ бўл. Энангни бу ёқقا айтиб юбор, — Бўрибой чол кўзини юмди.

Равшан үрнидан турди-ю, ташқарига югурди. Ҳовлига чиқиши билан:

— Эна, Баҳром! — дея бақирди, — тезроқ отамди олдига киринглар! Мен дўхтирга бориб келай!

Кутилмаган шовқинни эшитган кенжা ўғил Баҳром, унинг хотини, Равшанинг бола-чақаси ҳовлига югуриб чиқишиди. Ҳамма гарангсиб қолганди. Нима рўй бераётганинги билмасдан гаранг эдилар улар. Энасининг шошганча ҳассасига суяниб уйга кетаётганини кўрган Баҳром:

— Нима бўлди, эна? — дея сўради ваҳимадан қорачиқлари кенгайиб.

— Отанг, отангнинг олдига чоп! — деди кампир ўғлига қарамасдан ҳам.

Ака-уканинг хотинлари бирпасда ҳовлида шунчалик шовқин қилиб юборишлари, ҳатто қўшнилар ҳам: “Нима бўляяптийкин?” деган ўйда югуриб келишди.

Равшан Маъруф дўхтири бошлиб келганида Бўрибой чол оғир нафас олмоқда эди. Дўхтир унга кетма-кет иккита укол қилди. Шундан сўнг чол бироз тинчланди.

— Отангни тез касалхонага обормаса бўмайди, — деди дўхтир ҳовлига чиққанидан кейин Равшанга, — мен вақтинчалик таъсир кўрсатадиган укол қилдим. Агар ҳозирдан ҳаракатингни қилсанг, дўхтирохонага оборишга улгурасан.

Равшан нажот излаб атрофига қаради. Шовқинни эшитиб югуриб чиққан учта қўшнида ҳам машина бор эди. Ҳатто биттаси яқингинада яп-янги “Тико” сотиб олганди. Улар дўхтирининг гапини эшитиб бирдан тескари ўгирилишди. Маъруф дўхтир қараса, аҳвол чатоқ. Улар Равшанинг айтганини қиладиганга ўхшамайди.

— Мавлон ака, — деди Маъруф дўхтир айнан Равшанинг “Тико”си бор қўшнисига, — ака, ёрдам қилиб юбормасангиз бўлмайди.

— Мен жоним билан оборадим-у, бензиним сал чатоқроқ-да, — деди қүшни афтини бужмайтириб.

— Келинингиз, — деди Маъруф дўхтир бўш кел масдан, — бугун неварангизни оборувди. Анча мазаси йўқ экан. Иложим йўғиди, лекин қарадим, ўзимнинг ёнимдан укол қилдим. Ҳали яна иккита уколи туриди. Қиммат турадиган ноёб доридан укол қилиш керак. У дори шаҳарда фақат битта одамда бор. Унинг уйини фақат мен биламан. Ўйлаб қарасам, шаҳарга тушишга вақтим бўлмайдиганга ўхшайди.

Мавлон аканинг бирдан ранги оқариб кетди. Зеро, у ҳақиқатан ҳам набираси касаллигини биларди.

— Майли, — деди у бирдан, — йўлда бензиннинг бир иложини қиласмиз.

Бўрибой чолни олиб кетишганларидан кейин кампир келинларини чақириб роса қарғади.

— Бир жой ўт олиб кетгандай нимага ваҳима қиласанлар?! Касал бўлмаган одам бормикин?! Иссик жоннинг иситмаси чиқади-да. Бутун қишлоқни бошларингга кўтардиларинглар-а сенлар!.. Ёки қайнатангларнинг ўлишини хоҳлаб қолдиларингма?!

Келинлар қайнонанинг гапларини бошларини эгиб эшитишли. Шундан сўнг иккаласи ҳам висир-висир қилишиб, уй-уйига кириб кетипиди.

* * *

Милиция бўлинмасига борганларидан кейин Рустам: “Тағин булар ҳар хил шубҳа-тумонларга бориб ўтирмасин, меҳмонхона директорига ўхшаб”, — деган ўйда ҳамма гапни рўй-рост айтди. Меҳмонхона таржимони унинг оғзидан чиқсан гапларни оқизмай-томизмай ўзбек тилига ўғиргандан кейин бошқарма бошлигининг ҳайрати ошиб кетди.

— Наҳоғки, — деди у бошини сарак-сарак қилиб, — шунақасиям бўлса?! Ёш боланинг бир ўзи Америкадай жойда миллиардерга айланиб кетиши фантастика-ку! Бу йигит ҳақида китоб ёзиш керак.

Ўз ўрнида милиция капитанинг гапларини таржимоннинг оғзидан эшитган Рустам таажжубланди.

— Агар одам истаса, ҳамма нарсани қилиши мүмкін. Бунинг учун чексиз хоҳиши бўлиши керак, — деди у. — Лекин ҳозир менга қандай қилиб миллиардерга айланиб қолганим эмас, балки ота-онамни топишим мұхимроқ.

— Албатта, — деди бошқарма бошлиғи, — ёрдам берамиз. Лекин орадан анча вақт ўтиб кетган, шунинг учун маълум муддат кутишга тұғри келади. Биз архивларни бирма-бир титкилаб чиқайлик аввал. Бунга камида бир ҳафта кетади.

— Ундан тезроқ қилишнинг иложи йўқми? — дея сўради Анжела.

— Афсуски, имкони бўлганда, ҳозирнинг ўзидаёқ муаммоларингни ҳал қилиб берардик, — деди капитан.

— Топилмаслиги ҳам мүмкинми? — дея сўради Рустам ташқарига чиққанларидан кейин Анжеладан.

— Йўқ, топилади. Агар сен ҳақиқатан ҳам шу ерда туғилган бўлсанг. Чунки ота-онанг сен йўқолиб қолганингдаёқ милицияга хабар қилишган. Фақат боя капитан айтганидек, вақт керак, холос.

Улар меҳмонхонага қайтиб боришли. Рустам ўрнига ётиб олди. Унинг ичини қандайдир ҳаяжон кемирмоқда эди.

— Сенга чой олиб келдим, — деб қолди бир маҳал Анжела.

— Мен сенинг ташқарига чиқиб кетганингни билмай қолибман, — деди Рустам ва ўрнидан туриб ўтирди.

— Биласанми? — деди Анжела ўйланиб, — сенга бир хабар бор. Буни сен қандай қабул қилишнингни билмайман. Лекин мен шундай бўлишини анча вақтдан бери кутган эдим.

— Хабаринг шунчалик жиддийми? Бирдан маъюс тортиб қолдинг, — деди Рустам жылмайиб.

— Жиддийми, жиддиймасми, буниси ҳам сенга боғлик.

- Аввал айт, билайлик. Жиддийми, бошқами, бир гап бўлар.
- Мен ҳомиладорман.
- Ни-ма?! — деди ҳайратдан кўзи чақчайиб кетган Рустам. — Қанақа қилиб?
- Оддий. Қорнимдаги боланинг отаси сенсан.
- Ахир...
- Ҳеч қанақангি ахирга ўрин йўқ... Биламан, сен учун бунинг асло қўрқинчли жойи йўқ, лекин истамасанг... Шуни билмоқчиман, — деди Анжела. Унинг кўзидан ёш сизиб чиқди.
- Нега энди? — деди Рустам ўрнидан туриб Анжелага яқинлашар экан, — нима бўлган тақдирдаям бус-бутун одам дунёга келади. Бу фақатгина шодлик келтириши мумкин. Бошқа ҳамма нарса бекор.
- Анжеланинг юзида табассум пайдо бўлди. У кўзидаги ёшини артганча Рустамнинг қучогига кирди.
- Мен бахтлиман, — деди у, — севган одамимдан бола орттиридим.
- Бахт фақат сеники эмас, у менга ҳам тегишли.
- Ростданми?! — дея Анжела Рустамнинг бўйнидан маҳкам қучоқлаб олди-да, юз-кўзидан ўпишга тушиб кетди.
- Бундай хушхабарни ювмаслик гуноҳ. Ҳозир мен ҳамма нарсани тайёр қиласман. Сен шу ерда ўтира тур, — дея Рустам шошилиб чиқиб кетди. У ресторанга бориб, базм учун керакли нарсаларни буюргач, иккита шампан виносини очди-да, ходимларнинг: “Бизга мумкинмас”, деганларига ҳам қарамасдан уларга ичирди. Кейин ташқарига чиқиб, такси тутди. Ундан қаердан гул топиш мумкинлигини сўраган эди, у ҳеч вақони тушунмади. Шунда Рустам атрофига аланглаб, меҳмонхона адогида ўсиб очи-либ ётган атиргулларга кўзи тушиб қолди ҳамда таксичига “Бай-бай”, дея қўлини силтади-да, югуриб бориб гуллардан уч донасини узиб олди. Ва меҳмонхона томон чопди.
- Менга албатта ўғил тугиб берасан! — деди Рустам.

там тошойна олдида ўзига оро бераётган Анжела-нинг орқасидан қучиб ва янги узилган атиргулни унга тутди.

Кувончдан ўрнидан туриб кетган Анжела Рустамни маҳкам қучоқлаб олди.

— Мен сени бунчалик шод бўлади, деб ҳечам ўйла-магандим! — деди у.

Ўша куни улар ҳақиқий байрам уюштириши. Рустам ўзларининг хонасидаги столнинг безатилишига қаноат ҳосил қиласдан, ресторонда меҳмонхонада яшовчиларнинг ҳаммасига байрам қилиб берди.

— Рустам, — деди кечаси Анжела, — сенга кўп нарсани айтиб беришим қерак.

Рустам у томонга ўгирилди-да, “Нимани айтмоқ-чисан?” мазмунида қаради.

— Нима сабабдан Россияга келганингни биласанми?

— Тадбиркорлик мақсадида, — деди Рустам Анжеланинг бунаقا саволига ҳайрон бўлиб.

— Тўғри, сенинг мақсадинг тадбиркорлик билан шуғулланиш бўлган. Бошқалар эса бошқача ўйлашган. Яъни, Семён.

— Хўш, Семён нима ҳақида ўйлаган экан? — деди баттар ҳайрати ошган Рустам.

— У сенинг ҳамма пулингга эга чиқиш мақсадида сени Россияга таклиф қилган.

Бу гапдан кейин Рустам бирдан ўрнидан туриб кетди.

— Қандай қилиб? — деди у ғазаби келиб.

— Менинг у билан орани очиқ қилмоқчи бўлганим шунчаки саҳна эди, — деди Анжела кўзидан оқаётган ёшга эътибор ҳам қилмай.

— Очикроқ гапирсанг-чи.

— Ҳуллас, у менга, сени қўлга тушириш учун вақтинчалик ўзи билан ажрашишимни, ишончингни оқлашимни ва ниҳоят сенга турмушга чиқишимни буюрганди.

— Ундан кейин-чи?

— Ундан кейин у сени ўлдиарди. Ёлғиз меросхўринг мен бўлардим. Ҳамма мол-мулкингни ўзимнинг номимга ўтказиб олганимдан кейин қайтадан унга турмушга чиқардим. Оқибатда, пулларингнинг бари унинг қулига ўтиб қолар эди.

— Тушунарли, — деди Рустам ва музлаткичнинг ёнига бориб ароқ шишасини олди-да, қулқиллатиб қадаҳга қуиди ва уни бир кўтаришда бўшатди, — мақсадларингга бир қадам қолганида нега булардан мени огоҳ қилдинг? — дея у лабини қўли билан артди.

— Мен сени биринчи кўрганимдаёқ севиб қолгандим. Шу боисдан ҳам унинг таклифига рози бўлдим. Ҳамма айтганларини бекаму кўст бажардим. Мақсадим сенга етишиш эди, холос.

— Ундан кейин Семённинг ихтиёрига топширап-мидинг?

— Йўқ, йўқ! Сен билан Америкага кетиб қолардим, ишон менга, боламиз ҳаққи-хурмати! — дея Анжела қорнини ушлади.

— Боланинг мендан бўлганлигига ишончинг комилми? — дся сўради Рустам.

— Яқин бир ой ичиде Семённинг ёнига ҳам йўланган эмасман. Бу сенинг боланг. Фақат сен бунга оталик қилоласан!

— Буям навбатдаги ўйинлардан бири бўлмаслиги-га ким кафолат беролади? Эртага Семёнга бўлган хиёнат менга ҳам тақрорланмайдими? — деди баттар фазабланиб кетган Рустам.

— Мен сенга ҳеч қачон хиёнат қилмайман. Мен Семённи умуман севмаганман. Агар сен учрамаганингда қалбимда муҳаббат туйғулари уйғонмасдан ўтиб кетган бўлардим.

— Энди нима қилмоқчисан?

— Билмайман. Тақдирим сенинг қўлингда. Истасанг, ҳозирнинг ўзида ҳайдаб юбор. Истасанг, хотин қилиб ол!

Рустамнинг бутунлай боши қотиб қолган, нима

қиларини билмас, хонанинг ичидә у ёқдан-бу ёққа бориб келарди. Анжеланинг ҳомиладорлигини эшитгандан кейин пайдо бўлган хурсандчиликдан асар ҳам қолмаган эди.

— Майли, — деди у чуқур хўрсиниш билан, — ҳозир бирон нима деёлмайман. Ишларимиз ҳал бўлаверсин-чи, ундан кейин ўйлаб кўраман.

— Рустам, илтимос, менга ишон. Мен сенинг қулинг бўлишга ҳам тайёрман.

— Айтдим-ку, ҳамма нарсани кейин гаплашиб оламиз, унгача ўйлаб кўришим керак.

Улар эртасига ҳам, ундан кейин ҳам бир-бири билан аввалгидек яқин бўлишолмади. Анжела Рустамни олдингидек эрталаб уйғониши билан ўпид кўяр, уст-бошини бир сидра кўриқдан ўтказар эди. Аммо Рустам ўзини олиб қочарди. Ётганларила ҳам Анжеланинг яқинига йўламасди.

Нихоят орадан тўрт кун ўтганидан кейин милиция бошқармаси бошлиғи табассум билан уларни қидириб келди. Рустам уни кўриши билан қувониб кетди. Зоро, табассум ортида хушхабар ётар эди.

— Табриклайман, — деди капитан Рустамнинг қўлини маҳкам сиқиб, — ота-онангиз топилди.

Унинг нима деганлигини билиш мақсадида капитан билан бирга келган таржимонга қаради. У ўта бир юмшоқлик, худди америкаликлардек табассум билан бошқарма бошлигининг гапини таржима қилди.

— Ура! — деганча Рустам ўзини осмонга отди. Хурсандчилигидан капитанни қучоқлади. Сўнгра Анжелани ўпди.

— Кетдик! — деди у ҳайқириб, — ҳозироқ борамиз. Ортиқ бир дақиқа ҳам кутмаймиз.

— Ташқарида машина кутиб турибди, — деди капитан.

— Анжела, нега қараб турибсан?! Тезроқ кийинмайсанми?!

Ташқаридаги милиция машинасини кўрганидан кейин Рустам таржимонга қараб:

— Полиция машинасида бормаймиз, — деди.

Унинг гапини таржимон орқали тушунган бошқарма бошлиғи кулди. Ва таржимонга:

— Айтиб қўйинг, бу машинада йўли анча яқинроқ бўлади, — деди.

Улар машинага ўтираёттаниларида Анжела ўзига таниш бўлган иккита йигит қараб турганлигини пайқади. Кузатаёттаниларни яхшилаб кўриб олиш учун шунча ҳаракат қилмасин, имкони бўлмади. Машина тезлашиб кетди. Бирдан жувоннинг кўнглига фулгула оралади. У кўчаларни томоша қилиб кетаёттанинга ўхшарди-ю, бироқ хаёлида анави икки нусха эди. “Наҳотки, — дея ўйлар эди у, — Семён бизнинг оптимиздан одам юборган бўлса? Демак, у менга бутунлай ишонмай қўйган... Ишончини Москванинг ўзидаёқ йўқотгани кўриниб турганди... Балки анави йигитлар шунчаки кўзимга таниш туйилгандир. Ахир одам одамга ўхшайди-ку... Рустамга айтсамми? Йўқ, яхвиси, айтмаганим маъқул. Шундай кайфиятини бузиб қўяман”. Елиб бораёттган машина деразасидан Рустам ташқарини кузатиб борар, ўзини қизиқтирган нарсаларни ора-чора таржимондан сўраб қўярди.

Ярим соатга яқин вақт ўтганидан кейин уларнинг машинасини қоп-қора “Мерседес” қувиб ўтди.

— Жа ўпкаси йўқ одамга ўхилайди, — деди ҳайдовчи унинг оптидан қааркан.

— Бир жойга бориб қарсиллатиб уради, ундан кейин ўпкаси жойига тушади-да, — деди унинг ёнида кетаёттган таржимон.

Бу машинани кўрган Анжеланинг эса юраги шиф этиб кетди. “Боягилар оптимиздан тушганга ўхшайди”, дея ўйлади у ва Рустамга қараб қўйди.

Рустам унинг безовталигини дарров сезиб:

— Тинчликми? — дея сўради.

— Тинчлик, — деди Анжела жилмайиб, — бироз кўнглим айнигандай бўлди.

— Машинани тўхтатсинми?

— Йўқ, жойига тушди. Ҳозир ойнани бироз очиб оламан. Ундан ҳам яхши бўлиб кетади, — деди Анжела.

* * *

Семён Ўзбекистондан қўнғироқ бўлишини кутаётганди. Шу боис жажигина қўл телефонини маҳкам сиқимлаганча уйини таъмирлаётган усталарнинг ишини кузатаётган кишидай ҳовлида у ёқдан-бу ёққа бемақсад юрар эди.

Ниҳоят, телефон жиринглади. Семён шошиб қолганидан, ким қўнғироқ қилаётганлигига ҳам қарамасдан, телефон тугмачасини босиб, қулоғига тутди.

— Бизнинг биродаримиз соғ-саломатмилар? — деган овоз келди телефондан.

Бу Вадим эди. Семёnnинг афти буришди.

— Сен ҳол сўрамассанг, бошқа сўрайдиган қолмади. Ўтирибман ўзимнинг ёғимга ўзим қоврилиб. Соғлиқ бўлса... шугина ҳозирча панд бераётгани йўқ, — деди Семён чуқур хўрсаниб.

Семён бу гапларни атайлабдан азбароийи Вадимнинг ўзига нисбатан муносабатини аниқлаб олиш мақсадида айтди.

— Арзимаган нарсага бошингни оғритиб нима қиласан, ундан кўра, менинг дачамга кел. Бир айи қиласми. Ҳеч нарса кўрмагандай бўлиб кетасан, — деди қувноқ овозда Вадим.

“Жа хурсанд кўринади. Бунинг тагида бир гап бор. Олдига борсам, у мени ерга уриб мақтанади ёки ишимга бошини суқади. Ахир Рустамнинг қай даражада бой эканлиги унга ҳам маълум. Шунча бойликни кўрган олғир қуруқ тамшаниш билан чекланаб қолмаса керак. Албатта, у ҳам ниманидир ният қилган бўлиши тайин. Вой, айёр-эй, келиб-келиб мени лақиллатмоқчимисан ҳали! Чучварани хом са-

иабсан. Мен баъзи биролларга ўхшаб оғзидаги оши-
ни олдириб қоядиган аҳмоқ эмасман", дея хаёлидан
ўтказди Семён.

— Вадим, боролмасам керак. Баъзи ишларим бор.
Шуларни охиригача етказмай туриб, бирон жойга
чиқолмайман.

Вадим Семённинг гапидан қаҳ-қаҳ отиб кулиб
юборди-да:

— Қизиқсан-а, бир хил пайтлари сени умуман
тушунмай қоламан, — деди кўтаринки оҳангда. —
Нима қиласан кераксиз нарсаларга бошингни оғри-
тиб? Ўша ишларингни телефон орқали бажарсанг
ҳам бўлади-ку. Мундоқ соглигингни ҳам ўйласанг-
чи. Сенга мен дўстман. Демак, соглигинг тўғрисида
қайгуришим шарт. Гап шу, бугун кечга менинг да-
чамга етиб кел!

Шундай дея Вадим телефонини ўчириб қўйди.

— Жа ҳозир кўнглимга майшат сигади-да, — деди
Семён ўзига-ўзи.

Орадан бироз вақт ўтиб, яна телефон "сайраб"
қолди. Бу сафар у аввал ким қўнфироқ қилаётганига
қаради. Ўзи неча соатдан бери интиқ бўлиб кутаёт-
ган рақамлар телефонида ёзилганини кўриб, бирдан
юзи ёришди.

— Хўжайн, — деган таниш овоз келди телефон-
дан, — биз улар яшаётган меҳмонхонани топдик.
Ўзларини ҳам кўрдик. Нима қилайлик, ишни бир-
дан бошлайверайликми?

— Вазиятга қаранглар, агар иш бошлаш имкони
бўлса, тезроқ ҳамма нарсани ҳал қилиб, ортларингга
қайtingлар. Агар вазият қалтис бўлса, кутинглар.
Аммо уларни бир дақиқа бўлсин, кўздан қочирманг-
лар, — дея кўрсатма берди Семён.

У хурсанд бўлганидан, хизматкор аёлга пиво олиб
келишни буюрди.

Бир култум тахир суюқликдан ичганидан кейин:
“Вадимнинг олдига ҳақиқатан ҳам боришим керакка
ўхшайди. Нима деган тақдирлайам, мен унинг гапига

кулоқ соладиган одаммасман-у, лекин сал күнгилни ёзиб келганим қолади. Баҳонада Анжела бироз ёлимдан күтарилади", деган қарорга келди у. Сүңг икки йигитига машинани тайёрлашни буюриб, ўзи кийиниш учун хонасига кириб кетди.

Кутылган пайтдан анча барвақт Семённинг кириб келиши Вадимни таажжублантирди. Лекин у буни билдиринаслык учун, дўстини қуюқ очиб кутиб олди.

— Ўзинг ўлиб ўтирган экансан-у, яна менга ноз қилишингта ўлайнми, демоқчимисан? — деди Семён қадрдонини бағрига босиб. — Агар шундай десанг, минг карра ҳақ бўлиб чиқасан. Уйда гарангсиб нима қиласримни билмай ўтирган эдим. Ўзиям күнглимдаги гапни топиб айтдинг.

— Келганингдан хурсандман. Асабий ишлаганидан кейин одам дам ҳам олиши керак-да. Қачонгача мияни эговлашдан нарига ўтмаймиз. Қани, столга юр. Сен учун алоҳида тайёргарлик қилиб қўйибман.

Улар олдиндан маҳсус ҳозирлаб қўйилган стол атрофига ўтирганларидан кейин оёқлари узун, деярли қип-яланғоч иккита қиз ниҳоятда ноз билан қадам ташлаб келишди-да, икки эркакнинг ёнгинасига ўтиришиб, бараварига уларнинг юзларидан ўпишли.

— Кириш қисми даҳшат, давоми ўлдириб ташласа керак! — дея хандон отиб кулди Семён.

— Маҳсус тайёрланган, сенинг ташрифинг шарафига! — деди мийигида кулиб Вадим.

— Ол-а! Мен ким бўлибманки, ташриф буюрсам. Мен келаман. Кичкина одамлар ҳар доим келишга маҳкум.

— Камтарлик қилма, сенинг ҳам фақат ўзинггагина бўйсунадиган давлатинг бор.

— Қўй бунақа сафсаталарни, менинг давлат-павлатга алоқам йўқ. Ундан кўра ароқдан қуй, манави оғатижонлар билан бир майшат қиласрим, — дея Семён ёнидаги оппоққина, сариқ сочли гўзалнинг лабидан бўса олди. — Воҳ, воҳ. Мазасини қара. Ўткирлигидан лабинг куйиб кетади-я.

Вадим Семёнга ароқ қуйиб узатди-да, атрофга бир алантлаб олди. Уни озгина ҳаяжон босаётган эди. Бироқ буни Семён сезмас, у ёнидаги қизнинг исми ни аниқлаш билан овора эди. Шу боис қадаҳни олди да, столга қўйиб қўйди. Вадим ўзига ҳам ароқ қуйгач:

— Қани, олдик, мана шу гузаллар учун ичамиз. Улар бор экан, ҳаётимиз мунаvvар, — деди жилмайишга уриниб.

— Буларга-чи? — деди Семён қизларни кўрсатиб.
— Биз ичамиз-у, булар тамшаниб тураверишадими?
Йўқ, бунақаси кетмайди, манавини ол, Вадим қурум-
соқлик қилгани билан, менинг бағрим кенг, — деб у
қўлидаги қадаҳни ёнидаги сулувга узатди. Қиз Вадимга қараб қўйди. Худди шу лаҳзада эркак унга
“олма”, дегандек бошини чайқади.

— Йўқ, йўқ, — деди қиз ноз билан, — ҳар ким ўзининг насибасини ичсин. Менга Вадим бошқа қуйиб беради. Ундан кейин, мен шампан виносини кўпроқ ёқтираман.

Семённинг бирдан қайсараги тутиб кетди.

— Шу пайтгача ҳеч ким менинг қўлимни қайтармаган. Аввал мен узатган ароқни ичасан, кейин шампан виносидан ўзим қуйиб бераман, — деди у.

Ноилож қолган қиз унинг қўлидаги қадаҳни олди. Вадим Семёнга бошқа қадаҳга ароқ қуйиб узатди-да, ёнида ўзига суйкалиб ўтирган Танянинг сонини силаш баҳонасида унинг липпасига қистирилған тўппончани ушлаб қўйди.

— Унда бараварига кўтараильик. Томогам тақиллаб кетди, — дея таклиф қилди Вадим.

Семён бир кўтаришда қадаҳини бўшатди. Вадим билан Таня ҳам шундай қилишиди, аммо Семённинг ёнидаги Ира ҳеч кимга билдирамасдан қадаҳидаги ароқни пастга тўкиб юборди-да, газакка қўл узатди.

Базм борган сари қизий бошлади, бунга сайин Вадим асабийлашиб бораверди. Шу боисдан ҳам, гарчи ҳаво унчалик иссиқ бўлмаса-да, фарқ терга

ботди. Шундан кейингина Семён ундағы ўзгаришіга эътибор қилди.

— Сенга нима бўлаяпти, оғайни, жиққа терга ботиб кетдинг? Ёки ёнингдаги оғатижоннинг тафти шунчалик баландми? — деди бошқа нарсани хаёлига келтирмаган Семён.

— Ҳозир сенинг ёнингга ўтса, сенам сувга тушган мушукдай бўлиб қоласан, — деди Вадим нокулайликдан осонлик билан чиқиб кетганидан хурсанд бўлиб, ёнидаги сулувга ишора қиларкан.

— Қани, Таняхон, бизни ҳам бир куйдириб ташла-чи, — деди кулиб Семён.

Таня Вадимнинг лабидан бўса олди-да, ўрнидан туриб келиб Семённи ҳам ўпди. Икки жувон икки томонидан қучоқлаб, вужудини оҳиста сийпалай бошлагач, бутунлай ҳирсга берилган Семён:

— Ресторанингнинг алоҳида хонаси йўқми? — деди Вадимга қарата.

— Бўлганда қандоқ, — деб Вадим ортига бурилдида, йигитларидан бирини ёнига чақириб, тезда бассейнни тайёрлашларини буюрди.

Унинг гапини эшитиб Семён бурнини жийирди:

— Барака топтур, бассейнга улгурамиз, аввал нафсни қондириб олайлик.

— Бассейн тайёр бўлгунча, бу “қушчалар” сени адойи тамом қилишади. Қани, юринглар-чи, — дея Вадим ўрнидан турди.

Улар чақчақлашиб уй ичига киришди. Вадим иккинчи қаватдаги эшиги кўриниб турган хонани кўрсатди-да:

— Шу ерга чиқинглар, — деди. Бу хонани қизлар яхши билишарди, бироқ Семён илк маротаба кўриши эди.

Семён ўзи айтганидай, нафсини қондириб чиқкунча бир соатдан мўлроқ вақт ўтди. Шундан сўнг улар бассейнга киришди. Бу ерда ҳам усти турли хил тансиқ таомлардан тортиб ичкиликларгача тўлдирилган стол бор эди. Шу ерда Вадим мақсадига етди.

У Семён сувга ўзини ташлаб, талай муддат сузиди чиққанидан кейин унинг қулига ароқ тूла қадаҳ ту-тқазди. Бу сафар Семён қадаҳини Иранинг қулига тутқазмасдан, ҳар хил хаёлларга бормасдан, бир кўта-ришда бўшатди-ю, бирдан ранги гезариб кетди. Кей-ин хириллаб томоғини ушлаганча қайтадан сувга қулади.

Вадим жасадга бироз қараб турди-да, кейин йи-гитларини чақириб, уни сувдан чиқариб олиб, ўрмон-нинг ичига кўмиб ташлашни, унгача Семённинг ўзи билан бирга келган одамларини бир ёқли қилишни буюрди. Ўзи эса қизлар билан ишрат қилиш учун иккинчи қаватга кўтарилиди.

Соат тунги ўн иккиларга яқинлашиб қолганида, Семённинг уй қоровули хўжайиннинг машинасини кўриб, дарвозани очди. Ҳовлига кириб келган ма-шинанинг ичидан Семён тушмагач, келгувчиларга ҳайрон бўлиб қараб турганида, Вадимнинг икки йи-гити унга бирдан тўппончаларини ўқталиб:

— Жойингдан қимиrlасанг ўлдирамиз! — дейишди.

Вадим эгасиз қолган уйга худди ўзининг уйига киргандай bemalol кириб борди. Тансоқчилар рух-сатсиз кириб келаётган одамни тўхтатмоқчи бўлиб, унинг олдига чиқишиди-ю, Вадимнинг орқасидан ке-лаётган йигитларнинг қўлларидағи тўппончаларини кўриб, бирдан жойларида тўхташли.

— Афсус, — деди диванга бориб ўтирган Вадим, — баҳтсиз ҳодиса туфайли Семён оламдан кўз юмди. Ўлаётиб, уйига эгалик қилишни менга васият қилиб кетди. Сизлар ҳам васиятта тўлиқ амал қилиб, ме-нинг йигитларим қаторига қўшилишларинг керак. Йўқса, васиятни бузган одамни мен кечирмайман!

Семённинг тансоқчилари вазиятни тезда англа-бетиши ва Вадимнинг оёғига бош уришиб, умрбод унинг хизматини қилишларини айтишиди. Бироқ Вадим бунга қаноат қилмай, уларнинг ҳар бирларига қасам ичирди. Шундан кейин уларнинг ҳаммасини

ташқарига чиқариб юбориб, Семённинг қул телефонини текшира бошлади. У истаган рақамлар тезда топилди. Вадим мийигида кулиб, “Ҳаммаси бунчалик тез битишини ўйламаган эдим. Биронта йўқотишиз эришдим-а”, дея хаёлидан ўтказиб, охирги марта Семёнга қилинган қўнғироқнинг рақамларини шимининг орқа чўнтағидан кичкинагина дафтарча олиб ёзиб қўйди. Кейин Эдуарднинг телефон рақамини терди.

— Тушингда мени кўрдингми, нима бало? — деди у бемаҳал телефон қилган Вадимнинг овозини эшитганидан кейин норози бўлиб.

— Ҳа, сен тушимга кирдинг. Ҳозир тез кийиниб, инингдан чиқиб тур, сени йигитларим олиб кетишади, — деди Вадим.

— Қаёққа? — деди ҳайрон бўлган Эдуард.

— Қўрқма, нариги дунёгамас. Менинг ёнимга, — деди кулиб Вадим ва телефонни учирди.

Дўсти етиб келгунча Вадим Семённинг уйидаги ҳамма хоналарни бирма-бир кўздан кечириб чиқди. Сўнг бирдан унинг хаёлига: “Бойликларини қаерга яширдийкин?” — деган ўй келиб қолди ва хоналарни бөнгатдан синчиклаб кузатиб чиқа бошлади.

Эдуард етиб келганида бойлик қидиравериб ниҳоятда ҳолдан тойган Вадим диванга ўтирганча пиво ичар эди.

— Ҳа-а, бироннинг уйида жа ўзингдан кетиб ўтирибсан, — деди Эдуард кириб келиши билан.

— Буям энди ўзимнинг уйим, — дея ўрнидан туриб дўстининг истиқболига чиқди Вадим.

— Сенга қолса, кўзингга яхши кўринган уйларнинг ҳаммасини ўзингники қилиб олсанг, — деди кулиб Эдуард. Улар қучоқлашиб кўришиб, диванга ёнма-ён ўтиришганидан кейин Вадим йигитларига Эдуардга ҳам пиво олиб келишларини буюрди.

— Дўстим, — деди Вадим Эдуарднинг елкасига қўлини кўйиб, — ҳамма ишни тутатдим. Ўйлаган

режаларимнинг ҳаммаси тез ва осонгина амалга ошди.

— Нималар деяпсан? — дея сўради ҳайрон бўлган Эдуард.

Вадим жавоб беришга шошилмасдан, стол устига қўйган пивонинг шишасини қўлига олиб, қадаҳга ҳам қуийшга сабри етмасдан, бирдан шишанинг ўзи билан кўтарганча беш-олти қултум ичди. Шундан кейингина қилган ишларини бирма-бир гапириб берди.

— Ҳамма ёқни расво қилибсан! — дея бирдан бақириб юборди Эдуард.

— Нега? — деди ҳайрон бўлган Вадим.

— Ҳеч биронта иш қилишингдан олдин ўйлайсанми, ўзи?! — дея баттар тутақди Эдуард.

— Нима, мени бугунлай калласиз одам деб ўйлајпсанми? — деди хафа бўлган Вадим.

— Ҳа, сенинг калланг умуман ишламайди. Қилма деган ишларни ҳам ўзбошимчалик билан қилиб келасан. Энди бутун дунёга жар сол, мен шундай ишни дўндириб қўйдим, деб!

Вадим аччиқланганидан сигарета олиб тутатди ва бироз ўйланиб туриб, ҳамон асабийлашганча бармоқларини қайириб-қарсиллатиб ўтирган Эдуардга қараб:

— Нима қил дейсан? — дея сўради.

Эдуард унинг кўзига икки-уч сония тикилиб тургач, эшик ёнида ҳайкалдек қотиб турган Вадимнинг йигитига қараб:

— Ҳов гўрсўхта, бор, ташқарига чиқиб сигарет-пигарет чекиб кел, — деди.

Йигит Вадимга “чиқайнми, йўқми?” мазмунида қаради. Ва хўжайнининг қўл силтаб “кет” ишорасини қилганини кўргач, орқасига бурилди-ю, чиқиб кетди.

— Мен сенга ҳамма ишни бир ўзинг қил, дегандим. Ёнингда ўзингнинг йигитларингдан ҳам биронтаси бўлмасин дегандим. Сен бўлсанг ҳамманинг,

ҳатто иккита манжалақининг олдида ўлдирибсан уни... Бўпти, қилғиликни қилиб кўйибсан. Энди шу оқшомнинг ўзида орқангни ёпишинг керак. Бўлмаса, эртага қилган ишингдан бутун шаҳар хабар топади. Ундан кейин ўзингта қилиниши мумкин бўлган ҳужумларни кутиб ётавер. Чунки Семённи ўлдирганингни эшигтан бошқа “авторитет”лар қўлини қовуштириб, “Вадим энди қайси биримизни мўлжалга олар экан?” — деб ўтиришмайди.

— Қанақа қилиб ёпишим керак? — деди Вадим дўстининг гапидан ўйга чўмиб.

— Қилган ишингга ким гувоҳ бўлган бўлса, ҳаммасининг баҳридан ўтасан.

— Эсинг жойидами?! — дея бирдан ўрнидан туриб кетди Вадим.

* * *

Равшан эрталабга яқин уйига кириб келди. Гоҳ ухлаб, гоҳ уйғониб, тонг оттирган кампир ўғлини кўриши билан чорпоядан тушишга ҳаракат қила бошлади. Аммо ҳали калишини кийишга улгурмасидан Равшан унинг ёнига етиб келиб, чорпояга ўтирганча чукур “уфф” тортди.

— Отанг яхшима? — дея сўради кампир ўғлига қараб.

— Яхши.

— Уканг отангнинг олдида қолдима?

— Ҳа.

— Нимага бунча сўлийсан? — деди ўғлининг ланж аҳволидан жаҳли чиққан кампир.

— Чарчадим-да, эна, оқшомминан ухламай чиқдим. Дори излаб уйма-уй юрдим, — деди Равшан энасининг гапидан норози бўлиб.

— Ҳомсилар-да, хом. Бир оқшом юриб чиққанларингга келиб менинг бошимни ёрасизлар. Юрған бўлсанг, отанг учун юрибсан. Шу бечора чол сизларди одам қиласман деб вақтида кечаю кундуз чопган. Энди касал бўп қолганида кунига ярамасаларинг, нима керакларинг бор?

— Уфф, қизиқсиз-а, эна, бирор сизга югурмайман, қимайман, деяптими? Дарров ловуллайсиз. Чарчадим, дедим. Ҳали бошқа гапни оғзимга олганим йўқ. Шунга шунча!

— Майли, болам, — дея бирдан ҳовуридан тушди кампир, — чарчасангам қайтасан, отанг-да. Дўхтирилар нима деди ўзи?

— Борганимиздан битта укол қилишиди. Кейин менга икки хил дорини ёзиб бериб. “Ҳозироқ шуни топиб келмасанг бўлмайди”, дейишди. “Ярим оқшомда бу дориларни қаердан топаман?” дедим мен. Шундан кейин улар беш-олтита аптекачининг адресини беришли. Мен уларнинг уйига биттама-битта кириб чиқдим. Битта дорини топдим. Иккинчиси йўқ экан. Қайтиб келиб дўхтириларга ялиниб-ёлвориб ўзларидан ишлатиб туришни илтимос қилдим. Падарингга лаънатларнинг ўзларида боракан. Одамли сарсон қилмасаям бўлайкан. Пулни олди-да, дарров укол қилиб ташлади. Шундан кейин отам тинчгина ухлади.

— Дўхтириларга ишинг тушмасин, болам. Шуминан яхши бўп кетса қани? Хотининг ҳалиям уйкудан калла кўтаргани йўқ. Уйингга кир-да, уни уйғотиб юбориб, ўзинг пича дамингни ол. Мен овқатповқат қилдирај. Кейин обориб бериб келасан, — деди кампир.

— Қанақа дам? — деди Равшан. — Ҳозир анави тириқ моллардан биттасини сотиб келишим керак. Ундан кейин шаҳарга бориб яна бир-иккита дори топиб келмасам бўлмайди. У дорилар ўзимизда йўғакан. Дўхтирилар шундай деди. Қолганларини шу ердан топсаям бўларкан. Манави рўйхатни қаранг.

Кампир гарчи саводсиз, бунинг устига, кўзи яхши ўтмасаям, ўғли берган қофозни қўлига олиб қаради. Унда саккиз хил дори ажи-бужу ҳарфларда ёзилган эди.

— Ўҳ-ҳӯ, — деб юборди кампир, — шунча дори керак эканма?

— Ҳозирча шулар, қолганини кейин ёзib берай-миш, — деди Равшан бошини қимирлатиб.

— Бугун бозор кунимас-ку, кимга сотасан сигирди? — дея сўради кампир тиришган башарасини баттар тириштириб.

— Мавлон аканинг олдига борай-чи. Кеча касалхонага кетаётганимизда ёрдам керак бўп қолса қараб турмаймиз, дегандай бўлувди, — деб Равшан оғриниб ўрнидан турди.

У энди уйига етганида, аввал оппоқ “Жигули”, унинг ортидан милиция машинаси уларнинг ҳовлиси томонга бурилиб тўхтади ва сигнал берди. Равшан эшикни очган кўйи тўхтаб, орқасига қаради. Иккита машинадан чамаси етти киши тушиб, уларнинг уйи томонга келаётганилигини кўриб, бирдан юраги шув этиб кетди. “Ишқилиб, отамга бир гап бўлган бўлмасин”, деган ўй яшин тезлигига унинг хаёлидан ўтди.

— Кимакан улар? — деди келаётгандарга қараб турган кампир.

Равшан энасининг гапига жавоб бермасдан ечган ботинкасини қайтадан кийиб, меҳмонларга пешвоз чиқди. Бироқ келгувчилар Равшанинг ўзларига яқинлашаётгандарини кўрганидан кейин юришдан тўхтاشди. Кампирнинг эса юраги ҳаприқиб кетди. “Болам тушмагур бирон нимани бошлаб қўйганга ўхшайди. Менга айтмай яширган-да. Менимча, отасига дори топишга пули бўлмай биронникига ўғирликка тушганга ўхшайди. Бўлмаса, мелиса мошин эрталабдан нимага келади?” — дея ўйлади у.

Равшан машинадан тушган одамларнинг ёнига етиб борганидан кейин ҳаммаси билан қўл бериб кўришиб чиқди. Келган одамлардан бири маҳалла оқсоқоли экан.

— Анави машинада, — дея милиция машинасини кўрсатди оқсоқол, — иккита одам ўтирибди. Бирори эркак, иккинчиси аёл. Бориб кўр-чи, танийсанми-йўқми?

— Нима қиласман бориб кўриб? — деди ҳайрон бўлган Равшан.

— Сен бориб кўравер, нима қилишни кейин биласан, — дея жилтмайди оқсоқол. Равшан истар-истамас машина томонга юра бошлади.

— Ҳов! — дея бақирди кампир ўтирган жойида. — Уни қаёққа опкетаяпсизлар?!

Келган одамлардан иккитаси кампирнинг ёнига келишли.

Равшан машинанинг ёнига етиб келиши билан ичкарида ўтирганларнинг иккаласи ҳам ташқарига чиқди. Жуда пўрим кийинган, сочи силлиқ тараалган, бўйинбоғ таққан одам Равшан томон бир қадам юриб тўхтади. Унинг лаблари тинимсиз титрар, кўзидан ёш сизиб чиқмоқда эди. Равшан унинг йиглашига ҳайрон бўлиб тикилганча қотиб қолди. У Равшан тушунмайдиган тилда алланималар деди. Равшаннинг ортидан тезда етиб келган таржимон:

— Сиз бу йигитни танияпсизми? — дея Равшандан сўради.

— Йўқ, — дея бош чайқади у.

Унинг гапини шу ондаёқ таржимон келгувчига таржима қилиб берди. Кўз ёши тинимсиз оқишни бошлаган одам яна бир нималар деб гапирди.

— Наҳотки танимаётган бўлсангиз? — деди таржимон.

— Кўзимга иссиқ қўринаяпти-ю, лекин бирон жойда кўришганимни эслолмаяпман. Нимага йиглаляпти ўзи бу? — дея таржимонга қаради Равшан. Унинг гапини таржимондан эшитган келгувчи яна гапирди ва гапининг орасида Рустам деган исмни тилга олди.

— Ни-ма?! — деб бирдан бақириб юборди Равшан. — Бу Рустамми?!

Меҳмон кўксига урганча: “Рустам! Рустам!” деганча чўккалаб ўтириб қолди.

— Ука-ж-о-н!!! — дея ҳайқириб юборган Равшан Рустамни қучоқлаб олди-да, йиглашга тушди.

Ёнига келган иккита одамнинг жуда узоқлардан

бошлаб гапираётган гапларини тинглаётган қампирнинг қулогига Равшаннинг “Укажон!” дея бақирган овози эшитилиб, ўтирган жойида бир қалқиб кетди. Қампир чорпоядан тушиш ниятида ўрнидан турмоқчи бўлди. Бироқ қимиirlай олмади. Титраб кетаверди.

— Ўзингизни босинг, момо, ҳаммаси яхши, ўғлингиз келди. Соппа-соғ, фақат сиз ўзингизни босинг... — дея қампир бир нарса бўлиб қолмасин деб уни ҳаяжонланишдан тўхтатишга ҳаракат қила бошлади икки меҳмон. Дабдурустдан пайдо бўлган шовқинни эшигтан келинлар ҳам бирин-кетин уйдан чиқиб келишди.

Беш дақиқалар укасини қучоқлаб турган Равшан ниҳоят уни бағридан бўшатди-да, уйга етаклай бошлади.

— Юр, укажон. Энамни кўр, энам сени кўзи тўрт бўлиб кутавериб адойи тамом бўлаёзди. Юр, ука!.. Укажон! — дерди у. Унинг гапларини Рустам тушунмаса-да, акасининг ортидан эргашиб бораверди.

Рустам онасининг ёнига етиб борганларидан кейин бирдан ўзини унинг қучоғига отмоқчи эди, аммо қампир қалтираган қўлини олдинга чўзиб: “Тўхта, белингни очиб кўрсат!” дея бирдан уни шаштидан қайтарди. Рустам ҳайрон бўлиб таржимонга қаради. Таржимон қампирнинг гапларини инглиз тилига ўгириши билан, Рустам кўйлагини кўтарди-да, белини қампирга кўрсатди. Унинг белида ёнғоқдай келадиган хол бор эди.

— Бо-ла-м! — дея бирдан бақириб юборди қампир.

Рустам ўзини онасининг қучоғига отди...

Бир зумда ҳовли қий-чув бўлиб кетди. Рустам билан бирга келган одамлар Равшанни табриклашар, баъзилари қучоқлаб осмонга кўтарар эди. Аммо талай муддат ҳеч ким Рустамни табриклай олмади. Қампир уни маҳкам қучоқлаб олган, юз-кўзидан ўшар, социдан силар, “Болажоним, шунча пайт қаерларга йўқолиб кетдинг?! Нимага ўз оёғинг билан кетиб

қоласан! Мени, отангни ўйламадингми, болажоним?!
Шунчаям санқийсанми, болам?!” — дерди.

Шовқинни эшишиб: “Бўрибой чолга бир нарса
бўлганга ўҳшайди?” деган ўйда аввал қўшнилар югу-
риб келишиди.

Кампир ҳамон ўғлини бағридан бўшатгиси кел-
мас, мабодо бўшатадиган бўлса, яна у йўқолиб қола-
дигандек туйиларди.

— Бизгаям беринг-да энди қочоқни, бир бағри-
мизга босайлик! — деди ниҳоят Мавлон ака тоқати
тоқ бўлиб.

— Кўрдингларми менинг боламни? Қаранглар.
Ҳамма тополмай ўлиб кетади, девди. Топилди-ку!
Бағрим тўлди-ку, Мавлонбой! — деди кампир унга
жавобан.

— Муборак бўлсин, момо! Қучоқлаб тураверасиз-
ми, қўйиб юборинг, бизам кўришайлик энди, — дея
Мавлон ака чорпояга чўккалаб, Рустамнинг қўлидан
ушлади. У доим кампир билан ҳазил-хузул қилиб
юради.

— Беринг энди бошқаларгаям! — деган гап эши-
тилди тўпланганлар ичидан ҳам. Шундан кейингина
кампир истар-истамас ўғлини бағридан бўшатди.

Рустам ўзини қучоқлаётган эркаклар-у, юзидан
ўпаётган аёлларга кулиб-ҳайратланиб қаради.
Тўпланган одамлар ичидан отасини қидираркан, со-
қолли кишилардан қай бири отам экан, дея ўйлар
эди.

— Мана, янгаларинг, — деганча бир пайт хотини-
ю бола-чақаларини, укаси Баҳромнинг хотини ва
унинг болаларини етаклаб келиб қолди Равшан.

Бироқ Рустам ҳеч балони тушунмади ва атрофга
аланглаб, таржимонни қидира бошлади. Ҳартугул,
унинг ўзи Рустамдан кўз узмай турган экан, тезда
ёнига етиб келиб Равшаннинг гапларини таржима
қилди. Рустам хурсанд бўлиб кетиб, катта янгаси-
нинг юзидан ўпди.

— Манавилар менинг болаларим, сенинг жиянла-

ринг, — деди Равшан укасининг қилиғига ғаши келса-да, кулиб.

Рустам энди уларни бирма-бир қучоқлаб ўпишга тушиб кетди. Шундан кейин Равшан Баҳромнинг хотини билан ҳам Рустамни танишириб қўйди. Оилавий танишув ниҳоясига етгач, Рустам:

— Булардан сўранг, отам қаерда эканлар? — дея таржимонга юзланди.

— Отамнинг мазаси йўқ, — деди Равшан.

— Нега? — деди бирдан ҳаяжонланиб кетган Рустам.

— Сенинг дардингда тамом бўлган, ука! Ҳозирам сендей меҳмонни қолдириб, мен шаҳарга кетишим, дори-дармон топиб отамга оборишим керак, — деди кўзидан оқиб келаётган ёшни тиёлмаган Равшан.

— Тўхтанг, тўхтанг, — деди таржимонга одамлар орасидан ёриб, ака-уқанинг ёнига келган оқсоқол, — бу гапни таржима қилманг. Уят бўлади, ука. Ҳозироқ бошқа одам шу дориларни топиб, дўхтирхонага етказиб беради.

— Хўп, — дея таржимон Рустамнинг акасининг гапларини бошқача таржима қилди: — Отангизнинг соғлиғи анча яхши экан. Сизни соғиниби.

— Кетдик, ҳозироқ отамнинг ёнига борамиз, — деди Рустам таржимонга. Бу гап тезда атрофдаги-ларга, Равшанга етказилди. Кампир ҳам эшилди.

— Бечоранинг, — деди кампир ўтирган жойида, — юрагининг мазаси йўқ. Улининг келганини бирдан эшитиб қолса, бир нима бўп қолади. Яна боламга етишган жойимда чолимдан айрилиб қолмай-ин...

* * *

— Нега мени ярим кечаси безовта қилиб бу ерга олиб келдинг? Ҳамма нарсага фаросатинг етар экан, ўзинг ишингни қолган жойидан давом этказавер-майсанми? — дея жаҳл билан ўрнидан туриб кетди Эдуард.

— Сен билан тортишадиган пайт эмас ҳозир. Йи-

гитларимга ичим ачияпти. Наҳотки шуни тушунгинг келмаса?! — деди Вадим унга қараб.

— Ўзингнинг жонингга-чи, ичинг ачимаяптими? Йигитларингни...

— Унда ўзинг бажарасан бу ишни, — дея бирдан Эдуарднинг гапини бўлди Вадим.

Эдуарднинг ранги оқариб кетди. У қўли титраган ҳолда ёнидан сигарета чиқариб лабига қистирди-да, бир амаллаб тутатиб олди.

— Мен, — деди у шундан кейин овози қалтираб, — амалиётчи эмасман. Мен назариячиман. Амалиётни сенга чиқарган.

— Юрагинг ёрилиб кетдими? — дея кулиб қўйган Вадим ҳам сигарета тутатди.

— Мен сенинг мақсадинг нима эканлигини тушумаялпман.

— Нега бунча довдираисан? — деди Вадим. — Биламан, бунақа ишларни эплаш қўлингдан келмайди, лекин қанчалик оғирлигини бир маротаба бўлсам ўзинг ҳис этишинг учун айтдим бу таклифни.

Вадимнинг шу гапилаи кейин Эдуарднинг бироз титроги босилди. У диванга ўтириди-да, шишарадаги пивони бир кўтаришда охиригача симириб юборди.

— Ўйлаб кўрсам, сен ҳақ экансан. Айтганингни ҳозирдан бажаришга киришаман. Менинг одамларимдан олтитаси, Семёnnикидан ҳаммаси нариги дунёга равона бўлади. Фақат бунинг учун озгина ёрдам бериб юборасан. Келишдикми? — деди Вадим.

— Озгина бўлса майли, — деди ичилган пиво бирмунча томирини кенгайтирган Эдуард.

— Паشا! — дея бақирди Вадим. Унинг овозининг акс-садоси сўнган заҳоти эшик очилиб, барзангидай бир йигит кириб келди.

— Уйда Семёnnинг нечта одами қолган бўлса, ҳаммасини ҳаммомга йиф, — дея буйруқ берди унга Вадим. Йигирма дақиқага қолмай унинг амри адо этилди. Унгача Вадим билан Эдуард бир оғиз ҳам гаплашишмади. Индамасдан кетма-кет сигарета че-

киши. Яна икки шишадан пиво олиб келтиришиб, секин-секин ичишди. Йигитлар ҳамма йигилгани ҳақида хабар келтиришганидан сўнг Вадим бир нуқтага тикилган кўйи ўша Паша исмли йигитга уларнинг ҳаммасини отиб ташлашни буюрди.

— Уларнинг аксарияти аёллар, — деди Паша хўжайин буйруғини ўзгартирармикин деган умидда.

— Нима қипти? — дея унга ўқрайиб қаради Вадим. — Сениям ҳаммомга қамалгинг келиб қолдими?

Бу гапдан Паша бирдан сергакланди ва илдам қадамлар билан ҳаммом томонга кетди. Бироздан кейин у ёқдан автоматнинг тариллаган овози эшилтилди.

— Биринчи гуруҳ тинчиди, — дея пицирлади Вадим ўзига-ўзи гапиргандай, — навбат кейингисига.

Паша “иш”ни битириб, Вадимнинг бошқа йигитлари билан бирга қайтиб келди. У Вадимнинг савол назари билан қарашига жавобан: “Ҳаммаси тамом”, дегандек бош қимиirlатди.

— Энди икки киши дам олади, қолганлар қўриқчилик қиласи, — деди Вадим, — биринчи навбат Паша билан Олегга, қолганлардан иккитанг эшик олдида, иккитанг дарвозанинг ёнида турларинг.

Тўртта йигит ташқарига чиқиб кетди. Дам оловчиликага эса Вадим Семённинг иккинчи қаватдаги ётотига чиқишлиарини буюрди. Сўнг ўзи бир дона сигарета олиб, унинг махоркасини тўкиб ташлаб, ўрнига эзилган наша баргларини солди ҳамда унинг атрофини тупуклаб ҳўллади. Шундан кейингина тутатди. Ва ичига чукур тортиб, тутунни бироз ушлаб турди-да, сўнг чиқариб юборди. Уч марта шундай қилганидан кейин вужуди енгиллашди.

— Агар қанотим бўлганида, ҳозир учиб кетган бўлардим, — деди у Эдуардга қараб.

Эдуард унга ачиниб қаради:

— Сенинг бунақа одатинг борлигини илгари билмаган эканман.

— Ҳали кўп нарсани билмайсан, — деди Вадим ва ўрнидан туриб, костюмининг ён чўнтағидан тўппонча чиқарди. Иккинчи чўнтағини кавлаб, овоз сусайтиргични олиб, уни тўппончанинг милига бураб ўрнатди-да, тез-тез юриб иккинчи қаватга кўтарилди.

Чироқ бирдан ёнганида Олег билан Паша ўринларидан сакраб туришди.

— Мабодо “гомик” масмисанлар? — дея тиржайди Вадим. — Битта ўринга икковинг ётиб олибсан. Яна бир-бирингни-а...

Унинг гапи-ю, қўлидаги тўппончани кўрган йигитлар ҳайратдан қотиб қолишиди.

— Мени кечирасизлар, вазият шуни тақозо қилиб қолди, — дея Вадим кетма-кет тўрт марта тўппонча тепкисини босди. Иккала йигит ҳам бирдан қонига бўялганча полга турсиллаб қулади.

Эдуард тўппонча овозини эшитмади-ю, аммо гурсиллаган овоз унинг қулогига аниқ-тиниқ ётиб келди. Бу унинг кўнглида озгина ҳадик пайдо қилди. Ҳаяжонини босиб олиш учун, стол устидаги пиволарни бирма-бир симиришга тушиб кетди.

Вадим мамнун қиёфада юқоридан тушиб келдида, Эдуардга эшикнинг ташқи томонида қўриқчилик қилаётганларни чақириб келишни буюрди. Бу буйруқдан Эдуард оғринди. Лекин Вадимдан айни пайтда ҳамма нарса кутиш мумкинлигини ўйлаб, дарров унинг айтганини бажарди.

Вадим уларга дам олиш учун бошқа хонани кўрсатди. Йигитлар дам олгани киришди-ю, аммо ухлашга улгуришмади. Худди боягидек усулда уларни ҳам Вадим нариги дунёга равона қилди.

Дарвоза қуриқчилари эса уйга кирган заҳотиёқ кўкракларидан ўқ еди.

— Ана, ҳаммаси тамом, — деди Вадим қулидаги тўппончани стол устига отиб юборар экан. — Гувоҳларнинг биронтаси ҳам қолмади. Энди Семённинг мен томонимдан ўлдирилганлигини сену мен била-

миз. Мабодо биронта одам исини оладиган бўлса, иккимиздан биттамиз хиёнат қилган бўламиз.

— Мендан хавотир олма, — деди Эдуард унга илжайиб қарар экан. — Мен шу пайтгача сенга хиёнат қилган бандамасман.

— Тўғри, — деди кўзи қизариб кетган Вадим. — Шунча мурданни нима қиласмиш энди?

— Уй-пуйга қўшиб ёқиб юбориш керак. Шунда ҳеч ким бу ерда сенинг йигитларингнинг жасади борлигини билмайди.

— Бу ерда қанча бойлик борлигини биласанми сен? — дея Вадим қулочини ёзиб атрофни кўрсатди.

— Мўлжаллаган бойлигинг олдида бу сариқ чаقا.

— Тўғри! — дея хитоб қилди Вадим, — Рустам энди меники бўлади!

Уй гуруллаб алланга олган маҳал Вадимнинг қуйиб жизғанаги чиқиб кетаётган жасадларга эмас, балки уйга, унинг қаеригадир яшириб қўйилган пулларга ичи ачиди. Шу боиски, бирор беш дақиқа ёнаётган уйга термилиб қолди.

— Кетдик, — деди унинг ёнига келиб қулидан ушлаган Эдуард.

Машина рулига Вадим ўтиромас эди. Қўллари, умуман, бутун вужуди тинимсиз қалтиради. Ўзининг ақлидан, қилган ишларидан мамнун бўлган Эдуард эса хурсанд эди. Бор овозда қўшиқ айтгиси келарди. Албатта, буларнинг ҳаммаси унинг ичидаги эди, сиртида Вадим каби пешонаси тиришган, қайғуга кўмилиб қолган қўринарди.

У машинани тўғри ўз уйига ҳайдади. Вадим ундан “Нега сеникига бораяпмиз?” дея сўрамади. Чунки унгаям Эдуарднинг уйига бориш маъқулроқдай туйилди.

Вадим унинг уйига борганидан кейин ҳам наша ўради. Бироқ бир ўзи ҳаммасини чекмади, дўстига ҳам илинди. Эдуард умрида ҳали бирор марта ҳам наша чекиб кўрмаган эди. Шундай эса-да, Вадимнинг қулинини қайтармади. Тутунни симирди-ю, ле-

кин ичига ютмай, оғзида маълум муддат сақлаб турганидан сўнг чиқариб юборди. Улар кўп ўтиришмади. Вадимнинг кўзи юмилиб кетаверди.

Эртасига тушдан кейингина уйғонган Вадим ўрнидан турмай анча вақт ўйланиб, кечаги воқеаларни эслаб ётди. Эдуард эса соат саккиз бўлмасидан бурун уйғонган ва уйида ўзининг ишлаши учун маҳсус ажратилган хонада келгуси режаларни тушиб чиқмоқда эди. У ўзи сезмаган ҳолда “дўст”ининг “томир”ини қимирлатиб қўйганди. Буни ўша Вадим унинг маслаҳатини миридан сиригача қолдирмай ба жараётгандан илғаган эди. Энди у Вадимни мутлақо сафдан чиқариб юбориш, у эришган нарсаларнинг барини ўз ихтиёрига олиш ҳақида бош қотираёттан эди. Шу боис, қофозга айрим нарсаларни чизар, кейин ўчирап, сўнг мутлақо бошқа шаклни чизиб кўрарди. Яна чизилган шаклнинг баъзи жойлари ўзига маъқул келмасдан, унинг ҳам баҳридан ўтиб қўярди. Албатта, оппоқ қофоздаги яхшиликдан далолат бермайдиган турли чизиқларнинг маъно-мағзига фақат унинг ўзигина тушунарди. У уч соатга яқин тер түkkанидан кейин ниҳоят ниятига етди. Ва бу ишни ҳам қойиллатгани учун ўрнидан туриб керишди-да, ошхонага борди ва музлаткични очиб, ярми ичилган ароқ шишасини олди. Уни биронта идишга қўйишга эриниб, шишанинг ўзидан икки қултум ютди. Худди ўша маҳал хаёл суриб ётавериб зериккан Вадим бошини болишдан кўтариб, соатни билиш мақсадида, стол устидаги қўл телефонига қараган эди, жавобсиз қолган қўнғироқларни кўриб таажжубланди. “Йигирмадан зиёд қўнғироқ бўлибди-ю, биронтаси ҳам мени уйғотолмабди. Шунчалик қаттиқ ухлаб қолибман-да”, — дея ўйлади у. Ва энди ўзига кимлар телефон қилганлигини билиш учун телефон тугмачаларини бирма-бир босаётганида у яна жиринглаб қолди.

— Алло, — деди Вадим кўзини уқалаб.

— Тирикмисан? Бормисан? Қаерларда юрибсан?

Ҳамма ёқда шов-шув: кимдир Семённи одамларига күшиб ўлдириб кетибди! — дея бирдан бақира кетди хотини Юля.

— Ўзингни бос! — дея бақириб юборди Вадим ҳам. — Нималар деб валдираяпсан?!

— Ҳали ҳеч вақодан хабаринг йўқми?! Дўстинг Семённи ўлдириб кетишибди-ку!

— Нима?! Ўлдириб кетишибди? Ким, қачон ўлдирибди? Кимнинг ҳадди сифибди?! — дея ёлғондан ўкиришга тушди Вадим. — Сен уйдан қимирамай ўтириб, мен ҳамма нарсани аниқлаб, ўзим қўнғироқ қиласман.

“Ҳамма ёқда шов-шув бошланиб кетибди. Семённинг Ўзбекистонга кетган одамлари ҳам бундан хабар топишган бўлишса-чи? Зудлик билан ҳаракатга тушиш керак. Йўқса кеч қоламан... Падарингга лаънат, мени уйғотмасдан қаёққа йўқолибди, шундай пайтдаям бирон жойга кетадими одам? Ўзи охирги пайтларда жа ҳадидан ошаяпти, яхшилаб “бураб” қўйиш керак, шекилли”, дея хаёлидан ўтказган Вадим шоша-пиша кийимларини кия бошлади. У кийиниб бўлиб, энди эшик томонга юрган эди ҳамки, унинг рўпарасида тиржайганча Эдуард пайдо бўлди.

— Қаёққа йўқолиб қолдинг? — деди Вадим уни кўриши билан.

— Сен дам олганингда, менинг дам олишга ҳаққим йўқми? Юр, кофе дамлаб қўйибман. Туш пайти ноңушта қиласмиз, — деди Эдуард.

— Ноңуштага вақтим йўқ, зарур ишлар чиқиб қолди. Кейинроқ сенга ўзим қўнғироқ қиласман, — дея Вадим ташқарига чиқиб кетди. У йўл-йўлакай йигитларидан бирига қўнғироқ қилиб, Эдуарднинг уйи ёнига тезда етиб келишни буюрди. Ўзи эса машинага ўтириб, Семённинг телефонидан Ўзбекистонга қўнғироқ қилди.

— Хўжайнин, эшитаман, — деган овоз келди у ёқдан.

— Мен Семён эмас, Вадимман, яхши танисанг керак.

— Таниганда қандоқ, Вадим Александрович, шефнинг телефон рақами ёзилгани учун, у қўнғироқ қила-яптими, деб ўйлабман.

— Ишлар нима бўляяпти? — деди Вадим имкон даражасида хотиржам гапиришга ҳаракат қилиб.

— Кечирасиз, Вадим Александрович, бу ҳақда биз фақат шефнинг ўзларига ахборот берамиз. Буйруқ шундай бўлган, — деди бир неча минг километр узоқликдаги Семёnnинг йигити.

— Шефинг сенлар ишни чўзиб юбораётганикли-ринг ҳақида менга айтганди. Шу боис, мен сенларнинг ёнларингга ёрдам кучи жўнатмоқчиман. Албатта, уларнинг бориши сенларга минус олиб келади... Ҳа, исминг нима эди? — деди Вадим ойнага қарадида, сочини қўли билан таради.

— Исмим Паша... Лекин шеф... — деда бироз довдиради Вадим гаплашаётган одам.

— Шефинг нима деганини мен сенга айтдим, шекили! — деди Вадим пўписа билан.

— Шефнинг ўзи нега қўнғироқ қўлмади? — деда сўради Паша.

— Шефинг Голландияда айшини суриб юрибди... Нега эзилаяпсан ўзи?! — Вадимнинг бу пўписаси анчагина таъсирли чиқди. Паша дарров сайрашга тушиб кетди.

— “Мижоз”нинг ортидан қаерга борса кузатиб юрибмиз, кеча у марказдан узоқроқ бир қишлоққа кетди. Ота-онаси шу ёқда яшаркан. Унинг уйидаги аҳволни билиш учун одам ёлладик. У ҳозир Рустамнинг отасининг уйига кириб кетди. Ҳали чиққани йўқ. Фақат бизни битта муаммо қийнаб турибди.

— Қанақа муаммо? — деди Вадим бирдан сергак тортиб.

— Улар милиция машинасида юришибди. Яқинлашишнинг имкони бўлмаяпти.

— Яхши, шароитга қараб иш тутинглар. Ҳар эҳти-

молга қарши, мән сизларнинг ёnlарингизга ёрдамчи куч жүнатаман. Улар эртага эрталабки рейс билан етиб боришади. Кутуб олинглар, — деде Вадим телефонни учирди.

Орадан бироз ўтиб, у чақирган йигит етиб келди.

— Онам ҳам билан бирга борсин. Шунда мен уларнинг иккаласини бир кўриб хурсанд бўламан, — деди Рустам таржимонга. Унинг гапини таржимон тезда Равшанга етказди.

— Яхши бўларди, — деди Равшан, — энамни олиб бориб келишим учун машина топишим керак эди. Ўзи яхши юролмайди. Ҳозир машина ҳам тайёр, баҳонада энамам чолини кўриб келади.

Ака-укаларга яна саккиз чоғли одам қушилди, бу пайтда эса маҳалла оқсоқоли Мавлон аканинг машинасида чолнинг ёнига кетиб бўлганди.

Оқсоқолни кўрганидан сўнг Бўрибой чолнинг бироз юзи ёришди. “Озгина бўсаям маҳаллада обрўйим бор экан. Йўқса, оқсоқол мени кўргани келмасди. Иккинчи томондан, агар у дўхтирларга оқсоқоллигини айтиб кетса, яхшироқ қарайдиган бўлишади”, деда ўйлади.

— Чивин чақсаям балнисага келиб ётиб олиш керагакан-да, — деди жилмайиб оқсоқол, салом берганидан кейин.

— Ёш ўтганидан кейин ортиқча нафас олиб юборсангам касал буп қолавераркансан, — деда ҳазилга ҳазил билан жавоб қилди чол.

— Сизнинг ёшингиз ўтиб қолибдими? Бе, кўрган одам ҳали бу ўн саккизгаям кирмабди-ку, леб ўйлайди, — деди оқсоқол.

— Индамасам, бошқа нарсаям дерсан ҳали, — деди чол кулишга ҳаракат қилиб.

— Дердим, лекин, — деда Баҳромни кўрсатди оқсоқол, — манави шалпангқулоқ борлик қилиб қолдиди. Яна эртага энасига бориб: “Отам бошқача касал

бўп қопти, биронта кампирга совчиликка борсам-микин?” деб айтиб қоладими, деб қурқдим-да.

Чод унинг гапига ҳиринглаб кулмоқчи бўлган эди, кўкрагида бир нарса оғриқ бериб қолди. У кўксини ушлаш билан чегараланди, холос. Кейин оқсоқол чол ётган кароватнинг бир чеккасига ўтири-да, жиддий гапга ўтди:

— Бўрибой ака, ҳали бу касалликлар нима бўпти, кўрмагандай бўп кетасиз. Ундан кейин, неваралардан ҳали қутулганингиз йўқ. Уларнинг суннат тўйидан ташқари, катта бўлганидан кейин уйлантиришингиз ҳам бор. Боя Равшан билан гаплашувдим. “Отам соғ бўп турса, болаларимнинг қўлини ўзи ҳалоллаб беради”, деди. Кейин анави санқи ўғлингиз ҳам ўз оёғи билан келиб қолиши мумкин. Унгаям “салдат” тўйи қилиб бермасангиз, маҳалла сизнинг касал бўйиб ётишингизга йўл қўймайди, — деди.

— Оқсоқол, — деди чол кўзида ёш ялтираб, — шу боламни кўришга етиб бормайманми, деб қурқаманда. Энасидан кам соғинмадим! Худо, ишқилиб, шу боламнинг дийдоридан бенасиб қилмасин.

— Бўрибой ака, айтдим-ку, кўрасиз, деб. Тўй ҳам қип берасиз.

— Қанийди, — дея ростакамига йиғлашга ўтди чол.

— Қўйинг, ака, сизга йиғлаш мумкинмас. Дўхтир шундай деб айтган.

— Дўхтирларинг ҳар бало дейверади, — леди-да, чол кўзидағи ёшни артди.

Шу пайт бош врач кириб келди. Уни кўриб Бўрибой чол хурсанд бўлиб кетди. Ва бирдан оқсоқолни таништиришга тушди:

— Бу одам маҳалламизнинг каттаси, яхши одам, ҳамма бирдай ҳурмат қиласи. Бечора, катта бошини кичкина қип, мени кўргани кепти...

У яна кўп гапирмоқчийди, гаплари кўп эди. Лекин ҳамма гапларини айттолмади, кўкраги санчиб

қолди. Пешонасини тириштириб, кўксини фижимлади.

— Безовта бўлманг, — деди соchlари оппоқ, тўлдан келган дўхтир, — яхши танийман бу одамни. Бу одам сизни кўргани кептими, сиз ҳам обрўли, эътиборли кексаларимиздан бирисиз.

Врачни чолнинг юрагини ушлагани безовта қилди. У қасалнинг томирини ушлаб кўрди-да, жилмайди.

— Анча яхши бўп қопсиз, ота, тезда тузалиб кетасиз, — деди ва Баҳром билан оқсоқолдан чиқиб туришларини илтимос қилди. Ўзи эса эшик ёнида турган ҳамиширага тезда укол қилишни имо-ишоралар билан тушунтириди. Уколдан кейин чол яна бир текисда нафас ола бошлади. Бундан врачнинг кўнгли таскин топди. Бироқ барибир врачнинг боши қотди.

У қандай қилиб Рустамнинг келганлигини чолга айтишни билмасди. Чунки беморнинг текис нафас олиши вақтинчалик эди. Дорининг кучи кетиши билан унинг аҳволи оғирлашиб қолиши ҳеч гап эмасди. Бундай пайтда, Рустамнинг топилгани ҳақидаги хушхабарни айтиш у ёқда турсин, ортиқча безовта қилиш ҳам мумкин эмасди. Шуларни ўйлаб туриб, врач чол ётган хонадан бир-бир қадам босиб, коридорга чиқди.

— Айтамизми-йўқми? — дея сўради оқсоқол врачи кўрганидан кейин унинг ёнига келиб.

— Бошим қотди, ташқарида ўғли кўзини тўрт қилиб турибди. Ҳозирча билдиrmайлик десам, бечора бола шунча йил ота дийдорини кўрмаган. Айтайлик десам, чолнинг юраги кўтаролмайди, деб қурқаман, — деди дўхтир пешонасини тириштириб.

— Балки ўзим кириб ётиғи билан тушунтирсамми?.. — деди оқсоқол.

— Менимча, керакмас, шунча йил кутибдими, яна бир-икки кун кутсин, чолни бироз даволайлик, ўзига келиб олганидан кейин сиз айтгандай қилиб ту-

шунтирамиз. Ташқаридагиларгаям шундай деб ту-
шунтирамиз.

Бу гап оқсоқолга маъқул тушди. У Баҳромнинг олдига бориб, акаси келганлигини паст овозда айтди: “Фақат, — деди у гапининг сўнгиди, — буни отангта зинҳор билдирма. Агар айтиб қўйсанг, отасиз қоп кетишинг ҳам ҳеч гапмас”. Баҳромнинг хотирасидан Рустам аллақачон ўчиб кетган эди. Қолаверса, отасининг шу ахволга тушишида уни бош айблор ҳисобларди. Шу боисдан ҳам Рустамни кўрмоқ учун ташқарига югуриб кетмади.

— Хавотир олманг, — деди у оқсоқолга, — ҳеч нарсани билдиrmайман. Менга акадан кўра кўпроқ ота керак.

Таржимондан ҳозир отасини кўриш мумкинмаслиги ҳақидағи гапни эшитганидан кейин Рустамнинг кўзида бирдан ёш пайдо бўлди. Аммо у ёнидагилар олдида нокулай ахволга тушиб қолмаслик учун тескари ўгирилиб, кўз ёшини артиб олди. Буни ҳамма кўрди, шу боиски, оқсоқолдан тортиб улар билан бирга келган милиционер ҳам бошини эгди. Анжела эса унинг кўлидан ушлади. Унинг бундай қилиши Рустам учун ҳеч нимани билдиrmаган бўлса-да, Равшан бироз безовталаниб, энасига қаради. Қизнинг бу қилиғи кампирга ҳам ёқмади. Бироқ у ҳам айни дақиқада бу бети йўқ қизни қарғашдан ожиз эди.

— Рустамжон, — деди оқсоқол. Рустам ўзининг номини эшитиб оқсоқолга қаради. — Ўғлим, шунча кутганди бири. Яна бир-икки кун чидайсан энди.

Таржимондан унинг гапи мазмунини эшитган Рустам бошини қимирлатиб тасдиқ ишорасини қилди.

— Илтимос, — деди у врачга қараб, — отамнинг эртароқ соғайиб кетиши учун нима қилиш керак? Балки Америкадан доктор чақириш лозимдир. Мен ҳозирнинг ўзида хабар беришим мумкин. Узоги билан эртага етиб келади.

— Ука, — деди врач таржимонга қараб, — айтинг, ўзимиздаям америкаликлардан ўтадиган врачлар етар-

ли. Фақат отасининг соғлиғи ўнгланиши учун вакт керак.

Таржимон унинг гапларини инглиз тилига ўғиришга улгурмасидан бурун ҳамшира югуриб чиқиб, врачнинг қулогига алланималар деб шивирлади.

— Кечирасизлар, — деди-ю, дўхтири югургудек бўлиб касалхона ичига кириб кетди. Қолганлар эса унинг ортидан безовталаниб қараб қолишли.

“Эй, худо, — дея ичида нола қилли кампир, — чолимнинг жонини бизга кўп кўрма. Шўрлик боласини кўрсинг. Дийдорига тўйиб, ҳеч курса бир-икки йил яшасин”. Онасининг кўзидан оқаётган ёшни кўрган Рустам уни қучоқлади ва ўз тилида алланималар деб гапирди.

— Болам, — деди кампир унинг юзидан ўпиб, — ўзимнинг чулчит бўп қолган болам. Йўқолиб қолмаганингда шу кунлар йўғиди.

Ўғил ҳам онасининг биронта гапини тушунмади. Таржимон эса она-боланинг гапларига аралашмади.

— Момо, — деди оқсоқол кампирнинг кунглини кўтариш учун, — чолингиз отдай бўп кетади. Мен уни кўриб чиқдим-ку. Анча тетигиди. Касалхонада чолингиздан бошқаям касаллар кўп. Дўхтири шуларни кўргани кетди чоғимда. Яна у бу ернинг бошлиғи, битта-яримта катта телепон қип қогандир-да. Шунинг учун сиз ҳечам хавотир олманг.

Оқсоқолнинг гапларини таржимон Рустамга айтиб турди. Рустам, оқсоқолнинг гапларидан хурсанд бўлганидан, унинг ёнига бориб:

— Сенкю! — деди. Бу сўзни оқсоқол яхши билса керак, деган ўйда таржимон ўзбек тилига ўгирмади. Оқсоқол гарчи унинг гапига тушунмаган эса-да, индамай бошини қимиirlатиб кўйди.

Врач югуриб Бўрибой чол ётган палатага кирди-ю, унинг алаҳсираб ётганлигини кўриб қўрқиб кетди ва бўйнига осилган аппаратининг бир томонини қулогига ўрнатиб, иккинчи томондаги думалоқ тे-

мирни чолнинг кўкрагига қўйиб, беморнинг нафас олишини эшитиб кўрди.

— Лола, — деди у орқасида турган ҳамширага, — тезда укол қилинг!

— Хўп бўлади, — дея ҳамшира шприцини дорига тўлдира бошлади.

Врач эса оғир қадамлар билан коридорга чиқди. Унга Баҳром ҳам эргашди. Унинг кўзидан ёш оқмоқда эди.

— Дўхтир ака, — деди Баҳром овоз чиқариб йифлаб юбормаслик учун базур ўзини босиб, — отам ўлиб қолмайдими, ишқилиб?

Врач асабий ҳолда ортига бурилди, аммо Баҳромга қаттиқ гап айта олмади. Йигитнинг кўзидан оқиб тушаётган ёш тилини тишлашга мажбур этди.

— Ўзингни бос, ука. Худо хоҳласа, тузалиб кетади, хоҳламаса, бизнинг қўлимиздан нимаям келарди? Тақдирга тан беришдан бошқа иложимиз йўқ. Энди сенга бир гапни айтайнин... Кўзингни арт-э, эркакмисан ўзи?! — деди врач Баҳромнинг “пикъиллаш”ига ортиқ бардош беролмай. Йигит дўхтиренинг пўписасидан сўнг бирдан кўзидаги ёшни артди-да, бошини эгди.

— Ҳозир секин ташқарига чиқ, — дея гапида давом этди врач, — аканг билан кўриш. Ундан кейин акангни бу ёққа бошлаб кел. Ҳа, анави таржимониям бирга келсин. Аканг ҳозир отанг билан кўришмаса бўумайдиганга ўхшайди.

Врачнинг сўнгги гапидан кейин Баҳром худди ток ургандай чўчиб тушиди.

— Ака, — деди у, — бир бало қилинг. Отамни олиб қолинг. Илтимос, ака!..

— Бас! — деди врач. — Кўп сайрамай, бориб айтганимни қил.

— Хўп! — деди Баҳром бошини қимирлатиб. — Ҳозир...

Унинг бутун коридорни бошига кўтариб югуриб

кетаёттанилигини кўрган врачнинг жон-пони чиқиб кетди.

“Бу овсар ҳозир ҳамма ёқни қиёматга айлантириб юборади”, — дея хаёлидан ўтказди у ва:

— Ҳов! — деб бақириб юборди. Баҳром унинг овозини эшишиб, бирдан тұхтади. Врач унинг ёнига асабий тарзда тез борди-да:

— Бунча ҳовлиқасан? Ўпканг борми ўзи? Бориб отангнинг ёнила ўтири. Ўзим айтиб келаман, — деб ташқарига йўналди.

У биронта хабар эшишиб қолиш умидида касалхона эшигидан кўз узмай турғанлар ёнига борди-да, жилмайишга ҳаракат қилиб:

— Бобой анча яхши бўп қолди. Рустам бориб кўрсаям бўлаверади, — деди. Бу гапни эшитган оқсоқолнинг юраги шиф этиб кетди.

— Хайрият-э, — деди кампир. Равшаннинг эса юзида табассум пайдо бўлди. Рустам безовталаниб таржимонга қаради. Врачнинг гапидан мамнун бўлган таржимон унинг гапларини дарров Рустамга етказди.

— Оқсоқол, — деди врач, — сизам бирга боринг. Яна Рустамжон ёшлиқ қилиб отасини қаттиқ кучоқлаб юформасин.

Гап мазмунини оқсоқол дарров тушуниб етди. Бирдан унинг юзида ачиниш аломатлари пайдо бўлди.

— Майли, юринглар, — деди оқсоқол. Унинг гапи ҳазин чиқди. Бироқ ҳеч ким бунга эътибор бермади.

Коридорда ҳаммадан олдинда кетаёттан Рустамнинг юраги жуда тез урап, у йўлак чеккасида ўзига йўл бериб қолаёттан беморлару ҳамшираларга мутлақо эътибор бермас, қўзидағи ёшни тинимсиз артар эди. Ниҳоят у отаси ётган палатага етиб келди. Бироқ эшикни очишга унинг кучи етмади. Эшик тутқичини ушлаганча қотиб қолди. Шунда оқсоқол унинг ёнига келди-да, эшикни секин ичкарига итарди. Дераза ёнидаги каравотда кўзини юмиб ётган чолнинг кўкраги тез-тез кўтарилиб тушар, ҳар-ҳар

замон хириллаб қўярди. Унинг ёнида эса отасининг кулини ушлаганча Баҳром тинимсиз йиглар эди.

Рустам югуриб борди-да, отасини кучди:

— Ота, отажон! Мен келдим! — деди. Ҳудди шупайт Бўрибой чол кўзини очди. Нафас олиши ҳам мўтадиллашди.

— Бўрибой ака, — деди оқсоқол, — улингиз Рустам бу! У топилди. Мана, ёнингизга келди!

— Бо-ла-м! — деди чол паст, нимжон овозда. — Хайрият!

У Рустамни қучоқламоқчи бўлиб иккала қўлини у томонга чўзди. Бироқ қучоқлай олмади. Қўллари ҳавога кўтарилиди-ю, бироз муаллақ тургач, тап этиб яна жойига тушди. Кўзлари эса мангуга юмилди.

— Ота-а-а!!! — дея бақириб юборишди бирдан учала ўғил ҳам жон аччиғида.

Фарзандлар ҳайқириги бутун касалхонани титрабиб юборгандай бўлди.

Болаларининг ҳайқиригини эшитган кампирнинг кўзи бирдан ёшланиб, ичиди бир нарса чирт этиб узилгандай бўлди. У қалтираганча касалхона эшиги томон юра бошлади. Анжела дарров кампирнинг кўлидан тутди.

Бўрибой чол ётган палата мотам тусини олганди. Иккала ўғил “отамлаб” зориқиб, изтироб билан йиғлар, Рустам эса отасини кучганча унсиз кўз ёш тўкарди. Врачлару ҳамширалар қанчалик уринишмасин, барибир уларни тинчлантиришнинг имконини қилишолмасди. Кампир келганидан кейин эса ўғилларнинг фарёди янаям авжланиб кетди.

— Бўлди қилинглар! — дея бақирди оқсоқол охири сабри чидамай. — Нимага энди бунча дод-вой қиласизлар?! Шуминан отангларни қайтариб оласизларми? Кимнинг отаси ўлмаган? Етим бўлмаган одам борми ўзи бу дунёда!.. Касалхонада бошқа касалларам бор. Ҳеч бўлмагандага шуларни ўйласала-ринг бўлмайдими?!

Унинг гаплари фарзандларга таъсир этмасдан қолмади.

* * *

...Рустам умрида мотам маросими бунақа бўлишини кўрмаган эди. Иккала ўғил чопон кийиб, белига белбоғ боғлаб “отам”лаб бор овозда бақирар, сал нарида бир тўда аёллар уввос солишарди. Рустам битта-иккитаси соч юлаётганини ҳам кўрди. Унинг ўзи ҳам: “Шундай қилиш керак экан”, деган ўйда акаларига қўшилиб бақирмоқчи бўлди. Бироқ уддасидан чиқолмади. Шунчаки йиғлаб тураверди. Маросимнинг яна бир томони уни ҳайратга солди. Америкада марҳумни кўмиш учун аёлу эркак ҳаммаси қабристонга қора кийган ҳолда боришарди. Бу ерда эса жасад хонадондан олиб кетилаётганида аёллар додлаганча қолаверишди.

Отасининг вафотига Равшан билан Баҳром қанчалик куйинган бўлишмасин, ўзларини йўқотиб қўйишмади. Қабристондан қайтиб келишди-ю, худойи қилиш тўғрисида қўшнилар билан маслаҳатлашишга тушиб кетишиди. Рустам эса тилсиз-қулоқсиз бир одамдай бўлиб қолган эди. Атрофдагиларнинг ҳаммаси бир-бирлари билан гаплашишар, тортишишар, уларнинг ҳамма гапларини ўзбек тилига ўгиришга таржимонда имконият йўқ эди.

— Ука, — деди Равшан Рустамнинг ёнига келиб хирилдоқ овозда, — қўшнилар билан отамнинг худойисини икки кундан кейин ўтказишга келишдик. Лекин озроқ қўлимиз калта. Шунга ёрдам бериб юборрасанми? Сенга келганингдан бундай гапларни айтмоқчи эмасдим-у, лекин бошқа иложим йўқ-да...

Таржимон Рустамга худойи нима эканлигини аввал обдон тушунтирганидан кейингина акасининг мақсадини айтди.

Рустам тёзда ёнидан чек дафтарчасини олди-да, эллик минг доллар ёзгач, йиртиб Равшангага берди.

— Бу нима? — деди Равшан бир парча қоғозни олиб. — Бизнинг устимиздан куляйсанми?

— Бу чек, — деди таржимон, — банкка бориб шу қоғозчани кўрсатсангиз, сизга эллик минг доллар беришади.

— Бундай қилиш кўлимдан келмайди, — деди Равшан доллар сўзини эшитганидан кейин бироз довдираб. — Яхиси, ўзи бориб олиб келсин.

Таржимондан акасининг гапларини эшитганидан кейин Рустам: “Окей!” деди бошини қимирлатиб.

Рустам ҳақидаги хабарни эшитиб ҳокимият вакиллари ҳам таъзияга келишган эди. Улар бўлаётган гап-сўзлардан хабар топишганидан кейин дарров Рустамнинг ёнига келишди-да, ўзлари ёрдам қилажакларини айтишди. Ва марказдан бирга келган милиционер йигитни ёнларига олишиб, машинага ўтириб кетишиди.

Йўлда кетишаётгандаридан ҳокимият вакили йўл чеккасида “иномарка”га суюнишганча сигарета чекиб гаплашиб турган уч йигитни кўрсатиб:

— Булар Рустамнинг тансоқчиларими? — дея милиционердан сўради.

— Билмадим, — деди йўл четидаги йигитларга бир қараб олган милиционер. — Биз билан бирга ҳеч ким келгани йўқ. Ундан кейин, меҳмонхонадан Рустам билан Анжела чиққан. Уларни ҳеч ким кузатиб қўйгани йўқ.

— Рустам ҳақидаги шов-шувни эшитиб ўзимизнинг безорилар ҳам ғимирлаб қолган бўлишмасин тағин, — деди ҳокимият вакили. — Дарвоҷе, улар бу ўртанинг одамимас.

— Унда ким бўлиши мумкин? — деди милиционер, кейин ҳайдовчининг елкасига туртиб, орқага қайтишни илтимос қилди.

— Яхиси, — деди ҳокимият вакили, — марказга бориб, милиция бошқармасига айтамиз. Улар тезда буларнинг кимлигини аниқлашади.

— Унгача кетиб қолишмасмикин? — деди милиционер.

— Таъзияга бораётганимизда ҳам худди шу ерда туришганди. Менимча, ҳали кетишмаса керак.

Улар марказга етиб боришганларидан кейин бошқармага “шубҳали бегоналар” тўғрисида хабар бе-

ришли-да, кейин чек масаласида банкка кириб кетишиди.

Семённинг йигитларидан бири ёнларидан ўтган машинанинг ичида ўтирганларнинг ўзларига эътибори тушганини сезиб қолди.

— Анавилар, — деди у машинага ишора қилиб, — бизга термилишиб ўтиб кетишиди. Ичида “мент” и ҳам бор экан.

— Биз бу ернинг одамларига ўхшамаймиз, шунга қарашибандир-да, — деди унинг шериги.

— Айнан ўхшамаслигимизнинг ўзи бизга муаммо туғдириши мумкин. Рустам ҳали-бери бу қишлоқдан чиқиб кетмайди. Мотам тутиб ўтиради. Буларнинг ҳам ўзига яраша удумлари бўлса керак. Умуман, бўлмаган тақдирдаям, унинг ҳали-бери кетиши даргумон. Шунча йилдан бери энди келиши бўлса, — деди учинчи йигит.

— Унда кетдик, кечкурун келамиз. Унгача шефга кўнфироқ қилиб, маслаҳат сўраймиз, — деди сезгир йигит.

Бу гап уларнинг ҳаммасига маъқул тушди. Чунки шу пайтгача қуёшда куйиб ўтиришдан уларнинг жони ҳалқумларига келган эди.

Машина жойидан енгил қимиirlади-да, шаҳар томонга учиб кетди.

Хабар етиб борганиданоқ йўлга чиқсан милиционерлар барибир кеч қолишиди. Шундай бўлса-да, “бегоналар”нинг яна қайтиб қолиш хавфи борлигини ҳисобга олишиб, учта навбатчи ташлаб кетишиди.

...Равшан умрида ҳали бунаقا кўп пул кўрмаган эди. Машинадан бир қоп пулни орқалаб уйга киргизаётуб юраги ўйнаб кетди. “Пул деганлариям шунчалик оғир бўладими? Одамнинг белини чиқариб юборади-ю... Буни эҳтиёт қиласам, бирор илиб кетиши ҳеч гапмас. Бунаقا кўп пулни кўрган одам бир тонна бўлсаям кўтариб кетади... Айниқса, Баҳромнинг хотини ёмон, доим кўзи ўйнаб туради. Бегоналарданам кўра шундан кўпроқ эҳтиёт бўлиш керак.

Энамнинг бўлса қўнгли бўш, битта-яримта сўраб келиб қолса, йўқ деёлмай, айтганини тутқазиб юбора-веради. Энг ишончлиси хотиним. Ҳозир унга айтман. Уйдан ҳеч қаёққа қимиirlамай ўтиради... Юз минг сўмам отамнинг маъракасига етиб ортади. Қолганини нима қилишни кейин ўйлаб кўрарман”, дея хаёлидан ўтказди у. Ва уйга кириб ўзининг болалири-ю жиянларининг ҳаммасини қувиб юборди-да, хотинини чақириб, қўнглидаги гапларни унга айтди. Пулнинг миқдорини эшишиб жувоннинг ҳам кўзи ўйнаб кетди. Сўнг, эри чиқиб кетганидан кейин бу пулнинг қаерларга сарфланиши лозимлигини режалаштира бошлади...

* * *

Вадим Семённинг ёниб култепага айланган уйи ёнига борганида у ерда беш-олти милиционердан бошқа ҳеч ким йўқ эди. Томошани хуш кўрадиганлар, ўт ўчирувчилар ва бошқа “авторитет”ларнинг ҳаммаси келиб кетишганди.

— Нима бўлибди? — дея милиционерларнинг биридан сўради у ўзини гўлликка солиб.

— Нима бўларди? — деди милиционер сақичини чайнаб, — Семён деган “авторитет” бўларди, ўшани ўлдириб, уйини ёқиб кетишибди.

— Кимлар? — деди Вадим ўзини қайгули қиёфага солиб.

— Биз қаёқдан билайлик? Ҳамтовоқлари бўлса керак-да. Бошқа кимнинг ҳам ҳадди сигарди бундай қилишга. Лекин зўр жанг бўлган кўринади. Анча мурда олиб чиқдик. Ҳаммаси бутунлай куйиб, факат суяклари қолибди, ҳисоб.

Вадим афсусланганча бошини чайқаб машина томонга кетаётганида унинг қўл телефони жиринглаб қолди. У телефон тугмачасини босиб, қулогига тутиши билан “Дев” лақаби билан машхур, шаҳарнинг жанубий туманларига эгалик қилувчи “авторитет”-нинг дўриллаган овози унинг қулоқ пардасини йиртиб юборай деди.

— Кулок керак, оғайни! — деди унга жавобан Вадим.

— Кулок керак бўлганида шу пайтгача ўлик-тириклигингни билдирар эдинг-да! — деди яна ўша дўриллаган овоз. — Семёнга қўшиб сениям тинчи-тиб кетишибдими, деб ўйлаган эдим.

— Тирик бўлганим учун овозимни эшитиб турибсан, — деди Вадим.

— Бориб кўргандирсан, — деди Дев.

— Кўрдим.

— Кимнинг бунга ҳадди сифибди?!

— Ҳайронман. Мен ҳам ҳозир шу ҳақда ўйлаётган эдим.

— Кўпчилик бу ишда сенинг қўлинг борлигини айтаяпти. Шунинг учун телефонларга жавоб бермасдан жуфтакни ростлаб қолганмишсан.

— Ким экан ўша итдан тарқаган? — дея бирдан сўкиб юборди Вадим.

— Ўзингни бос. Бунгаям ўзига яраша сабаблар бор. Яъни, сенинг у билан қадрдонлигинг.

— Бир одам иккинчиси билан қадрдон бўлса, дар-ров уни йўқ қиласди, шундайми? — деди Вадим алам билан.

— Унақа демоқчи эмасман. Ҳартугул, яқин бўлгансизлар. Мабодо бирон нимани келишолмай қолган бўлсанглар...

— Агар ҳозир даражанг бошқача бўлганда, онадан тугилганингга пушаймон бўлардинг, — деди Вадим Девнинг гапини бўлиб. — Эҳтимол, ўша гапни сен чиқаргандирсан. Ҳар қалай, Семён билан олди-берди қилганингдан тонмасанг керак. Ажабмаски, сизларнинг ораларингдан гап қочган бўлса...

— Шунақа деб ўйлайсанми?

— Ҳамма нарса деб ўйлашим мумкин.

— Аввал ҳам ит эдинг, шундайлигингча қолибсан. Майли, нима бўлсаям дўстинг учун таъзиямни қабул қил. Мен қидириб унинг хотинини тополмадим. Балки у ҳам аллақачон нариги дунёning жаннатида ке-

зид юргандир. Шу боисдан ҳам Семён учун рамзий қабр қилиб, мотам маросимини ўтказиб қўйиш лозим деб ўйлайман. Шундай қилмасак, чет эллик биродарларимизнинг кулгисига қоламиш.

— Ақлинг анча кириб қолибди. Ҳозир ўзимам шу ҳақда ўйлаётган эдим. Менимча, эртадан кейин ўтказак маъқул бўлар.

— Нима десанг шу, мен ҳамиша тайёрман. Кейин бошқаларга айтиб чиқишини ҳам зиммамга оламан. Чунки Семён қандай одам бўлишидан қатъий назар, бизга биродар эди. Унинг руҳи олдида бош эгишимиз шарт:

— Дев, девлик қилгин, тулкилик сенга сираям ярашмайди. Бўпти, мен шошиб турибман. Эртадан кейин қабристонда кўришамиз, соат ўн иккода, — дея Вадим телефонни ўчирди-да, сўкиниб қўйди ва машинага ўтириб, ҳайдовчига:

— Уйга ҳайда, — деб буюрди.

Уйда хотини Юля ҳам ярим соатга яқин сайдраб турди. Аввал бошда Вадим унинг гапларига эътибор бермади. Аммо хотини ҳадеб: “Мен сени ўйладим, сениям ўлдириб кетишибди, деган хаёлга бордим. Сениям душманларинг кўп-ку!” — деб бир гапни такрорлайвергач, шартта кулочкашлаб унинг юзига шапалоқ тортиб юборди. Шундан кейингина Юлянинг уни ўчиб, ўзининг хонасига чиқиб кетди.

Валим йигитларига яна Эдуардни олиб келишларини буюрди.

Эдуард бу сафар унга тузук-куруқ маслаҳат бермади. Девнинг гапини эса маъқуллади.

Иккаласининг ҳам хаёлида “Дев бекордан-бекорга мотам кунини ўтказишни таклиф қилмагандир”, деган ўй бор эди. Аммо иккаласи ҳам бу ҳақда бир-бирига айттиси келмади. Шундан кейин ичқилик-бозлик бўлди. Вадимни жуда кўп ўйлар ўз исканжасига олганлиги боис, у тезда маст бўлиб, ухлаб қолди. Шунинг учун Ўзбекистонга учиб кетадиган йигитларига қайтадан кўрсатмасини такрорлай олмади.

...Паша билан унинг яна бир шериги Вадимнинг одамларини аэропортда кутиб олиши ва вазият қана-қалигини уларга бирма-бир айтиб беришди. Шу куни улар меҳмонхонада тунашди. Эртасига эрталаб Рустамнинг ота-онаси яшайдиган вилоятга кетишли.

— Энди, — деди Вадимнинг Игор исмли йигити Паша ҳаммани тўплаганидан кейин, — бу ёғига бизнинг ўзимиз ишни давом этказаверамиз. Әнжела сенларни танийди. Шу боисдан меҳмонхонада тургандаринг маъқул. Ҳамма нарса ҳал бўлганидан кейин биз билан биргаликда Москвага қайтасанлар.

— Бизгаям озодлик бор экан-ку, — деди кулиб Паша.

— Ҳа, энди дам оласанлар! — шундай деган Игор кутилмаганда ёнидан ханжар чиқариб Пашанинг қорнига тиқиб олди.

— А-а-а!.. — дея Паша букчайиб қолди. Семённинг қолган учта йигити эса овоз чиқармайдиган тўппончадан отилган ўқдан бу дунё билан хайрлашиши. Бу пайтда вақт алламаҳал бўлиб қолган, бунинг устига, улар шаҳардан ташқарида, онда-сonda битта-яrimta машина ўтадиган кўчада эдилар. Шу боис қотилликдан ҳеч ким хабар топмади.

Иш якунига етганидан кейин Игор ва унинг шерикларида ер кавладиган бирорта асбоб бўлмаганигидан, мурдаларни йўл четига, очиқ далага ташлаб кетишга мажбур бўлиши.

Эртасига тушга яқин иккита болакай қўйларини боқиб юриб мурдаларни кўриб қолишли. Икковининг ҳам ранг-кути ўчиб, қўйларни ҳам ташлаб қишлоқ томонга ютуриши. Уйларига етиб борганидан кейин эса кўрганларини кўзлари косасидан чиқкудек бўлиб айтиб беришли.

Милиционерлар мурдаларни топганларидан кейин марказдан Рустам билан бирга келган милиция ходими ҳам тезда чақиртирилди. У жасадларга бирма-бир қараб чиқаркан, ҳақиқатан ҳам ўша куни Рустамларнинг қишлоғидан чиқишида машинага сую-

ниб сигарета чекиб турган йигитлар айнан шулар эканлигини айтди.

— Лекин улар учта эди, бу ерда эса түртта йигит ётибди, — деди у ҳайрон бўлиб.

— Балки биттаси ўша пайт машинанинг ичидаги бўлган-у, сизлар кўрмай ўтиб кетгандирсизлар. Майли, буниси муҳим эмас. Муҳими, ким уларни ўлдириб кетган? Ундан кейин Рустам бу ерга тансоқчилар билан келганми ёки фақат анави аёл унга ҳамроҳлик қиласяптими? Мана шуни аввал билиш керак, — деди бошқарма бошлиғи. — Мурдаларнинг ёнидан чиқсан паспортларга қараганда, булар россиялик. Қандай қилиб россиялик йигитлар Рустамнинг орқасидан эргашиб юришибди? Буям катта жумбоқ!..

— Рустамнинг ўзидан тансоқчилар билан келган келмаганлигини сўрамаймизми? — деб қолди марказдан келган “меҳмон”.

— Ҳа, фақат шуни сўраймиз. Бошқа нарсаларни ҳозирча билмай тургани маъкул. Нима бўлган тақдирдаям, биз нималар содир бўлаётганлигини билишимиз шарт.

Таржимон Рустамдан тансоқчиси бор-йўқлигини сўраганда, Рустам унга тикилиб турди-да:

— Йўқ, мен Анжела билан бирга келганман. Агар менинг номимдан биронта одам гапириб юрган бўлса, билингки, мен ўша одамни мутлақо танимайман, — деди ишонч билан.

Бу жавобдан кейин ички ишлар ходимларининг яна бошлари қотди. Энди уларни мурдаларнинг Рустамга алоқаси борми-йўқми, деган савол қийнаётганди.

Вадимнинг йигитлари Семённикидан фарқли ўлароқ, таксида юришган эдилар. Шу боисдан ҳам улар дарров кўзга ташланишмади.

— Ҳамма ёқни милиция босиб кетибди-ку, — деди Игор машина деразасидан ташқарига қараб кетаркан.

— Ҳа, — деди ҳайдовчи, — бир эмас, түртта йигитни ўлдириб кетишибди. Бечоралар россияликлар экан. Шунга ағдар-тұнтар бўлиб ётибди.

Игор орқа томонга бир қараб олди-да, кейин:

— Виталий, — деди пешонасини қашиб, — фотоаппаратни олдингми?

Унинг шериги бирдан вазиятни тушунди.

— Йўқ, эсимдан чиқибди, — деди атайлабдан.

— Ака, — деди ҳайдовчига Игор, — институтда шунақанги латта бола билан ўқиётганимга пушаймон еб юбораман баъзан. Сиздан илтимос, орқага қайтайлик, меҳмонхонага бориб фотоаппаратни олиб келмасак бўлмайди.

— Пул борми? — деди ҳайдовчи пинагини бузмай.

— Бор? — деди ҳайрон бўлиб Игор.

— Унда фотоаппарат деганлари ҳозир қаҳат эмас, исталган жойдан топиш мумкин.

— Ака, уни икки минг “кўки”гаям тополмайсиз. Японларники. Токиодан олиб келганман. Шунақа зўрки, — дея ўзининг фотоаппаратини мақтади Игор.

— Майли, шунақа бўлса, орқага қайтамиз, — деди ҳайдовчи.

Меҳмонхонанинг ёнига етиб боргандаридан кейин тўртала йигит ҳам машинадан тушиши. Игор ҳайдовчини овора қилганлари учун кира ҳақини икки баравар қилиб тўлаб, бугун кеч бўлиб қолганлигини, энди эртага саёҳатга чиқишиларини айтди. Ҳайдовчи “Менга барибир”, дегандай елкасини қисиб қўйди-да, пулни олиб, жўнаб кетди.

— Ковун туширибмиз, — деди ўзларининг хоналарига чиққанларидан кейин Игор. — “Мент”лар хитланиб қолибди. Энди Рустамнинг қишлоғига боришимиз қўлга тушишимиз билан баробар... Ҳозир кела-келгунча мен бир нарсани ўйлаб келдим. Шефга қўнғироқ қиласиз-да, Семённинг одамлари “ари”нинг уясини қўзғатиб қўйганлигини айтамиз. Шу билан бошимизга келадиган балодан қутулиб қоламиз. Агар рост гапни айтадиган бўлсак, тўрталамизнинг ҳам калламиз кетиши аниқ.

Унинг гапи ҳаммага маъқул тушди. Зеро, ҳамманинг хаёлида чигалликдан қандай чиқиш мумкин, деган ўй бор эди.

— Семённинг одамлари ўзига ўхшаган-да, — деди Вадим Игордан тафсилотларни эшигтгач. — Энди аэропортдан хабар олиб туринглар. Рустам барибир узоқ вақт қишлоғида туролмайди. Унинг Америкада қиласидиган ишлари кўп. У ўтирган самолётта сенларам чиқасанлар-да, ҳамма ишни Америкада ҳал қиласанлар. У ёқда бундай ишларни қилиш осонроқ кўчади.

Игор иш осонлашганлигини эшитиб хурсанд бўлиб кетганидан шерикларига қараб илжайиб қўйди.

Кампир чолининг худойиси ўтганидан кейин Равшанни ёнига чақирди-да:

— Анави чулчитдан сўраб бил-чи, ўзи билан юрган ўрис хотини унга ким бўларкан? — деди.

— Чулчитингиз ким, эна? — деди ҳайрон бўлган Равшан.

— Шуниям билмайсанма, уканг-да. Ҳеч балога тушумайдиган одамди чулчит дейди. Ҳали билмайман, қандай қип уни одам қилиб оламиз... Агар хотини бўлса, отангнинг қирқи ўтганидан кейин элга билдирув қип қўяйлик. Тўй қиламиз деса кўнма. Отамнинг йили ўтмай туриб, бу уйда танғир-тунғир бўлмайди, дегин.

Укасининг кўрсатган муруввати туфайли бир қоп пулни орқалаб кўргач, фоз юришни одат қилиб олган Равшан ёлғиз ўзи оғилхона томонда у ёқдан-бу ёққа хаёл суриб бориб-келаётган Рустамнинг олдига борди-да, укасининг ўзбек тилини билмаслигини ҳам унутиб, энасининг гапларини унга айтди. Рустам акасига жилмайиб қараган кўйи елкасини қисди.

— Оббо, — деди Равшан бошини қашлаб, — энам айтганича бор-да, чулчитдан фарқинг йўқ.

У таржимон иш билан қаёққадир кетганлиги сабабли хотинлари билан бирга ўтирган Анжеланинг

ёнига борди. У ерда ҳам асосан иккала овсин ўзаро гаплашишар, Анжела уларнинг ҳеч бир сўзига тушунмасдан гоҳ унисининг, гоҳ бунисининг оғзига анграйиб ўтиради. Равшанинг армияга бориб келгани фойда бериб, чала-чулла русча гапириб, Рустамга ким бўлишини жувоннинг ўзидан сўради. Анжела унинг гапидан кейин қизариб кетди ва бу ҳақда яхшиси Рустамнинг ўзидан сўраш кераклигини айтди.

— Унингга ҳеч балони тушунтириб бўлмаяпти, юр, ўзинг сўраб бер, — деди Равшан.

Акасининг саволи Рустамни ўйлантириб қўйди. Хотиниммас, деса, Анжела у билан куну тун бирга. Бунинг устига, ундан ҳомиласи ҳам бор. Хотиним дейдиган бўлса, буям ҳақиқатдан йироқ. Шу боисдан у бироз муддат ер чизиб турди-да, кейин умид билан унинг кўзига тикилиб турган Анжелага:

— Акамга айт, сен менинг хотиним бўласан, — деди.

Бундай хушхабарни эшитган Анжеланинг кўзидан ёш сизиб чиқди ва Равшанинг борлигига эътибор ҳам қилмасдан Рустамнинг бўйнига осилиб олиб, унинг лабидан ўпди. Буни кўрган Равшан бирдан ерга қаради. Нарироқда уларни кузатиб турган кампир:

— Ҳаҳ, бетингдан бузилгур, — дея Анжелани қарғади.

Яхшигина томошага гувоҳ бўлган овсинлар эса бирдан кулиб юборишиб, бир-бирига қарашли.

— Унда айт эрингга, — деди Равшан ерга қараганча гапириб, — отамнинг қирқи ўтганидан кейин кўй-пўй сўйиб элнинг олдидан ўтиб кўямиз.

Гарчи Равшанинг сўзлари русчанинг бузилган шаклида талаффуз қилинган бўлса-да, Анжела ҳеч балони тушунмади. Зеро, у қўй сўйиб элнинг олдидан ўтиш нима эканлигини тасаввур ҳам қилолмас эди.

Кечга бориб уларнинг уйлари яна гавжумлашли.

Оқсоқол, серқатнов бўлиб қолган ҳокимият вакили, таржимон келишиди. Тўрт-беш милиционер эса уларнинг уйлари тўғрисида, кўча четида туришди. Айнан кўчада турган милиционерлар Рустамнинг кўнглига яна бир марта гулгула солди. Унинг кўнгли бу ердаям худди Россиядагидек нималардир содир бўлаётганини сезар эди. Келгувчилар унчалик кўп ўтиришмади. Икки соатлар у ёқ-бу ёқдан гаплашиб туришган бўлишида-да, бир косадан шўрва ичишиб, таржимонни қолдиришганча қайтиб кетишиди. Шундан кейин Рустам Анжелага кўнглидан кечётган ўйларни айтди.

— Эҳтимол, шунаقا воқеалар содир бўлаётгандир ҳам, мен бу ёққа келаёттанимизда, меҳмонхона ёнида бизни кузатиб турган Семённинг йигитларини кўргандай бўлувдим. Балки уларни бу ернинг милиционерлари сезиб қолишгандир. Шунинг учун биздан тез-тез хабар олиб туришгандир, — деди Анжела ўзига эр деб ҳисоблай бошлаган одамнинг кўзига тик қараб.

— Менинг кетгим келаяпти, Анжела, — деди Рустам кутилмаганда. — Бу ерда кўпроқ қоладиган бўлсам, қариндошларимни ҳам ташвишга солиб кўяман. Энг яхши йўл тезроқ Америкага кетиш. У ерда ҳам ишларим қалашиб қолган.

— Менимчаям, шундай қилсанг тўғрироқ бўлади. Мана, қариндошларингни топиб олдинг. Энди истаган пайтда келиб кетишинг мумкин.

Эртасига эрталаб Рустам таржимон орқали ўзининг мақсадини акасига айтди. Унинг гапини эшишиб Равшаннинг капалаги учуб кетди.

— Бунинг калласи айниб қолганми? Нималар деяпти ўзича? Шунча вақт изғиб юргани етмайдими? Ҳеч қаерга бормайсан! Бир йўқолиб отамдан айирдинг, энди бизларга энаниям ортиқча қилиб қўймоқчимисан?! — бақирди у.

Рустам унга тезда қайтиб келишини, вақтинчалик Америкага бориб келмаса бўлмаслигини тушунти-

ришга уринди. Аммо фойдаси бўлмади. Шундан кейин у таржимон билан бирга энасининг ёнига борди. Эна ақаданам ошиб тушди:

— Пишириб қўйибдими сенга у ёқда?! Кетсанг сени оқ қиласман! — дея бақириб берди у ўғлига.

Рустам нима деярини билмай қолди ва қизариб-бўзариб нари кетди. Туш пайтида улардан хабар олгани келган оқсоқол Рустамнинг қовоқ-тумшуғи осилиб юрганлиги сабабини таржимондан сўраганида, у бўлиб ўтган гапларни гапириб берди. Кўпни кўрган, катта-кичик билан доим алоқада юрган оқсоқол талай муддат ўйланиб қолди, сўнг сўрининг устида ўғлидан баттар ғамга кўмилиб ўтирган кампирнинг олдига борди-да, гапни узоқдан бошлаб, аввал кампирни эритиб олгач, Рустамни яна бирозгинага қўйиб юбормаса бўлмаслигини, ўғли бориб уч-тўртта туманинни бемалол сотиб олишга етадиган пулни олиб келиши лозимлигини айтди. Кампир дарровда унинг гапига кўнмади. Ўғлини яна йўқотиб қўйишдан чўчиётганини айтиб йиглади. Оқсоқол ҳеч ҳоли-жонига қўявермагач, ноилож кўнди.

Яна роппа-роса бир ҳафта туғилган қишлоғининг ҳавосидан нафас олган Рустам аэропортга борди. Бу ерда эса уни Вадимнинг одамлари кутиб туришар эди. Улар ҳам Рустам учадиган самолётга чипта олишли. Лекин ҳаммаси эмас, фақат иккитаси. Қолган иккитасига чипта етмади. Улар қанчалик ҳараткат қилишмасин, барибир чипта олишнинг эпини қилишолмади.

* * *

Семённинг мотам маросимини ўтказаётган маҳал Вадим қўриқчилар сонини кўпайтирди. Улар ҳар битта келган авторитет ва уларнинг одамларини кўз узмасдан кузатишли. Ҳартугул, ҳеч ким Вадимга ёмонлик тиламаган экан. Маросим якунига етганидан кейин ҳар ким ўз “ини”га кетди. Шундан кейингина бироз нафасини ростлаган Вадим Ўзбекис-

тон билан боғланиб, яна бир марта вазиятни аниклаштириб олди.

Унга Рустамнинг Америкага учганлиги ҳақидағи хабар келиши билан ҳар әхтимолға қарши Москвадан Нью-Йоркга яна иккита йигитини жүнатди.

Рустам Америкага етиб борганидан кейин ўзини анча әркин ҳис этди ва ишига шүнғиб кетди. Анжела эса кун бүйи уйда ўтирап, тобора каттариб бораёттган қорнини қувонч билан силаб қўяр эди.

Орадан саккиз кун ўтганидан кейин Анжела ҳовлида сайр қилиб юрганида хизматкорлардан бири уни кимдир йўқлаб келганлигини айтиб қолди. Жувон аввалига ҳайрон бўлди. Чунки уни бу ерда сўраб келиши мумкин бўлган таниши йўқ эди. “Балки Рустам биронта одамни менинг ёнимга иш билан жўнатгандир”, — деган уйда жувон хизматкорига меҳмонни бошлаб келишни буюрди.

Жигарранг костюм-шим кийган, кенг елкали, сочи калта олинган йигит Анжелага яқинлашиб келди-да:

— Хоним зерикмаяптиларми? — деди соф рус тилида. — Сизга Семёндан салом. У сизни тезда ўзининг ёнига етказишимни сўраган.

— Ним-ма?! — деди ҳайратдан қотиб қолган Анжела.

— Ўтганларнинг васияти албатта ижро бўлиши шарт, — дея йигит ёнидан тўппонча чиқарди-да, Анжеланинг қорнига тўғрилаб, тепкини уч марта босди...

Қотил узоқقا қочиб кетолмади. Рустамнинг тансоқчилари уни ҳовлидан чиқиш жойида отиб ташлашди.

Йигирма дақиқа ичиде уйига етиб келган Рустам Анжелани кучганча юм-юм йиғлар эди...

Рустам Анжелага қаттиқ боғланиб қолганлигини уни дағн қилишганидан кейин билди. Юрса ҳам, турса ҳам у хаёлидан кетмас эди. Устига-устақ, уйидаги ҳамма нарсалар уни эслатарди. Шу боис, у ичкилилкка ружу қўиди. Эрта тонгдан кетма-кет икки

қадаҳ ароқ ичар, сүнг Анжелани эслаб кўз ёш тўка бошларди. “Сен менга меросхўр туғиб беришинг кепрак эди. Лекин, нега сенга умид боғлаганимда кетиб қолдинг?” — дея бўзларди у ич-ицидан эзилиб.

Бир ой шу алпозда ўтганидан сүнг, болалигидан қадрдон дўсти Френк чидаб тура олмади.

— Нимага бунча мотам тутасан? Бас қил! Ўзингни кўлга ол! — дея бақирди у.

— Сен билмайсан-да, Анжела менга...

— Нима бўлган тақдирдаям!.. — дея Рустамни гапиртиришга йўл қўймади у.

— Ахир қандай қилиб?! Мен ундан оқила аёлни энди қаердан топаман!?

— Шу гапни сен айтаяпсанми? Сени таниёлмай қолаяпман. Эсингдами, менга доим: “Ўзимнинг миллатимдаги қизга уйланаман”, дердинг...

— У пайтда Анжела йўқ эди.

— Ҳозир ҳам йўқ.

— Бўлди, гапирма! — дея Рустам бақириб юбориб шишага қўл узатган эди, дўсти ароқни олиб, полга зарб билан урди, шиша чил-чил бўлиб кетди. Алами келган Рустам хизматкорга бошқасини олиб келишни буюрди. Аммо унинг гапи бу сафар ўтмади. Тўғрироғи, хизматкорларни Френк йўлдан қайтарди. Шундан кейин Рустам сочини фижимлаганча бошини эгди.

Шу куни амал-тақал қилиб ухлаб, саҳарлабдан уйғонган Рустам деразадан узоқ-узоқларга термилганча бир соатга яқин турди. Сўнг миясига гаройиб фикр келиб, чўмилиш хонасига кирди ҳамда шошилмасдан анча вақт сувнинг ичидаги ётди.

У ювиниб чиққанида, Френк илжайганча уни кутиб турарди.

— Кўрқма, — деди Рустам ҳам унга жилмайиб қараб, — ичганим йўқ. Умуман, ичиш ниятим ҳам йўқ. Биласанми, хаёлимга нима келди?

— Гапир, эшитаман, — деди қоравой Рустамнинг бир кечада яхши томонга ўзгарганидан хурсанд бўлиб.

— Ўзбекистонга кетаман. Яқинларим билан кўришиб келай. Шунда зора ўзимга келсам.

— Бу гапинг ҳақиқатан ҳам ўзингга келганингни билдириб турибди. Фақат бу сафар бир ўзинг кетмайсан. Менам сенга қўшилиб бораман. Оиланг билан танишмоқчиман.

— Улар сени кўришса, хурсанд бўлишига аминман, — деди Рустам дипломатларча гапириб.

— Унда мен аэропортта қўнғироқ қилиб, чилтага буюртма берай, сен нонушта қилиб тур, — деда Френк илдам қадамлар билан эшик томонга йўналди.

Бироқ улар ортиқча шошилишган эди. Самолёт фақат тушдан кейин бўларкан. “Бунисиям яхши бўлди. Унгача ишхонага бориб, баъзи ишларни кўриб чиқаман”, деда хаёлидан ўтказди Рустам.

Рустам ҳам, унинг дўсти Френк ҳам аввалгига нисбатан анча пишиқ бўлиб қолишганди. Улар аэропортга боришлиридан олдин бешта тансоқчини ўёққа юборишиди. Ўзларини иккита машина кузатиб борди. Миясида эртароқ Ўзбекистонга етиб бориш ўйи маҳкам ўрнашиб олган Рустам, нақ бошига тўғриланган тўппончанинг икки сонияда ишга тушишини билмасди. Аммо тансоқчилар Вадимнинг икки йигитини ҳам сезиб қолишиди. Қасд қилганлардан тўппончасини Рустамга биринчи бўлиб тўғрилагани қўлини олдинга чўзиб профессионал отувчилигининг обрўсини тушириб қўйган эди. Эҳтимолки, унинг ўрнида бошқа бўлганида ҳам шундай қиласарди. Чунки Рустамни қидиравериш, Вадимнинг сўкишларини, дўқ-пўписаларини эшитавериш уларнинг жонига тегиб кетган, биринчи имкониятданоқ ўлжани саранжомлаб, бу ерлардан жуфтакни ростлаб қолиш фикри уларнинг миясига ўрнашиб қолганди.

Тансоқчи Рустамни уриб юбориб, пастга қулатди. Ўзи ҳам унинг устига йиқилди. Шу пайт тўппончанинг варанглаган овози эшитилди. Ҳаммаёқ тўс-тўполон бўлиб кетди. Кимдир қочаман деб йиқилган, кимдир бақирган, полициячилар ҳам югуриб қолиш

ганди. Рустамни “овламоқчи” бўлганлар эса қочишга тушишган эди. Аммо улар узоқча боришолмади. Аэропорт эшиги ёнида тансоқчилар томонидан қўлга олинди.

* * *

Вадим Америкадан хабар келмай қолганидан кейин алам билан муштини туғиб у ёқдан-бу ёқда бориб келди. Сўнг қўл телефонини олиб, Эдуарднинг рақамини терди. Аммо унинг телефони ўчирилган эди. “Падарингга лаънат, жуҳуд!” — дея қичқирди у ва йигитларидан бирини чақириб, тезда Эдуардни топиб келишни буюрди. Сўнг ўзи шкафдан конъяк шишасини олиб, қадаҳга тўлатиб қўйди-да, бир кўтаришда бўшатди. Сигарета чекди. Бироқ ички ғам уни барибир ўз ҳолига қўймади. Шундан кейин сигаретасини ўчиришни ҳам унутиб, полга отиб юборди-да, ташқарига чиқди. Ва ўзининг уйига қарама-қарши бўлган баланд бинонинг тепасида қандайдир шарпа юрганлигини кўриб, шу томонга қараганча бироз туриб қолди. Шарпанинг нега у ерда турганлигини англаб етганида эса кеч бўлган эди. Снайпер унинг иккӣ қоши ўртасини аниқ нишонга олиб, телкини босди...

* * *

— Семён обрўли одам эди. Хор бўлиши мумкин эмасди. Лекин Вадим номардлик қилиб, уни ўлдирди. Оқибатда, биз унга уруш эълон қилишга мажбур бўлдик. Лекин нима бўлгандаям унинг ҳурматини жойига қўйиб кўмишимиз керак. Қани, дўстларим, ўтганларнинг хотираси учун ичайлик, — дея ўрнидан турди Дев ва ўзининг қадаҳидаги ароқни бир кўтаришда бўшатди.

Шунинг билан “миллиардер ови” ниҳоясига етди. Чунки Дев Рустам тўғрисида умуман ҳеч нарса билмас эди.

* * *

— Ўзимнинг гадой болам, — деди кампир боласининг юз-кўзидан ўпар экан, — мен сени яна бир-

икки йилга санқигани кетди, деб ўйловдим. Ҳар қалай, энангни эсингдан чиқармабсан.

Рустам онаси билан күришиб бўлганидан кейин Френкни кўрсатиб:

— Бу менинг болаликдан қадрдон дўстим, — деди.

Таржимондан ўғли нима деганигини тушуниб олган кампир:

— Бунча қора бўмаса бу, — деди афтини буриштириб, — ўзиям негрга ўхшайди.

Таржимон кампирнинг гапларини силлиқлаб инглизчага ўғирди. Шундаям мазмун-маънони ўзгартиролмади. Рустамга қўшилиб ўзи билан бирга келган учта тансоқчи-ю, Френк ҳам бу гапни эшитиб кулиб юборишиди.

— Ўзи қора бўлсаям, кўнгли оппоқ, — деди Рустам энасига қараб. Таржимон орқали боласи билан гаплашишга ўрганиб қолган кампир дарров “даллол”га қаради. Ундан ўғлининг гапининг ўзбекчасини эшитгач:

— Болам, тиркавичсиз бир жойга боралмайсанма, дейман? Илгари бир чулчит билан келувдинг. Энди жўрангдан бошқа яна учтасини етаклаб олибсан. Яна шу чулчитинг билан келаверсанг бўмасмиди, унга анча ўрганиб қолувдик, — деди.

— Чулчит деб кимни айтаяпсиз, хола? — дея сўради таржимон кампирга тиржайиб қараб.

— Ўтган марта келувди-ку, битта аял билан, — деди кампир пешонасининг ажинларини баттар кўпайтириб.

Рустам таржимондан гап Анжела ҳақида кетаёт-ганлигини билганидан кейин бошини эгиб, бироз жим бўлиб қолди, сўнг:

— У энди йўқ. У ўлди... — деди пичирлаб.

— Эй, бечора, жойи жаннатдан бўсин. Истаралигина хотин эди... Сен кўп қайғурма, дарахтни силкитсанг қиз ёғилади ҳозир. Ўзим сени қишлоғимизди энг олди қизига уйлантириб қўяман. Ўзиям сен келиб кеттанингдан кейин қизи борларнинг ҳамма-

си афсусланиб қолиши. “Агар хотини бўмаганда қизимни берардим”, деб.

Шундай дея кампир укасининг ёнида илжайиб турган Равшанга қаради-да:

— Бор, хотинингга айт. Анави куни мендан бес-йоров талтайиб оберган кўйлагингни кийсин, Мамаражабди қизига борамиз, ўзиям уни қизи бирам қиз бўган, ўнинчини битириб, оқи оқقا, қизили қизилга айрилиб турибди, — деди.

— Эна, — деди Равшан бирдан қовоқ-тумшуғи осилиб, — Рустам йўлдан чарчаб келган, аввал бунга чой-пой қиласлик, ундан кейин борарсиз шу Мамаражаб аканикига.

— Буни биламан, кегандан кетаманга тушади. Сен бўлса, менга ақл ўргатмасдан бориб хотинингга айт, тез бўсин. Ўзи охирги пайтларда унингам тоза таннозлашиб қолган.

Равшан ноилож ўрнидан турди. Таржимондан акаси билан онаси нима деганилигини билиб олган Рустам:

— Ҳали бироз эрта-ку. Бунинг устига, мен у қиз билан таниш эмасман. Аввал танишай, беш-олти кун гаплашиб юрай. Агар бир-биримизни ёқтириб қолсак, ундан кейин уйланарман, — деди бироз хижолат тортиб. Таржимон бу ернинг одати тўғрисида унга тушунтириб ўтирасдан, унинг гапларини тўғридан-тўғри онасига таржима қилиб берди.

— Вой ўлмасам, вой шарманда! Сенда уят-пуят деган нарсадан борми, болам? Ўзи олдинги келганингда чулчит билан қучоқлашиб юрганингни кўриб, ерга кириб кетай девдим. Танишишмиш, яна бирга юриб кўраймиш, ҳе, бетингдан олсин сени! — деди кампир жаҳл билан, кейин катта ўғлига қараб: — Равшан, сен ўзинг буларга чой-пой қип тур. Биз тез бориб келамиз. Ҳа, уканғга айт, мошинни ўнғайласин. Буни мошинида борсак, Мамаражаб типиричи-лаб қолади.

Кампир кеттанидан кейин тансоқчилар-у Френк ажабланди.

— Шунақасиям бўладими? — деди Френк.

— Бўларкан-да, — деди Рустам қўлларини икки ёнга ёзиб.

Кампир биринчи сафар ишни пишириб келмаган эса-да, кейинги боришида Мамаражаб аканинг розилигини олиб келди. Рустамнинг кўнгли бироз таскин топди. У бу таскинни уйланаётганидан эмас, балки яқинларининг орасида эканлигидан деб билар эди.

У қизни фақат тўй куни кўрди. Кўрди-ю, унга тикилиб қолди. Лола (келинчакнинг исми) шунаقا гўзал эдики, шунаقا ибо билан бош эгиб турар эдики, Рустамни ҳаяжон босди.

Тўйдан сўнг бир ҳафта ўтгач, Рустам кетиш тайёртарлигини кўра бошлади. Кампир аввал бунга қаршилик қилиб турган эса-да, кейин ноилож рози бўлди.

Рустам самолётда Лоланинг елкасига бошини кўйди. Оппоқ юзи бироз қизарган келинчак уялганидан кўзини ерга тикди.



Адабий-бадиий нашр

Ўзбек тилида

Нуридин ИСМОИЛОВ

МИЛЛИАРДЕРГА ҚЎЙИЛГАН ТУЗОҚ

Саргузашт-детектив роман

Мұхаррір Нормурод Нарзуллаев

Дизайнер Сергей Бауэр

Техник мұхаррір Зокиржон Алибеков

Мусаттақ Отабек Сафаров

СаҳифаловчиFaфуржон Мадалов

ИБW 3968

Босишига 20:01.2006 йилда рухсат этилди.
Бичими 84x108 1/32. Босма табоби 12. Адади 5000.
Жи сонли буюртма. Нархи шартнома асосида.

«Ношир» масъулияти чекланган жамияти.
Манзил: Тошкент, Навоий кўчасидаги савдо раастаси,
пастки қатор.

